

呂留良等選編

宋

詩

鈔

(二)







書叢本基學國

鈔 詩 宋

(二)

選收自吳 振之吳 良留呂

校龔宣李



行發館書印務商







786  
24  
西塘詩鈔

鄭俠字介夫。福清人。第進士。調光州司法參軍。秩滿入都。見安石言新法非便。安石不悅。使監安上門。會久旱。俠繪門上所見流民困苦圖。發馬遞投銀臺進之。神宗覽圖。噓唏罷新法。浹日大雨。用事者爭置俠擅發馬遞之罪。編管汀州。改英州。哲宗立。放還。除泉州錄事參軍。元符復。送英州。建中靖國放還。復前職。崇寧監衡山廟。旋追毀前命。勒停五年。降告復將仕郎。敍用。俠遂不復出。在英時號大慶居士。還鄉所存唯一拂。故又號一拂居士。宣和元年。忽夢鐵冠道士遺之詩。視之乃子瞻也。嘆曰。吾將逝矣。作詩云。似此平生只藉天。勝如過鳥在雲煙。如今身畔無餘物。贏得虛堂一枕眠。授孫而卒。年七十九。嘉定中諡曰介。俠少苦學。其古詩疎朴老直。有次山東野之風。不得以當行格調律之。

謝太守答詩萊州

閑齋掩畫屏。疎竹間風韻。兀坐無所爲。仰高方苦峻。關關兩喜鵲。如以捷來獻。疑其喜過常。精爽抑何頓。謂當有嘉賓。結駟問原憲。不然親交書。萬里來問訊。何意二千石。新書爛盈卷。使者入衡門。紅光十餘仞。衣冠出蓬室。再拜望城闔。開緘列宿動。芒角相輝煥。捧讀未終篇。欽降已三歎。譬如涉春波。渺不知涯岸。又若驚雷霆。但覺目眩轉。誰言匹夫窮。陋巷一簞飯。篋有無價珍。貴于青玉案。昨者鄙俚辭。惟求指瑕疊。



敢期明月珠。傾寫殊不恪。重重借褒譽。許與良過分。酷愛愚且直。還憐貧且困。惟人最難知。聖哲其猶恨。自非明如日。安得物無遁。程孔昔中途。邂逅適所願。傾蓋畢所懷。日西不知倦。聖賢欣道合。萬古直一瞬。淒涼千載餘。此道誰復振。未聞似今日。曾不拜公面。顧遇過所親。思知久彌浚。重念樗散材。平生慕忠順。青衫百僚末。言責固所道。若其愛君心。豈以爵祿辨。謂宜爲民上。必與同喜慍。謂宜食君祿。寧當復私狗。刀斧且滿前。斯誠豈磨磷。千載幸一時。岩廊拱堯舜。夔皋豈無人。共絲偶未竄。眷委一失真。聰明不無亂。出令以便民。動皆爲深患。疲羸死飢凍。重負遭囚絆。奔逃苟自活。父子潛分散。以天征不義。如以雨蘇旱。簞食迎王師。東征西夷怨。未聞百萬師。戈鋌日持玩。南取十數洞。西開五六郡。府庫爲一空。白骨成龍斷。大臣弄權柄。生殺在顧盼。威福不有歸。佞邪尙何憚。公忠獲罪咎。正直招訶譴。幽悲鬱不伸。變異以頻見。陰陽爲之沴。淫潦仍乾嘆。方且頌太平。長歌事賡贊。天子九重門。深居拱閒燕。人人懷欺匿。比周相引荐。以俠觀此時。綱維一何紊。滔滔恐皆溺。心竊擬手援。是以屢上章。指陳幾欲遍。初雖蒙嘉納。終不離讒間。棄逐來窮陬。星霜雨經閏。簪紳滿朝著。大半嗟排擯。誰爲憫窮褐。粟帛推餘羨。誰爲念孤獨。齒牙借餘論。重傷棄逐久。不敢略自辯。高堂有單親。日久庭闈戀。同時得罪人。一赦皆從便。惟茲尙遠斥。不許歸寧覲。擬扣閭闔門。明颺紫宸殿。恨無可言路。勇決固所斷。嗟嗟道云亡。丈夫兒女懦。勢利同險巖。風雲借餘便。誰非顧金錢。誰非思達宦。孳孳顧理義。惻惻念寒峻。如公今幾人。百世紹休聞。



觀孔義甫與謝致仕詩有感

人生足清閑。天下第一福。惜哉聲與利。舉世方逐逐。君子耀軒裳。小人腴口腹。霜雪滿頤頰。馳競心更速。誰如東山後。清風千載續。仁孝實天成。聰明乃幾燭。弱冠揖高科。聲華光煜煜。騏驥駕夷途。千里在舉足。歲未再周天。官先上應宿。皇華屢更指。間請分符竹。端介奉高明。慈仁撫熒獨。施設妙通神。歡謳道相屬。一日遽上章。幡然謝羈束。古人涖官政。五十曰艾服。公年未五十。懇請竟從欲。緬彼伋與軻。進退遺佳躅。三揖就恩榮。一辭託巖谷。由公仕以觀。其庶無愧慙。東皋我田園。負郭予室屋。兒姪幾百人。圖史逾千軸。親舊既周旋。閨門更雍穆。賓來酒一樽。與來碁一局。吟嘯動煙雲。詩書到僮僕。寧知地有仙。但見人如玉。乃覺世間人。爲生何局促。譬如方污垢。對之獨薰沐。孔公當代賢。宜其欽愛酷。慷慨出長篇。情殷語重複。日日動歸思。浩浩見林麓。何意蒙鄙人。幸茲一觀矚。當筵頓忘味。如聽簫韶曲。平生粗意氣。自初得書讀。每見古聖賢。心常自程督。知身是罪根。每每自鉏斲。如彼善稼穡。去草茂嘉穀。深嘉遠世網。有若囚脫梏。惟茲素艱貧。事與心反覆。歷官二紀周。一紀投南隩。歸時異去時。聖主恩霏霏。方欣到家鄉。足覺愁慮簇。高堂皓垂白。甘旨不饒沃。四弟兩背亡。未言他骨肉。繼又喪一弟。三房等窮蹙。不數姆與婢。孤孀十有六。薄業支半年。一飯猶五菽。蕭然夏秋際。甚者日食粥。人惟有父子。恩親家室睦。惟知有君臣。禮義朝廷肅。二者苟有違。三靈共誅戮。况茲生聖辰。熙隆遇堯譽。艱虞免兵革。少小遊庠塾。青春被恩擢。名姓粗揚暴。



孰非累聖德。師誨而君牧。中間更狂妄。天聽常輕瀆。云云不少已。竟致御史鞫。所負鼎鑊輕。敢意尙收錄。日月忽中天。湛恩我濯浴。父子實再逢。君臣亦敦復。新恩胡爲報。舊過云何贖。父母教子勤。羽括而礪鏃。朝夕望乃成。榮顯被親屬。慈烏於反哺。知以報生鞠。學術不寸施。猶之玉韞匱。千載遘明良。不能少負幅。是生天地間。曾不如草木。以此望明公。雲中一鴻鵠。

臘月十八日呈子京

歲去如奔馬。殘日十有三。姪爲當嫁女。甥是未婚男。叢然猥俗併。殊非力所堪。嗟予本支離。塵事素不參。東牀書一架。西榻經一函。如是歲月深。吻舌如滕緘。惟有陶淵明。常欲共清談。牀頭酒盈壺。亦欲同醺酣。二十一二間。煩事如掃芟。期使堂下空。宴笑同所耽。清樽酌宜深。古語交嶄岩。夜久燈熒熒。金波忽東南。歲宴獨優游。庶幾爲不凡。

示潮州吳宅三甥

大郎性純淑。至寶受磨琢。二郎姿秀美。白璧光閃爍。三郎神照藏。宛若雛在殼。五彩翔鳳翰。參差見斑駁。三人吾令甥。亦嘗從吾學。昊穹有顯通。報應無舛錯。未有祖慶厚。而招子孫薄。二親又善教。曾不閑飲啄。甥雖多似舅。三子自超卓。爲文要根理。覽古務詳博。不惟子三人。萬世同矩矱。慎勿學舅癡。直指世奸惡。心雖在規益。世誰受忠諤。立身旣不危。青雲在拏攫。



示女子

吾生鮮兒女。汝次今居首。柔惠少語言。天性非矯揉。女生必有適。二親非終守。既嫁又他州。安能長相就。幸然汝夫賢。純淑真汝偶。出門天其夫。禮律其來久。汝姑吾之妹。姑夫爲汝舅。事舅如事父。事姑如事母。三者無所闕。汝則無大咎。門內有尊親。門外有親友。歲時或餽助。祭祀合奔走。一一無間言。乃可逃父醜。治家在勤儉。臨財戒多取。誦經味其理。聖心良可究。卽事念慈和。無但勞吻味。善看育與蟾。二子吾珠鍔。汝嫁旣違鄉。吾遷又遠趣。東去十八程。西來二十九。三四千里間。吾視堂猶牖。人生否與泰。正若夜隨晝。但當道無虧。不媿載與覆。憶昨汝初生。時吾心有負。以爲臣事君。卽是子事父。閨門有危難。誰不在惇疚。推其愛父心。誰不得前剖。幸爲男兒身。許國自結綬。安能冷眼看。終不一開口。封章重十上。夫豈避鼎斧。南州雖譴逐。萬死蒙恩宥。行行出國門。母馬吾徒步。汝生未三月。正當時裸乳。雪片落鵝毛。霜簷懸凍溜。汝母斂汝身。寒風裂雙肘。驅馳僅逾時。粗糲不敢吐。殘春到貶所。歲卯俄及丑。汝時年十二。稍稍近針縷。是歲真龍躍。重明登九五。湛恩被遐荒。漸漬到枯朽。拜命走親庭。便道從海浦。旣見汝姑賢。汝乃吳氏婦。我乃緣他人。譴斥循其舊。人皆念再逐。道路或攢皺。我以臣子心。等視如榮授。人生無患難。憤勵亦何有。况茲尋前道。復見迎賢堠。旬月得相聚。天與幸誠厚。君命不可緩。病已斯馳驟。南北出靡常。惟祈各寧壽。舉足念其身。行幽如白晝。又當夙夜間。警戒其君子。神靈依正直。惟仁孝是祐。書信或往來。知汝無病苦。



爲婦洎爲母。皆不處人後。定當舉家歡。相慶酌大斗。勝彼淚滂沱。臨期一盃缶。

六環助潮士鍾平仲納官輒辭贈以詩

揭陽繁富州。鍾子處城閉。怡然保清操。不與世俗換。豪家富廩庾。鼠雀嫌陳爛。鍾子無田園。糾糴供哺旦。甲第闢公門。奴僮立如雁。鍾子無使令。其子供饋盥。無妻備組紉。無婢奉炊爨。市屋十數椽。廩商是隣畔。暝陰滋蠹蝕。飛屑落几案。炎蒸鬱不通。揮扇尙流汗。絃誦不輟音。學海窮瀾漫。文章有星斗。胸臆藏璀璨。何殊盛衣冠。而坐於塗炭。下藥百十包。蟲腐皆逾半。經年無人顧。蛛網潛滋蔓。苦李十數株。採摘亦素幹。此外乃一無。兒女不蔽肝。固非人所堪。隨分亦侃侃。何意官物租。添輸告踰貫。太守爲學校。芹茆思樂泮。買田垂萬年。供給期無岸。誰人不樂輸。我獨無計辦。此時私愁憂。幾至方寸亂。我身困長途。脫身自投竄。聞此心惻然。不覺潛浩歎。六環聊助君。鷺股難廣獻。聊欲分子憂。使免頻勾喚。知子謂子貧。不知謂矜慢。斯則朋遊愆。此時那可斷。子猶重辭讓。揖拜如戰汗。急取慎勿辭。六環如六萬。

再到吳子野歲寒堂

再到歲寒堂。仍登歲寒閣。閣上與堂前。物物皆如昨。鐵幹偃虬龍。雲峯自巖壑。文章有神力。壁笥光彩錯。主人歲寒翁。古意何淡薄。山肴具樽酒。忻喜爲我酌。高論寫胞懷。千弩射鯨鱷。速悟有寶龜。靈通非火灼。辯議恣酬答。亦以資笑謔。想翁賓去後。前局徐徐鑰。萬卷羅目前。舒卷良自若。盛暑一榻風。祁寒一爐藥。



翛然去與來。一箇無住着。我亦淡泊人。世味聊咀嚼。無種不取嘗。畢竟何美惡。但聞歲寒風。便覺世齷齪。今茲翁如龍。看彼皆尺蠖。今茲翁如鴻。視彼皆龍縛。故願歲寒翁。高收歲寒腳。踞坐百千年。看春華秋落。無令木石心。長笑人脆弱。

### 古交行

大海有時竭。此心瀝不乾。厚地有時坼。此心無裂文。持此以相照。百鍊青銅昏。用此以相惠。貝璧黃金盤。觀面有餘歡。背面無間言。德義以相高。慶譽以相先。千古似一日。萬里如同筵。此爲金石交。誰與知者論。

### 教子孫讀書

水在盤盂中。可以鑑毛髮。盤盂若動搖。星日亦不察。鏡在臺架上。可以照顏面。臺架若動搖。眉目不可辨。精神在人身。水鏡爲擬倫。身定則神凝。明于烏兔輪。是以學道者。要先安其身。坐欲安如山。行若畏動塵。目不妄動視。口不妄談論。儼然望而畏。暴慢不得親。淡然虛而一。志慮則不分。眼見口卽誦。耳識潛自聞。神焉默省記。如口味甘珍。一遍勝十遍。不令人艱辛。

### 賦公悅席上事送周如京

逢世路分疑。歸洛陽。有客邂逅樵溪曲。高談傾蓋萬株璣。相對崇朝惟不足。武陽太守山簡徒。喜賢樂事天下無。爲客留公駐斯須。精庖饌玉歌貫珠。坐中賓客皆豪傑。凜凜清風生頰舌。性情浩浩談云云。不特



酒味既凜冽。逡巡行幕如風翻。二姝新出屏幃間。一人捧心餘故態。對客悄悄眉峯攢。一人襜裾半雲霧。仙袂應曲飄飄舉。解作陽關意外聲。舊人只把花卿數。此宵嘉會世所稀。席上更覽周侯詩。彫金有格但聞說。不覽新集那得知。俠于周侯非甚舊。朋友十輩識公九。此公惜別事如何。反覆清篇還執手。龍韜虎略何處藏。卻向吟筆呈鋒鏑。堪作太平祥瑞錄。將軍白首弄篇章。

謝太守惠酒

重陰未肯避陽明。飄風驟雨加震凌。正月已缺二月近。滴水成凍威稜稜。帝雖乘震利發生。令猶行冬輕嚴凝。鸞皆遷喬忽入谷。魚已弄煖翻藏冰。此時草木亦成愁。祇恐不得達其萌。吁嗟羈窮影弔形。安得愬然如無情。明良會合千載遇。乃以罪棄投荒荆。單親萬里頭應雪。不得朝晚奉甘馨。閩嶺之南方。弄兵殺氣殊與生成爭。既不能輔助聖時使。咸若又不得慷慨帝前效。昔人之請纓。詩書滿腹浪自飽。一句不得推而行。身雖兀坐心惕驚。愁緒忽起填胸膺。但聽曠野深林調調刁刁。如有神號鬼泣聲。真江太守真慈明。惠施每每先單笑。眼前突兀雙玉瓶。滿貯玉液清泠泠。拜公之賜未敢傾。不覺失笑三閩生。不學憔悴思獨醒。哺糟啜醢隨其朋。往往一飲一石。五斗解醒。被人呼作生劉伶。雖然遇酒而酩酊。心不汝醉神亦寧。開樽又飲太守德。和氣坐覺生簷楹。不知凝冽自何去。至于愁思皆自澄。乃知春功亦不遠。緘封祇在瓶與罌。安得遽爾披重雲。劃見白日臨青冥。和氣習習扇九壤。枯枝朽質爭敷榮。風雨時。泰階平。聖君萬



壽寰海清。細草輕煙日邊路。鳳管龍絲細可聽。有耳不聞鼙與鉦。有目不識旗與旌。聖功浩蕩不可名。

醉翁行贈黎師醇

金峯醉翁七十九。行步龍鍾面黧垢。惟有滿腹奇文章。日月爭新無老醜。頰舌鏘洋言不苟。咳唾成珠須信有。兩眼如星照耀人。見客偏明儼如舊。問翁壯年愛碁酒。邇日還如昔時否。曰予不戰猶好看。日飲常能傾一斗。因持碁酒前就翁。明日壺漿復予就。朱君貧苦亦好奇。接續攜持窮清晝。城中遑遑競趨走。覲面草草忘親友。幾人樽俎暫從容。笑傲松篁弄花柳。寧知北郭予三人。繼日相從辰到酉。龐眉皓髮常溫然。想見妙齡眉目秀。惜哉才高命蹇成遺滯。四十餘年州縣吏。棄之林野混漁樵。徒使知音動嗟喟。愚聞天道高遠不容人測度。無奈人能樂其樂。故有鼓琴重圍。行歌遺穉。浩然克塞。不以世俗瑣屑累寥廓。愚觀翁之子孫。誥誥繩繩。此其後慶爲不薄。世俗毋以翁老生輕心。須知此翁頭白面黧。而英心義氣。天地不得而銷鑠。

連州斛嶺寨井

斛嶺寨。行雲際。下視長江入地底。汲江登嶺行三里。躋攀峻險爲艱爾。將率居民幾半千。度歲終年苦無水。爰自慶曆達元符。循舊安常誰擬議。元符太守何公賢。愛民慮事誠而至。以爲山頂流泉鮮其事。吾觀古人行師動萬億。所至豈必皆平地。軍必有井井未達。將渴不敢聞衆耳。陰陽者流以水照星。星之所聚



泉所委。行行浚鑿三日。遇泉井成矣。乃今三井如鼎趾。豈特當年負瓶操綆。僕僕往還之人爲慰喜。吾欲後之人知井所以起。敬守前功無委圯。必使甃砌長如今日之清泚。萬萬斯年施何已。故作此歌勒諸斛嶺之市。

苞苴行

苞苴來。苞苴去。封書裹信不得住。君不見。箕山之下有仁人。室無杯器。以手捧水。不願風瓢挂高樹。

瑞像閣同楊驥雪夜飲酒

濃雪暴寒齋。寒齋豈怕哉。書隨更漏盡。春逐酒瓶開。一酌留孔子。再酌招賜回。酌酌入詩句。同上玉樓臺。

和荆公何處難忘酒詩

何處難緘口。熙寧政失中。四方三面戰。十室九家空。見佞眸如水。聞忠耳似聾。君門深萬里。安得此言通。

次張子京遊天王湖作

湖上遲遲不忍還。談玄清徹幾重關。旋嵐野馬皆歸靜。逝鳥潛魚各自閒。墜果露巢秋後樹。淡煙斜日晚來山。吟情到此何終極。注目紅雲紫霧間。

同子忠上西樓

偶因送客上西樓。共愛佳城枕海陬。雁翅人家千巷陌。犬牙商泊數汀洲。風吹細雨兼秋淨。雲漏疎星帶



水流獨有單親頭早白。迢迢東望不勝愁。

次孟堅初冬晴和見梨桃二花作

十月南天尚暑襟。幽花何怪動清吟。半扉素蕊呈修徑。幾朵天紅出茂林。地借小春回暖氣。日勻疎影轉輕陰。惟應幕府多才俊。不負行臺醉賞心。

幽居

蕭條深巷寄門墻。城郭村居事異常。石展地衣三藥徑。錦圍天柱十花檣。幽禽隔樹鈎膠語。異草搖風合和香。不覺冬歸與春到。但知無事日偏長。

煙雨樓

仙人居處卽鼇宮。更作層樓峭倚空。羣岫西來煙漠漠。大江南去雨濛濛。花鑣柳策熙怡裏。耘笠漁簑笑語中。別有夜楹千里月。凭欄清興與誰同。

示潮州妹子

八人兄弟三人在。獨立他州信汝賢。直使無情如槁木。忍看垂淚念南遷。從今依舊歌泉水。何物偏宜寄謫仙。美酒年年須百甕。好從南海便乘船。

和子京霜字見寄



秋深園圃雖無雨。晚歲頭鬢自有霜。身事無功且人事。酒囊餘地乃書囊。寒鴉嘯侶鳴喬木。紛蝶成圍過矮墻。對此每思良友伴。幸時來訪浣愁腸。

次韻知郡登高言懷

莫向天涯說故鄉。人身不似雁隨陽。黃花滿手空佳節。千里有懷如寸腸。爲許功名酬聖代。不須愁緒付瑤觴。男兒不是閨中物。生則桑弧射四方。

次韻張老見贈

烏鴉螺蟻有君臣。此義如何易世塵。欲爲無窮宗社計。肯憂如幻死生身。八千江上奔馳路。十二天南黯淡春。歸到親闈捧杯酒。始知終是福唐人。

觀碁

三百六十路。通精此有門。數奇藏日月。機發動乾坤。對面知爲敵。渾輸卻有翻。詐貪常易喪。仁守乃長存。隻子如輕用。全功更莫論。就令投險勝。寧抵被圍奔。縱得四方盡。寧同一腹尊。傍觀饒好着。當局奈嗔言。慙媿中孚信。幾危大壯藩。坐觀成敗者。安得不驚魂。

出御史臺

萬險千艱六出身。如今也得避囂塵。須知從此寒原上。有箇行歌拾穗人。



道中見以索牽五六十人監理錢者

可憐平地不生錢。稚老累累被索連。困苦新圖誰畫此。祇愁中禁又無眠。









# 廣陵詩鈔

王令字逢原廣陵人也年十數歲與里人滿執中爲友偉節高行特立于時王安石赴召道由淮南令賦南山之田詩往見之安石大喜期其材可與共功業於天下因妻以其夫人之女弟年二十八而卒令詩學韓孟而識度高遠非安石所及不第以瓌奇也惜限於年耳

## 寒林石屏

號山之遠數千里。號石之重難將持。舟車號來每苦重。釜盎尙棄不肯攜。苟非世尙且奇怪。孰肯甚遠載以來。何況號人自珍祕。得一不換千瓊瑰。流傳中州盛稱尙。主以詫客客見祈。世人賤真珍貴假。見者喜色留膚皮。強材美幹立修蔭。羅列滿野誰復窺。我嘗客坐例一見。實亦可愛小且奇。初疑秋波瑩明淨。魚子變怪成蛟螭。鱗鬚爪角尙小碎。但見蜿蜒相參差。又如開張一尺素。醉筆倒畫胡髯髭。如何石上非自然。猶是軟弱從風枝。高樓曉憑秋色老。煙容雨氣相蒙垂。喬林隱約出天際。醉目遠暝分茫微。不然誰家老圖畫。破碎偶此一片遺。借令人手弄點畫。尙恐巧拙成瑕疵。如何石理自生長。安得當世無猜疑。高堆黃金募辨說。萬口利銳如磨錐。或云南山產巨怪。意欲手把乾坤移。先偷日月送巖底。次取草木陰栽培。天公怒恐寢成就。六丁挑斧摩雲揮。世人乘此得分裂。鍛琢片段廢財資。至今風雨號山夜。樹石號作神



鬼悲。又云春氣入山骨。欲自石裏生蒿藜。根株芽枿未及出。卒遇匠手相鑿隳。多稱老松已變石。此固剪截根鬚離。又云鬼手亦能畫。多向石室成屏帷。固知物怪浩難盡。誰能向此明是非。城狐老能男女變。海蜃口或樓臺吹。世間自是有此類。何必詰曲窮所歸。細思此屏竟無用。石不中礪木莫一作不支。徒將文理有小異。招聚瞽說成籠欺。咄哉閉口不復論。爲語愛者無我譏。

贈慎東羊伯筠

世網掛士如蛛絲。大不及取小綴之。宜乎侗儻不低斂。醉脚倒踏青雲歸。前日才能始誰播。一口驚張萬誇和。雷公訴帝喘似吹。一作乞盛恐聲名塞天破。文章喜以怪自娛。不肯裁縮要有餘。多爲峭句不姿媚。天骨老硬無皮膚。人傳書染莫對當。破卵驚出鸞鳳翔。間或老筆不肯屈。鐵索縛急蛟龍僵。少年倚氣狂不羈。虎脅插翼赤日飛。欲將獨立跨萬世。笑謂李白爲癡一作嬰兒。四天無壁纔可家。醉膽憤癢遣酒拏。欲偷北斗酌竭海。力拔太華壓鯨牙。世儒口軟聲如蠅。好于壯士爲忌憎。我獨久仰願得見。浩歌不敢兒女聲。

寄題韓丞相定州閱古堂

始聞定作閱古堂。又聞定有閱古詩。揚之遠定五千里。思得兩翅擘以飛。偶聞人來說堂事。初做兩壁無塵疵。間時公來命繪匠。親以玉指交畫揮。教令某載若某狀。匠拜奉命唯不辭。左圖守相父母吏。右狀將



帥熊熊姿。長冠峨峨偉笏佩。鬪以玄白爲裳衣。屹如丁寧立以議。遜若避讓行而隨。圖成嚴毅色可讐。過吏不敢竊目窺。仍令大筆署行事。寫出黑膽朱肝脾。死者有靈如不泯。合有英氣來附茲。故公之謀不知出。宜有神鬼一作物陰助奇。茫茫九泉謂已朽。豈意一旦存形儀。請留中壁素莫繪。待千歲後公以歸。當搜國匠第一手。狀寫公像存依稀。要知文完武純備。遺與萬世瞻思資。我知觀者足墮淚。不復峴首羊公碑。又聞當世大手筆。磊砢詩句相撐支。手搏蛟龍拔獬角。爪擘虎豹全脫皮。鄆州溪堂遂寂寞。韓詩塵蔽人不吹。想應從此傳萬世。粹玉貫串珠縈纒。小戎何爲尙縮伏。久滯公斧血不滋。何時功成事業就。兩手一掃清三垂。一作睡歸來天子喜以領。秦階輝煥平無欹。次招當世草茅士。各使呈露心腹披。締裾聯纓上廊廟。留與後世圖爲師。然後回謝閱古堂。彼合異代今一時。

龍興雙樹

春城花草窮朱殷。俗兒趁走脚欲穿。閑來無惊喜自適。時到雙樹爲奇觀。莊如天官植幢蓋。毅若壯士蒼衣冠。老枝叉牙忽並出。似欲併力擎青天。靈根深盤不可究。疑與地軸相拘攣。不知培栽竟誰手。而又始植爲何年。行捫步遠不可問。但見茂色連雲煙。東風牽人少游此。佛屋日日重門關。雖有大蔭人不及。于此尤得志士憐。束蒿爲楹樗爲柱。居者略不憂其顛。迺令遺材抱美植。不得總載桷與椽。高堂傾欹未支柱。匠者日亦經其邊。不思大幹有強用。反以斧鈍難其堅。吁哉誰是愛材者。定知惜此雙樹篇。



原蝗

蝗生於滿一作野誰所為。秋一母死遺百兒。埋藏地下不腐爛。疑有鬼黨相收扶一作持。寒禽冬饑啄地食。拾掇穀種無餘遺。吻雖掠卵不加破。意似留與人為饑。去年冬溫臘雪少。土脈不凍無冰澌。春氣蒸炊出地面。戢戢密若在釜糜。老農頑愚不識事。小不撲滅大莫追。遂令相聚成氣勢。來若大水無垠涯。蓬蒿滿眼幸無用。爾縱嚼盡誰爾譏。而何存留不咀嚼。反向禾黍加傷夷。鴟鴞啄銜各取飽。充實腸腹如撐支。兒童跳躍仰面笑。卻愛甚密嫌疎稀。吾思萬物造作始。一一盡可天理推。四其行蹄翼不假。上既載一作角齒乃虧。夫何此獨出羣類。既使跳躍仍令飛。麒麟千載或始一作一見。仁足不忍踏草萎。鳳凰偶出即為瑞。亦曰竹食梧桐棲。彼何甚少此何衆。況又口腹害不誓。遂令思慮不可及。萬目仰面號天私。天公被誣莫自辨。慘慘白日陰無輝。而余昏狂不自度。欲盡物理窮毫絲。要祛衆惑運獨見。中夜力為窮所思。始知在人不在天。譬之蚤虱生裳衣。捫搜撥捉要歸盡。是豈人者尙好之。然而身常不絕種。豈此垢舊招致斯。魚枯生蟲肉腐蠹。理有常爾夫何疑。誰為憂國太息者。應喜我有原蝗詩。

題滿氏申申亭

申申亭者名自誰。河東丈人身銘一作名之。方其作亭自休息。固欲申暢名其題。雖然自奉頗優樂。豈敢兼忽當世為。若曰所憂非所及。因以遜世無悶辭。丈人疎高喜自適。去不限約來無時。門無賓僚車馬絕。室



有几杖衣冠一作冠。欵夜徑行招海月。伴晝榻坐與天雲期。春林暄和鳥聲好。勝聽俗論相啞一作嗚。塵埃縱爾得風力。卒不到此徒自飛。亭前朱朱有治熊。亭下白白無俗姿。好木留存竟見實。惡草鋤拔無容茨。嘗聞景勝未易敵。須有大句相參差。故吾經年不敢往。日望詩老力可支。偶來爲游適已晚。花稍尙有春餘遺。高哦遶樹惜時節。拾嚼紅片行透遲。回看北林竹萬箇。寒氣一作翠欲起凌人威。清風時來助氣勢。塞甲夜聚言語私。方將投閑日來此。脚踏樹下成交蹊。無端塵土又爲隔。明日跨馬西北馳。心思夢好定頻到。不必直俟歸風吹。

聞太學議

白日流上天。牛蝨無遁形。萬目盡爲用。而不駭日明。穴鼠夜值螢。嗾嗾相聚驚。鼠穴不日通。鼠足不日行。已矣不日識。迺此螢爝矜。鮪蝦陷井坎。莫與江海爭。籬禽不天飛。詎識雲漢冥。咄哉浮薄兒。勉爲高大營。

贈別晏成績懋父太祝

懋甫相門兒。家世沓纓紉。早年綴官簿。青衫蔚於茨。本宜多驕矜。不謂銳義敢。意貪英雄交。一手欲四攬。偶來濫予會。臂搦首已頷。酒甞誇胸襟。頂踵都一膽。壯心羞摧藏。義肉喜菹歎。要言相死從。一作死顧豈苟難斬。聽其自陳論。峭拔不平漸。要之當一切。固合不黷黯。一作黷憶余少年時。亦自喜黠瀾。於今老而悔。壯意日凋減。惜夫相遇遲。君放我已檢。驟聞強大語。若虎餓得啗。已無相高心。徒有志氣感。春風吹天昏。



醉目睨愁豔。念當相別去。兩懷不無慘。何時重來過。慰我涸轍。惟其別去後。猶一飽復歎。幸因西南風。時作寄我槩。

夢蝗

至和改元之一年。有蝗不道自何來。朝飛蔽天不見日。若以萬布篩塵灰。暮行嚙地赤千頃。積疊數尺交相埋。樹皮竹顛盡剝枯。況又草穀之根芟。一蝗百兒月再孕。漸恐高厚塞九垓。嘉禾美草不敢惜。卻恐壓地陷入海。萬生未死饑餓間。支骸遂轉蛟龍醢。羣農聚哭天血滴。地爛皮蒼蒼冥冥遠復遠。天聞不聞不可知。我時爲之悲。墮淚注兩目。發爲疾蝗詩。憤掃百筆禿。一吟青天白日昏。兩誦九原萬鬼哭。私心直冀天耳聞。半夜起立三千讀。上天未聞間。忽作遇蝗夢。夢蝗千萬來我前。口似嚙嗚色似冤。初時吻角猶唧嗾。終遂大論如人然。問我子何愚。乃有疾我詩。我爾各生不相預。子何詩我盍陳之。我時憤且驚。噪舌生條枝。謂此腐穢餘。敢來爲人譏。爾雖族黨多。我謀久已就。方將訴天公。借我巨靈手。盡拔東南竹柏松。屈鐵纏縛都爲箒。掃爾納海壓以山。使爾萬噍同一朽。尙敢託人言。議我詩可否。羣蝗顧我嗟。不謂相望多。我欲爲子言。幸子未易呶。我雖身爲蝗。心頗通爾人。爾人相招呼。飲啜爲主賓。賓飲啜嚼百豆爵。主不加話翻歡欣。此竟果有否。子盍來我陳。予應之曰然。此固人間禮。儻介迎召來。飲食固可喜。蝗曰子言然。予食何愧哉。我豈能自生。人自召我來。啜食借使我過甚。從而加話爾亦乖。嘗聞爾人中。貴賤等第殊。雍雍



材能官雅雅仁義儒。脫剝虎豹皮。假借堯舜趨。齒牙隱針錐。腹腸包蟲蛆。開口有福威。頤指轉賞誅。四海應呼吸。千里隨卷舒。割剝赤子身。飲血肥皮膚。噬啖善人黨。嚼口不肯吐。連牀列竽笙。別屋閑嬪姝。一身萬椽家。一口千倉儲。兒童襲公卿。奴婢聯簪裾。犬豕羨膏粱。馬厩餘繡塗。其次爾人間。兵阜倡優徒。一作兵倡釋老徒。子不父而父。妻不夫而夫。臣不君爾事。民不家爾居。目不識牛桑。手不親犁鋤。平時不把兵。皮革包矛爰。開口坐待食。萬廩傾所須。家世不藏機。繪繡一作繡絲一作錦衣襦。高堂傾美酒。鸞肉鱠百魚。良材琢梓楠。重屋擎空虛。貧者無室廬。父子一席居。賤者餓無食。妻子相對吁。貴賤雖云異。其類同一初。此固人食人。爾責反捨且。我類蝗自名。所食况有餘。吳饑可食越。齊饑食魯邾。吾害尚可逃。爾害死不除。而作疾我詩。子言得無迂。

寄滿執中子權

吾愛子權詩。苦嚼味不盡。窮思欲名狀。百比無一近。初如貪追兵。屢請忽許進。旗旄交叉幢。戟劍後先刃。方爭奮拏先。忽覩斬亂狗。徐驅得平郊。萬甲合一陣。偏裨走起頗。中堅坐吳牘。喊呀鬪志酣。髣髴窮敵認。前軍奔交兵。後馬走斷紉。須臾聲金休。萬噪快一雋。羣降挑戈矛。叩拜乞用釁。蒼黃請命間。竊視不敢瞬。玄雲壓空虛。半夜暴霆震。睡耳起欲掩。驚仆失肝腎。壯者固已然。況余乃齟齬。及其久詳味。欲吐復自慙。有如羅百珍。次第嚼嚼順。貪豐不辭多。愛美忘餘餽。故其留人口。雖久咽喉潤。何時匹馬來。一作東畏愛氣



兩振。唯其未合間。如不獲謝蘭。望風爲此詩。顛倒猶合燼。

再寄滿子權二首

秋近啼哀蟲。君思云奈何。我愚得君思。合少君賢勞。我心則多。非獨辭源長。瀉海爲江河。平生未始有點缺。玉日拂拭金燒磨。尋常羆與狸。見一足已蹉。又況一地臥三虎。狗彘雖勇何敢過。揚州我何思。青山無一螺。午市不畜寶。米鹽纔如它。而吾三夫子。一身各丘軻。瓊林自生寒。結霧成冰柯。文章日組緯。玉機飛金梭。誰有真珠繩。結何張麟羅。拔爲當世祥。聲爲太廟歌。我願參衆民。手足搖婆娑。

有錢莫買金。多買江東紙。江東紙白如春雲。獨君詩筆宜相親。綴聯卷大十牛腹。要盡寄我無寄人。我將攜之東。一作攜之東海去脚踏海水洗齒脣。轉來清澈飲百斛。蕩滌腸肺無纖塵。嘗聞泰山高。高處天爲鄰。借如無梯不得上。亦欲大叫呼天神。鋪陳君所詩。譟口雷鼓振。世多俗耳既莫告。當冀上帝依稀聞。正聲定不感凡類。舞躍百鳳千龍麟。安能學俗兒。一卷不復伸。天公聞否尙未快。一作決安得鐵翼穿秋旻。

答東徽之索詩

世味久已諳。多惡竟少好。惟詩素所嗜。決切欲深造。人安已不休。衆恥我獨冒。有如獺行跡。欲改復自蹈。肝腸困搜尋。吻舌倦搏造。心靈無餘多。爲此日有耗。已勤尙無成。既苦每自勞。自笑如秋蟬。饑極不止噪。努力排韓門。屈拜媚孟竈。惟此二公才。百牛飽懷抱。我如餓旁一作旁飢者。眈眈不得犒。不知去幾多。窮行竟



未到。無門隔藩籬。發罅窺堂奧。愛之不可入。抵觸發狂譟。借使苟有成。不知竟何要。孤名非所求。弊俗詎足傲。況乃非所及。窮海未爲浩。不知何時休。定訖死與老。因疑今世人。恐有我同操。徽之才超高。竿幢出標纛。爲學尙淹蘊。富囊不肯暴。文章內朱豹。外襲一以皂。大論尤堅強。推舟出行杲。珉砢不施功。徑欲制珪瑁。幸此不我陋。教誨日陳告。昨因語及詩。請我使自道。屢謝不得命。迫窄遂顛倒。被堅誘羸兵。伏銳待穿盜。取勝雖必然。窘窮亦堪悼。勉爲瓦礫投。幸有金珠一作珠玉報。

寄滿居中衡父

前會去莫追。後見來無期。別嘆後見難。悔恨前會稀。惟吾衡父兄。一作友金純玉光輝。裁磨殺圭角。不與瓦礫齊。大匠陶百器。不閒履下泥。一衡舉千鈞。何棄毫與釐。余獨胡爲人。乃不忍使遺。有如橫道藜。萬足踏不疑。子何嗜好殊。獨俯掇一作拾以歸。整束使不茨。欲令雜蘭芝。蘭芝有天香。藜賤雜則非。然其廁置間。適與薰染資。文章每借觀。罅隙窺晴曦。議論使坐聽。穴贖聞英池。春園或承招。遊騎亦許隨。劇雲愛風枝。藝火圍夜基。縱談心一作襟開張。倒笑冠欹披。匹馬載以來。東首頸脰疲。夜夢不厭勞。百里夕一馳。想見目與眉。百障千藩籬。不虞自投置。遂若鳥遭竊。何時獲因緣。連筮促馬蹄。誓當盡晨昏。不復起退辭。

謝李常伯

人從東南來。忽得連紙詩。行義不赫曄。名聲無萎蕤。雖常誤見辱。旋則拜席歸。別久謂已忘。不圖猶記之。



長封大書字。顧我已忸怩。開滕把之讀。推與果失宜。剝虎蒙羊豬。借使出類奇。見豺先自奔。遇豭還羣隨。是故古之人。爲己賤若斯。有聞未之行。季路恐不嬉。名浮過所實。軻也恥以非。今而承所賜。迺此亦可噫。賢者寧過哉。當是我有欺。忍愧讀終篇。喜驚改肝脾。嚶嚶誨教言。舉舉仁義辭。初令探本根。喻以海與池。乾坤老六經。遺編爛孔姬。尙恐惑異說。教之無遷移。強聞終日乾。仁不三月違。卒以二者終。要我勉不疑。百誦百再拜。下淚如掛縻。交朋百愚諛。此語聞之誰。憶初從粹翁。睡耳忽得提。震驚破百昏。寐覺悼前迷。今而去之久。茅塞心叢茨。驟承夫子言。快斧加芟蕪。舊穢忽剗銷。新涂坦平夷。念當不捨去。戴服同冠衣。猶恐免袒間。復作須臾離。且將鑷之心。不止涅之皮。二者苟一能。終始庶不遺。平生苦嗜詩。此篇況驟馳。喁喁夜不休。齟齬午忘饑。仰嗟天骨雄。俯嘆人莫爲。星明有常高。日圓無食虧。讀久口益饑。舌軟涎流垂。想當措意初。嚼雲吐虹蜺。脣牙哆華鮮。肺腸涌光輝。故其紙上言。飄有霄漢姿。何可對酬謝。約海量珠璣。

對月憶滿子權

長風掠海來。吹月散百鍊。一作白練青天豁四壁。雲靄不容線。窗軒颯先秋。露氣入簾扇。寬一作空庭生夜涼。蚊

口不得擅。人靜暮客去。坐偃適自便。清牽睡思醒。明發醉膽健。披風睨白月。瞪視不爲眩。未甘景獨勝。思出大句銜。狂搜得無奇。猛吐復自吮。篇成若奴婢。氣骨終凡賤。置棄不復收。嘆感退自旋。起探君寄詩。兀坐諷百遍。駭哉劇雄勁。百札洞一箭。間逢騁新奇。春雲弄晴霰。古意終重厚。九鼎掛一鉉。吾嘗笑夫人。語



富則自願。及嬰愛君念。始自信惓惓。閱女當求嬪。慕士在護彥。鄙哉尋常者。亦用目識徧。得逢誠幸多。既別遂堪嗟。乖離時況久。會合卜未先。思之不可見。飛魂不身戀。秋城崔嵬高。圍我屹若圈。安得擘風翅。飛出不自殿。巧爲相見謀。反覆竟未善。惟當遠相要。共借月爲面。相離苟同天。舉目亦兩見。又況相去間。纔止百里縣。不知竟可否。寄詩代請勸。

八檜圖

客有要我八檜吟。手攜八檜圖來縣。掛張滿壁揚可駭。眄顧左右同嗟嘆。芴墓石刻署名狀。各有憑附相。資緣或高相扶互倚礙。或斷欲蹶猶支顛。強枝拗回信有力。高幹復俯蛟蚪拳。尋根及株逮條蘖。例不拔直皆芴偏。雷疲風休雲雨去。蛇龍鬪死猶鈎纏。安分爪角一作牙與尾鬣。徒見上下相蜿蜒。不知生時竟何謂。略不參類常木然。宜乎今古惑昧者。搖擺舌吻躡之仙。一尤盤拳老高大。傳云曰一作眇老由飛躡。當時駕鹿踢以上。跡有町疇遺相連。多應蝸殘鳥喙啄。不爾誕者強鑿鑿。眇能惑人已自幸。豈此上去能欺天。借如眇功可升躍。鹿亦何幸飛相聯。于中一本特甚異。膚革逆理紐左旋。傳云眇手所自樹。我知此語定鑿穿。苟令實爲眇老植。推以天意猶可言。當年曷不紐以右。若曰世爲左道牽。如何衆輒不省究。反重神怪令眇專。乾坤中含萬品彙。此獨自異誰令旃。一作殊窮思竟慮莫可索。欲世不惑誰能攀。仙書虛荒喜誕妄。推說事理尤綿延。世人一讀卽化變。日望飛奮相迷顛。豈非此木久樹此。浸漬亦爲異說遷。故其形



植與生死時以異怪招驚憐。先時世不早斤斧。放其老大訛誇傳。當年同生好材幹。半以直伐成燒燃。憑妖附誕相樹立。卒自死活終完全。葉枝凋疎不有蔭。材直弗柱曲莫輶。不知留存護養者。竟以何理惜不捐。我有尺鐵大剛利。久已鑄斧磨山巔。卒無柯柄尙棄置。懶乞月桂求嬋娟。

秋夜

秋夕不自曉。百蟲齊一鳴。時節適使然。鼓脅亦有聲。爭喧鼠公盜。悉窺地陰行。獨有東家雞。苦心爲昏明。

答束孝先

純金出鎔爐。烜赫掩熾火。錦成洗春江。衆目眩莫奈。魚鹽物誠微。誤用幸不浼。君家兄弟賢。我見始驚夥。文章露光芒。藏蘊包叢脞。關門當自足。何暇更待我。固知仁人心。姑欲恤窮餓。苟論才不才。自合棄如唾。憶昨西來初。戚惕待客坐。交持駕說口。張闔不可鑠。間發辨經義。鐵舌莫摩挫。高文忽下投。白日駭天墮。眩怖欲前掩。布帛不可褻。初觀固宜驚。獨獲亦堪賀。又如遇貴人。繡錦飾婀娜。回眸忽自鑑。惡面復窶裸。屈降心已甘。嘆憤志亦頗。雄高豈復爭。愛恤亦加荷。大詩又一作忽來及。推與太浮過。自無賢可稱。以是惡甚播。譬如享廼人。豆食止則可。苟強擔石負。蹉跌適足禍。何以論報心。結草效鬼一作魏顛。

寄洪與權

與權江南來。適自滿門會。初無合我志。纔以客面待。時時相鈎探。稍稍互酬對。根源豁波張。局鏞失分解。



君然領還嗟。我恐敬若戴。相逢時既多。相待兩交快。予初請子交。子曰何可外。中又謝不德。卒曰吾而愛。既而第以年。子合我兄拜。揚雖士云多。往往事冠帶。中間滿夫子。峴出百萬最。更以子從之。而吾米則糲。朋從偶許攀。會合日與在。春晨巧誇招。月夕因論話。書狂逸飛蛇。碁毒甚含蠱。相謀務奇勝。聚口笑拙敗。貪驩不知久。歲律忽移再。余饑奔先西。餓色面留菜。子待去亦恨。書以問我奈。別來君何如。思子我心痲。朋分無舊歡。世險有新態。高言足瑕疵。俗學牽細碎。貧知身責重。病覺學力怠。壯心已無多。況去日有退。預期後相見。頑陋徒老大。好勤寄余書。思子百憂萃。

寄滿子權

子權今謂何。久不治簡書。子素賜我多。豈以此遂疎。予亦如常時。病與貧相俱。冉冉草沒階。客脚不踏廬。貴者事名位。崖岸誇懸殊。賢者縱肯來。顧我欲取無。惟餘齷齪徒。吾亦羞與居。潭潭一室空。編帙環三隅。暴陽不憂償。偷飽幸未誅。且可延朝昏。憂思老頑愚。獨有思子懷。涕下時喑鳴。

冬陰寄滿子權

玄雲載雨惜不下。北風吹急冰相黏。周遮覆蓋不通透。錮結已厚難披燂。微陽未復老陰壯。記去暖律時猶淹。青天何可一日失。漸恐此去無由瞻。日馭自懼不得脫。略出急入地下潛。憑陰託寒恣凌爍。風伯得意一作志欣沾沾。但幸天公不省悟。惟顧下地人嗟讒。隔絕霜露曠不下。帝有潤澤何由霑。非惟勾芽凍天



折亦恐萬類由茲殲。九龍銜火互相暖。稱有日職借不甘。羣兒銳奮不量度。欲仰吐氣吁以炎。惟有壯士抱劍臥。思得美酒聊自酣。

弱弱誰氏子

弱弱誰氏子。鮮鮮一何姝。來奔富人家。妻與富人俱。一作嚴華粧問夫子。我豈彼室如。夫子笑遣之。彼寧與汝都。一作裳由阼階。德色溢以舒。親賓不敢笑。退語相噉吁。高堂聚羣婢。唯諾相咨睢。家事忽不圖。顧指取自如。朝令折桂薪。暮遣藩籬除。風雨半夜來。百釁生不虞。屋壓盜隨至。夫死別嫁夫。東鄰有淑子。一作恬不事鈞朱。端居待人求。正色不願諛。清鏡見一作照白髮。行媒不顧問。不知愛妻人。取捨何異歟。

答黃藪富道

角角適時足。力走猶或遲。從而不逮人。不若坐視之。而予始用此。已無先人思。間自念斯世。固亦未易為。以其得而慚。曷若退自宜。老身可孔顏。餓死猶夷齊。予心最樂此。尤喜用自持。豈將六尺軀。賤易五穀皮。但無百畝田。一作得可抱剛氣歸。年來事窮蹙。露暴無自依。姊寡不能嫁。一作無為家兒孤牽我啼。平生事文字。無路活寒饑。勉從進士科。束若縛襁兒。時時忽自笑。一作笑往往窮加悲。一作還有如高飛鳥。中路饑自低。銳知從食來。一作豈意身投繯。神龍拏白日。挾雨萬里飛。使其口有銜。安得無馴隨。雖然平生志。固未忍散遺。間時自開縱。哦吟助噓噓。纔將舒已私。豈敢偷人知。黃君道德者。術業何頎頎。手提九黃



鍾。旁取折籥吹。縣知失氣類。誤以倡和期。不知里社歌。不可郊廟施。況余衰病餘。有氣亦已卑。加之困俗學。羝角方牽羸。陳詩盡自道。幸子憐無疵。一作

### 春風

春風東來暖如噓。過拂我面撩我裾。不知我心老有異。亦欲調我兒女如。庭前花枝笑自愛。風裏草力更相扶。旁林曲樹足飛鳥。不聞燕雀鴟鵂鳥。求雌要雄各有意。豈但鬪競爭春呼。春巢成多夏卵衆。明年計此更有餘。非唯喧呼亂人耳。漸恐巢穴妨人居。收殘射中豈無道。我亦力可彎長弧。林深枝曲矢不入。況弓待借家所無。行吁坐眊不可奈。安得靜默投身俱。

### 哭詩六章

死者徒已死。思之恨無涯。生者非素心。還作死者嗟。今古悲略同。斯道竟奈何。哀絃直易絕。哭詞曲難歌。朝哭聲吁吁。暮哭聲轉無。聲無血隨盡。安得目不枯。目枯不足嘆。無目心自安。目存多所見。不若無目完。切切切切切。淚盡琴絃絕。憤氣吐不出。內作心肝熱。朝漿渴不勝。莫潦濁不清。何以慰我懷。安得滄海冰。哭莫傍滄海。淚落長海流。流深風濤多。駕蕩覆我舟。不若灑春草。荆榛蕪蔓莖。怨氣觸草死。猶得香蘭生。朝歌憂思多。暮歌無奈何。偶嘆氣亦絕。未慟血先沱。淚落入口少。不如出眼多。安得堂堂軀。不爲瘠且癯。目雖淚所出。由來心乃源。白日燄我面。意欲乾汎瀾。而不照我心。我淚何由乾。況在重雲遮。使我何自安。



張巡

祿兒射火燒九天。鬼手不撲神聽旃。羣庸仰口不肯唾。反出長喙噓之燃。睢陽城窮縮死鼈。危繫一髮懸九淵。巡瞋睨遠兩眦拆。怒嚼齒碎鬚張肩。恨身不毛劍無翼。不能飛去殘賊嚙。翁軀腥刀子磔俎。日嚼肉血猶經年。霽雲東攘兩臂去。西來才有九指還。胸中憤氣吐不散。去隨箭入浮屠埽。忠窮智索莫自効。更戀愛妾嘗饑涎。我疑沒日賊不食。恐其肉醜死不痊。又疑身骨不化土。定作金鐵埋重泉。何時山移陵谷變。發出鼓鑄戈或鋌。吾如得之願有用。不誅已然誅未然。

贈李定資深

涉川固有道。造舟不如梁。曾聞水覆舟。不聞死乘杠。奈何揭厲子。先先勇褰裳。豈盡水害人。固亦謀非臧。鳳雖謂靈畜。無竹或一作終死饑。竹今無方無。鳳來亦云何。一作時使之羣隨鴟鳶饑飽爲止飛。非惟失所靈亦與彈射期。

坦坦誰之田。施施謝且弋。烏來玩其機。鵠至喜其食。長鴻飛冥冥。志與萬里極。豈無啄飲心。寧饑不人得。湍激日蹙蹙。風稜勢漫漫。奈何舟上人。試死才一間。苟不以利涉。安坐思誠艱。客雖懼謀梁。而木嗟在山。

古廟

古廟隆隆敞庭扉。風雨剝壁頽柱榱。我來安知神所依。穹堂窳窳風幡旂。神君龐軀突鬚眉。視我睨睚坐



倨箕。惕礫。觀者駭不怡。羣鬼後先張福威。直東之廂步逶迤。日益所見怪可噦。馬牛羊犬雜豕雞。或戴以首旁四支。間有人面身亦非。老祝趨前爲衆詞。口吻囁嚅言嗚咿。稱別狀類顧東西。唱號名字分何誰。空虛冥漠非所期。豈亦以此爲人尸。視其膚革已彪狸。寧有中反恬肝脾。又有械器身挈持。傳言厲疫此乃資。古之日行歷虛危。猶恐盛陰鬼所隨。礫儼于門驅使馳。今安取此廟以祠。不念延虐殆尪羸。農凶年多苦餓饑。苟幸得飽不擇祈。來則拜叩盡敬祇。幸天之澤偷自歸。民德且恐報之時。餼肴豐鮮牲魚肥。欲奠以獻更濯卮。進謝千語拜百低。工鼓于庭巫舞衣。祝傳神醉下福禧。農謝神去祝徹之。庭前剪割棄餘遺。鵲烏下爭趨不飛。回顧神面如故時。意者不爲祭謝移。嗚呼神固一作信非吾知。

雜詩

方春不種蘭。終歲無自佩。良田弗加芟。徒穉亦無歲。空令雨露恩。日夕被蒿艾。安坐饑怨天。此理果誰在。一日不爲田。百草已有根。况復閑三時。其穢何待論。豈不有錢鎛。徒羞慵借勤。歲晚憂不耕。何獨議耒耜。穆穆晚春樹。上下聚百蟲。不有口似蠶。則生尾如蜂。設不二者然。亦徒生無庸。清陰不可居。晚歲還秋風。

答問詩十二篇寄呈滿子權有序

令旣愛盧仝蕭宅。二三子之詩。而猶恨其發之輕也。然忘其効而更重之。則得矣。逮子權之起予。予實慕之。輒爲十二篇。其題亦不易。子權所謂東墅諸子答問者。予獨廣之爾。其水車之篇。獨異于子權。然



特其文則然。吾知子權與吾與它知詩者。謂爲異也。

罇問耒

金堅雖不磨。木曲亦已揉。幸蒙主人用。反要主隨走。適從慵耕兒。雖功不見取。良田常無收。何塞不耕咎。

耒答罇三首

我用常在金。任金適由木。苟得金爲用。何惜木微曲。幸得主人隨。不恤汗行犢。必求隨主人。我用誠不足。我用于主人。良田無虛種。主人不我以。我適爲無用。不知主人饑。卒歲安自奉。由來我求人。孰與求我重。我必爲人用。不必用于人。若也責不耕。君其問諸田。

耒問罇

一畦失之荒。爾力亦可耨。天下方漫蕪。爾功亦何有。

罇答耒

天下方漫蕪。顧我適有庸。使其已除脩。我將何以功。我豈大無効。自是用我慵。

耒問斧

子斧誰爾爲。黑白太分別。朝伐一樗死。暮伐千樗蘖。爾終不自謀。幾日不缺折。

斧答耒



大樽吾猶伐。小樽何畏蘖。吾缺猶俟磨。爾折將奈何。

水車問龍

來何必召雲。去何必飛天。我名不爲龍。何能雨爾田。

龍答水車

神龍謝子車。子能未足多。上潤雖已然。下竭將奈何。

水車謝龍

水車謝神龍。下竭固無奈。旱則我爲用。爾龍尙何謂。

龍謝水車

神龍謝水車。吾語爾來前。爾雖用于人。我亦用于天。在物固不同。于用豈殊然。水下高田乾。爾能俯水取。假人不爾用。爾售田責否。吾雖身爲龍。動亦天所主。天猶不有命。我安事爲雨。

中夜

晝日苦卒卒。忽焉不加思。長夜漫不眠。起復日所爲。所爲浩多愧。不與初心期。虛云聖賢學。實從庸俗歸。雖耻猶奈何。長歌涕垂頤。

書懷寄黃任道滿子權



西風吹雲空。晴日露高曦。駑馬無速聘。歸客思遠屆。長林剝霜紅。遠水漾寒派。露蟲悲自且。一作咽。風菊老尤介。昔予來方春。焰焰樹生態。今歸亦未幾。馬踏落葉壤。時物固有然。盛衰信難概。吁嗟爲生勞。黽勉計無奈。伊余有遐致。久此困俗械。嘗思擺絕去。自放出世外。高懷樂天寬。遠目斥人礙。有田足晨昏。有圃具菹菜。父母不待養。妻子固易賴。世孰得丘山。亦孰失蒂芥。人自能輕重。吾將守所愛。六經老誠明。萬古熟成敗。得時爲醯鹽。滋味和鼎鼐。失猶有萬世。令名自沽賣。自視久已明。決不俟謀蔡。寄詩侑子觴。期子和而再。

令既有高郵之行而束孝先兄弟索余詩云

擾擾利學者。久不可與謀。讀書乃何爲。老不知軻丘。弗恤義所在。務期高爵收。嘗聞失所嗟。不聞得之羞。知誰洪其源。使世乘其流。于今已汗漫。更久將溯游。嘗聞古人言。饕餮爲共兜。謂惡豈必多。偷飽德弗脩。不知自思者。捨此何所由。故予早知懼。誓將異人求。寧爲寒餓嗟。不同富貴謳。此行況有獲。師德高前修。因嘗請子行。勉子無逗留。于吾乃何有。同病不獨瘳。雖愛謂子然。尙疑子終不。惜子有高材。竿幢揭華旒。苟能自擺去。不爲世學囚。行將見遠到。強弩射弱菽。何必請子詩。自合治子輈。

酬束丈貺詩兼敘所懷

白日立中路。犬去不形相。夜以盜自來。何敢怨犬傷。主人忽加念。謝怒犬無良。盜子隗伏前。有言願加詳。



見賜固已多。怒犬誠未臧。

卜居

吾求一屋逮兩月。貧不謀貴何以圖。竭來自放就窮巷。幸得之喜何敢吁。頽簷斷柱不相締。瓦墮散地梁架虛。門無藩闌戶不閉。時時犬彘入自居。主人憐我莫自致。爲我補葺加墜塗。翻翻匠氏乃誰子。頡頏作氣厲叫呼。羣庸洶洶助聲勢。脾睨凌我要我酤。歸來嘆息無自得。兩日纔致酒一壺。徵多償少意不愜。棄我忽去如逃逋。重來閭寂不可問。依舊四壁編空蘆。嗟予雖貧日猶饜。可不善爲盎釜謨。外戶不閉古則爾。今也盜賊通街衢。乞錢買籬作藩固。更學關鍵防朝晡。鄰翁問我乃何者。得無亦以自名儒。王朝潭潭聚冠蓋。幾人不載卿相車。子何布被不蓋肉。浪自名士實則奴。假爲無能等編戶。猶可自擇安閤閭。胡爲慘戚卒困此。去矣何屋不可徂。此居卑洼不待說。四高中下流無渠。夏霖連延久積注。往往竈下秋生魚。始來圖此不自擇。終見坐與蚯蚓俱。何況梁椳日蛀腐。一仆非爾力可扶。苟求暫安急旦夕。反以身就殞壓虞。迺知窮則失自愛。死得正命有幾且。翁乎爾言誠得矣。我方困甚非真愚。

送李公安赴舉

行子冠上塵。梁宋道傍士。塵逐冠弊捐。人來還復去。馬蹄日月長。踏盡西北路。近日何紛紛。姿狀頗秀舉。傳言天子詔。士得四方赴。來如鵲翅翻。去若蠅頭聚。市兒屈指計。過百日未暮。昔周方盛時。得士纔十數。



唐虞此爲盛。中復容女婦。昔何稱才難。今也寧異趣。但恐所取異。今古殊尺度。夫君乃高才。久有及物慮。今又奮絕去。挺拔欲自樹。余窮非所知。久有山林素。但無百畝粟。乃就羣才賦。仕道得亦嗟。困窮失爲懼。二者各有命。子亦何所與。

離高郵答謝朱元弼兼簡崔伯易

昔來何悠悠。今去亦泛泛。豈自果進退。姑且便飲啗。三代去今遼。士食久已濫。徒死不爲義。可無苟石擔。平生墮百爲。且就役鋤槩。束身入世程。開口就人歉。怒喜有失得。眉睫煩窺瞰。野鳥或在籠。山猿有終檻。能安此爲命。雖失亦何一作何憾。予嘗勇自明。磨古得前鑑。抱關賢所容。較獵聖或暫。庶未負初學。尙爲神所監。予行人之嗟。我笑不爲領。子獨辱所厚。以詩繫歸纜。命和始自書。狂言庶非僂。

山陽思歸書寄女兄

淮風晴舒舒。楚水日夜流。風能駕吾帆。水可載我舟。余歸知幾時。子望懸百憂。念我兄弟寡。商參各殊州。十年不一逢。會合何所由。幸逢子來歸。與我相慰投。甥兒入吾牽。甥女出我留。子吾笑其間。貧不知可愁。心如熙春陽。樂若醉九酬。憶我別子日。將行更逗留。泣恐傷子心。淚出仰目收。別日纔幾時。別思日九秋。心隨西北風。目望東南樓。主人仁且賢。憐我羈旅游。晨粳玉炊香。暮酒金注甌。盤蔬羅春青。豆脯兼夕鱸。爲食豈不美。義咽不下喉。要當歸子同。半菽飽亦優。始余志所學。義當望軻丘。謁來與世評。衆口忽起咻。



嘗觀世金朱。此道久已偷。胡爲不奮去。附世如贅疣。而子亦待人。特以貧不謀。參差兩如此。偃蹇勢略侔。要當共引去。逸出世網罟。遐追避世徒。子與侍巾裘。吾將亦娶婦。力以石臼求。買田結歸廬。種樹屋四周。子居課桑蠶。我出鞭耕牛。教妻績以筐。使兒餉來疇。坐笑忘歲時。聚首成白頭。歸乎當何時。詩以侑子謳。

大舟

大舟無風帆不舉。小舟榜入青冥去。舟中漁子呼且歌。夜半鬪魚誰得多。

望花有感

春來幾時余不知。但怪日日柳稍好。我嗟無地自種花。常恐東風只生草。誰家有園不可入。時時縱足信自到。寒梅最香落已闌。桃杏雖遲亦顛倒。高枝飛鳥夜踏空。低樹狂兒日摧拗。惟餘零落滿地紅。主人更聽奴頻掃。歸來四顧慷慨歌。要且傾酒澆顏酡。春歸欲挽誰有力。河濁雖泣庸奈何。

餓者行

雨雪不止泥路迂。馬倒伏地人下扶。居者不出行者止。一作返午市不合人空衢。道中獨行乃誰子。餓者負席緣門呼。高門食飲豈無棄。願從犬馬求其餘。耳聞門開身就拜。拜伏不起呵羣奴。喉乾無聲哭無淚。引杖去此他何如。路旁少年無所語。歸視紙上還長吁。

暨陽居二首



出無王事牽。入不治居舍。蒿藜入牆屋。塵垢變几架。糟糠苟無憂。智力取自暇。逢詩即廢日。得客輒忘夜。積懶遂成性。習勤反如詐。幾不類怠傲。愧耻將何謝。身非爵與官。車馬久不謀。家無田倉儲。雀鼠非我仇。朝出從人居。詩書講前修。暮從兒子嬉。歡笑何所憂。閑將筋力疲。懶使志慮收。斗稭尚煩送。誰謂能無求。

謝客二首

擾擾車馬客。各以勢利奔。自問閭巷人。何為亦紛紛。與客成往還。勉就俗所敦。禮不經聖人。頗厭後世煩。欲問無所得。歸視紙上文。以非孔子心。尚拜陽貨豚。乃知偈仄間。心跡久已安。去矣可奈何。更問來者門。躑躑出何為。奄奄歸就臥。不知身所謀。徒與俗相和。本無聲利求。一作營久厭車馬過。詩書雖滿前。奔走不暇坐。收身衣食餘。抱病歲月破。得不勝所忘。進亦何可課。前躅杳一作莽難躋。下愚旋易墮。得勢有然爾。命矣何可奈。一作非

春游

春風誰相呼。鳥語到庭戶。罷書起何游。一作往繫馬城西樹。寧須客衆隨。聊與春相遇。高林美風竹。疎影有清覆。可以便行坐。解脫快巾屨。日長天地寬。飄戾飛雲度。風枝綠未柔。一作舒日暮紅先露。芳辰信可尚。嘉興惜無寓。舊聞黃公墟。頗一作屢枉壯士顧。予雖輕數子。自適偶同趣。起解身上衣。就貫青旗醕。獨酌不待



勸興至還自注。對物無所語。似若喧譁惡。雖無歌舞歡。幸可篇章賦。乾坤本閑暇。人物自紛遽。勞生曷不樂。歲月失已屢。酒闌起四望。落日不可駐。饑馬自知家。何須問歸路。

送曹杜赴試禮部

霜風琅琅鳴鼓聲。鳥寒夜噪樹折枝。居者不出行者歸。廐馬解銜車棄脂。長河夜冰船就維。百賈晏起朝閉扉。爲問當今行者誰。出門千里到何時。母送拊背父嘆嘻。兒惜欲去哭挽衣。上馬反顧紛涕洟。非所願欲去何爲。家雖有田豐歲稀。所得償公不及私。況望羶腥事庭闈。結髮從學今十碁。始自有志狗孔姬。豈願從世成依違。高堂華髮紆素絲。暮年待子爲光輝。望我日久莫報之。苟得一笑辱弗辭。況望舊作三釜家無飢。吾于二子久所知。怪其才高所就卑。今乃語此誠可悲。近聞天子變典彝。欲撥舊冗收新奇。子行出仕適其期。驂騑得路無銜羈。罷酒行矣無自遲。去取天寵酬親慈。

野步

久嬰末俗喧。脫就綠野靜。方求巾屨便。那暇賓客命。林紅落春衰。草舊本綠爭夏盛。時從老農語。久佇行子聽。謂言勞苦後。各以閑暇慶。時逢瓶盎沽。亦有肴核稱。喧嘲忽無次。歌唱仍相詠。酒闌紛起坐。白髮忽一作兩凭。兒乘旁樹嬉。牛臥前籬暝。予方困俗累。愛此近天性。何當從之歸。買舍與相並。

古風



古風何寥疎。世方盛夸慕。利塗劇先趨。直軌迷曲駐。渾渾九河翻。仡仡百川注。分爭或多岐。斂枕纔一趣。睢盱承至歡。讐疊謝絕怒。財得升斗多。勉售形骸雇。不知萬鐘得。孰與一日裕。況承丘山羞。願易頃刻遇。誰能脫近役。自放就遐鶩。航湖足菱魚。拔野厭芼茹。行招千古游。坐與來世語。延風敞虛襟。揖月坐嘉樹。此意固有然。童兒未堪預。

旅次寄寶覺訥師

小雨破宿暑。曉風忽焉適。山深樹翳陰。蝸蛭應已秋。清坐想高絕。語言誰應酬。豈不念一往。抱病終自留。羈旅少往還。有來或非儔。命僕一謝之。縱我冠屨休。移牀上高堂。解書散牀頭。于此有嘉興。念世誰與謀。獨思山林人。茲意可綢繆。何當買田盧。共遂丘壑游。

寄呂惠卿吉甫兼簡林伯通

踐踐門外馬。客至知謂一作誰。昔面尙未逢。那論心相知。揖客拜上堂。一作拜客謝客辱弗遺。寒暑相問酬。唯諾坐無爲。靜默近尤怨。多言足瑕疵。勉從客所論。還顧所學非。念此廢無益。對書坐長嘻。一作爲此廢書坐長嘻。獨思同懷子。念遠莫見之。豈無寄我書。歲晚得苦遲。聞頗困王事。豈無閑暇時。況有同僚賢。相期在詩書。人生天地間。常苦食所糜。去就兩莫謀。會合寧有期。余病不自樂。舊學益以墮。近者非所同。遠者勞夢思。江水日夕東。道塗宛而夷。寄書當在勤。無謂還往稀。



答逢原

呂惠卿

晨出趨長司。跪坐與之言。偶然脫齟齬。相送顏色溫。歸舍未休鞍。簿書隨滿門。相仍賓客過。欵午僅朝餐。平生性懶惰。應接非吾真。況乃重戕賊。良氣能幾存。就夜甫得息。閱我几上文。開卷未及讀。睡思已昏昏。自知小人歸。昭昭復何云。每于清夜夢。多見夫子魂。側耳聽高議。如飲黃金樽。覺來不得往。欲飛無羽翰。昨日得子詩。我心子先論。怪我書苦遲。友道宜所敦。豈不旦夕思。實苦案牘繁。豈無同官賢。未免走與奔。相見鞅掌間。有言無暇陳。嗟嗟茲世士。無食同所患。念我力難任。聞子謀更艱。久知爲之天。安能怨婁貧。吾聞君子仕。行義而已焉。亦將達吾義。肯遂爲利牽。東海有滄溟。西極有崑崙。古來到者誰。不過數子尊。子已具車航。吾亦爲楫輪。欲一從子游。不知何時然。

寄崔伯易

擾擾閭巷士。過我何所爲。屢來徒我煩。不來我弗思。少年樂知聞。喜與客子隨。晚歲事恬默。與世益參差。騎馬出尋人。中路輒自歸。歸來亦何樂。書史自相期。已與往者親。可無茲世違。欲語無所得。起視北雁飛。念子遠千里。昔別今已基。寄聲雖云多。所得竟亦稀。近者忽報書。期我往就之。不知予苦窮。繫此不可離。尙迫朝暮憂。寧有道路資。人生少所同。老去纔幾時。予勢旣若此。子復不肯來。但恐百年間。齟齬終莫齊。詩以寄子招。亦以寫我悲。



寄孫莘老

默默不自得。勞勞非所任。不與君子逢。誰復明此心。偶客來自南。口有千里音。知無木索勤。頗復山水吟。對之爲一笑。欣如獲千金。宣城風物佳。古語昔已忱。太平又其右。道塗邈幽深。溪流渺彎環。山勢屹抱臨。況復寂寞人。黃綬事陸沈。公田秣旣收。客席酒屢斟。悔予昔南浮。不往一就尋。波濤忘日月。疾病廢古今。歸來就羈銜。外慮日已侵。適時愧非才。對客輒自瘖。譬如火炙膚。暫忍久莫禁。唯思百畝田。爲可足釜鬻。投身脫世箴。斂足蹈古箴。寄言所同懷。相期在中林。

夏日平居奉寄崔伯易兼簡朱元弼

天風變春和。晝日差夏永。門闌閉無事。燕雀去益靜。紛翻詩書帙。棄散懶收整。時來就枕臥。復可取窺省。心恬逐物閑。跡闊與世屏。鮮鮮南山暖。秀色上脩嶺。苟嫌安坐慵。還可遠游騁。自緣智能薄。反得閑暇幸。交朋久相遠。疎懶欲誰警。

幺幺庭下樹。陰影日已敷。攸攸閉門人。簟席自卷舒。高枝就懸冠。曲枝挂裳裾。一作襦還來從此息。臥視詩與書。栢栢門外客。從徒駕驪駒。不知來何聞。一作爲乃肯顧我閭。呼兒往應門。謂言出在途。非我敢厭客。非客與我疎。以予拙語言。無以得客娛。一不當客意。恐與世患俱。不如兩相忘。何能効紛如。

送朱明之昌叔赴尉山陽



朱侯拜書天上回。去以身試百里障。青衫飄若風外荷。借馬載出塵土上。準眉嶄嶄見天秀。如立繫馬萬里望。身軀雖小胸腹寬。沛如絕海橫秋漲。久宜脫絕事高致。豈願卑冗勞俗狀。高堂華髮親老矣。四海無家寄几杖。世外言高信獨奇。人前腰折嗟已強。尉官雖小俸雖薄。猶有餘錢買甘養。想當家帷奉顏面。綵衣躬率婦子餉。洗洗兒女戲滿前。累累諸兄坐相向。人間此樂不可幸。一笑自足百辱當。時清固應稀盜賊。俗弊寧不煩笞掠。好偷閑暇事簡編。思我寧無文字況。

### 學子

瑣瑣來學子。從我問古風。一作吾言古之人。學不求世功。以其明智餘。施與天下同。能知學爲身。自不恤窮通。童子顧我笑。是言得無蒙。斯道使可遵。曾不聞父翁。謂言童子歸。盍自謀厥躬。吾不能爾言。一作吾能亦不必爾從。

### 寄滿子權

昔心何悠悠。今學益漫漫。恭如浮江河。浩不際涯岸。生雖樂文字。勤不償几案。重編空堆塵。折簡久枯汗。徒如陳市肆。表列環四畔。已無探討勤。胡可賢否按。零丁晚觀玄。泯滅舊習彖。得指來歲期。失忘去日算。嘗聞勤惰間。已是愚知判。蒙羞欲何顏。避耻愧無翰。不能繩已怠。何力禁人叛。文章觸世嫌。議語限客竄。時牽好惡卑。俗撓是非亂。早衰奪舊剛。多病襲新懦。心經衣食難。事廢米鹽半。何謀脫身去。割跡與俗斷。



耕荒食新收。鑿室復舊貫。念生如冬冰。至死僅春泮。其間能幾時。何恃苦自緩。翩翩淮南英。顯顯士林觀。方子未爲遊。辱子昔同閑。篇章覲新華。論說聽橫捍。包奇晚自走。去實王府玩。近書何相撩。頗以名見謾。不知老者拙。棄此久已斷。子方勇自樹。解轡縱新驛。行期拾春青。采綬縮歸腕。乖離思舊歡。遷徙就新絆。無琴雖自歌。有酒欲誰伴。閑暇當寄詩。持此資賀換。

暑旱苦熱

清風無力屠得熱。落日着翅飛上山。人固已懼江海竭。天豈不惜河漢乾。崑崙之高有積雪。蓬萊之遠常遺寒。不能手提天下往。何忍身去游其間。

寄王正叔

微生不過人。氣力兩眇麼。力學失自謀。徑古趨今左。病世相陷賊。樹性期剛果。豈不中是時。然亦未嘗過。奈何衆好殊。未語咻已夥。俛俛獨何之。去去銳亦挫。忠言不售耳。直面屢得唾。怒目瞋以環。謗口焰而火。出門先自羞。有衣恍疑裸。過市不成步。侶距侔鼈跛。周旋不出屏。迷若蟻循磨。人惡固爲甚。自厭近亦頗。媚世定有術。欲學從誰可。必也泥自售。恐由此始禍。賢子遠相問。幸有以教我。得報速是宜。翹企不容坐。

雜詩效孫莘老

魚蝦無所能。動輒困人得。蛟鯨能則乖。覆舟取人食。龜鼈雖謂殊。剝剝同一劇。龍不入網羅。亦不爲人識。



犬羊養於人。壯則人食之。猛虎嗜人肉。終昧獵者機。豺狼與狗同。爲害豈必威。封狐能爲人。還作行子妻。

雜詩呈逢原

孫覺

鴻鴈最知時。未逃羅與網。不能忘稻粱。千里安得往。鳴蜩腹空虛。見啄因其響。丹鳳穴九霄。虞人常夢想。

呼雞

雞呼雞來。犬吠犬至。止夫豈必可召。役以食乃爾。今吾曷爲悲。人而雞犬爲。自計無自存。西山謝夷齊。

姚堅老見約偶成

初正布新和。餘臘爭近候。升騰陽力微。惟怯老陰鬪。江雲蕩空碧。一作疎朝雨沐清晝。林稍釋冬枯。土蘂壯春蔕。萎蕤風日舒。刻畫山野秀。關關先春鳥。格磔弄晴味。無人與調和。終日自嘲詬。唯君卜近適。過我許來就。遷延日屢蹉。嘆惜月復殼。人生誠多故。世事那可究。唯當自推置。障絕俗慮寇。休閒倘能偷。疎懶當自宥。徒行苟憚勞。借馬欲誰廐。清醕如定攜。佳客可先購。勉之無使遲。梅萼已堪覿。

初聞思歸鳥憶昨寄崔伯易朱元弼

去年春日花盛開。嘗有鳥啼歸去來。余詩告爾東海志。子笑屬我南山杯。將希遐躅蹈高軼。就拔去跡離俗埋。同時游者最誰上。朱子峭擢凌春材。門關午景臥正懶。過我呼號如春雷。鄰驚偷窺婦女怪。婢駭奔



棄一作走兒童。哈門開納坐聽論。列笑口侈哆傾胸懷。寒菹半菽要同飮。齏醬叫乞喧鄰隈。僧從南浮橐異角。尉解西去亭遺臺。心爭誇漫詰蜒蜿。目樂虛豁留崔嵬。柳稍黪黪空晴絮。杏花爍爍翻遺埃。春湖平渟照空碧。淮帆曉上攙天桅。西歸頗阨窮餓久。南泛未免丐乞哀。竭來隨人事卑折。忽自顧影漸低摧。平時客坐不敢語。苟以唯諾償嫌猜。胸中約結浩千萬。到口不吐如橫枚。比來頗自撥俗礙。日傍竹樹良徘徊。昏昏萬事置不省。知己疎懶心難裁。一聞春風動啼鳥。猛若重睡忽喚回。咨嗟歲月急若矢。嘆息無地安蒿萊。比于見人日加懶。行恐合俗老益乖。不知飄浮寄茲世。竟亦何計收形骸。春林沾沾風日好。飛止自便宜爾諧。何爲猶道歸不得。世間萬事真悠哉。

思京口戲周器之

江南別日醉方醺。貪愛青天帶水痕。忘却碧山歸路直。誤投浮世俗塵昏。終期散髮江邊釣。當有漁舟日繫門。但恨故人猶喜仕。他時胸腹未堪論。

寄束伯仁

身逐南舟去不迴。匡廬留滯得裴回。峯頭夜宿平看斗。巖下朝陰俯聽雷。西顧波濤浮日月。東歸天地入塵埃。何時得遂幽棲志。常把韋編靜處開。

對花



憂愁卒卒人無樂。花草紛紛物又春。安得無憂與無慮。對花還作笑歌人。

春遊

春城兒女縱春遊。醉倚層臺笑上樓。滿眼落花多少意。若何無箇解春愁。

春晚雨後

東風柔弱事春權。劇雨無端轉愴然。不惜好花都委地。却令遠草直平天。龍蛇久蟄應思奮。蛙蠃乘時已自先。綠柳由來卻堪笑。葉眉愁劇遂長眠。

紙鳶

誰作輕鳶壯遠觀。似嫌飛鳥未多端。纔乘一線憑風去。便有愚兒仰面看。未必碧霄因可到。偶能終日遂爲安。扶搖不起滄溟遠。笑殺搏鵬似爾難。

古鑑

一片靈光合有神。不知鎔鑄竟何人。春耕破冢衣冠盡。鬼手摩天日月新。鑑面祇知西子姣。照心難見比干真。主人深有收藏意。當待清明不受塵。

和東熙之雨後

獵獵風吹雨氣腥。誰翻碧海踏天傾。如何農畝三時望。只得官蛙一餉鳴。何處斷虹殘冷落。有時斜照暫



分明雷車收轍雲藏跡。依舊晴空萬里平。

幽居感懷寄滿子權

卜得幽居四絕鄰。尋常庭巷斷蹄輪。門前犬豕臥橫道。城上牛羊下視人。滿眼夕陽閑草樹。回頭歸路正埃塵。思君未見東來計。何日雙眉對面伸。

秋懷寄呈子權先示徽之兼簡孝先熙之

樹哭寒螿草哭蟲。何堪羈客憤時窮。卒無可樂羣書外。百不堪言一嘆中。雲黯暮天沉白日。土塵平地斷清風。夫君若問秋來況。淚滿遺編髮亂鬢。

九日寄滿子權

懶將衰病照清流。爲有歸心欲白頭。幸自好花開便笑。不甘爲客見成愁。長歌欲強秋風醉。高處先輸俗子遊。我在無聊元亮死。當年今日共悠悠。

次韻子權京口夜宿見寄

寒江漠漠客帆稀。獨泊扁舟望翠微。已寫綠醺聊自適。更邀白鳥共忘機。水閑海月寒初上。樹盡秋城碧自圍。嗟我相思邈千里。不來同此兩忘歸。

答孫莘老見寄



高門鞍馬日光榮。勢力紛紛起共爭。偶以不能聊自便。敢于茲世獨求清。生無人愧寧非樂。死有天知豈待名。客食官居同是苟。何須稱別異平生。

登郡樓

江城朝雨濕晴煙。樓上風帆送去船。苟得息肩閑歲月。時來開口笑山川。田園啼鳥三春日。江海扁舟萬里天。何計脫身來此老。青山白髮兩忘年。

感憤

二十男兒面似冰。出門噓氣五蜺橫。未甘身世成虛老。待見天心卻太平。狂去詩渾誇俗句。醉餘歌有過人聲。燕然未勒胡雛在。不信吾無萬古名。

登瓜洲迎波亭

海面清風萬里寬。偶來如已脫塵關。自嗟客世無虛日。卻被斜陽占盡山。海鳥不來青嶂靜。漁師歸去暮江閑。從來雲水有期約。直待功成是厚顏。

憶潤州葛使君

六朝遊觀委蒿蓬。想像當時事已空。一作清談半夜樓臺橫海日。萬家簫鼓過江風。金山寺近塵埃絕。鐵甕城深一作高氣象雄。欲放船隨明月去。應留閑暇待詩翁。



何處難忘酒

何處難忘酒。窮才世不知。出門無直道。開口礙當時。白髮無端速。青山不忍歸。此時無一盞。何以活餘黎。

庭草

平時已多病。春至更蹉跎。惡土種花少。東風生草多。客愁渾寄淚。野思不堪歌。獨有詩心在。時時一自哦。

秋日寄滿子權

樓前暮靄暗平林。樓上人愁意思深。未必薄雲能作雨。從來秋日自多陰。三年客夢迷歸路。一夜西風老壯心。欲作新聲寄遺恨。直絃先斷淚盈琴。

江上

羃羃荒城沒遠煙。暮雲歸族忽相連。春江流水出天外。晚渡歸舟下日邊。杏萼春深翻淺纈。柳花風遠聚晴綿。無錢買得江頭樹。輸與漁人繫釣船。

送聳隅黃先生

黃風吹土截天橫。瘦馬着鞭驅不行。尙說苦心酌直道。誰知白髮爲蒼生。平時蠻貊恬忠藎。常日公卿足仰成。雖有英雄無用處。卻令老去買牛耕。

寄介甫



天門簾陛鬱巍巍。勢利寧無澹泊譏。難與跼徒爭有道。好思吾黨共言歸。古人踽踽今何取。天下滔滔昔已非。終見乘槎去滄海。好留餘地許相依。

寄滿子權

窗前午枕夢忘還。門外清風晝掩關。天下誰當千古後。牀頭自笑六經閑。能將道繫窮通裏。安用身干進退間。自愧公心猶有蔽。清時無日不思山。

寄都下二三子失舉

大學齏鹽共苦辛。寒窓筆硯日相親。梁王臺畔一分袂。楊子江頭三換春。篋裏黃金須買酒。鬢邊白髮解欺人。窮通得喪誰能定。況是男兒有此身。

次韻滿子權見寄

當世雄圖不可懷。退居蒿艾自沉埋。門無來足荆生道。病不能鋤草上階。自是直方違世易。況將疎懶合人乖。無由與子同樵種。回首平林浪可柴。

病中

十日身無一日寧。病源知向百憂生。寒侵騏驥應方瘦。蠹滿楸楠豈易榮。小閣晝閑書帙亂。畫堂風靜藥羅聲。北山扶杖終歸去。寄語巖猿莫曉驚。



金山寺

萬頃清江浸碧瀾。乾坤都向此中寬。樓臺影落魚龍駭。鐘磬聲來水石寒。日暮海門飛白鳥。潮回瓜步見黃灘。常時戶外風波惡。祇得高僧靜處看。

登甘露寺閣

忽忽勞生歲月催。時偷高迹出浮埃。風沾草樹紅朝動。春入川原綠夜回。欲出壯懷臨八極。可無樽酒到高臺。江山不與人相語。似待忘言野客來。

謝張和仲惠寶雲茶

故人有意真憐我。靈苑封題寄華門。與療文園消渴病。還招楚客獨醒魂。烹來似帶吳雲腳。摘處應無穀雨痕。果肯同嘗竹林下。寒泉猶有惠山存。

太湖

西南無盡望。吞恐罄吳郊。海近私憑蓄。天低不敢包。蛟龍宜自宅。螾蛭莫令巢。遠浦纔分點。歸檣略認稍。水乘潮更闊。地過底宜坳。鳥截煙維斷。風凌浪脊交。大橋橫作畫。別岸缺成爻。吟恐詩無氣。圖憂筆費鈔。婦輸范蠡得。官許季鷹拋。去憶心應繫。歸誇口定譎。窮何須蹈海。來好卜編茅。著戶生同隱。居民釣自庖。滄浪未容濯。魚樵夜停敲。



# 後山詩鈔

陳師道字履常。一字無已。號後山。彭城人。年十六謁曾南豐。大器之。遂受業焉。元豐初。曾典史事。以白衣薦爲屬。尋以憂去。不果。章惇冀其來見。將特薦之。卒不一往。蘇東坡與侍從列薦爲教授。未幾。除大學博士。後以蘇氏私黨。罷移潁州。又換彭澤。以母憂不仕者四年。元符間。除秘書省正字。侍南郊。寒甚。其妻于僚壻借副裘。蓋熙豐黨也。竟不衣。病寒卒。初學於曾。後見黃魯直詩。格律一變。魯直謂其讀書如禹之治水。知天下之脈絡。有開有塞。至於九川滌源。四海會同者。作文知古人關鍵。其詩深得老杜之法。今之詩人不能當也。任淵謂讀後山詩。似叅曹洞禪。不犯正位。切忌死語。非冥搜旁引。莫窺其用意深處。因爲作註。蓋法嚴而力勁。學瞻而用變。涪翁以後。殆難與敵也。

妾薄命二首自注曰。爲曾南豐作。

主家十二樓。一身當三千。古來妾薄命。事主不盡年。起舞爲主壽。相送南陽阡。忍着主衣裳。爲人作春妍。有聲當徹天。有淚當徹泉。死者恐無知。妾身長自憐。葉落風不起。山空花自紅。捐世不待老。惠妾無其終。一死尙可忍。百歲何當窮。天地豈不寬。妾身自不容。死者如有知。殺身以相從。向來歌舞地。夜雨鳴寒蛩。



送外舅郭大夫槩西川提刑

丈人東南來。復作西南去。連年萬里別。更覺貧賤苦。王事有期程。親年當喜懼。畏與妻子別。已復迫曛暮。何者最可憐。兒生未知父。盜賊非人情。蠻夷正狼顧。功名何用多。莫作分外慮。萬里早歸來。九折慎馳騫。嫁女不離家。生男已當戶。曲逆老不侯。知人公豈誤。

送內

塵甕顧其子。燕雀各自隨。與子爲夫婦。五年三別離。兒女豈不懷。母老妹已笄。父子各從母。可喜亦可悲。關河萬里道。子去何當歸。三歲不可道。白首以爲期。百畝未爲多。數口可無饑。吞聲不敢盡。欲怨當歸誰。

別三子

夫婦死同穴。父子貧賤離。天下寧有此。昔聞今見之。母前三子後。熟視不得追。嗟乎胡不仁。使我至於斯。有女初束髮。已知生離悲。枕我不肯起。畏我從此辭。大兒學語言。拜揖未勝衣。喚爺我欲去。此語那可思。小兒襁褓間。抱負有母慈。汝哭猶在耳。我懷人得知。

寄外舅郭大夫

巴蜀通歸使。妻孥且舊居。深知報消息。不忍問何如。身健何妨遠。情親未肯疎。功名欺老病。淚盡數行書。

憶少子



端也早豐下。歲晚未可量。我老不自食。安得如我長。呱呱棄不子。退省未始忘。吾母亦念我。與爾寧相望。  
贈二蘇公

岷峨之山中。巴江桂椒柟。櫨楓柞樟。青金黃玉丹砂良。獸皮鳥羽不足當。異人間出駭四方。嚴王陳李司馬楊。一翁二季對相望。奇寶橫道驥服箱。誰其識者有歐陽。大科異等固其常。小卻盛之白玉堂。典謨雅頌用所長。度越周漢登虞唐。千載之下有素王。平陳鄭毛視荒荒。後生不作諸老亡。文體變化未可量。萬口一律如吃羌。妖狐幻人大陸梁。虎豹卻走逢牛羊。上帝惠顧祓不祥。天門夜下龍虎章。前驅吳回後炎皇。絳旂丹轂朱冠裳。從以甲冑萬鬼行。乘風縱燎無留藏。天高地下日月光。授公以柄扶病傷。士如稻苗待公秧。臨流不度公爲航。如大醫王治膏肓。外證已解中尙強。探囊一試黃昏湯。一洗十年新學腸。老生塞口不敢嘗。向來狂殺今尙狂。請公別試囊中方。

送江端禮

正學元非世。能詩新有聲。諸公交鄭泰。多士閉何生。汎愛經過數。移書底裏傾。又爲淮海別。病眼向誰明。

九日寄秦觀

疾風回雨水明霞。沙步叢祠欲莫鴉。九日清樽欺白髮。十年爲客負黃花。登高懷遠心如在。向老逢辰意有加。淮海少年天下士。可能無地落烏紗。



示三子

去遠卽相忘。歸近不可忍。兒女已在眼。眉目略不省。極喜不得語。淚盡方一哂。了知不是夢。忽忽心未穩。

烏呼行

去年米賤家賜粟。百萬官倉不餘掬。青錢隨賜費追呼。昔日剜瘡今補肉。今年夏旱秋水生。江淮轉粟千里行。不應遠水救近渴。空倉四壁雀不鳴。似聞爲政不爲費。兩不相傷兩相濟。十年斂積用一朝。驚濤破山風動地。

送張支使

曠度逢知晚。高才處下難。清秋一鶚上。拭目萬人看。白酒初同醉。黃花已戒寒。憑將衰老事。一一報長安。

從蘇公登後樓

條作三年別。才堪一解顏。樓孤帶清洛。林缺見巴山。五月池無水。千年鶴自還。白鷗沒浩蕩。愛惜髣毛斑。

次韻李節推九日登南山

平林廣野騎臺荒。山寺鳴鐘報夕陽。人事自生今日意。寒花只作去年香。巾欵更覺霜侵髣。語妙何妨石作腸。落木無邊江不盡。此身此日更須忙。

田家



鷄鳴人當行。犬鳴人當歸。秋來公事急。出處不待時。昨夜三尺雨。竈下已生泥。人言田家樂。爾苦人得知。  
出清口  
家世山東飽耕稼。晚託一舟順流下。漁溝寒餅不下筓。推柂轉頭更五夜。平明放溜出清口。霜落潮回霧  
連野。平淮一夢三十里。有日無風神所借。似憐憂患滿人間。百孔千瘡容一罅。文章末技將自効。語不驚  
人神可嚇。子女玉帛君所餘。寄聲白鳥煩多謝。

贈歐陽叔弼

早知汝穎多能事。晚以詩書託下僚。大府禮容寬懶慢。故家文物尙嫖姚。只將憂患供談笑。敢望功言答  
聖朝。歲歷四三仍此地。家餘五一見今朝。

觀堯文忠公家六一堂圖書

生世何用早。我已後此翁。頗識門下士。略已聞其風。中年見二子。已復歲一終。呼我過其廬。所得非所蒙。  
先朝羣玉殿。冠佩環羣公。神文煥王度。喜色見天容。御榻誰復登。帝書元自工。黃絹兩大字。一覽涕無從。  
似欲託其子。天意人與同。歷數況有歸。敢有貪天功。集古一千卷。明明並羣雄。誰爲第一手。未有百世公。  
廟器刻科斗。寶樽蟠華蟲。緬懷弁服士。酬獻鳴琤琮。插架一萬軸。遺子以固窮。素琴久絕弦。棊酒頗闕供。  
向來一瓣香。敬爲曾南豐。世雖嫡孫行。名在亞子中。斯人日已遠。千歲幸一逢。吾老不可待。露草濕寒葢。



送蘇迨

胸中歷歷着千年。筆下源源赴百川。真字飄揚今有種。清談絕倒古無傳。出塵解悟多爲路。隨世功名小着鞭。白首相逢恐無日。幾時書札到林泉。

送黃生兼寄二謝

城西兩謝俱能文。穰丞精悍吾所聞。每讀吾詩得人意。使不能文已可人。我昔謝公門下士。早年妄作功名意。如今老寄潁河東。九泉雖深愧此公。

次韻蘇公西湖徙魚三首

窮秋積雨不破塊。霜落西湖露沙背。大魚泥蟠小魚樂。高丘覆杯水如帶。魚窮不作搖尾憐。公寧忍口不忍鱠。脩鱗失水玉參差。晚日搖光金破碎。咫尺波濤有生死。安知平陸無灘瀨。此身寧供刀几用。着意更須風雨外。是間相忘不爲小。濠上之意誰得會。枯魚雖泣悔可及。莫待西江與東海。

赤手取魚如拾塊。布網鳴舷攻腹背。豈知激濁與清流。恐懼駢頭牽翠帶。居士仁心到魚鳥。會有微生化餘鱸。寧容網目漏吞舟。誰能烹鮮作苛碎。我亦江湖釣竿手。悞逐輕車從下瀨。生當得意落鷗邊。何用封侯墮鳶外。不如此魚今得所。置身暗與神明會。徑須作記戒鯨鯢。防有任公釣東海。

詩成落筆驥歷塊。不用安西題紙背。小家厚劍四壁立。拆東補西裳作帶。堂下殼鯨牛何罪。太山之陽人



作鱸。同生異趣有如此。餅懸嘗間終一碎。流水長者今公是。雨花散亂投金瀨。人言充庖須此輩。慈觀更須容度外。賜墻及肩人得視。公才槃槃一都會。有憐其窮與不朽。我亦牽聯書玉海。

八月十日二首

一夢人間四十年。只應炊竈固依然。兩官不辦一丘費。五字虛隨萬里船。人生七十今強半。老去光陰已後身。更欲置身須世外。世間元自不關人。

迎新將至漕城

早投林野遠風雨。晚傍塵沙飽送迎。卻愧兩街屠販子。臥聽車馬過橋聲。

卽事

老覺山林可避人。正須麋鹿與同羣。卻嫌鳥語猶多事。強管陰晴報客聞。

齋居

青奴白牯靜相宜。老罷形骸不自持。一枕西窗深閉閣。臥聽叢竹雨來時。

寄亳州林待制

湖海相望闕寄聲。雲林過雨未全晴。青衫作吏非前日。白首論文笑後生。似聽兒童迎五馬。稍修書札問專城。一聞苦李蒙莊句。不復人間世後名。



次韻回山人

一杯領意不須沾。六字持身已有餘。痴子未知天上樂。先生今解世間書。

又次屬沈東老

隨世功名非所望。稱家豐儉不求餘。青衫出指論奇字。白髮挑燈寫細書。

送孝忠二首

老眼元多淚。春風見此行。又爲貧賤別。更覺急難情。斗食吾堪老。詞場爾向榮。未須憐野鷺。家法付宣城。經史三年學。聰明一旦開。把文甘潦倒。數日待歸來。士患聲名早。官今歲月催。有親須薄祿。臨路尙徘徊。

以桂桂一作柱杖供仁山主

洗足投筇只坐禪。厭尋岐路費行纏。老來不復人間事。不用山公更削圓。

西湖

小徑才容足。寒花只自香。官池下鳧鴈。荒塚上牛羊。有子吾甘老。無家去未量。三年哦五字。草木借輝光。

送吳先生謁惠州蘇副使

聞名欣識面。異好有同功。我亦慚吾子。人誰恕此公。百年雙白鬢。萬里一秋風。爲說任安在。依然一秃翁。

別觀音山主



離合應生理。過逢豈近緣。情親見今日。語妙記當年。閉戶安禪主。衝風逆水船。不應清夜月。故作別時圓。

離頌

河市千人聚。寒江百尺牽。吾生能幾日。此地費三年。叢竹防供爨。池魚已割鮮。拙勤終不補。他日愧無傳。

答晁以道

轉走東南復帝城。故人相見眼偏明。十年作吏仍餬口。兩地爲鄰闕寄聲。冷眼尙堪看細字。白頭寧復要時名。孰知范叔寒如此。未覺嚴公有故情。

別黃徐州

姓名曾落薦書中。刻畫無鹽自不工。一日虛聲滿天下。十年從事得途窮。白頭未覺功名晚。青眼常蒙今昔同。衰疾又爲今日別。數行老淚灑西風。

古墨行 并序

晁無斃有李墨半丸。云裕陵故物也。往於秦少游家。見李墨。不爲文理。質如金石。亦裕陵所賜。王平甫所藏者。潘谷見之。再拜云。真廷珪所作也。世惟王四學士有之。與此爲二矣。嗟乎。世不乏奇。乏識者耳。敬爲長句。率無斃同作。

秦郎百好俱第一。烏鳥一作墨丸如漆姿如石。巧作松身與鏡面。借美於外非良質。潘翁拜跪摩老眼。一生再



見三歎息。了知至鑒無遁形。王家舊物秦家得。君今所有亦其亞。伯仲小低猶子姪。黃金白璧孰不有。古錦句囊聊可敵。睿思殿裏春夜半。燈火闌殘歌舞散。自書細字答邊臣。萬里風塵入長算。初聞橋山送弓劍。寧知玉怨人間見。夜光炎炎衝斗牛。會有太史占星變。人生尤物不必有。時一過目驚老醜。念子何忍遽磨研。少待須臾圖不朽。魏衍注曰。少游之墨。嘗許先生爲他日墓誌潤筆。先明窗淨几風日暖。生嘗語衍。作此詩時。少游尙無恙。然終先逝去。有愁萬斛才八斗。徑須脫帽管城公。小試玉堂揮翰手。

次韻春懷

老形已具臂膝痛。春事無多櫻筍來。敗絮不溫生蟣蝨。大杯覆酒着塵埃。衰年此日常爲客。舊國當時只廢臺。河嶺尙堪供極目。少年爲句未須哀。

河上

背水連漁屋。橫河架石梁。窺巢烏鵲競。過雨艾蒿光。鳥語催春事。窗明報夕陽。還家慰兒女。歸路不應長。

題柱并序

永安驛廊東柱有女子題五字云。無人解妾心。日夜長如醉。妾不是瓊奴。意與瓊奴類。讀而哀之。作二絕句。

桃李催殘風雨春。天孫河鼓隔天津。主恩不與妍華盡。何限人間失意人。



從昔嬋娟多命薄。如今歌舞更能詩。孰如如一文雅河陽令。不削瓊奴柱下題。

### 蠅虎

物微趣下世不數。隨力捕生得稱虎。匿形注目搖兩股。卒然一擊勢莫禦。十中失一八九取。吻間流血腹如鼓。卻行奮臂吾甚武。明日淮南作端午。

### 宿深明閣

窈窕深明閣。晴寒是去年。老將災疾至。人與歲時遷。默坐元如在。孤燈共不眠。莫年身萬里。賴有故人憐。縹緲金華伯。人間第一人。劇談連晝夜。應俗費精神。時要平安報。反愁消息真。墻根霜下草。又作一番新。

### 東山謁外大父墓

土山宛轉屈蒼龍。下有槃槃蓋世翁。萬木刺天元自直。叢篁侵道更須東。百年富貴今誰見。一代功名託至公。少日拊頭期類我。莫年垂淚向西風。

### 次韻晁無斁冬夜見寄

寒窗冷硯欲生塵。短枕長衾卻自親。老子形骸從薄暮。先生意氣尙青春。覆杯不待回丹頰。危坐猶能作直身。城郭山林兩無得。莫年當復幾霑巾。

### 寒夜有懷晁無斁



同好共城郭。十日不一顧。人事雖好乖。吾生亦多忤。闔門對妻子。歲月不可度。閉目寧用遮。停杯仍下筯。獨無區中緣。永懷岩下趣。平生三徑資。安得一朝具。萬里初歷塊。前驅告曠暮。歸懷屬有思。棄世不待怒。老境厭逶遲。人情費將護。向來張長公。吾亦從茲去。燈花頻作喜。月色正可步。預恐何水曹。明朝有新句。

寄提刑李學士

石渠金馬青雲上。東里西門濟水邊。上冢過家真樂事。平時持節貴當年。成家舊學諸儒問。脫手新詩萬口傳。范叔一寒今若此。相逢猶得故人憐。

寄杜擇之杜寄惠近詩

詩家兩杜昔無隣。文采風流一作傳家世有人。疾置送詩驚老醜。坐曹得句自清新。興來不假江山助。目過渾如草木春。農馬智專吾不讓。衡陽紙貴子能頻。

寄晁無斁

稍聽春鳥語丁寧。又見官池出斷冰。雪後踏青誰與共。花間着語老猶能。笑談莫倦尋常聽。山院終同一再登。今日已知他日恨。槍榆況得及飛騰。

還里

曠士愛吾廬。遊子悲故鄉。慷慨四方志。老衰但悲傷。虛名自成誤。失得略相當。莫年還家樂。未覺道路長。



閩里喜我來。車馬塞康莊。爭前借言色。草木亦晶光。向來千人聚。一老獨徜徉。手開南陽阡。松柏鬱蒼蒼。永願守一丘。脫身萬里航。平生功名念。倒海澗我腸。款段引下澤。斷弦更空觴。尙恐北山南。有文移路傍。

次韻夏日江村

漏屋簷生菌。臨江樹作門。捲簾通燕子。織竹護雞孫。向夕微風一作涼進。相逢故意存。一作露衣何當加我歲。從子問乾坤。

次韻夏日

江上雙峯一草堂。門閑心靜自清涼。詩書發冢功名薄。麋鹿同羣歲月長。句裏江山隨指顧。舌端幽眇致張皇。莫欺九尺鬚眉白。解醉佳人錦瑟傍。

夏夜有懷

臥念張居士。逃名老石根。學詩端得瘦。識字卽空樽。鳴笛夜宜遠。燈花曉更繁。未須哀老子。也復守丘園。

和顏生同遊南山

何杖芒鞋取次行。琳琅觸目路人驚。當年此日仍爲客。病目今來喜再明。筋力尙堪供是事。登臨那得總無情。已知名世徒爲爾。可復緣渠大瘦生。

和魏衍元夜同登黃樓



車馬競清夜。人物秀三楚。登臨得免俗。茲樓豈時睹。同來兩稚子。冠者亦四五。落落俱可人。頗亦厭歌鼓。山月出未高。潛鱗動寒渚。檣燈接稀星。奪目粲不數。魏侯轉物手。百好趨就敍。得句未肯吐。秀氣出眉宇。水淨納行影。山空答脩語。夜氣稍侵肌。鳥駭去其侶。清游豈有極。喜事戒多取。投靜未免喧。於今豈非古。永懷寂寞人。南北忘在所。橫嶺限魚鳥。作書欲誰與。情生文自哀。意動足復佇。憑檻一作檻共一默。望舒已侵午。

和魏衍同登快哉亭

經時不出此同臨。小徑新摧草舊侵。欲傍江山看日落。不堪花鳥已春深。來牛去馬中年眼。朗月清風萬里心。故着連峯當極目。回看幽徑遶雙林。

和三日

苦遭年少強追陪。病眼看花更覆杯。夾岸萬人傾國出。清江一注兩山開。遊人欲盡驚鷗下。晚日猶須惡雨催。更恐明年有離別。折花臨水共徘徊。

登燕子樓

綠暗連村柳。紅明委地花。畫梁初着燕。廢沼已鳴蛙。鷗沒輕春水。舟橫着淺沙。相逢千歲語。猶說一枝花。

和黃充實春盡遊南山



逐勝缺勇功。餞春無少色。出門欲何向。坂丸隨所擊。百年餘幾何。十步復一息。同來二三子。楚楚頗修飭。行前強老夫。徑捷疲峻陟。山門開煙霏。禪房閉岑寂。口燥沾茗椀。久厄此爲德。逐日下西山。草路荒不識。回溪轉鈎曲。門徑入繩直。故人喜領客。向愧積腸臆。所來爲親舊。掃除稱寥閔。疾風無末勢。過雨有餘瀝。高花初欲然。平荷已如拭。因君感衰盛。醜好移頃刻。交新厭區區。話舊聽歷歷。談間十一二。四座已傾側。茅屋漏溼一作風霜。山田帶沙礫。尙能哀此老。舉手觸四塞。君如澗底松。超拔出天壁。學詩有新功。黃魏共推激。生與魏衍黃預游。

何郎中出示黃公草書

龍蛇起伏筆無前。江漢淵回語更妍。好事元須一賞足。藏家不必萬人傳。當年闕里與論詩。晚歲江山斷夢思。妙手不爲平世用。高懷猶有故人知。

送河間呂令子固甥

今日中牟令。當年太守孫。獨能憐此老。肯避席爲門。寒日風濤壯。邊城簿領繁。平生子曾子。白首得重論。

寄潭州張芸叟

湖嶺一都會。西南更上游。秋盤堆鴨腳。春味薦猫頭。宣室來何暮。蒸池得借一作留。孰知爲郡樂。莫作越鄉憂。



去國如前日。爲邦得舊游。霜柑先落手。春鴈幾回頭。只道風沙惡。寧知賈宋留。賦詩真有助。弔古不同憂。

雪後

送往開新雪。又晴故留臘。白待春青。稍回松色。伸梅怨。併得朝看與夜聽。已覺庭泥生馬一作鳥迹。遽修田事帶朝星。莫年功力歸持律。不是騷人故獨醒。

送提刑李學士移使東路

襟抱從前相向開。倡酬於此未多陪。身更寵辱談彌勝。路別東西意自哀。隱几忘言終不近。白頭青簡兩相催。孰知衰老難爲別。聲問應須續續來。

隱者郊居

高齋繚繞度雙溝。老氣軒昂蓋九州。不爲江山開悒快。正緣風味得淹留。招攜好客共談笑。拆補新詩擬獻酬。小摘自鋤稀菜甲。旁觀虛作不堪憂。

送檢法趙奉議

三歲公門不屢過。作牋時得問如何。及茲去去翻爲恨。向使常常肯謂多。勇銳閉房猶着酒。切深疾惡反傷和。贈言竊取仁人號。善聽君居長者科。

寄曹州晁大夫



東方千騎貴當年。白髮居頭也自賢。肯費精神修客主。稍回功譽入章篇。虛名不救一作飢。空腸厄。晚歲仍遭末疾纏。死去不爲天下惜。鏡中當有故人憐。

送馮翊朱令

三楚風流信有人。先聲今已徹咸秦。寧爲雞口官無小。欲試牛刀久要新。細肋臥沙勤下筯。長芒刺眼莫露唇。山西一作西州。豪傑知吾老。爲說猶堪舉萬鈞。

酬智叔見贈

老去斯文不更論。卻因夫子話師門。清談不待傾三語。勝日何知共一樽。逐北我方填坎井。圖南誰得料鵬鯤。過逢爲說侯芭在。臥楫生衣續有孫。

敬酬智叔三賜之辱兼戲楊理曹二首

龍爭虎據竟成塵。只有青樓與白門。青樓謂燕子樓也。令宰才高先得句。使君情重數開樽。江山故國難留鶴。科

斗荒池可着鯤。直使頷鬚渾作白。未應投鑷愧諸孫。智叔有嘆白髮詩。

險韻廋詞費討論。真持布鼓過雷門。更看九日臺頭句。未用三人月下樽。鏡裏黃花明白髮。海邊赤腳踏長鯤。從來相戒莫打鴨。可打鴛鴦最後孫。

酬智叔見戲



百念皆空習尚存。稍修香火踏空門。槌腰摩腹非春事。割愛投閑覆上樽。白髮情多猶可染。來詩有白髮之嘆。鸞興盡卻乘鯤。上界紛紛足官府。也容河鼓過天孫。

雨花風葉未宜春。私柳官渠白下門。每度清溪嘲短髮。時容使席近芳樽。雄蜂雌蝶元非偶。野馬遊塵不佐鯤。若許成功當封賞。事具李待制席上篇。請看子子與孫孫。

九月九日與智叔鵬堂宴集夜歸

鵬堂從昔有惡客。酒盡不去仍復索。欲留歌舞盡客意。風雨和更作三厄。佳辰難得客更難。我窮無酒爲君歡。只欲泥行過白下。萬一簾疎見一斑。

絕句四首

秋牀歸臥不緣愁。病與衰謀作老仇。數樹直青能爾瘦。一軒殘照爲誰留。芒鞋竹杖最關身。散髮披衣不待人。三兩作鄰堪共話。五千插架未爲貧。昏昏嗜睡元非病。續續題詩不耐閑。作意買山還得笑。多方拔白却成斑。書當快意讀易盡。客有可人期不來。世事相違每如此。好懷百歲幾回開。

懷遠任淵注云。此詩屬東坡。

海外三年謫。天南萬里行。生前只爲累。身後更須名。未有平安報。空懷故舊情。斯人有如此。無復涕縱橫。



答田生

酒亦有何好。人今未肯忘。苟無愁可解。何必醉為鄉。臆欲論奇字。終能諱秘方。直饒肌骨秀。正要畫眉長。

早起

鄰雞接響作三鳴。殘點連聲殺五更。寒氣挾霜侵敗絮。賓鴻將子度微明。有家無食惟一作高枕。百巧千窮只短檠。翰墨日疎身日遠。世間安得尚虛名。

和黃充小雪

度臘侵春亦未遲。紛紛款款意猶微。霑衣帶潤元無見。着物還消不待晞。臆欲打窓連夜聽。未須迷鴈斷行飛。老來才盡無新語。只欲煩君急手揮。帶潤一作自溼

謝趙使君送烏薪

欲落未落雪近人。將盡不盡冬壓春。風枝冰瓦有去鳥。遠坊窮巷無來人。忽聞叩門聲遽速。驚雞透籬犬升屋。使君傳教賜薪炭。妓圍那解思寒谷。老身曲直不足云。冷窓凍壁作春溫。定知和氣家家到。不獨先生雪塞門。一作席作門

和范教授同遊桓山

送客尋山已自仙。行談坐笑復忘年。平郊走馬斜陽裏。破屋傳杯積水邊。洗壁留名題歲月。一作題名留歲月登



高着句記山川風流幕下諸公子縮手吟邊更覺賢。

早春

度臘不成雪。迎年遽得春。水開還舊綠。魚喜躍脩鱗。柳及年年發。愁隨日日新。老懷吾見異。不是故違人。

徐僊書

徐清字靜之。蓬萊女官也。下西里王氏。詩作謝體。書效黃魯直。妍妙可喜。敬作三絕句。

蓬壺仙子補天手。筆妙詩清萬世功。肯學黃家元祐腳。信知人厄匪天窮。

詩成已作客兒語。筆下還爲魯直書。豈是神仙未賢聖。不隨時事向人疎。

金華牧羊小家子。西真攘桃何代兒。詩着海山書落爪。向來何一作那免世人疑。

咸平讀書堂

昔人三百篇。善世已有餘。後生守章句。不足供囁嚅。一登吏部選。筆硯隨掃除。閉閣畫眉嫵。隔屋聞歌呼。奉公用漢律。寧復要詩書。俛首出跨下。枉此七尺軀。今代陶朱公。不作大梁屠。計然特未用。意得輕全吳。爲邦得畿縣。政密自計疎。寧書下下考。不奉急急符。用意簿領外。築室課典謨。平生五千卷。還舍不問塗。近事更漢唐。稍以詩自娛。復作無事飲。醉臥擁青奴。桃李春事繁。軒窓晝景舒。鳴屋鳩渴雨。窺簾燕哺雛。休吏散篇帙。風篁獻笙竽。忻然一啓齒。斯民免爲魚。



絕句二首

里中餽杏得嘗新。馬上逢花始見春。勤苦著書如此吏。世間枉是最閑人。  
密密丹房疊疊花。一枝臨路爲人斜。丁寧語鳥傳春意。白下門東第幾家。

春懷示鄰里

斷墻着雨蝸成字。老屋無僧燕作家。剩欲出門追語笑。卻嫌歸髻着塵沙。風翻蛛網開三面。雷動蜂窠趁  
兩衙。屢失南鄰春事約。只今容有未開花。

和寇十一晚登白門

重門傑觀屹相望。表裏山河自一方。小市張燈歸意動。輕衫當戶晚風長。孤臣白首逢新政。遊子青春見  
故鄉。富貴本非吾輩事。江湖安得更相忘。

謝寇十一惠端硯

百工營才先利器。市道居貨如作贅。書生活計亦酸寒。斷塼半瓦寧求備。端溪四山下龍淵。鬱積中州清  
淑氣。金聲玉骨石爲容。河江屈流雲作使。滑如女膚色馬肝。夜半神光際天地。諸天散花百神喜。知有聖  
人當出世。沒人投深索千丈。探領適遭龍伯睡。輓轡挽出萬人負。千歲之藏一朝致。琢爲時樣供翰墨。十  
襲包藏百金貴。北行萬里更衆目。寇卿好事不計費。南鄰居士卿之孫。豐悴相從不爲異。似憐陶瓦磨竈



煤輟誦不減前人志。人言寒士莫作事。鬼奪客偷天破碎。龜玉韞匱與無同。錦衾還客棄佳惠。衆所欲得當有緣。天獨於余可無意。敢書細字注魚蟲。要傳華嚴八千偈。

再和寇十一

與世相違孰自量。資身無策謾多方。逢場作戲真呈拙。誤筆成蠅豈所長。名字不歸青史筆。形容終老白雲鄉。何可一作須五斗輕千里。賴有斯人未肯忘。

謝趙生惠芍藥

從微至老走風塵。喜見鄉園第四春。獨舞東風醉西子。政緣無語卻宜人。九十風光次第分。天憐獨得殿殘春。一枝賸欲簪雙髻。未有人間第一人。

寄鄰

借子翩翩果下駒。春原隨處小踟蹰。可能炙背春風裏。臥把青銅摘頷鬚。

和寇十一同登寺山

度暑無好懷。憑危略幽致。衣冠蔚如林。從我才一二。茲山昔深登。歲月誰得記。尙有名勝流。不與金石悴。孰知千載後。我與子復至。煙昏倏見燈。洪發疑無地。領略章句手。割據英雄志。興壞容一瞬。今昔當幾喟。圍山缺西北。放目不可制。歸懷納清境。夜榻成良寐。零落壁間詩。豈特彼所愧。會逢南過適。不問西來意。



謝孫奉職惠胡德墨

奚李風流盡。法傳外諸孫。常山陳瞻子。懷抱自高擗。孰云勝潘翁。惟眉山公言。四海未盡識。一變歸九原。胡郎少年子。外家典刑存。一點落髭漆。重價壓璵璠。孫侯磊落人。情義久益惇。解囊贈玄圭。孰知師白猿。我資不解書。下筆輒自暖。良寶不受辱。隱默面稱冤。

拱翠堂

蕭邑富人寶敦禮。卽泉山作此堂。規制宏麗。無咎作記。

千年茅竹蔽幽奇。一日堂成四海知。便有文公來作記。尙須我輩與題詩。至人但有經行處。寶蓋仍存朽老枝。能事向來非促迫。經年安得便嫌遲。

和李使君九日登戲馬臺

登高能賦屬吾儕。不用傳杯擊鉢催。九日風光堪落帽。中年懷抱更登臺。江山信美因人勝。萸菊逢辰滿意開。二謝風流今復見。千年留句待公來。

與魏衍寇國寶田從先二姪分韻得坐字

將老蒙誤恩。受吊不受賀。欲起尙遲回。積閑習成惰。向來二三子。相與守寒餓。一日不可無。三歲安得過。是時秋益高。夜永月初墮。漏鼓已再更。坐者餘幾箇。酒薄多可強。談勝堅莫破。簷昏讀字細。林缺瞻星大。吳吟未至慢。楚語不假些。懷遠已屢歎。論昔先急唾。身世喜相違。真成蝨旋磨。平生陳孟公。晚歲不驚坐。



初墮一作初破。莫破一作莫挫。

和黃生出游

賸欲登臨強作歡。衣冠未動意先闌。從今泉石非吾事。只借君詩細細看。

從寇生求茶庫紙

南朝官紙女兒膚。玉版雲英比不如。乞與此翁元不稱。他年留待大蘇書。

酬顏生惠茶庫紙

破卵剝膜肌理滑。削玉作版光氣熏。老子尙堪哦七字。阿買頗能書八分。

黃樓

樓以風流勝。情緣貴賤移。屏亡老畢篆。市發大蘇碑。更覺江山好。難忘父老思。只應千載後。覽古勝當時。

答黃生

魏衍注云。時初冬。尙無冬衣。先生以背子贈之。堅不受。到家以朱氏所贖二疋寄之。因作詩。

我無置錐君立壁。春黍作糜甘勝蜜。綈袍不受故人意。樂餌肯爲兒輩屈。割白鷺股何足難。食鷓鴣肉未爲失。暮年五斗得千里。有愧寒簷背朝日。

五子相送至湖陵

中年患別多作別。早日諱窮常得窮。勿云一水四十里。衣冠塞郭何人同。周生子病輟身出。劉子遠來今



幾日石家仲叔好少年。頗能壓俗從吾律。魏君不獨相從早。自君之來吾卻掃。歲月磨人孰能久。反覆看渠難得好。湖陵古城風日寒。情義乃知生別難。高懷已爲故人盡。交道應留後代看。

家山晚立

遶舍苔衣積。倚墻梨頰紅。地平宜落日。野曠自多風。禹迹千年後。家山一顧中。未休嗤土偶。已復逐飄蓬。

寒夜

一夜風澎浪。中宵月脫雲。到窓資少睡。遠響倦多聞。星火遠相亂。江山氣不分。早雞先得便。斷鴈屢鳴羣。

山口

重霧真成雨。疎簾不隔風。青林擁紅樹。家鷺雜賓鴻。漁屋渾環水。晴湖半落東。往來成一老。猶在半塗中。

宿合清口

風葉初疑雨。晴窓誤作明。穿林出去鳥。舉棹有來聲。深渚魚猶得。寒沙鴈自驚。臥家還就道。見計豈蒼生。

宿泊口

弱柳經寒色。懸流盡夜聲。更長疑睡少。霜落怯寒生。急急占星度。搖搖苦舫傾。風濤兼盜賊。恩重覺身輕。

宿柴城

臥埋塵葉走風煙。齒豁頭童不計年。起倒不供聊應俗。高低莫可只隨緣。通通遠鼓三行夜。隱隱平湖四



接天枕底濤波篷上雨。故將驕旅一作老到愁邊。

晚坐

柳弱留春色。梅寒讓雪花。溪明數積石。月過戀平沙。病減還增藥。年侵卻累家。後歸栖未定。不但只昏鴉。

寒夜

留滯常思動。艱虞卻悔來。寒燈挑不焰。殘火撥成灰。凍水滴還歇。風簾掩復開。孰知文有忌。情至自生哀。

晚興

去國猶能別。逢人始欲愁。不干遮極目。自是怯回頭。布網收魚糝。連筒下釣鈎。誰初教鮮食。澤竭未能休。

別劉郎

魏衍注云。宣義之壻。六年之別。先生喪母。劉喪父。故其詩哀甚。

一別已六載。相逢有餘哀。公私兩多事。災病百相催。無酒與君別。有懷向誰開。深知百里遠。肯為老夫來。

雞籠鎮今棗州界。

河市新經集。雞籠舊得名。初聞北人語。意作故鄉聲。客久艱難極。情忘去就輕。空虛仍廢忘。何以慰諸生。

酬王立之二首

頓有亭前玉色梅。情知不肯破寒開。似憐憔悴兩公指蘇黃客。獨倚東風遣信來。

重梅雙杏巧相將。不為游人只自芳。應怪詩翁非老手。相逢不作舊時香。



和謝公定觀秘閣文與可枯木

斯人不復有。累世或可期。每於丹青裏。一見如平時。壞障塵得入。慘淡令人悲。墨色落欲盡。嚴顏終不移。朽老莫使年。石心烏銅皮。念此猶少作。未盡冰霰姿。北枝把異鵲。意定了不疑。惜哉不得語。曾次幾興衰。一爲要貴役。可復愧一作畫師。隱奧雖可惜。塗抹復見遺。謝侯名家子。感慨形苦詞。豈惟語畫工。勁特頗似之。何當補諫列。一吐胸中奇。

贈吳氏兄弟

得失媿妍只自知。略容千載有心期。恨君不見金華伯。何處如今更有詩。

上晁主客時與無咎對酒。及門而闢者辭焉。

兩疏父子共含香。不獨家榮國有光。賸欲展懷因問疾。孰知相對只銜觴。年侵身要兼人健。節近花須滿意黃。從昔竹林須小阮。只今未可棄山王。

贈石先生

多方作計老如期。百疾交攻遽得衰。晚有勝緣逢異士。生須快意闕前知。迫人鬢領紛紛白。臨事廻迂種種遲。分我刀圭容不死。他年鶴馭得追隨。

送歐陽叔弼知蔡州



穎陰爲別悔忽忽。十載相望信不通。晚遇聖朝收放逸。旋遭官禁限西東。又爲太守專淮右。賸喜郎君類若翁。梅柳作新詩興動。可令千里不同風。

送晁堯民守徐

中年爲別不堪憂。束髮登門到白頭。南省望郎仍國士。東方千騎更吾州。彭翁老壽終遺骨。燕子飛來只故樓。知己難逢身易老。煩公置醴我歸休。

山口阻風

夕風朝未回來。雲去爲雨。繫舟直山口。天意遽如許。濤風兩方鬪。丘原莫當怒。兩山爲俯仰。一鳥不得度。臨深負高枕。偷生寧得所。歷歷數過帆。當途氣如虎。快意亦適然。淹泊豈吾取。溯洄更去留。未易相爾汝。行登東山顛。壯觀前來覩。九澤不滿眼。五丈方一縷。茲山昔誰遊。巨野傳自古。菰魚無凶年。末利猶不禦。荷隩活萬人。梨埒視千戶。東方富絲麻。小市藏百賈。連檣自南北。行談雜秦楚。向晚風力微。湖清魚可數。空倉鳥烏樂。外舍窗扉語。身非天下惜。家無十金聚。欲留盜賊迫。欲去渡濤怒。兩者爾何從。一死吾未與。

嘲無咎文潛二首

詩人要瘦君則肥。便然偉觀詩不宜。詩亦於人不相累。黃金九鑲腰十圍。一饑緣我不緣渠。身作賈孟行詩圖。窮人乃工君未可。早據要路安肩輿。



次韻夜雨

暗雨來何急。寒房客自醒。驟看燈閃閃。擬對竹青青。聲到江干靜。風回葉上聽。更長那得曉。欹側想儀型。

和王子安至日

近節翻多事。爲家不亦難。老成須藥力。愁絕向誰寬。凍雨能妨夢。朝霜故作寒。衰顏心自了。不待鏡中看。物理有終極。人情從往還。陰陽消長際。老疾去留間。申白徒懷惠。巢由不買山。更歌吾和汝。風日稍侵顏。晨起公私迫。昏歸鳥雀催。百年忙裏盡。萬事醉間來。竹雨深宜晚。江梅半欲開。風燈挑不焰。寒火撥成灰。連日大雪以疾作不出聞蘇公與德麟同登女郎臺

掠地衝風敵萬人。蔽天密雪幾微塵。漫山塞壑疑無地。投隙穿帷巧致身。晚積讀書今已老。閉門高臥不緣貧。遙知更上湖邊幸。一笑潛回萬室春。是日賜紫朱。

立春

馬蹄殘雪未成塵。梅子梢頭已着春。巧勝向人真奈老。衰顏從俗不宜新。高門肯送青絲菜。下里誰思白髮人。共學少年天下士。獨能濡濕轍中鱗。

次韻敬酬元弼三兄

冥冥雨力及時來。冉冉春光作意回。白髮尙堪供語笑。青衫不惜着風埃。林廬要自家家到。尊酒寧辭日



日開只恐未便文字飲。人間無夢到陽臺。

除夜對酒贈少章

歲晚身何託。燈前客未空。半生憂患裏。一夢有無中。髮短愁催白。顏衰酒借紅。我歌君起舞。潦倒略相同。

贈知命

黑頭居士元方弟。不肯作公稱法嗣。外人怪笑那得知。他日靈山親授記。學詩初學杜少陵。學書不學王右軍。黃塵扶杖笑鄰女。白衫騎驢驚市人。靜中作業此何因。醉裏逃禪卻甚真。顧我無錢呼畢曜。有人載酒尋子雲。君家魯直不解事。愛作文章可人意。一人可以窮一家。怪君又以才爲累。請將飲酒換吟詩。酒不窮人能引睡。不須無事與多愁。老不欲醒惟欲醉。

謝傅監

好士如好色。昔聞今則無。平生席爲門。未識長者車。曠士慕林谷。羈人辱泥塗。願爲執鞭役。莫順下風趨。去年辱公先。懷刺留寓居。我往拜其門。鸞鷲鳴高梧。論交不計年。取材忘其愚。一寒我如此。百鎰公無餘。今年賀公歸。乃復過我廬。當使有近行。磨門有長須。小家不耐事。雞飛犬升閭。莫歸自有恨。親顏一何娛。汝家吾無憂。能致賢大夫。吳公漢庭右。賈生世用疎。平分大倉粟。盡讀鄴侯書。士爲知己留。不爲食有魚。三言移曾母。投杼公何如。



次韻答秦少章

學詩如學仙。時至骨自換。縹緲鴻鵠上。衆目焉能玩。子從淮海來。一喙當百難。師儒有韓孟。拭目互驚惋。老生時在傍。縮手愧顏汗。黃公金華伯。莞爾回一眄。彼方試子難。疾前不應懦。要當攻石堅。勿作搏沙散。植壁雖具美。龔錯加璀璨。我老不足畏。後生何可慢。

九月十三日出善利門

十載都城客。孤身冒百艱。一饑非死所。萬里有生還。去國吾何意。歸田病不關。共看霜白鬢。似得半生閑。

湖上晚歸寄詩友

髭髮難藏老。湖山穩寄身。卻尋方外士。招作社中人。霜葉深於染。秋花晚自春。無人還有礙。詩卷莫辭頻。簞笠宜多病。衣冠錯致身。清愁偏待客。白髮解禁人。江月深留雪。山梅借探春。興從湖上發。詩爲道人頻。功名違壯志。戒律負前身。劉德長欺客。王融卻笑人。殘年憎送歲。病眼怯逢春。杖屨知何向。如君未厭頻。紅綠羞明眼。欹斜久病身。年齡不待命。湖海却留人。點滴花間露。新鮮柳上春。情懷將底用。詩外不須頻。

寄邢和叔

昔作梁宋遊。幽憂廢朝昏。閉門無往還。不厭兒女喧。隔墻聞剝啄。莫夜誰叩門。知是邢夫子。低回過高軒。願爲布衣交。不顧年德尊。忽忽立談罷。又見東南奔。江湖多病後。僅免餉魚鼈。久廢數行書。因人問寒暄。



但愛孤山西。松筠數家村。便欲築居室。插秧仍灌園。生前不自愛。身後何足論。草玄笑楊雄。贊易悲虞翻。文章徒自苦。紙筆莫更存。却尋南郭老。隱几學忘言。他日宦遊客。誤入桃花源。葦間見漁父。誰識王侯孫。

十七日觀潮

潮頭初出海門山。千里平沙轉面間。猶有江神憐北客。欲將奇觀破衰顏。

江水悠悠自在流。向人無恨一作不應愁。相逢不覺渾相似。誰使清波早白頭。

宿錢塘尉廨

平湖遶舍山無盜。官事長閑俸有金。安得終身為禦寇。不辭兒女作吳音。

贈關彥長

少年初識字。已誦子虛賦。嘗疑天上人。已離人間去。蹉跎二十年。久自歎遲暮。倦游梁宋間。却踏江湖路。此地始逢君。秋陽破朝霧。白首鬢毛新。青衫顏色故。問君胡爲然。竟坐文字誤。人事久難知。高才常不遇。論人較賢智。富貴寧在數。不見竹林詩。山王俱不與。湖塘發高興。山林有佳處。迨此閒暇時。觀遊莫辭屢。功名如附贅。得失何用顧。但當勤秉燭。長願隨杖屨。

贈太素

缺一字 軻律師 律師山居不出。十四年矣。

林間細路暗通門。火閣深藏雪裏春。自笑世間千計錯。羨他湖上十年人。



次韻關子容湖上晚飲

風樹吹花落四鄰。莫雲將雨作催人。旋傾美酒留連客。急作新詩報答春。試傍清湖看鬢髮。莫辭行樂費金銀。如今歸去還高臥。更問風光有幾旬。

夏日書事

花絮隨風盡。歡娛過眼空。窮多詩有債。愁極酒無功。家在斜陽下。人歸滿月中。肝腸渾欲破。魂夢更無窮。

答無咎畫苑

卒行無好步。事忙不草書。能事莫促迫。快手多麓疎。君看荷葦櫺葉扇。崔家中叔三人俱。掃除事物費歲月。收完神氣忘形軀。恍然有得奪天巧。衰顏生態能相如。市師信手無贏餘。一日畫出東封圖。眼前百口怪神速。背後十指爭挪揄。君家畫苑傾東都。錦囊玉軸行盈車。補完破碎收亡逋。欲得不計有與無。問君此病何當祛。君言無事聊自娛。世間何事非迷途。挾策未必賢樗蒲。苑中最愛文與蘇。情親不獨生同閭。自謂知子誰知余。叔也不癡回不愚。憐君用意常勤渠。揮毫灑墨填空虛。風梢雨葉出新意。老樹僵立何年枯。我生百事不留意。外物不足煩毆除。翰墨纔能記名字。模臨寫貌無工夫。見弱不救危不扶。獨無一物充庖厨。看君髮漆顏丹朱。意氣健如生馬駒。逢人不信六十餘。郁然一莖無白鬚。呂公落寞起釣屠。南山四老東宮須。人生晚達有如此。應笑虞翻早著書。



次韻應物有歎黃樓

一代蘇長公。四海名未已。投荒忘歲月。積毀高城壘。斯樓亦何與。與人壓復起。紛紛徒爾爲。長劍須天倚。循分即可久。吾行誰與止。邇來賢達人。五十笑百里。賴有寇公子。衆毀聞獨美。直氣懾狂童。牽聯皆可紀。少公作長句。班揚安得擬。頗有喜事人。睥睨欲槌毀。一朝陵谷變。天語含深旨。驚倒樓前人。今朝有行履。和休文至自新安

無成底事到天涯。重見春工換柳枝。歷盡江山苦行役。歸來風雨過花時。驅馳共厭人間世。險阻時聞別後詩。獨有窮愁銷未盡。一番相見一伸眉。

次韻蘇公西湖觀月聽琴

公詩端王道。亭亭如紫雲。落世不敢學。謂是詩中君。獨有黃太史。抱杓挹其尊。韻出百家上。誦之心已醺。黃鍾毀少合。大裘擯不文。世事如病耳。螳鬪作牛聞。苦懷太史惠。養豹煙雨昏。後世無高學。舉俗愛許渾。

城南

白下官楊小弄黃。騎臺南路綠無央。含紅破白連連好。度水吹香故故長。蹲滑踏青穿馬耳。轉危緣險出羊腸。熟知南杜風流在。預怯排門有斷章。

贈魯直



相逢不用早。論交宜晚歲。平生易諸公。斯人真可畏。見之三伏中。凜凜有寒意。名下今有人。胸中本無事。神物護詩書。星斗見光氣。惜無千人力。負此萬乘器。生前一尊酒。撥棄獨何易。我亦奉齋戒。妻子以爲累。君如雙井茶。衆口願共嘗。願我如麥飯。猶足填饑腸。陳詩傳筆意。願立弟子行。何以報嘉惠。江湖永相忘。

放歌行二首

春風永巷閉娉婷。長使青樓誤得名。不簾捲簾通一顧。怕君簾眼未分明。當年不嫁惜娉婷。抹白施朱作後生。說與傍人須早計。隨宜梳洗莫傾城。

送李奉議亳州判官

吾友孫子實。愛學吾所畏。持身如處子。得句有餘味。交驩艱難際。凜然見名誼。吾病臥里中。車馬日一至。遣醫饋梁肉。憂喜見顏際。殷勤勸加飡。代我破戒罪。一別已三秋。君室乃其季。輪囷見眼中。不作千里外。因聲問何如。胡不枉一字。

吾友張文潛。君行乃其里。當年釣遊處。壯者或可指。聞風起遐想。意作千古士。不知塵土中。奴推婢不齒。胸中無一塵。筆下有百紙。勿問見自知。未語君已喜。與遊今已後。行已勿停軌。

陳詢秀才歸徐

千里相從愧子心。未堪歸路馬駸駸。更能作意憐衰病。肯復一作重來道古今。三歲有期看一舉。百年聊



待到千尋行逢淨社論餘習。爲說登臨久廢吟。

登彭祖樓

城上危樓江上城。風流千載擅佳名。水兼汴泗浮天闊。山入青齊煥眼明。喬木下泉餘故國。黃鸝白鳥解人情。須知壯士多秋思。不露文章世已驚。

遊鶴山院

積石橫成嶺。行楊密映門。人聲隱林杪。僧舍遶雲根。頓攝塵緣盡。方知象教尊。只應羊叔子。名字與山存。

南豐先生出守  
日常游是院

和南豐先生西遊之作

孤雲秀壁共崔嵬。倚壁看雲足懶回。睡眼曠緣寒綠洗。醉頭強爲好峯擡。山僧煮茗留寬坐。寺板題名卜再來。有愧野人能自在。塵樊束縛久低徊。

和南豐先生出山之作

側徑籃舁兩眼明。出山猶帶骨毛清。白雲笑我還多事。流水隨人合有情。不及鳥飛渾自在。羨他僧住便平生。未能與世全無意。起爲蒼生試一鳴。

和張次道再遊翠巖之作



去歲尋山有舊題。重來似與故人期。回巒俯仰如迎客。流水喧鳴擬索詩。嶺路依危通鳥過。吾身趁健白雲隨。自憐久快屠門嚼。欲住安能久茹芝。

和富中容朝散值雨感懷

節物驚心懶復嗟。樽中酒盡復誰賒。風撩雨脚俄成陣。雪閣雲頭欲結花。萬里可堪長作客。一年將盡未還家。自憐落落終難合。白首詩書謾五車。

謝贇閣梨見訪

好在談經老上人。衝風踏雪到江濱。百篇出篋自新得。一鉢隨身依舊貧。終歲杜門逃俗士。爲師設榻對修筠。蒲團藜杖焚香坐。此意此時無點塵。

和沈世卿推官見寄

倦看世態久低徊。且置窮通近酒杯。未忍一身閑處着。暫容雙眼醉時開。爲呼阿武扶頭起。擬與山公倒載回。好在東籬舊時菊。無心準擬白衣來。

和王明之見寄

末路相逢首重回。紫芝眉宇向人開。老來惟有風情在。事去空憐歲月催。憔悴不堪臨楚澤。棲遲無路上燕臺。少陵肺病疎杯罍。想負花前載酒來。



和酬施和叟宣德

山陰傾蓋兩綢繆。十載重來鬢已秋。往事侵尋如昨日。故人牢落半滄洲。流離道路生涯拙。蕪沒田園歲計休。久要尙憐君子在。爲言雞黍亦遲留。

送澤之過維揚

夢裏揚州十載間。青樓陳迹故依然。袍爭爛錦催詩筆。雨濺明珠落酒船。顧我老無騎鶴興。羨君行及看花天。囊中繡句歸應滿。不負韋郎五色牋。

再到錢塘呈會宗伯益

負笈重來感舊遊。流年衰鬢兩經秋。湖山依舊渾相識。風月愁人不自由。尙有故交重冷榻。可堪歸夢到滄洲。誰憐壯志空調落。百鍊今爲遶指柔。

簡李伯益

齏鹽度歲每無餘。垂橐東歸口未餬。貧裏交遊新斷絕。老來光景半消除。時情視我門前雀。人好看君屋上烏。尙喜敝廬連蔣徑。願求佳句遞髯奴。

九日無酒書呈漕使韓伯脩大夫

老大悲傷節物催。酒腸枯涸壯心灰。慙無白水真人分。難置青州從事來。倦筆懶從都市出。醉眸剛爲麴



車回黃花也似相欺得。坐對空樽不肯開。

過杭留別曹無逸朝奉

陳蕃解榻為留連。俯仰徒驚歲月遷。故意斯人奈風雨。多情於我獨山川。可憐顏貌非前日。依舊窮愁似去年。後夜相思隔煙水。夢魂空寄過江船。

別威德寺

三宿城隈寺。輕齋類老禪。暫來真偶爾。適去更翛然。笑別留春塢。行尋下瀨船。此身猶斷梗。飄泊且隨緣。

沈道院有水墨壁畫奇筆也。惜其窮年無買之者。賈明叔請余同賦。

和彥詹題遠軒

壁間水墨畫。為爾拂塵埃。草樹精神出。溪山氣勢回。路從沙嘴斷。人自渡頭來。莫怪知音少。牙絃匣不開。

夜坐有懷 一作秋懷

開牕得遠意。興出杳冥間。芳草日邊路。片雲天外山。好花和露斲。脩竹夾藤刪。每許南鄰伴。時來一寄顏。

瑣瑣重門閉。蕭蕭一再更。一作稍稍昏烟集。擊擊一再更。短檠昏細字。高枕笑忘。一作平生來鴈防身早。身一作妨。秋陽換眼明。已須甘酒力。不用占時名。一作永言鄰里舊。心肯向人傾。

馬上口占呈立之



廉纖小雨濕黃昏。十里塵泥不受辛。轉就鄰家借油蓋。始知公是最閑人。



# 丹淵集鈔

文同字與可。蜀梓州人。初以文贄文潞公。公譽重之。繇是知名。登皇祐元年進士。爲邛州軍事判官。調靖難軍幕。至和中。召試館職。判尙書職方。兼編較史館書籍。以親老請通判邛州。尋改漢州。熙寧中。復入朝。與執政議新法不合。以論禮坐奪一官。出知陵州。徙洋州。所至皆有政績。代還。判登聞鼓院。數月。出知湖州。尋卒。稱石室先生。自謂有四絕。詩一。楚辭二。草書三。畫四。且云。世無知我者。惟子瞻一見識吾妙處。其詩清蒼蕭散。無俗學補綴氣。有孟襄陽蘇韋州之致。與東坡中表。每切規戒。蘇門亦嚴重之。不與秦張輩列。送蘇倅杭云。北客若來休問事。西湖雖好莫吟詩。蘇不能聽也。世以爲知言。

## 早晴至報恩山寺

山石巉巖磴道微。拂松穿竹露沾衣。煙開遠水雙鷗落。日照高林一雉飛。大麥未收治圃晚。小蠶猶臥斫桑稀。暮煙已合牛羊下。信馬林間步月歸。

## 睡起

寥寥公館靜。門掩似山家。竹簟屢移枕。石盤頻浸花。閑多新得策。事少早休衙。一覺高春睡。誰來伴試茶。

## 織婦怨



擲梭兩手倦。踏繭雙足趼。三日不住織。一疋纔可翦。織處畏風日。翦時謹刀尺。皆言邊幅好。自愛經緯密。昨朝持入庫。何事監官怒。大字雕印文。濃和油墨汚。父母抱歸舍。拋向中門下。相看各無語。淚併若傾瀉。質錢解衣服。賈絲添上軸。不敢轍下機。連宵停火燭。當須了租賦。豈暇恤襦袴。前知寒切骨。甘心肩胛露。里胥踞門限。叫罵嗔納晚。安得織婦心。變作監官眼。

咎公漑

晚泊咎公漑。船頭餘落暉。攜家上岸行。愛此風滿衣。村巷何蕭條。四顧煙火稀。問之曰去歲。此地遭凶飢。斯民半逃亡。在者生計微。請看林木下。墻屋皆空圍。好田無人耕。惟有荆棘肥。至今深夜中。鬼火流清輝。衆稚聞此語。競走來相依。錯莫驚且哭。牽挽求速歸。

謝友人寄畫

客從長安來。厚紙封小軸。題云此奇畫。寄贈公可蓄。開之掛高壁。爛絹止一幅。中有兩駱駝。氣韻頗不俗。大駝載半婢。正面頸愈曲。小駝方就乳。蹲身腳微跼。一馬立其後。纔露頭與足。三犬乃子母。共臥嚼齧肉。老胡抱朱旗。狀貌何很復。端然立高岸。勢若不可觸。定是虜中酋。華旂蓋鮮服。不知何所來。隨從無一僕。初誰作此畫。精妙亦可錄。應餘右方在。次第不止獨。更願君訪來。我肯萬錢贖。

夏日閑書墨君堂二首



先人有弊廬。涪水之東邊。我罷漢中守。歸此聊息焉。是時五六月。赤日烘遙天。山川盡慘燥。草木皆焦燃。塵襟既暫解。勝境乃獨專。高林抱深麓。清蔭密右綿。層岩敞戶外。淺瀨流窗前。邀客上素琴。留僧酌寒泉。竹簟白石枕。穩處只屢遷。忽時乘高風。遠望立雲煙。野興極浩蕩。俗慮無一緣。氣爽神自樂。世故便可捐。卻憶爲吏時。荷重常滿肩。几案堆簿書。區處忘食眠。冠帶坐大暑。額汗常涓涓。每懼落深責。取適敢自便。安閑獲在茲。恍若夢游仙。行將佩守符。復爾趁洋川。山中豈不戀。事有勢外牽。尙子願未畢。安能賦歸田。歸來山中住。便作山中人。冠帶亦自閑。累月不着身。散髮層巖阿。濯足清澗濱。石蘚黏簡冊。松風墮衣巾。鄉里多舊游。不厭過從頻。山肴與野饌。待我如佳賓。有召卽走赴。愛其愛我真。常恐禮數乖。取問吾交親。正此一夏樂。忽茲邁蕭辰。還愧擁千騎。又走西道塵。

重過舊學山寺

當年讀書處。古寺擁羣峯。不改歲寒色。可憐門外松。有僧皆老大。待客轉從容。又下白雲去。樓頭敲暮鐘。

閑樂

晝睡忽過午。好風吹竹牀。溪雲生薄暮。山雨送微涼。粉裏衣裳潤。蘭薰簟席香。歸來閑且樂。多謝墨君堂。

晚至村家

高原磽确石徑微。籬巷明滅餘殘暉。舊裾飄風採桑去。白袷卷水秧稻歸。深葭繞澗牛散臥。積麥滿場雞



亂飛前谿後谷暝煙起。稚子各出關柴扉。

過友人谿居

籬巷接菰蒲。閑扉掩自娛。水蟲行插岸。林鳥過提壺。白浪搖秋艇。青煙蓋晚廚。主人誇野飯。爲我煮新蘆。

江上主人

客路逢江國。人家占畫圖。青林隨遠岸。白水滿平湖。魚小猶論尺。鷗輕欲問銖。何時遂休去。來此伴潛夫。

極寒

燈火宜冬杪。圖書稱夜長。簾鉤挂新月。窗紙漏飛霜。酒醴慙孤宦。皮毛逐異鄉。誰知舊山下。梅豔滿東墻。

六月十日中伏玉峯園避暑值雨

南園避中伏。意適晚忘歸。墻外谷雲起。簷前山雨飛。興餘思秉燭。坐久欲添衣。爲愛東崑下。泉聲通翠微。

訪李奐山人隱居

多暇無所適。故來尋隱居。舉開壓屋樹。觸散擁門雲。狀貌不妨古。言談何太文。令人重高趣。歸去每斜曛。

安仁道中早行

行馬江頭未曉時。好風無限滿輕衣。寒蟬噪月成番起。野鴨驚沙作隊飛。揭揭酒旗當岸立。翩翩魚艇隔灣歸。此間物象皆新得。須信詩情不可違。



面川亭

幽亭最孤絕。直入亂叢間。近晚獨來此。有誰相與閑。卷簾通大野。臨檻數前山。便欲教攜酒。陶然踏月還。

北郭

繞樹垂蘿蔭曲堤。暖煙深處亂禽啼。何人來此共攜酒。可惜拒霜花一谿。

讀史

不得滎陽遂失秦。始知成敗盡由人。可憐一擲贏天下。只使黃金四萬斤。

夜學

已叨名第雖堪放。未到根原豈敢休。文字一牀燈一盞。只應前世是深讐。

冷餅

海南有陶器。質狀矮而橢。云初日炙就。鍛鑠不以火。水壺醜突兀。酒甌肥礫砢。山鼎頸微腫。石鼎足已跛。圓如鴟夷形。大比康瓠顆。華元腹且皤。王莽口何哆。蕃胡入中國。萬里隨大舸。攜之五羊市。巾匱費包裹。侏儻講其效。瀉辯若炙輅。課以沸泉沃。冰雪變立可。炙敲療中渴。其用豈么麼。君凡幾錢得。不惜持遺我。曾將對佳客。屢試輒亦果。勿云遠且陋。幸可置之左。

中秋夜試院寄子平



憶初我來時。夜色如墨障。心常念明月。幾日西南上。松梢倚樓角。一袂偃相向。漸見輪中物。依稀吐形狀。今宵東嶺外。灩灩金波漲。人間重此夕。一歲號佳賞。而我督秋試。鑱宿密如藏。細務紛滿前。約束甚鞮鞻。無由奉朋侶。徹曉坐清曠。之人富才華。筆力趨且壯。誰陪把樽酒。露下與酬唱。南墻咫尺地。使我起遐想。人生此良會。可惜已虛放。獨立中夜歸。俛首入書幌。

成都楊氏江亭

汀洲煙雨卷輕霏。遙望軒窗隱翠圍。萬嶺西來共曉色。一江南下載晴暉。鳧鷗慣入闌干宿。魚蟹長隨舴艋歸。我亦舊多滄海思。幾時如此得苔磯。

無爲山寺

一緇危磴遶崢嶸。上徹幽深入化城。煙外川原誰繡畫。雲中樓閣自陰晴。老僧高論都無著。古佛真身宛若生。聞道軍持新呪水。願傾涓滴灑塵纓。

郡學鑱宿

長柏高柟蔭廣庭。夜涼人靜夢魂清。不知山月幾時落。每到曉鐘聞雨聲。

月崑齋又言累石爲山上有一峯穿竅如月謂之月崑齋詩中子平卽子瞻也。

月爲太陰精石亦月之類。月常寄孕於石中。事理如此何足異。天地始分判。日月各一物。旣名物乃入形。



器安有形器不消沒。況此日與月。曉夜東西走。珠流璧轉無暫停。豈與天地同長久。其爲勞苦世共知。惟是月有生死時。旣然須常換新者。人但不見神所爲。日須上天生。月必地中產。君不見號陽縣之山谷間。纔成未就知何限。石有不才者。徃徃其卵殼。靈媪棄置不復惜。任人取去爲珍玩。佳者留之待天取。藏滿庫樓千萬許。彥贍博物天下稱。更無定不以予之說爲寢語。予恐世人不知嵩丘崑洞中。中有八萬二千脩月戶。其所食盡玉屑。昔有王生見之滿襍提斤斧。應是當年靈鷲山。直自天竺飛落西湖前。其上有石姪月月已滿。此人竭來就彼剝剔歸上天。所以此石拆礪不復合。至今神胞所附之處。其痕圓拋擲道傍。凡幾歲。風刷雨淋塵土穢。子平一見初動心。輦致東齋自摩洗。更選他山相擁列。就中獨爾一峯最奇絕。每至瑤岷流光下照時。玉柱橫欹無少缺。子平謂我同所嗜。萬里書之特相寄。邀我爲詩我豈能。窗前累日臨空紙。遙想崑前寶穴通。玉蟾從此去無蹤。請君爲我細書字。側名爲月母峯。

和提刑度支王店雞詩

王店有郵吏。養雞殊可笑。昂然處高襟。不肯以時詘。官有宿此者。西征待初曉。雞竟不一鳴。問吏吏已告。云此最荒絕。左右悉蓬蓼。狐狸占爲宅。恣橫不可道。前此三四雞。一一遭其暴。尋聲卽知處。盡獲爪牙弔。自後始得此。其若有人教。東方或未明。羣醜尙騰越。此雞但鉗結。直伺太陽耀。雖然謂失旦。似得保身要。官曰此何用。不然則宜糶。不見不鳴鴈。先死蓋自召。天下已明白。豈假更喧鬧。徒爾費稻粱。曾莫知所報。



吏云官言是。且顧忽嘲誚。知是本在人。此物何足校。

送棋僧惟照

學成九章開方訣。誦得一行乘除詩。自然天性曉絕藝。可敵國手應吾師。窗前橫榻擁爐處。門外大雪壓屋時。獨翻舊局辨錯著。冷笑古人心許誰。

送廳中秀才

曼倩學精知蜥蜴。公明術妙識蜘蛛。臨印復有龐成叔。萬事先將入卦圖。

遣興效樂天

君莫學楊虞欽。奉李宗閔。宗閔權勢豈能久。君莫學劉栖楚。附李逢吉。逢吉祿位寧長守。雖然一時身暫好。其奈千古名常醜。丈夫讀書要知道。所信不篤被其誘。大張富貴作羅網。愚者紛紛以身就。左纏右繞不可脫。誅竄還當逐其後。君不見虞卿須遇李固言。君不見栖楚終遭韋處厚。一朝摧折靈氣盡。龍如蛇兮虎如狗。勸君聖賢術內好潛心。勸君邪佞黨中休入手。豈不知潞州處士田佐時。喚與美官嫌不受。

野逕

山圃饒秋色。林亭近晚晴。禽蟲依月令。藥草帶人名。排石鋪衣坐。看雲緩帶行。官閑惟此樂。與世欲無營。

寄何首烏丸與友人



此草有奇効。嘗聞於習之。陵陽亦舊產。其地尤所宜。翠蔓走崑壁。芳叢蔚參差。下有根如拳。赤白相雄雌。斲之高秋後。氣味乃不虧。斲以苦竹刀。蒸曝凡九爲。夾羅下香屑。石蜜相和治。入臼杵萬過。盈盤走纍纍。日進豈厭屢。初若無所滋。漸久覺膚革。鮮潤如凝脂。旣已鬚髮換。白者無一絲。耳目固聰明。步履欲走馳。十年親友別。忽見皆生疑。問胡得爾術。容貌曾莫衰。爲之講靈苗。不爲世俗知。蓋以多見賤。蓬藿同一虧。君如聽予服。此語不敢欺。勿信柳子厚。但誇仙靈脾。

秋日田家

淘漉溝源築野塘。滿坡煙草臥牛羊。今年且喜輸官辦。豆夾繁多粟穗長。

可笑口號七章

可笑庭前小兒女。栽盆貯水種浮萍。不知何處聞人說。一夜一根生七莖。  
可笑陵陽太守家。閑無一事只栽花。已開漸落并纔發。長作亭中五色霞。  
可笑此公何太惑。讀書寫字到三更。也知學得終無用。自肯辛勤比後生。  
可笑生平事迂闊。向人不肯強云云。到頭官職難遷轉。一似城南蕭次君。  
可笑爲官太微幸。養愚藏拙在深山。君看處置繁難者。日夜經營心不閑。  
可笑兒孫亦滿眼。朝朝庭下立參差。謂言飽讀詩書去。憔悴如翁亦好爲。



可笑山州爲刺史。寂寥都不是川城。若無書籍兼圖書。便不教人白髮生。

山城秋日野望感事書懷詩呈吳龍圖

已是秋陰更夕曛。亂山高下起寒雲。危樓願見客何處。遠笛不知人厭聞。身外流年波渺渺。眼前生事葉紛紛。此愁萬斛誰量得。直爲重捻庾信文。

子平寄惠希夷陳先生服唐福山藥方因戲作雜言謝之

蜀江之東山色盡如赭。有道人云此是丹砂伏其下。煙雲光潤若洗濯。澗谷玲瓏如刻畫。我聞神仙草藥不在凡土生。是中當有靈苗異卉之根莖。果然人言所出山芋爲第一。西南諸郡有者皆虛名。就中唐福衆稱賞。肥實甘香天所養。有時崑頭倒垂三尺壯。士臂忽然洞口直舉一合仙人掌。土人入冬農事閑。千籌萬鋪來此山。可憐所鬻不甚貴。着價卽售曾不慳。往年子瞻爲余說。言君所部之內此物尤奇絕。後復寄書勸我當餌之。滿紙親提華嶽先生訣。予因購之不惜錢。依方服餌將二年。其功神聖久乃覺。牙牢體溢支節堅。自問丹青幾時上。早生兩翅教高颺。塵世如帑不可居。待看鴻濛對雲將。

貧居

繩牀擁敝裯。初起髮未櫛。南窗展書卷。就暖讀寒日。門前絕車馬。薄暮垂片席。短墻挂織蔓。幽鳥啄紅實。羣蝸惡積雨。繚繞篆空壁。男兒處貧賤。舉首宇宙窄。翩翩槍榆鳩。宛轉匿絮蟲。妻奴競相笑。憔悴守文筆。



江原張景通善頌堂

庭前雲蓋碧巉崑。堂上先生雪滿髯。說藥客來聊下榻。謁齋僧去便垂簾。種時法好花難謝。買處錢多石易添。子舍光榮身壯健。只將香火事華嚴。雲蓋堂下石銘

寄宇文公南自文州曲水令棄官

彭澤長謠便歸去。君辭曲水亦其徒。一官何藉五斗米。二子況皆千里駒。懶對俗人常答颯。厭聞時事但盧胡。從來綿竹多賢者。惟是楊雄失壯夫。

送潘司理祕校

已自多時賦式微。五峯佳景夢長飛。四年遠地爲官去。萬里高堂喜客歸。下馬便呈新授勅。開箱爭認舊縫衣。鄉人覓次來相賀。蓴菜魚鱸正軟肥。

又五言

曲棧繞斜谷。鉤欄天際分。吟鞭搖嶺月。倦枕拂浮雲。好景不關俗。新詩皆屬君。西南有歸客。一一幸相聞。

清景堂

公外捐塵慮。閑中見物情。蕉花紅炬密。竹節粉環輕。燕泊簾鉤語。蜂尋筆架鳴。靜能知此趣。吃吃笑勞生。

呈李堅甫中舍杞



往年曾憶過長安。短紙書名詣門下。君時延我坐終日。灑掃東軒留看畫。橫圖巨軸不知數。但見匣中時一把。甲猶未竟乙復作。門類著番開滿架。使人歎羨不能已。只恨有門歸隔夜。歸來兀坐想精絕。念此榮觀若爲謝。就中寒林兩大幅。此物世間誰敢價。倏然一別十五載。常向人前盛誇詫。因君奉使臨敵邑。見先問此餘不暇。君能爲我再講說。座上不容人俗話。如君所蓄更誰有。有亦未能無笑罵。況君累世盡清職。摹本敢來前弄詐。君今還省正擢用。異日須求作鄰舍。峩巾曳履日相謁。更欲重煩開絕屨。待尋前輩用心處。款曲應須頻假借。每廚閱訖當便還。不敢奉欺言羽化。

采芡通判盧微之攜種種之。次年大盛。

芡盤團團開碧輪。城東壕中如疊鱗。漢南父老舊不識。日日岸上多少人。駢頭鬢鬆露秋熟。綠刺紅針割寒玉。提籠當筵破紫苞。老蚌一開珠一掬。吹臺北下凝祥池。圃田東邊僕射陂。如今兩處盡湮沒。異日此地名應馳。物貴新成味尤美。可惜飄零還入水。料得明年轉更多。一匣清波流珠子。

峯鐵峽

東風吹空力何短。三月隴山全未暖。文法姦酋引騎兵。飛隨銀鷁弓刀滿。霜矛雪甲寒如水。候卒何由知首尾。君不見峯鐵峽頭雲色死。一過蕭然五十里。

北齋雨後



小庭幽圃絕清佳。愛此常教放吏衙。雨後雙禽來占竹。秋深一蝶下尋花。喚人掃壁開吳畫。留客臨軒試越茶。野興漸多公事少。宛如當日在山家。

疑雲榭晚興

晚策倚危榭。羣峯天際橫。雲陰下斜谷。雨勢落褒城。遠渡孤煙起。前村夕照明。遙懷寄新月。又見一稜生。

山堂偶書

幾日無公事。山堂興頗清。和詩防積壓。丸藥趁晴明。斲石新稜出。澆蔬晚甲生。此皆忙外得。低首笑塵纓。

將赴洋州書東谷舊隱

晚客無一來。獨步入東谷。園林已成就。此景頗不俗。落落巖畔松。脩脩澗邊竹。爽氣逼襟袖。清如新出浴。寒泉激亂石。磊磊漱瓊玉。荒溪漬餘潤。滿地苔蘚綠。珍禽靜相倚。毛羽華且縟。高下相和鳴。不去若馴伏。幽花雜紅紫。點滴亂盈目。坐久微風來。時聞散餘馥。往年讀書處。宛爾舊茅屋。雖然小破壞。脩整可數木。開門拂軒窗。無限起蝙蝠。縱橫列蟲網。不免自掃撲。壁間細書字。多是親寫錄。當時苦謀身。如此用意毒。於今三十年。才抵羊腓熟。一從入仕路。行步每踣踖。所畏惟簡書。其甘者藜菽。中間何大幸。致身在天祿。無狀陪俊游。俛首常自慙。連章乞外補。得郡悉鄉曲。雖名二千石。敢自辭碌碌。朝廷設新法。布作天下福。或慮多垢玩。訓戒稍嚴肅。刺史當是時。能不爲驅督。行之以中道。勉副議者欲。刻薄素所憎。忍復用刑獄。



進身豈不願。實懼有陰戮。昨從漢中歸。於此度炎燠。親朋日相會。分誼愈敦篤。便欲從之遊。投簪解朝服。退自數年計。伏臘殊未足。還當武康去。就養若雞鶩。貧雖士之常。於我何迫蹙。簞瓢若自具。尙可繼前躅。奈何食口衆。不比回也獨。東方千餘騎。導從催我速。行復登長途。貌展心甚縮。淵明豈俗士。幸此有松菊。

崔覲詩 大中詩人。

崔覲者高士。梁州城固人。讀書不求官。但與耕稼親。夫婦既已老。左右無子孫。一日召奴婢。盡以田宅均。俾之各爲業。不用來相聞。遂去隱南山。雜跡麋鹿羣。約曰或過汝。所給爲我陳。有時攜其妻。來至諸人門。乃與具酒食。嘯詠相歡忻。山南鄭餘慶。辟之爲參軍。見趣使就職。漫不知吏文。已復許謝事。但謂長者云。補闕王直方。本覲之比鄰。文宗時上書。召見蒙咨詢。薦覲有高行。用可追至淳。詔授起居郎。裒斜走蒲輪。辭疾不肯至。高風槩秋旻。我昨過其縣。徘徊想芳塵。訪問諸故老。寂無祠與墳。斯人久不競。薄夫何由敦。此縣漢唐時。諸公揚清芬。刻詩子堅廟。來者期不泯。

翡翠

清晨有珍禽。翩翩下魚梁。其形不盈握。毛羽鮮且光。天人栽碧霞。爲爾縫衣裳。晶熒炫我目。非世之青黃。愛之坐良久。常恐瞥爾翔。忽然投清漪。得食如針鉞。如是者三四。厭飫已一航。旣飽且自嬉。翻身度回塘。飛鳴逐佳匹。相和音琅琅。是時鳧與鴈。狼籍島嶼旁。滿腹釀腥穢。紛紛曬晴陽。鶯鷓最羸惡。觜大腳脰長。



入水捕地鱓。淤泥亦啣將。想其見爾時。一喙亦爾傷。其心肯謂爾。被體凝華章。勸爾慎所止。好醜誰同鄉。清溪多織鮮。亦足充爾腸。江海深且闊。所獲未可量。爾當事深刷。帝圃參鸞鳳。

晚泊金牛

一襟初覺晚霜清。短鞵垂頭任馬行。斜日斂回疎木影。急風收斷落泉聲。望窮好景番番別。題徧新詩閱閱精。終是教入伏潘令。許多才調賦西征。

寄子駿運使時按西鄉

西鄉巴嶮下。嶮道入屏顏。使騎到荒驛。野禽啼亂山。問民青靄裏。訪古白雲間。幾日南城路。新詩滿軸還。

寄景孺提刑

江由崑嶮地。萬木與雲齊。弭節山中宿。思歸夜半啼。麝香霑野草。虎跡滑春泥。到此須憑酒。何人手可攜。

往年寄子平

往年記得歸在京。日日訪子來西城。雖然對坐兩寂寞。亦有大笑時相轟。顧子心力苦未老。猶弄故態如狂生。書窗畫壁恣掀倒。脫帽褫帶隨縱橫。誼誼歌詩開文字。蕩突不管鄰人驚。更呼老卒立臺下。使抱短簫吹月明。清歡居此僅數月。夜夜放去常三更。別來七年在鄉里。已添三度移雙旌。今茲悒悒意思倦。加以跼跼疾病嬰。每思此樂一絕後。更不逢人如夜行。



依韻和蒲誠之春日卽事

輕煙漠漠雨斜斜。無事常教放兩衙。問客江邊求好石。倩人山裏覓奇花。新蔬宛宛生晴圃。淺溜涓涓出暖沙。入夏盃盤須準備。繞畦親灌邵平瓜。

木瓜園

驅馬下高岡。吟鞭只自揚。溪山過新霽。草木發清香。浩蕩來江闊。縈紆去棧長。春風吹欲盡。樽酒嘆何嘗。

水磴

激水爲磴嘉陵民。構高穴深良苦辛。十里之間凡共此。麥入麩出無虛人。彼甿居險所產薄。世世食此江之濱。朝廷遣使興水利。嗟爾平輪與側輪。

長舉駟樓

爽氣浮空紫翠濃。隔江無限有奇峯。君如要識營丘畫。請看東頭第五重。

柳溪贈丁綰

場屋聲名四十年。五車書誤一囊錢。老來山驛爲監吏。相對春風但惘然。

此君庵

班班墮籜開新筠。粉光璀璨香氣氲。我常愛君此默坐。勝見無限尋常人。



晉銘

長安鬻碑者。遺我古鼎銘。不知其所來。有眼實未經。凡百十九字。詭怪摹物形。縱橫下點畫。不類子與丁。試考諸傳說。其源已冥冥。官王石鼓文。氣韻殊飄零。始皇嶧山碑。骨骼何玲瓏。我恐鬼哭時。正爲此物靈。安得不死神。提去詢大庭。爲我譯其辭。讀之駭羣聽。

秦詔

山流濯幽坑。銅篆發古耀。我行奉天縣。叟以百錢糶。讀之迺二世。元年所刻詔。謂法度量者。盡始皇帝造。辭止曰皇帝。久遠若爲道。乃命斯去疾。具述紀其右。文章旣精簡。字畫亦佳妙。亥爾何等人。敢作萬世調。其爲者非是。所累纔一廟。區區頌微末。回首皆可弔。郡兵厭寶玉。得此只揮掉。漂流落荒壤。千載厄潛奧。乃知天宇內。事有不可料。此物今何爲。惟助觀者笑。

謝楊侍讀惠端溪紫石硯

學文二十年。語氣殊未成。所以文房中。四譜無一精。豈不願收貯。竊恐好事名。自愧中槁然。敢假外物榮。前日下祕閣。謁公來西城。公常顧遇厚。待以爲墨卿。延之吐佳論。出口無雜聲。語次座上物。硯有紫石英。云在嶺使得。渠常美其評。因取手自封。見授囑所擎。倉皇奉以拜。其喜懷抱盈。歸來示家人。衆目歡且驚。言並我所有。瓦礫而瑤瓊。貴價市珍煤。風前試寒泓。磨知密理潤。點覺浮光清。洗濯鑑面瑩。彈扣牙音鏗。



遂翦十襲巾。加以重篋盛。客來有欲觀。稍俗不敢呈。願傳之子孫。更重金滿籬。作詩敘嘉貺。慙比毫毛輕。

西岡僦居

出官在秦蜀。始末凡十年。所治得公宇。靡不完且堅。中堂與挾廊。角翼相鈎聯。領屬僅十口。出處皆安便。冬夏惡風日。侵薄曾無緣。今年歸中都。職事叨磨鋌。未免僦屋住。敢謂須華鮮。西岡頗幽僻。愛此遠市廛。問得王氏居。十楹月四千。牀榻案几外。空處無一椽。堰溷及井竈。圻壁皆相連。經痺須俛首。過隘常側肩。所謂十口者。日繞蝸殼旋。前時大暑中。幾不禁祥延。鬱若鼎釜炊。局如狴犴攣。走蝮過亂蟻。飛蚊劇羣蟬。今日幸過之。復畏明日然。喜見白露節。相賀肌肉全。如何下淫雨。曉夕常綿綿。瓦破棖棟漏。柱陷墻垣穿。惟供改席坐。豈暇安枕眠。中庭止數步。深已可載船。盡室徒跣行。一起復一顛。京師費耗地。居止實重遷。俸料計月入。外得無幾錢。卻思已過分。僅免親犁田。自望於古人。若地而升天。小廬焦生高。陋巷顏子賢。引之諭妻孥。吾道宜此焉。猶勝比鄰者。寒突無晨煙。

閩鄉值風

烈風吹華陰。古槐若長呼。高沙起黃磧。四望如一鋪。上馬低便回。據鞍兀長途。日晚過潼關。行客亦已疎。守吏索姓名。沸亂如蟲蛆。兩目不可開。說之使自書。夜至閩鄉縣。僮僕相欵欵。坐定卽洗濯。泥土捫短鬚。草草具盤餐。零落飯與蔬。恨無姜少府。爲膾黃河魚。



積雨

京師值積雨。浮淖皆滿城。況當洶決時。左右羅深坑。有客南河居。旦夕隄上行。病僕挾羸馬。十步八九傾。職事有出入。長抱落膽驚。都人素豪恣。小官常見輕。排闥要穩道。斂避不敢爭。試欲效阿止。圓目根姓名。往往被濺污。直落舌與睛。歸來事洗濯。袍袴分縱橫。仰首問天公。春澤當早晴。幸有好日月。何惜施光明。大熱過散關。因寄里中友人。

六月日正午。大暑若沸鑊。時行古關道。十步九立腳。煙雲炙盡散。樹木曬欲落。喉鼻喘不接。齒舌津屢涸。擔血僮破領。鞍汗馬濡膊。幽坑困猿狖。密莽渴鳥雀。至此因自謂。胡爲就名縛。所利緣底物。奔走冒炎惡。塵心日夜迫。欲往不能略。因念於故園。左右悉林薄。昔我未第時。此有文酒樂。長松借高蔭。飛瀑與清濯。層崖對僧詠。大石引客酌。畏景雖赫然。無由此流爍。於今只夢想。欲往途路邈。所效殊未立。期歸尙誰約。徒爾發短歌。西首謝巖壑。

送張宗益工部知相州

學術深沉久未施。晚登臺省世方知。詩章好奏周文廟。字法宜磨魏武碑。禁掖便當提大筆。名藩猶自擁高麾。應憐共試金坡者。答颯渾如鄭鮮之。

送王恪司門知絳州



絳守園池天下誇。紹述有記詞聲牙。蒼官青士左右樹。神君仙人高下花。遠水依然尙鈎帶。舊門想已無。鞞。自憐俗狀不能到。此去羨君專宴衙。

新霜

新霜着庭樹。葉下如猛剝。蕭然物容改。有若懼凌挫。砌下丹橘落。墻邊紫榴破。精光竹勁健。沮喪柳怯懦。覽景惜向暮。感時驚忽過。勝事實可樂。閑愁本堪唾。何當共佳客。對此酌香糯。

紅樹

萬葉驚風盡卷收。獨餘紅樹擬禁秋。已疑斷燒生前嶺。更共殘霞入遠樓。楓岸最深霜未落。柿園渾變雨初休。勸君莫上青山道。粧點行人分外愁。

鄧隱老木寒牛

蒼崖棱層草芊綿。巨木半死生枯塗。羸牛日晩已噍草。稚子天寒猶打錢。

蒲生鍾魑

寒風酸號月慘苦。梟飛狐鳴滿墟墓。叢棘亂礪翳野霧。古社禿剝倒枯樹。下有三鬼相嘯聚。初行誰家作。疰忤。痛熱腫痒快嘔吐。塞噎咽喉脹臍肚。呼巫召覲使呪詛。翁驚嫗忙設賽具。茅盤草船置五路。飯盂炙串狼籍布。相共收斂各執去。方此危坐歡且哺。忽爾相視生畏怖。有神傑然駕巨牯。前呵後擁役二豎。此



神噉鬼充旦暮。其腹尙餒色躁怒。鬼遙見之悉失措。竄匿不暇相告諭。酒傾肉落雜穢汗。魄醜飛蕩身偃仆。一入木底只四據。一尙把盞愕以顧。一自隱蔽捩眦覷。神用氣攝縛束固。前死入吻無十步。計之嚼嚙或味飫。蒲生胡爲適爾遇。畫之滿卷無一誤。筆墨醜怪實可懼。持以贈余子何故。搖手不取一錢賂。他日乞詩者尤屢。試爲言之寫其故。

謝任瀘州師中寄荔支

有客來山中。云附瀘南信。開門得君書。歡喜失鄙吝。筠籜包荔子。四角俱封印。童稚瞥聞之。羣來立如陣。競言此佳果。生眼不識認。相煎求拆觀。顆顆紅且潤。衆手攫之去。爭奪遞追趁。貪多乃爲得。廉耻曾不論。喧鬧俄頃間。咀嚼一時盡。空餘皮與核。狼籍入煨燼。







# 襄陽詩鈔

米黻自云黻卽芾也。故亦作芾。字元章。太原人。徙居襄陽。號襄陽漫仕。後徙居吳。以母侍。宣仁后藩邸舊恩。補臨光尉。歷知雍丘縣。漣水軍使。太常博士。知無爲軍。召爲書畫學博士。賜對便殿。上其子友仁楚江清曉圖。擢禮部員外郎。出知淮陽軍。卒。解音律象緯。善屬文。作韻語。要必已出爲工。務崖絕魁壘。悟竹簡以竹聿行漆。故篆籀法特古。作字遒勁奇峭。畫山水人物。自成一家。極江南煙雲變滅之趣。晚以研山易北固園亭。名海嶽庵。淨名齋。又作寶晉齋。因號海嶽外史。又以曾監中嶽廟。號中嶽外史。自稱家居道士。有潔癖。世謂水淫。任太常。奉祀太廟。洗去祭服藻火。坐是被黜。冠服作唐人。所好多違世異俗。故人皆稱米顛。嘗作詩云。飯白雲留子。茶甘露有兄。人叩之曰。只是甘露哥哥耳。王安石愛其詩。摘書扇上。東坡云。元章奔逸絕塵之氣。超妙入神之字。清新絕俗之文。相知二十年。恨知公不盡。答曰。更有知不盡處。其風致可想也。有山林集十卷。恨未見其全。

## 垂虹亭

斷雲一葉洞庭颿。玉破鱸魚霜破柑。好作新詩寄桑苧。垂虹秋色滿東南。

## 題多景樓



欲雨氣不透。庭梧有棲煙。回首望北固。雲藏淨名天。呼童速具輿。憑高覽山川。隱見豈不好。開霽景固全。須臾江風流。湛湛清露圓。歸途知有伴。華月上丹淵。

觀音巖

秦驅禹鑿已寥寥。卻爲高人得姓焦。鮑餌有時邀楚釣。海雲常覺護山樵。巖多陰霧龍藏角。虹挂蒼林玉露臙。濁氣不侵靈贖下。方壇曾駐紫清飈。

題泗濱南山石壁曰第一山

京洛風沙千里還。船頭出汴翠屏間。莫論衡霍撞星斗。且是東風第一山。

山光寺

竹園山徑晚風清。又入山光寺裏行。一一過僧談舊事。遲遲繞壁認題名。仙來石畔懷灰劫。鶴語池邊勸後生。三十年間成底事。空叨閒祿是榮身。

望海樓

雲間鐵瓮近青天。縹緲飛樓百尺連。三峽江聲流筆底。六朝帆影落樽前。幾番畫角催紅日。無事滄洲起白煙。忽憶賞心何處是。春風秋月兩茫然。

題子敬范新婦唐摸帖



貞觀款書丈二紙。不許兒奇專婦美。何爲寥寥寶是似。遭亂歸貞火兼水。千年誰人能繼趾。不是名家殊未智。嗟爾方來眼。次洗玉躩金題半歸米。雲物龍蛇森動紙。父子王家真濟美。張翼小兒寧近似。滄溟浩對蹄涔水。騰蛇無足鼯多趾。以假易真信用智。龜澣雖多手屢洗。卷不生毛誰似米。真裂紋勻真古紙。跋印多時俗眼美。誠懸尙復誤疑似。有渭不能辨涇水。真爲頭面拳趺趾。久假中分辨愚智。寶袖開時心一洗。百氏何人傳至米。

漢王宗漢作蘆鴈有佳思贈以詩

偃蹇汀眠鴈。蕭梢風觸蘆。京塵方滿眼。速爲喚花奴。楚趣分茗水。風光剪雪湖。塵中不作惡。爲有鄴公圖。

富薛紹彭

世言米薛或薛米。猶言弟兄與兄弟。四海論年我不卑。品定多知定如是。

訓劉涇

唐滿書奩晉不收。卻緣自不信雙眸。發狂爲報豢龍子。不怕人稱米薛劉。

擬古



青松勁挺恣凌霄。耻屈盤種種出枝葉。牽連上松端。秋花起絳煙。旖旎雲錦般。不差不自立。舒光射丸丸。柏見吐子效。鶴疑縮頸還。青松本無華。安得保歲寒。龜鶴年壽齊。羽介所托殊。種種是靈物。相得忘形軀。鶴有沖霄心。龜厭曳尾居。以竹兩附口。相將上雲衢。報汝慎勿語。一語墮泥塗。

秋登峴山之作

皎皎中天月。團團徑千里。震澤乃一水。所占已過二。娑羅卽峴山。謬云形大地。地惟東吳偏。山水古佳麗。中有皎皎人。瑤衣玉爲珥。位推列仙長。學與千年對。幽操久獨處。迢迢願招類。金颺帶秋威。欵逐雲檣至。朝隔輿馭颺。暮過光浮袂。雲育有風馭。蟾餐有刀利。亭亭太陰宮。無乃瞻星氣。興深夷險一。理洞軒裳僞。紛紛夸俗勞。坦坦忘懷易。浩浩將我行。蠢蠢須公起。

西山書院丹徒私居也。上皇樵人以異石來告余。凡八十一穴。狀類泗淮山一品石。加秀潤焉。余因題爲洞天一品石。以麗其八十一數。令百夫輦致寶晉齋。又七日甘露下其石。梧桐柳竹椿杉蕉菊無不霑也。自五月望至廿六日猶未已。因思之作此詩。

我思岳麓抱黃閣。飛泉元在半天落。石鯨吐出流一里。赤日露下陰紛薄。我曾坐石浸足眠。肘項抵水洗背肩。客時救我病欲死。一夜轉筋著艾燃。如今病渴擁爐坐。安得縮脚三十年。重往石上浸足眠。



甘露寺

六代蕭蕭木葉稀。樓高北固落殘暉。兩州城郭青煙起。千里江山白鷺飛。海近雲濤驚夜夢。天低月露濕秋衣。使君肯負時平樂。長倒金鍾盡醉歸。

答劉巨濟

劉郎收畫蚤甚卑。折枝花草首徐熙。十年之後始聞道。取吾韓戴爲神奇。邇來白首進道奧。學者信有髓與皮。始知十襲但遮壁。牛馬便可裹弊帷。峨峨太平老寺主。白紗冒首無冠蕤。武士後列肅大劍。宮女旁侍顰脩眉。神清眸子知寡欲。齒露脣反法定飢。世人覩服似摩詰。不知六朝居士衣。後人勿把亂唐突。梁時筆法了可知道子。見之必再拜。曹劉何物望藩籬。本當第一品天下。卻緣顧筆在漣漪。

潤州甘露寺

邑故重重構。春歸戶戶嵐。槎浮龍委骨。畫失獸遺耽。神護衛公塔。天留米老庵。栢梁終厭勝。會副越人譚。

雜詩

揚清歌。發皓齒。北方佳人東鄰子。且吟白紵停綠水。長袖拂面爲君起。寒雲夜卷霜海空。胡風吹天飄塞鴻。玉顏滿堂樂未終。館娃日落歌吹濃。絃歌興罷拂衣還。棄米何嘗有俸錢。恩自大鈞能逐物。只應訪藥是優賢。



寄薛郎中紹彭

老來書興獨未忘。頗得薛老同徜徉。天下有識誰鑒定。龍宮無術療膏肓。淮風吹戟稀訟牒。典客閉閣閑壺漿。吟樹對山風景聚。墨池濯硯龜魚藏。珠臺寶氣每貫月。月觀桂實時飄香。銀淮燭天限織女。煙海括地生靈光。儁兒乃是翰墨侶。挾竹不使與衛將。象管鈿軸映瑞錦。玉麟斐几鋪雲肪。依依煙萃動勃鬱。矯矯龍蛇起混茫。持此以爲風月伴。四時之樂渠未央。部刺不糾翰墨病。聖恩養在林泉鄉。風沙漲天烏帽客。胡不東來從此荒。

歐怪褚妍不自持。猶能半蹈古人規。公權醜怪惡札祖。從茲古法蕩無遺。張顛與柳頗同罪。鼓吹俗子起亂離。懷素獷獠小解事。僅趨平淡如盲醫。可憐智永硯空白。去本一步呈千嗤。已矣此生爲此困。有口能談手不隨。誰云存心乃筆到。天工自是祕精微。二王之前有高古。有志欲購亡高貲。殷勤分治薛紹彭。散金購取重跋題。

寄紹彭

蕭李駮子弟。不收慰問帖。妙迹固通神。水火土更劫。所存慰問者。班班要箱笈。使惡乃神護。不然無寸札。自此輒畫相。後人眼徒攝。



東風何索寞。帶雪入揚州。尙想遺釵雀。重觀上玉鈎。眞同一夢覺。空憶十年遊。邂逅逢孫楚。酣歌慰滯留。  
竹西寺

貞孃墓歌

何不學仙家。纍纍白楊西。郭陰風悲虎丘。一叩貞孃墓。薜荔援墻委蘭露。千歲蒙茸幾樹花。夜飄鬼火曉啼鴉。向憐挾瑟彈清月。猶憶吹簫乘彩霞。吳閭少年往來道。黛娥釵燕誰能好。酒滴春雲夢不消。泉聲幽咽鐘聲老。陌上行游緩緩歸。昨日紅顏今日非。東望闔閭穿葬處。玉鳧欲化湛盧飛。

余嘗碾越竹光滑如金版。在油拳上短截作軸。入笈番覆一日數十張。學書作詩寄劉薛。越筴萬杵如金版。安用杭油與池繭。高壓巴郡烏絲欄。平欺澤國清華練。老無他物適心目。天使殘年同筆研。圖書滿室翰墨香。劉薛何時眼中見。

將之苕溪戲作呈諸友

松竹留因夏。溪山去爲秋。久賡白雪詠。更度采菱謳。縷玉鱸堆案。團金橘滿洲。水宮無限景。載與謝公游。半載依修竹。三時看好花。懶傾惠泉酒。點盡壑源茶。主席多同好。羣峯伴不譁。朝來還蠹簡。便起故巢嗟。余居半載諸公載酒不輟。而余以疾每約置膳清話而已。復借書劉李周三姓。



好懶難辭友。知窮豈念通。貧非理生拙。病覺養心功。小圃能留客。青冥不厭鴻。秋帆尋賀老。載酒過江東。仕倦成流落。游頻慣轉蓬。熱來隨意住。涼至逐緣東。入境親疎集。他鄉彼此同。暖衣兼食飽。但覺愧梁鴻。旅食緣交駐。浮家爲興來。旬留荆水話。襟向卞峯開。過剡如尋戴。遊梁定賦枚。漁歌堪畫處。又有魯公陪。密友從春拆。紅薇過夏榮。團枝殊自得。顧我若含情。漫有蘭隨色。寧無石對聲。卻憐皎皎月。依舊滿船行。

與薛老

何必識難字。辛苦笑楊雄。自古寫字人。用字或不通。要之皆一戲。不當問拙工。意足我自足。放筆一戲空。

蕭閒堂詩并敘

四明從事晉陵錢君世系。字延叟。過襄陽。米芾曰。昨送季濟民渡江。與汪行之復會蕭閒堂。已撤幕。壁間有君像。題曰。權杭州觀察米元章像。楊之儀筆。楊之傑贊曰。君子之交。小人之讐。以今方人。叔度宜儔。余以袖掩字而問行之曰。誰歟。行之曰。君也。僕爲檢同氣德識面三編。無君名姓。嗚呼。古人論世取友。況同世哉。世復有三君子者。觀文殿學士王公韶。字子純。樞密直學士劉公庠。字希道。則僕竟不識其面。選人蔡君肇。字天啓。於相知間語僕。如素心腹者。云得僕於王荆公。蓋僕於元豐六年赴希道金陵從事之辟。會公謫居。始識荆公於鍾山間。公門有數十後進。喜爭名而相非。又記以長者之言也。如天啓樂道人善者。一人而已。僕老矣。不知一蔡二楊。行能識面。因延叟語發悲嘆。并記其事於家集中。



以貽子孫。嗚呼。仕開求進之語。則世人之邪說大行。紛紛不求己而求人。豈其本心。實利誘然。今樂善君子。一何多耶。彼口不道忠信。捷捷而惡人。翩翩而自喜。點點懷奸。藏匿竊竊掩人之善。沾沾自標置者。得不少悛乎。既序其事。因系以詩。

惟起蕭閒堂。圖贊凡醜質。昧昧豈我思。有懷斯士吉。吾生終不遇。二陵已相失。苟養走四方。公卿更絕跡。向我交漸稀。背憎十六七。豐吾九畹蘭。任汝滿地棘。我豈蕭閒人。偶然得空壁。美哉何方彥。精絕入妙筆。君不愧顧長康。取媚桓温圖九錫。我不媿孟浩然。緩策京山遇摩詰。前此交道久不康。紛紛白頭多不卒。嗚呼紛紛白頭多不卒。回首此君應辟易。







# 山谷詩鈔

黃庭堅字魯直。分寧人。游灑皖山谷寺石牛洞。樂其勝。自號山谷老人。天下因稱山谷。以配東坡。過涪。又號涪翁。第進士。歷知太和。哲宗召爲校書郎。神宗實錄檢討。官起居舍人。除祕書丞。國史編修官。紹聖間出知宣鄂。章蔡論實錄多誣。責問。條對不屈。貶涪州別駕。安置黔州。卽日上道。投牀大斲。人以是賢之。徽宗起監鄂州稅。歷知舒州。丐郡得大平州。旋罷。嘗忤趙挺之。及相。嗾除名。編管宜州。卒年六十一。宋初詩承唐餘。至蘇梅歐陽。變以大雅。然各極其天才筆力。非必鍛鍊勤苦而成也。庭堅出而會萃百家句律之長。究極歷代體制之變。自成一家。雖隻字半句。不輕出。爲宋詩家宗祖。江西詩派皆師承之。史稱自黔州以後。句法尤高。實天下之奇作。自宋興以來。一人而已。非規模唐調者所能夢見也。惟本領爲禪學。不免蘇門習氣。是用爲病耳。

柳閱展如蘇子瞻甥也。其才德甚美。有意於學。故以桃李不言。下自成蹊。八字作詩贈之。

柳君文甚武。一作武甚睥視萬人豪。睥睨一作睨視老氣鼓不作。卷旗解弓刀。上爲朝陽桐。下爲澗溪毛。囊中有美實。

期子種蟠桃。

浮陽愧嘉魚。道傍多苦李。古來賢達人。不爭咸陽市。吾子富春秋。日月東趨一作逝。水潛聖有玉音。聞道而



已矣。

霜威能折綿。風力猶冰酒。勤子來訪道。枵然我何有。寢興與時俱。由我屈伸肘。飯羹自知味。如此是道不。任世萬鈞重。載言以爲軒。空文誤來世。聖達欲無言。咸池浴日月。深宅養靈根。胸中浩然氣。一家同化元。陸沉百世師。寄食魯柳下。我今見諸孫。風味窺大雅。大雅久不作。圖王勿成霸。偉哉居移氣。蘭鮑在所化。聖學魯東家。恭惟同出自。乘流去本遠。遂有作書肆。日中駕肩來。薄晚常掉臂。徒囂終無贏。歸矣求已事。清潤玉泉冰。高明秋景晴。妙年勤翰墨。銀鈎爛縱橫。藍田生美璞。未琢價連城。思爲萬乘器。柱下貴晚成。八方去求道。渺渺困多蹊。歸來坐虛室。夕陽在吾西。君今秣高馬。夙駕先鳴雞。慎勿取我語。親行乃不迷。

奉和文潛贈無咎篇末多見及以既見君子云胡不喜爲韻

龜以靈故焦。雉以文故翳。本心如日月。利欲食之既。後生玩華藻。照影終沒世。安得八絃置。以道獵衆智。談經用燕說。束棄諸儒傳。濫觴雖有罪。末派瀾九縣。張侯真理窟。堅壁勿與戰。難以口舌爭。水清石自見。野性友麋鹿。君非我同羣。文明近日月。我亦不如君。十載長相望。逝川水汙汙。何當談絕倒。茗椀對鑪薰。北寺鎖齋房。陳鑰時一啓。晁張跼然來。連壁照書几。庭栢鬱葱葱。紅榴罅多子。時蒙吐佳句。幽處萬籟起。先皇元豐末。極厭士淺聞。只今舉秀孝。天未喪斯文。晁張班馬首。崔蔡不足云。當令橫筆陣。一戰靜楚氛。張侯窘炊玉。僦屋得空壚。但見索酒郎。不見酒家胡。雖肥如瓠壺。胸中殊不粗。何用知如此。文采似於菟。



荆公六藝學。妙處端不朽。諸生用其短。頗復鑿戶牖。譬如學捧心。初不悟已醜。玉石恐俱焚。公爲區別不。吾友陳師道。抱獨門掃軌。晁張作薦書。射雉用一矢。吾聞舉逸民。故得天下喜。兩公陣堂堂。此士可摩疊。子瞻詩句妙。一世乃云効。庭堅體蓋退之戲。效孟郊樊宗師之比。以文滑稽耳。恐後生不解。故以韻道之。

我詩如曹鄴。淺陋不成邦。公如大國楚。吞五湖三江。赤壁風月笛。玉堂雲霧窗。句法提一律。堅城受我降。枯松倒澗壑。波濤所舂撞。萬牛挽不前。公乃獨力扛。諸人方嗤點。渠非晁張雙。但懷相識察。牀下拜老龐。小兒未可知。客或許敦龐。誠堪塔阿巽。買紅纏酒缸。

留王郎 純亮世弼

河外吹沙塵。江南水無津。骨肉常萬里。寄聲何由頻。我隨簡書來。顧影將一身。留我左右手。奉承白頭親。小邦王事略。蟲鳥聲無人。王甥解鞍馬。夜語雞喚晨。母慈家人肥。女慧男垂紳。有田爲酒事。豚韭及秋春。生涯得如此。舊學更光新。索去何草草。少留慰艱勤。百年才一炊。六籍經幾秦。要知胸中有。不與跡同陳。郢人懷妙質。聊欲運吾斤。白頭一作白髮

贛上食蓮有感

蓮實大如指。分甘念母慈。共房頭鱗鱗。更深兄弟思。實中有么荷。拳如小兒手。令我憶衆雛。迎門索梨棗。



蓮心政自苦。食苦何能甘。甘澹恐腊毒。素食則懷慚。蓮生淤泥中。不與泥同調。食蓮誰不甘。知味良獨少。吾家雙井塘。十里秋風香。安得同裘子。歸製芙蓉裳。

次韻張仲謀過酺池寺齋

詢

十年醉錦幄。醪醑照金沙。欹眠春風底。不去留君家。是時應門兒。紫蘭茁其芽。只今將弟妹。嬉戲牽羊車。忽書滿窗紙。整整復斜斜。平生悲歡事。頭緒如亂麻。苟祿無補報。幾成來食嗟。喜君崇名節。青雲似可涯。我夢江湖去。釣船刺蘆花。江濱開園宅。畦蔗蒔梨楂。夢驚如昨日。炊玉困京華。公來或藜藿。愛我不疵瑕。深念煩鄉里。忍窮禁貸賒。夜談簾幕冷。霜月動金蛇。卽是桃李月。春蟲語交加。我亦無酒飲。一室可盤蝸。要公共文字。朱墨勘舛差。非復少年日。聲名取嫋姘。諸阮有二妙。能詩定自嘉。何時來煮餅。蟹眼試官茶。

次韻子瞻送顧子敦河北

儒者給事中。顧公甚魁偉。經明往行河。商略頗應史。勞人又費乏。國計安能已。成功渠有命。得人斯可喜。似聞阻饑餘。惡少驚邑里。啓鑰探珠金。奪懷取姝美。部中十盜發。一二書奏紙。西連魏兩河。東盡齊四履。此豈小事哉。何但行治水。使民皆農桑。乃見真儒耳。

今代顧虎頭。骨相自雄偉。不令長天官。亦合丞御史。能貧安四壁。無慍可三已。昨來立清班。國士相顧喜。何因將使節。風日按千里。汲黯不居中。似非朝廷美。大任錄萬事。御坐留諫紙。發政恐傷民。天步薄冰履。



蒼生憂其魚南畝多被水。公行圖安集。信日勿信耳。

跋子瞻和陶詩

子瞻謫嶺南。時宰欲殺之。飽喫惠州飯。細和淵明詩。彭澤千載人。東坡百世士。出處雖不同。風味乃相似。

送李德素歸舒城

僧夏莫問塗。麥秋宜煮餅。北寺旬休歸。長廊六月冷。簟翻寒江浪。茶破蒼壁影。李侯爲我來。遽以歸期請。青衿廢詩書。白髮違定省。荒畦當鉏灌。蠹簡要籤整。挽衣不可留。決去事幽屏。天恢獵德網。日饕養賢鼎。此士落江湖。熟思令人瘦。胸中吉祥宅。膜外榮辱境。婆娑萬物表。藏刃避緊肯。人生要當學。安燕不徹警。古來惟深地。相待汲修綆。

次韻冕仲考進士試卷

少來迷翰墨。無異蟲蠹木。諸生程藝文。承詔當品目。牀敷設箱篋。賦納忽數束。變名混甲乙。謄寫失句讀。晝窗過白駒。夜几跋紅燭。釣深思嘉魚。攻璞願良玉。談天用一律。伸詐厭重複。絲布澀難縫。快意忽破竹。聖言裨曲學。割袞綴邪幅。注金無全巧。竊發或中鵠。翟公辟癰老。薪樗茂械樸。御史威降霜。行私不容粟。吏部提英鑒。片善蒙采錄。博士刈其楚。銓量頗三復。因人享成事。賤子真碌碌。

次韻答秦少章乞酒

觀



朝事鞍馬早。吏曹文墨拘。初無尺寸補。但於友朋疎。豈知簞瓢子。臥起一牀書。炙背道堯舜。雪屋相與娛。步出城東門。野鳥吟廢墟。頗知富貴事。勢窮心亦舒。詩來獻窮狀。水餅嚼冰蔬。斗酒得醉否。枵腹如瓠壺。亦可召西舍。侯嬴非博徒。

贈秦少儀

汝南許文休。馬磨白衣食。但聞郡功曹。滿世名籍籍。渠命有顯晦。非人作通塞。秦氏多英俊。少游眉最白。頗聞鴻雁行。筆皆萬人敵。吾早知有覲。而不知有覲。少儀袖詩來。剖蚌珠的皪。乃能持一鏃。與我箭鋒直。自吾得此詩。三日臥向壁。挽士不能寸。推去輒數尺。才難不其然。有亦未易識。此詩一作此士。挽士一作挽來。

次韻子實題少章寄寂齋

虛名誤壯夫。今古可笑閔。屍裹萬里歸。書載五車擔。安知衡門下。身與天地準。秦晁兩美士。內行頗修謹。余欲造之深。抽琴去其軫。寄寂喧鬧間。此道一作鈎深有汲引。獄戶聞笞榜。市聲雜嘲駭。二生對曲肱。圭玉發石蘊。小大窮鵬鷗。短長見椿槿。一作付欲聞寂時聲。黃鍾在龍筭。

次韻謝斌老送墨竹十二韻

古今作生竹。能者未十輩。吳生勒枝葉。筌窠遠不逮。江南鐵鈎鎖。最許誠懸會。燕公洒墨成。落落與時背。譬如剡心松。中有寒歲在。湖州三百年。筆與前哲配。規摹轉銀鈎。幽賞非俗愛。披圖風雨入。咫尺莽蒼外。



吾子學湖州。師逸功已倍。有來竹四幅。冬夏生變態。預知更入神。後出遂無對。吾詩被壓倒。物固不兩大。  
世傳江南李正作竹。自根至梢。極小者一一鉤勒成。謂之鐵鉤鎖。自云惟柳公權有此筆法。

次韻答斌老病起獨游東園

主人心安樂。花竹有和氣。時從物外賞。自益酒中味。斲枯蟻改穴。掃籜笋迸地。萬籟寂中生。乃見風雨至。  
顏徒貧樂二首

衡門低首過。環堵容膝坐。四傍無給侍。百衲自纏裹。論事直如絃。觀書曲肱臥。饑來或乞食。有道無不可。  
小山作友朋。義重子輿桑。香草當姬妾。不須珠翠粧。烏烏窺凍硯。星月入幽房。兒報無炊米。浩歌繞屋梁。  
以椰子茶餅寄德孺

炎丘椰木實。入用隨茗椀。譬如楛石斲。但貴從來遠。往時萬里物。今在籬落間。知君一拂拭。想我瘴霧顏。  
次韻子瞻題郭熙畫秋山

黃州逐客未賜環。江南江北飽看山。玉堂臥對郭熙畫。發興已在青林間。郭熙官畫但荒遠。短紙曲折開  
秋晚。江村煙外雨腳明。歸雁行邊餘疊巘。坐思黃甘洞庭霜。恨身不如雁隨陽。熙今頭白有眼力。尙能弄  
筆映窗光。畫取江南好風日。慰此將老鏡中髮。但熙肯畫寬作程。五日十日一水石。

詠李伯時摹韓幹三馬。次蘇子由韻。簡伯時兼寄李德素。  
公麟築



太史瑣窗雲雨垂。試開三馬拂蛛絲。李侯寫影韓幹墨。自有筆如沙畫錐。絕塵超日精爽緊。若失其一望。路馳馬官不語臂指揮。乃知仗下非新羈。吾嘗覽觀在垆馬。駑駘成列無權奇。緬懷胡沙英妙質。一雄可將十萬雌。決非廝養所成就。天驥生駒人得之。千金市骨今何有。士或不價五羖皮。李侯畫隱百寮底。初不自期人誤知。戲弄丹青聊卒歲。身如閱世老禪師。

次韻子瞻和子由觀韓幹馬因論伯時畫天馬

于闐花驄龍八尺。看雲不受絡頭絲。西河驄作葡萄錦。雙瞳夾鏡耳卓錐。長楸落日試天步。知有四極無由馳。電行山立氣深穩。可耐珠躡白玉羈。李侯一顧歎絕足。領略古法生新奇。一日真龍入圖畫。在垆羣雄望風雌。曹霸弟子沙苑丞。喜作肥馬人笑之。李侯論幹獨不爾。妙盡骨相遺毛皮。翰林評書乃如此。賤肥貴瘦渠未知。況我平生賞神俊。僧中云是道林師。俊一作駿

戲和文潛謝穆父松扇

猩毛束筆魚網紙。松柎織扇清相似。動搖懷袖風雨來。想見僧前落松子。張侯哦詩松韻寒。六月火雲蒸肉山。持贈小君聊一笑。不須射雉穀黃間。

次韻王炳之惠玉版紙

伯虎

王侯須若緣坡竹。哦詩清風起空谷。古田小牋惠我百。信知溪翁能解玉。鳴磬千杵動秋山。裹糧萬里來



輦轂儒林丈人有蘇公。相如子雲再生蜀。往時翰墨頗橫流。此公歸來有邊幅。小楷多傳樂毅論。高詞欲奏雲門曲。不持歸掃蘇公門。乃令小人今拜辱。去騷甚遠文氣卑。畫虎不成書勢俗。董狐南史一筆無。誤掌殺青司記錄。雖然此中有公議。或辱五鼎榮半菽。願公進德使見書。不敢求君米千斛。

雙井茶送子瞻

人間風月不到處。天上玉堂森寶書。想見東坡舊居士。揮毫百斛瀉明珠。我家江南摘雲腴。落磴霏霏雪不如。爲公喚起黃州夢。獨載扁舟向五湖。

常父答詩有煎點徑須煩綠珠之句復次韻戲答

小鬟雖醜巧粧梳。掃地如鏡能檢書。欲買娉婷供煮茗。我無一斛明月珠。知公家亦闕掃除。但有文君對相如。政當爲公乞如願。作牋遠寄宮亭湖。

戲呈孔毅父

平仲

管城子無食肉相。孔方兄有絕交書。文章功用不經世。何異絲窠綴露珠。校書著作頻詔除。猶能上車問何如。忽憶僧牀同野飯。夢隨秋雁到東湖。

以團茶洮州綠石研贈無咎文潛

晁子智囊可以括四海。張子筆端可以回萬牛。自我得二士。意氣傾九州。道山延閣委竹帛。清都太微望



冕旒。貝宮胎寒弄明月。天網下罩一日收。此地要須無不有。紫皇訪問富春秋。晁無咎。贈君越侯所貢蒼玉璧。可烹玉塵試春色。澆君胸中過秦論。斟酌古今來活國。張文潛。贈君洮州綠石含風漪。能淬筆鋒利如錐。請書元祐開皇極。第入思齊訪落詩。

謝送碾賜壑源揀芽

喬雲從龍小蒼壁。元豐至今人未識。壑源包貢第一春。緗匳碾香供玉食。睿思殿東金井欄。甘露薦椀天開顏。橋山事嚴<sup>庀</sup>百局。補袞諸公省中宿。中人傳賜夜未央。雨露恩光照宮燭。左丞似是李元禮。好事風流有涇渭。肯憐天祿校書郎。親敕家庭遣分似。春風飽識大官羊。不慣腐儒湯餅腸。搜攪十年燈火讀。令我胸中書傳香。已戒應門老馬走。客來問字莫載酒。袁司一作補袞

以小團龍及半挺贈無咎并詩用前韻爲戲

我持玄圭與蒼璧。以暗投人渠不識。城南窮巷有佳人。不索賓郎常宴食。赤銅茗椀雨斑斑。銀粟翻光解破顏。上有龍文下棋局。檐囊贈君諾已宿。此物已是元豐春。光皇聖功調玉燭。晁子胸中開典禮。平生自期莘與渭。故用澆君磊隗胸。莫令髣髴毛霜相似。曲几團蒲聽煮湯。煎成車聲繞羊腸。鷄蘇胡麻留渴羌。不應亂我官焙香。肥如瓠壺鼻雷吼。幸君飲此勿飲酒。擔囊一作探囊

觀伯時畫馬



儀鸞供帳饗蟲行。翰林濕薪爆竹聲。風簾官燭淚縱橫。木穿石罅未渠透。坐窗不遨令人瘦。貧馬百竄逢一豆。眼明見此五花驄。徑思著鞭隨詩翁。城西野桃尋小紅。

次韻子瞻送李豸

驥子墮地追風日。未試千里誰能識。習之實錄葬皇祖。斯文如女有正色。今年持橐佐春官。遂失此人難塞責。雖然一闢有奇耦。博懸於投不在德。君看巨浸朝百川。此豈有意潢潦前。願爲霧豹懷文隱。莫愛風蟬蛻骨仙。

次韻子瞻寄眉山王宣義

參軍但有四立壁。初無臨江千木奴。白頭不是折腰具。桐帽棕屨稱老夫。滄江鷗鷺野心性。陰壑虎豹雄牙須。鷓鴣作裘初服在。猩血染帶鄰翁無。昨來杜鵑勸歸去。更得把酒聽提壺。當今人材不乏使。天上二老須人扶。兒無飽飯尙勤書。婦無複輝且著襦。社甕可漉溪可漁。更問黃雞肥與羶。林間醉著人伐木。猶夢官下聞追呼。萬釘圍腰莫愛渠。富貴安能潤黃墟。

聽宋宗儒摘阮歌

翰林尙書宋公子。文采風流今尙爾。自疑耆域是前身。囊中探丸起人一作死。貌如千歲枯松枝。落魄酒中無定止。得錢百萬送酒家。一笑不問今餘幾。手揮琵琶送飛鴻。促絃聒醉驚客起。寒蟲催織月籠秋。獨



雁叫羣天拍水。楚國羈臣放十年。漢宮佳人嫁千里。深閨洞房語恩怨。紫燕黃鸝韻桃李。楚狂行歌驚市人。漁父挈舟在葭葦。問君枯木著朱繩。何能道人意中事。君言此物傳數姓。玄壁庚庚有橫理。閉門三月傳國工。身今親見阮仲容。我有江南一丘壑。安得與君醉其中。曲肱聽君寫松風。琵琶一作阮咸

答黃冕仲索煎雙井并簡揚休

裳

江夏無雙乃吾宗。同舍頗似王安豐。能澆茗椀湔被我。風袂欲挹浮丘翁。吾宗落筆賞幽事。秋月下照澄江空。家山鷹爪是小草。敢與好賜雲龍同。不嫌水厄幸來辱。寒泉湯鼎聽松風。夜堂朱墨小燈籠。惜無纖纖來捧椀。唯倚新詩可傳本。

再答冕仲

丘壑詩書誰數窮。田園芋栗頗時豐。小桃源口雨繁紅。春溪蒲稗沒鳧翁。投身世網夢歸去。摘山鼓聲雷隱空。秋堂一笑共燈火。與公草木臭味同。安用茗澆磊隗胸。他日過飯隨家風。買魚貫柳雞著籠。更當力貧開酒椀。走謁鄰翁稱子本。

戲答陳元興

軒

平生所聞陳汀州。蝗不入境年屢豐。東門拜書始識面。髻髮幸未成老翁。官饗同盤厭腥膩。茶甌破睡秋堂空。自言不復蛾眉夢。枯淡頗與小人同。但憂迎笑花枝紅。夜窗冷雨打斜風。秋衣沉水換薰籠。銀屏宛



轉復宛轉。意根難拔如薤本。

考試局與孫元忠博士竹間對窗夜聞元忠誦書聲調悲壯戲作竹枝歌三章和之。林

南窗讀書聲吾伊。北窗見月歌竹枝。我家白髮問烏鵲。他家紅粧占蛛絲。  
屋山啼鳥兒當歸。玉釵罨蛛郎馬嘶。去時燈火正月半。階前雪消萱草齊。  
勃姑夫婦喜相喚。街頭雪泥即漸乾。已放遊絲高百尺。不應桃李尙春寒。

王稚川既待一作官都下有所盼未歸。予戲作林夫人欸乃歌二章與之。竹枝歌本出三巴。其

流在湖湘耳。欸乃乃湖南歌也。款音襖。乃音藹。

花上盈盈人不歸。棗下纂纂實已垂。臘雪在時聽馬嘶。長安城中花片飛。  
從師學道魚千里。蓋世成功黍一炊。日日倚門人不見。看盡林鳥反哺兒。

演雅

桑蠶作繭自纏裹。珠螿結網工遮邏。燕無居舍經始忙。蝶爲風光勾引破。老鶻銜石宿水飲。穉蜂趨衙供  
蜜課。鵲傳吉語安得閒。雞催晨興不敢臥。氣陵千里蠅附驥。枉過一生蟻旋磨。蝨聞湯沸尙血食。雀喜宮  
成自相賀。晴天振羽樂蜉蝣。空穴祝兒成螺贏。蛄蜺轉丸賤蘇合。飛蛾赴燭甘死禍。井邊蠹李螬苦肥。枝  
頭飲露蟬常餓。天螻伏隙錄人語。射工含沙須影過。訓狐啄屋真行怪。蠨蛸報喜太多可。鷓鴣密伺魚蝦



便。白鷺不禁塵土澆。絡緯何嘗省機織。布穀未應勤種播。五技鼯鼠笑鳩拙。百足馬蚊憐鰲跛。老蚌胎中珠是賊。醯雞瓮裏天幾大。螳螂當轍恃長臂。熠燿宵行驚照火。提壺猶能勸沽酒。黃口只知貪飯顆。伯勞饒舌世不問。鸚鵡纔言便關鎖。春蛙夏蝮更嘈雜。土蚓壁蟬何碎瑣。江南野水碧於天。中有狎鷗閒似我。  
狎一作白

戲答趙伯充勸莫學書及爲席子澤解嘲

叔益延堂

平生飲酒不盡味。五鼎餽肉如嚼蠟。我醉欲眠便遣客。三年窺牆亦面壁。空餘小來翰墨場。松煙兔穎傍明窗。偶隨兒戲洒墨汁。衆人許在崔杜行。晚學長沙小三昧。幻出萬物真成狂。龍蛇起陸雷破柱。自喜寄觀曉繩牀。家人罵笑寧有道。污染黃素敗粉牆。誠不如南鄰席明府。蛛網鎖硯蝸書梁。懷中探丸起九死。才術頗似漢太倉。感君詩句喚夢覺。邯鄲初未熟黃梁。身如朝露無牢強。玩此白駒過隙光。從此永明書百卷。自公退食一爐香。

出城送客故人東平侯趙景珍墓

令據

朱顏苦一作欲留不肯住。白髮政爾欺得人。嬋娟去作誰家妾。意氣都成一聚塵。今日牛羊上丘壟。當時近前左右噴。花開鳥啼荆棘裏。誰與平章作好春。

題小猿叫驛

知命



大猿叫罷小猿啼。箐裏行人白晝迷。惡藤牽頭石齧足。嫗牽兒隨淚錄續。我亦下行莫啼哭。

王充道送水仙花五十枝欣然會心爲之作詠

淩波仙子生塵襪。水上輕盈步微月。是誰招此斷腸魂。種作寒花寄愁絕。含香體素欲傾城。山礬是弟梅是兄。坐對眞成被花惱。出門一笑大江橫。

武昌松鳳閣

依山築閣見平川。夜闌箕斗插屋椽。我來名之意適然。老松魁梧數百年。斧斤所赦今參天。風鳴鳩皇五十絃。洗耳不須菩薩泉。嘉二三子甚好賢。力貧買酒醉此筵。夜雨鳴廊到曉懸。相看不歸臥僧氈。泉枯石燥復潺湲。山川光輝爲我妍。野僧早飢不能饘。曉見寒谿有炊煙。東坡道人已沉泉。張侯何時到眼前。釣臺驚濤可晝眠。怡亭看篆蛟龍纏。安得此身脫拘攣。舟載諸友長周旋。

次韻文潛

武昌赤壁弔周郎。寒溪西山尋漫浪。忽聞天上故人來。呼船淩江不待餉。我瞻高明少吐氣。君亦歡喜失微恙。年來鬼祟覆三豪。詞林根柢頗搖蕩。天生大材竟何用。只與千古拜閣像。張侯文章殊不病。歷險心膽元自壯。汀洲鴻雁未安集。風雪牖戶當塞向。有人出手辦茲事。政可隱几窮諸妄。經行東坡眠食地。拂拭寶墨生楚愴。水清石見君所知。此是吾家秘密藏。閣像一作遣像



書磨崖碑後

春風吹船著浯溪。扶藜上讀中興碑。平生半世看墨本。摩挲石刻鬢成絲。明皇不作包桑計。顛倒四海由祿兒。九廟不守乘輿西。萬官已作烏擇栖。撫軍監國太子事。何乃趣取大物爲。事有至難天幸爾。上皇跼蹐還京師。內間張后色可否。外間李父頤指揮。南內淒涼幾苟活。高將軍去事尤危。臣結春陵二三策。臣甫杜鵑再拜詩。安知忠臣痛至骨。世上但賞瓊琚詞。同來野僧六七輩。亦有文士相追隨。斷崖蒼蘚對立久。凍雨爲洗前朝悲。

再答元輿

君不能入身帝城結子公。又不能擊強有如諸葛豐。法當憔悴百寮底。五十天涯一秃翁。問君何自今爲郎。便殿作賦聲摩空。偶然樽酒相勞苦。牛鐸調與黃鍾同。安得朱轡各憑熊。江南樓閣白蘋風。勸歸啼鳥曉窗籠。男兒邂逅功補袞。烏倦歸巢葉歸本。

送王郎

酌君以蒲城桑落之酒。泛君以湘纍秋菊之英。贈君以黟川點漆之墨。送君以陽關墮淚之聲。酒澆胸中之磊隗。菊制短世之頽齡。墨以傳千古文章之印。歌以寫一家兄弟之情。江山萬里頭俱白。骨肉十年眼終青。連牀夜語雞戒曉。書囊無底談未了。有功翰墨乃如此。何恨遠別音書少。炒沙作糜終不飽。鏤冰文



章費工巧須要心地收汗馬。孔孟行世日杲杲。有弟有弟力持家。婦能養姑供珍鮭。兒大詩書女絲桑。一作麻公但讀書煮春茶。

送舅氏野夫之宣城二首 李莘

籍甚宣城郡。風流數貢毛。林霜收鴨腳。春網薦琴高。共理須良守。今年輟省曹。平生割雞手。聊試發硎刀。試說宣城郡。停杯且細聽。晚樓明宛水。春騎簇昭亭。粳稔豐圩戶。桁楊臥訟庭。謝公歌舞處。時對換鵝經。

次韻崔伯易席上所賦因以贈行

迎新與送故。渠已不勝勤。民賣腰間劍。公寬柱後文。諸郎投賜沐。高會惜臨分。去國雖千里。分憂卽近君。

次韻秦少章晁適道贈答詩

二子論文地。陰風雪塞廬。寧穿東郭履。不奉子公書。士固難推挽。時聞有詔除。負暄真得計。獻御恐成疎。

次韻答高子勉

君不居郎省。還應上諫坡。才高殊未識。歲晚喜無它。櫪馬羸難出。鄰雞凍不歌。寒爐餘幾火。灰裏撥陰何。志士難推轂。將如高子何。心期誠不淺。餘論或相多。欲向滄洲去。還能小艇麼。鷗鷺西照處。相並晒漁蓑。

次韻柳通叟寄王文通

故人昔有凌雲賦。何意陸沉黃綬間。頭白眼花行作吏。兒婚女嫁望還山。心猶未死杯中物。春不能朱鏡。



裏顏寄語諸公肯湔拔。割雞令得近鄉關。

次韻王定國揚州見寄

清洛思君晝夜流。北歸何日片帆收。未生白髮猶堪酒。垂上青雲卻佐州。飛雪堆盤鱸魚腹。明珠論斗煮雞頭。平生行樂自不惡。豈有竹西歌吹愁。

寄黃幾復

我居北海君南海。寄雁傳書謝不能。桃李春風一杯酒。江湖夜雨十年燈。持家但有四立壁。治病不斬三折肱。想得讀書頭已白。隔溪猿哭瘴溪藤。

次韻幾復和答所寄

海南海北夢不到。會合乃非人力能。地褊未堪長袖舞。夜寒空對短檠燈。相看鬢髮時窺鏡。曾共詩書更曲肱。作箇生涯終未是。故山松長到天藤。

寄上叔父夷仲二首

少年有功翰墨林。中歲作吏幾陸沉。庖丁解牛妙世故。監市履豨知民心。萬里書來兒女瘦。十月山行冰雪深。夢魂和月遶秦隴。漢節落毛何處尋。

關寒塞雪欲嗣音。燕雁拂天河鯉沉。百書不如一見面。幾日歸來兩慰心。弓刀陌上望行色。兒女燈前語



夜深更懷父子東歸得手種江頭柳十尋

次韻宋楸宗僦居甘泉坊雪後書懷

漢家太史宋公孫漫逐班行謁帝闈燕頷封侯空有相蛾眉傾國自難昏家移四壁書侵坐馬瘦三山葉擁門安得風帆隨雪水江南石上對窪罇

馬瘦一作馬聳

次韻宋楸宗三月十四日到西池都人盛觀翰林公出遊

金狨繫馬曉鶯邊不比春江上水船人語車聲喧法曲花光樓影倒晴天人間化鶴三千歲海上看羊十九年還作遨頭驚俗眼風流文物屬蘇仙

次韻楊君全送酒長句

扶衰卻老世無方唯有君家酒未嘗秋入園林花老眼茗搜文字響枯腸醅頭夜雨排簷滴盃面春風繞鼻香不待澄清遣分送定知佳客對空觴

贈李輔聖

交蓋相逢水急流八年今復會荊州已回青眼追鴻翼肯使黃塵沒馬頭舊管新收幾粧鏡流行坎止一虛舟相看絕歎女博士筆硯管絃成古丘

女博士謂輔聖後房孔居也於文藝無不妙絕

和高仲本喜相見



雨昏南浦曾相對。雪滿荊州喜再逢。有子才如不羈馬。知公心是後彫松。閒尋書冊應多味。老傍人門似更慵。何日晴軒觀筆硯。一尊相屬要從容。

新喻道中寄元明用觴字韻

中年畏病不舉酒。孤負東來數百觴。喚客煎茶山店遠。看人秧稻午風涼。但知家裏俱無恙。不用書來細作行。一百八盤攜手上。至今猶夢遶羊腸。

湖口人李正臣蓄異石九峰。東坡先生名曰壺中九華。并爲作詩。後八年自海外歸。過湖口。石已爲好事者所取。乃和前篇以爲笑。實建中靖國元年四月十六日。明年當崇寧之元五月二十日。庭堅繫舟湖口。李正臣持此詩來。石旣不可復見。東坡亦下世矣。感歎不足。因次前韻。

有人夜半持山去。頓覺浮嵐暝翠空。試問安排華屋處。何如零落亂雲中。能迴趙璧人安在。已入南柯夢不通。賴有霜鍾難席卷。袖椎來聽響玲瓏。

追和東坡題李亮功歸來圖

今人常恨古人少。今得見之誰謂無。欲學淵明歸作賦。先煩摩詰畫成圖。小池已築魚千里。隙地仍栽芋百區。朝市山林俱有累。不居京洛不江湖。



王才元惠梅花三種皆妙絕戲答三首

梅

城南名士遣春來。三月乃見臘前梅。定知鎖著江南客。故放綠梢春晚回。一作陰  
舍人梅塢無關鎖。攜酒俗人來未曾。舊時愛菊陶彭澤。今作梅花樹下僧。一作殺一  
病夫中歲屏栝杓。百葉細梅觸撥人。拂殺官黃春有思。滿城桃李不能春。一作掠

題伯時畫頓塵馬

竹頭搶地風不舉。文書堆案睡自語。忽看高馬頓風塵。亦思歸家洗袍袴。

竹枝詞二首

古樂府有巴東三峽巫峽長。猿鳴三聲淚霑裳。但以抑怨之音。和為數疊。惜其聲今不傳。予自荊州上峽入黔中。備嘗山川險阻。因作二疊。傳與巴娘。令以竹枝歌之。前一疊可和云。鬼門關外莫言遠。五十三驛是皇州。後一疊可和云。鬼門關外莫言遠。四海一家皆弟兄。或各用四句。入陽關小秦王亦可歌也。

撐崖拄谷蝮蛇愁。入箐攀天猿掉頭。鬼門關外莫言遠。五十三驛是皇州。  
浮雲一百八盤榮。落日四十九渡明。鬼門關外莫言遠。四海一家皆弟兄。

予既作竹枝詞。夜宿歌羅驛。夢李白相見於山間。曰。予往謫夜郎。於此聞杜鵑。作竹枝詞三疊。



世傳之不子細憶集中無有請三誦乃得之

一聲望帝花片飛。萬里明妃雪打圍。馬上胡兒那解聽。琵琶應道不如歸。  
竹竿坡面蛇倒退。摩圍山腰胡孫愁。杜鵑無血可續淚。何日金雞赦九州。  
命輕人鮮甕頭船。目瘦鬼門關外天。北人墮淚南人笑。青壁無梯聞杜鵑。

題驢瘦嶺馬鋪

知命

老馬饑嘶驢瘦嶺。病人生入鬼門關。病人甘作五溪臥。老馬猶思十二閒。

上南陵坡

知命

風餐水宿六千里。蛇退猿愁百八盤。上得坡來摠歡喜。摩圍依約見峰巒。

病起荆江亭卽事十首

翰墨場中老伏波。菩提坊裏病維摩。近人積水無鷗鷺。時有歸牛浮鼻過。  
維摩老子五十七。天子大聖初元年。傳聞有意用幽側。病著不能朝日邊。  
禁中夜半定天下。仁風義氣徹脩門。十分整頓乾坤了。復辟歸來道更尊。  
成王小心似文武。周召何妨略不同。不須要出我門下。實用人材卽至公。  
司馬丞相昔登庸。招用元老超羣公。楊綰當朝天下喜。斷碑零落臥秋風。

昔一作驟



死者已死黃霧中。三事不數兩蘇公。豈謂高才難駕御。空歸萬里白頭翁。謂一

文章韓杜無遺恨。草詔陸贄傾諸公。玉堂端要真學士。須得儋州秃髻翁。作爲

閉門覓句陳無已。對客揮毫秦少游。正字不知溫飽未。西風吹淚古藤州。吹一

張子耽酒語蹇吃。聞道潁州又陳州。形模彌勒一布袋。文字江河萬古流。作揮

魯中狂士邢尙書。本意扶日上天衢。惇夫若在鑄此老。不令平地生崎嶇。生一

謝答聞善二兄

身入醉鄉無畔岸。心與歡伯爲友朋。更闌罵坐客星散。午過未蘇髮鬢髻。

羣猪過飲尙可醉。疥手轆甕庸何傷。柳家兄弟大迫窄。狂藥不容人發狂。

公擇醉面桃花紅。人百忤之無愠容。幸老夜闌傾數斗。焚香默坐日生東。

李公擇尙書  
孫莘老中丞

推牀破面棖觸人。作無義語怒四鄰。尊中歡伯笑爾輩。我本和氣如三春。

陶令舍中有名酒。無夕不爲父老傾。四坐歡欣觀酒德。一燈明暗又詩成。

次韻向何鄉行松滋縣與鄒天錫夜語南極亭

衝風衝雨走七縣。唯有白鷗盟未寒。坐中更得江南客。開盡南窗借月看。

戲簡朱公武劉邦直田子平



朱公趨朝瘦至骨。歸來豪健踞胡床。日看省曹闈者面。何如田家侍兒粧。

戲贈米元章二首

萬里風帆水着天。麝煤鼠尾過年年。滄江靜夜虹貫月。定是米家書畫船。  
我有元暉古印章。印刳不忍與諸郎。虎兒筆力能扛鼎。教字元暉繼阿章。

往歲過廣陵。值早春。嘗作詩云。春風十里珠簾捲。髣髴三生杜牧之。紅藥梢頭初蠶栗。揚州風動鬢成絲。今春有自淮南來者。道揚州事。戲以前韻寄王定國二首。

淮南二十四橋月。馬上時時夢見之。想得揚州醉年少。正圍紅袖寫烏絲。  
日邊置論誠深矣。聖處時中乃得之。莫作秋蟲促機杼。貧家能有幾絢絲。

從張仲謀乞臘梅

聞君寺後野梅發。香蜜染成官樣黃。不擬折來遮老眼。欲知春色到池塘。

寄杜家父二首

紅紫爭春觸處開。九衢終日轢車雷。閒情欲被春將去。鳥喚花驚只麼回。  
風塵點汙青春面。自汲寒泉洗醉紅。徑欲題詩嫌浪許。杜郎覓句有新功。

寺齋睡起



桃李無言一再風。黃鸝唯見綠怱怱。人言九事八爲律。倘有江船吾欲東。  
次韻王稚川客舍

身如病鶴翅翎短。心似亂絲頭緒多。此曲朱門歌不得。湖南湖北竹枝歌。

六月十七日晝寢

紅塵席帽烏鞞裏。想見滄洲白鳥雙。馬齧枯筴誼午枕。夢成風雨浪翻江。

上楊康國

君家秋實羅浮種。已作纍纍半拂墻。莫遣兒童酸打盡。要看霜後十分黃。

雨中登岳陽樓望君山二首

投荒萬死髣毛斑。生入瞿塘灩澦關。未到江南先一笑。岳陽樓上對君山。  
滿川風雨獨凭欄。綰結湘娥十二鬟。可惜不當湖水面。銀山堆裏看青山。

寄賀方回

少游醉臥古藤下。誰與愁眉唱一盃。解作江南斷腸句。只今唯有賀方回。

戲答王子予送凌風菊二首

病來孤負鷓鴣杓。禪板蒲團入眼中。浪說閒居愛重九。黃花應笑白頭翁。



王郎頗病金瓢酒。不耐寒花晚更芳。瘦盡腰圍怯風景。故來歸我一枝香。

次韻文潛立春日絕句

渺然今日望歐梅。已發皇州首更回。試問淮南風月主。新年桃李爲誰開。

求范子默染鴉青紙

學似貧家老破除。古今迷忘失三餘。極知鴿白非新得。漫染鴉青襲舊書。老一作兔

伯時彭蠡春牧圖

岳陽樓上春已歸。湖中鴻雁拍波飛。布帆天闊隨鳥道。石林風晚吹人衣。春水初生及馬腹。浮灘欲上西山麓。遙看絕嶺秀雲松。上有垂蘿暗溪谷。沙眠草嚙性不驕。側身注目鳴相招。林間瞥過星爍爍。原上獨立風蕭蕭。君不見中原真種胡塵沒。南行市骨何蒼卒。祇收力健載征夫。肯向時危辨奇骨。卽今貢馬西北來。東西坊監屯雲開。紛然駑驥同一秣。爾可不憂四蹄脫。

臨河道中

村南村北禾黍黃。穿林入塢岐路長。據鞍夢歸在親側。弟妹婦女笑兩廂。甥姪跳梁暮堂下。唯我小女始扶床。屋頭撲棗爛盈斗。嬉戲喧爭挽衣裳。覺來去家三百里。一園免絲花氣香。可憐此物無根本。依草着木浪自芳。風煙雨露非無力。年年結子飄路傍。不如歸種秋柏實。他日隨我到冰霜。臨河屬開德路由河隄。今集中有曹村



道中一首。瓜田餘蔓有荒壟。梨子壓枝鋪短牆。明月風烟如夢寐。平生親舊隔湖湘。是也。蓋經行先曹村。後臨河。故前詩有覺來去家三百里之句。指大名也。

觀劉永年團練畫角鷹

劉侯才勇世無敵。愛畫工夫亦成癖。弄筆掃成蒼角鷹。殺氣稜稜動秋色。爪拳金鉤背屈鐵。萬里風雲藏勁翮。兀立槎枒不畏人。眼看青冥有餘力。霜飛晴空塞草白。雲垂四野陰山黑。此時軒然盍飛去。何乃巘岬立西壁。祇應真骨下人世。不謂雄姿留粉墨。造次更無高鳥喧。等閒亦恐狐狸嚇。旁觀未必窮神妙。乃是天機貫胸臆。瞻相突兀摩空材。想見其人英武格。傳聞揮毫頗容易。持以與人無甚惜。物逢真賞世所珍。此畫他年恐難得。

同朱景瞻分題汴上行

東風何時來。堤柳芳且柔。河冰日已銷。漫漫春水流。寒梅未破萼。芳草綠猶稠。歲月不我還。念此人生浮。高車無完輪。積水有覆舟。鹿門不返者。誰得從之游。

奉答固道

平生湖海漁竿手。強學來操製錦刀。末俗相看終眼白。古人不見想山高。未乘春水歸行李。倘得閒官去坐曹。自是無能欲樂爾。煩君錯爲歎賢勞。

次韻公秉子由十六夜憶清虛



九陌無塵夜際天。兩都風物各依然。車馳馬逐燈方闌。地靜人閒月自妍。佛館醉談懷舊歲。齊宮詩思鎖今年。但聞公子微行去。門外驂騑立繡韉。

謝王爛之惠茶

平生心賞建溪春。一丘風味極可人。香包解盡寶帶胯。黑面碾出明窗塵。家園鷹爪改嘔冷。官焙龍文常食陳。於公歲取壑源足。勿遣沙溪來亂真。

還家呈伯氏

葉縣作

去日櫻桃初破花。歸來着子如紅豆。四時驅迫少須臾。兩鬢飄零成老醜。永懷往在江南日。原上急難風雨後。私田苦薄王稅多。諸弟號寒諸妹瘦。扶將白髮渡江來。吾二人如左右手。苟從祿仕我遄回。且慰家貧兄孝友。強趨手板汝陽城。更責愆期被訶詬。法官毒螫草自搖。丞相霜威人避走。賤貧孤遠蓋如此。此事端於我何有。一囊粟麥七千錢。五人兄弟二十口。官如元亮且折腰。心似次山羞曲肘。北窗書冊久不開。筐篋黃塵生鏤鈕。何當略得共討論。況迺雍容把杯酒。意氣敷腴貴壯年。不早計之且衰朽。安得短船萬里隨江風。養魚去作陶朱公。斑衣奉親伯與儂。四方上下相依從。用舍由人不由已。迺是伏轅駒犢耳。

次韻時進叔二十六韻

時子河上園。竹間開棟宇。大兒勝衣冠。小兒豐頰輔。嫁女與朱公。伏臘可稱舉。髮疎雖蒼莧。齒嚼未齟齬。



雞栖牛羊下。各自有室處。四墻規模小。易守若滕莒。舍前花木深。春物麗觀覩。舍後曲池哇。齊堂風月苦。此豈不足歟。歎歲不我與。客宦孤雲耳。未知秦吳楚。向來千駟公。果愧一丘土。寧當損軒昂。聊欲效傴俯。時子欣然笑。吾已寤倉鼠。少猶守章句。晚實愛農圃。鵲巢最知風。蟻穴識陰雨。世網事諳委。醉鄉俗淳古。坐忘兩家說。肉堅與腸腐。酒至即使傾。客來敢辭窶。時邀五柳陶。共過三徑詡。往在少年場。豪氣壓穎汝。借令今尙爾。真復難共語。稍知憐麴蘖。漸解等灘澗。朋友半山阿。光陰共行旅。人故義當親。衣故義當補。飛鳧王令尹。期我向君所。君爲拂眠床。淹留莫成阻。水自河出爲澗。自濟出爲澗。

招子高二十二韻兼簡常甫世弼

我行向厭次。夏扇日在搖。甘瓜未除壘。高柳尙鳴蜩。駕言聊聶歸。飛霜曉封條。負薪泣裘褐。公子御狐貂。歲月坐腕晚。鬢顏颯然凋。道德千古事。斯文非一朝。往者我不及。後生多見超。吾黨二三子。士林聳孤標。小謝抱周易。忘言獨參寥。崔郎楚左史。二典考舜堯。王生風雅學。談辯秋江潮。灑筆驚有司。小敵謂可驕。安知樽蒲局。臨關敗三臯。三生數步隔。屢赴茗椀邀。小謝殊未來。我覺百里遙。問之憂菽水。心慮極無聊。父憐母不訶。日以濁酒澆。此道如鼎寶。念子羹未調。古來有親養。回也樂一瓢。不田鶉生突。在物乃爲祆。吾言有師承。可信如斗杓。詩以解子憂。亦用當子招。

林爲之送筆戲贈



閻生作三副。規摹宣城葛。外貌雖銑澤。毫心或粗糲。巧將希栗尾。拙迺成棗核。李慶縛散卓。含墨能不洩。病在惜白毫。往往半巧拙。小字亦周旋。大字難曲折。時時一毛亂。迺似逆梳髮。張鼎徒有表。徐偃元無骨。模畫記姓名。亦可應倉卒。爲之街南居。時通鈴下謁。晴軒坐風涼。怪我把枯筆。開囊撲蠹魚。遣奴送一束。洗硯磨松煤。揮灑至日沒。蚤年學屠龍。適用固疎闊。廣文困齏鹽。烹茶對秋月。略無人問字。況有客投轄。文章寄呻吟。講授費頰舌。閒無用心處。雌黃到筆墨。時不與人游。孔子尙愛日。作詩當鳴鼓。聊自攻短闕。

再和答爲之

君勿嘲廣文。沍寒被絺葛。君勿嘲廣文。窮年飯粢糲。常恐俎豆予。與世充肴核。凡木不願材。大折小枝洩。櫟依曲轅社。聊用神其拙。吾家本江南。一丘藏曲折。瀕溪蔭蒼葢。蕭灑可散髮。旣無使鬼錢。又無封侯骨。薄祿庇閒曹。且免受逼卒。爲此懶出門。徒敝懷中謁。直齋賓客退。風物供落筆。詩成著牀頭。不知今幾束。君何向予勤。見詩歎埋沒。嗣宗須酒澆。未信胸懷闊。自狀一片心。碧潭浸寒月。令德感來教。爲君賦車轄。君思楊雄吃。何似張儀舌。此意恐大狂。願爲引繩墨。政使此道非。改過從今日。報章望瓊琚。勿使音塵闕。

再和答爲之

林君維閩英。數面成瓜葛。鄰居接杖藜。過飯厭疎糲。讀書飽工夫。論事極精核。奮身君子場。勇若怒未洩。窮年栖旅巢。由命非由拙。王良驅八駿。方駕度九折。學堂疎雨餘。石砌長苔髮。弟子肥如瓠。先生瘦唯骨。



林白君在朱氏講授。朱氏見北門一都會。塵埃人卒卒。高蓋如秋荷。勢利相奔謁。唯君尙寂寞。來觀草  
皆面豐肥。而林君如刻削。玄筆斯文未易陳。政當長閣束金馬。事陸沉。市門逐乾沒。未須相賢愚。聊自嘲迂闊。憶昨戲贈詩。迺辱報  
明月。極知推挽意。我車君欲轄。屠龍真狂言。奔馬不及舌。賜書盈五車。直舍方二墨。會意便欣然。餘事過  
窗日。尙恐素餐錢。諸生在城闕。

次韻感春

張侯脫朝衣。兒褐多純綠。聞道無米春。煮木學辟穀。官吏但索錢。詔書哀惓獨。東方長九尺。不得侏儒祿。  
屋中聲鵝雁。日暮攪心曲。窮巷無桃李。縑袍非春服。我吟白駒詩。知君在空谷。  
茶如鷹爪拳。湯作蟹眼煎。時邀草玄客。晴明坐南軒。笑談非世故。獨立萬物先。春風引車馬。隱隱何闐闐。  
高蓋相摩戛。騎奴爭道喧。吾人無榮觀。宴處自超然。城中百年木。有鵲巢其顛。鳴鳩來相宅。日莫更謀遷。

謝張泰伯惠黃雀鮓

去家十二年。黃雀慳下筯。笑開張侯盤。湯餅始有助。蜀王煎菘法。醢以羊蕪兔。俗謂亥卯未餽餽麥餅薄於紙。含  
漿和醎酢。秋霜落場穀。一一挾蠶絮。殘飛蒿艾間。入網輒萬數。烹煎宜老稚。罌缶煩愛護。南包解京師。至  
尊所珍御。玉盤登百十。睥睨輕桂蠹。五侯曠豢豹。見謂美無度。瀕河飯食漿。瓜蒞已佳茹。誰言風沙中。鄉  
味入供具。坐令親饌甘。更使客得與。蒲陰雖窮僻。勉作三年住。願公且安樂。分寄尙能屢。



次韻無咎閣子常攜琴入村

土寒餓古猶今。向來亦有子桑琴。倚檻嘯歌非寓淫。伯牙山高水深深。萬世丘壘一知音。閣君七絃抱幽獨。晁子爲之梁父吟。天寒絡緯悲向壁。秋高風露聲入林。冷絲枯木拂蛛網。十指乃能寫人心。村村擊鼓如鳴鼉。豆田見角穀成螺。歲豐寒士亦把酒。滿眼釘餽梨棗多。晁家公子屢經過。笑談與世殊白科。文章落落映晁董。詩句往往妙陰何。閣夫子勿謂知人難。使琴抑怨久不和。明光晝開九門肅。不令高才牛下歌。

同堯民游靈源廟廖獻臣置酒用馬陵二字賦詩

靈源廟前木。我昔見拱把。七年身屢到。鬱鬱蔭簷瓦。春風響馬銜。並轡客蕭灑。更願少尹賢。置酒意傾寫。齋堂有佳處。花柳輕姪姘。蓮塘想舊葉。稻畦識枯苴。開關撫洪河。黃流極天瀉。憶昔武皇來。繫壁沉白馬。從官親土石。襁負至鰥寡。空餘瓠子詩。哀怨逼騷雅。白圭自聖禹。今誰定真假。晁子發讜言。聖功諒難亞。排河著地中。勢必千里下。移民就寬閒。何地不耕稼。此論似太高。吾亦茫取舍。有器可深川。吾未之學也。

馬字

洪河壯觀游。太府佳友朋。春色挽我出。東風如引繩。昏昏版築氣。王事始繁興。大隄如連山。小隄如岡陵。增卑更培薄。萬杵何登登。憶昨河失道。平原魚可罾。田萊人未復。瘡大國方懲。忽念耒耜閒。爲民保丘塍。



百縣伐馨出。夜半廢曲肱。吾儕愧祿廩。游衍事鞍乘。晁子漢公孫。新法司馬丞。出幹大農部。才術見嗟稱。我坐廣文舍。七年讀書燈。結髮入場屋。肯謂河難憑。爾來觸事短。癡甚霜前蠅。世味極淡薄。不了人愛憎。唯得一卮酒。尙能別淄澠。所以對樽俎。未曾問斗升。酌我良已多。狂言恐侵陵。暮雲吞落日。歸鳥求其朋。復用前韻冷官僕馬瘦。及門鼓騰騰。陵字

奉和王世弼寄上七兄先生用其韻

宮槐弄黃黃。蓮葉綠婉婉。時同二三友。竹軒涼夏曉。駕言都城南。以望征車返。何知苦淹回。及此秋景短。愁思令人瘦。舉目道路遠。西風脫一葉。薦士聞鄉選。簡書催渡河。賓客不得展。親憂對萱叢。婦病廢巾盥。言趨厭次城。鞭馬倦長阪。棗林蔽天日。交陰不容繖。仰看實離離。憶見花纂纂。異鄉懷節物。不共斟酒盞。舉場下馬入。深鎖嚴籥管。諸生所程書。摺束若稽稗。蜜燈坐回環。丹硯精料束。披榛拔芝蘭。斷石收琰琬。紛爭一日事。聲實溷端竅。天球或棄遺。斗筭尙何寡。西歸到官舍。塵土昏案板。寒窗穿碧疏。潤礎鬧蒼蘚。詩書鵲巢翻。帷幔蛛絲罨。果知兄未來。光陰坐晷晚。昨蒙叔父報。亦歎音書簡。薄言使事重。激切被天遣。逋流一方病。責任媿和扁。咨詢懷靡及。不皇暇息偃。嚼冰進糜殮。衝雪踏層巘。嚴霜八月飛。貂狐無餘煖。念嗟叔母劉。窮年寄甥館。尙憐公初黠。誘掖到昭宛。庭堅薄才資。行又出哇町。浮雲與世疎。短綆及道淺。匠伯首斲回。大樗終偃蹇。學宮尸廩入。奉養闕豐腆。學徒日新聞。孤陋猶舊典。小材渠困我。持斲問輪扁。



復用此一韻。事異似不害。大材我屈渠。越雞當鵠卵。未能引分去。戀祿幸苟免。平生報一飽。從事極黽勉。豈如不見收。放身就閒散。思伯臥江南。無心趣軒冕。龐翁跡頗親。黃蘗門屢歛。齋餘佛飯香。茶沸甘露滿。逢人問進退。餘事寄一筦。仲父挾高材。甘爲溝中斷。青黃可犧樽。薦廟配瑚璉。季父有逸興。未嘗入都輦。臨流呼釣船。拂石弄琴阮。雍容從朋交。林下追游衍。田園雖足樂。及時思還返。陰寒不鳴條。望損倚門眼。南枝喜鵲鳴。尺素託黃犬。又以窀穸留。歸期指姑洗。寄聲問僧護。兒髮可以綰。妙言對賓客。稱渠萬金產。爾來弄筆硯。墨水惡翻建。大字如栖鴉。已不作肥軟。魯論未徹章。政苦諸叔懶。新詩開累紙。欲罷不能卷。遠懷託孤高。別思盈繾綣。秋月明夜潮。柘漿凍金碗。疎杵韻寒砧。幽泉流翠筧。吟哦口垂涎。嚼味有餘雋。傳示同好人。我家東牀坦。風煙意氣生。揮毫寫藤壺。獵山窮鶉鴛。罩海極蝦蜆。銀鈎亂眼膜。佳句濯肺腕。且言伯在野。朋友必推挽。五秦列清廟。聖緒今皇纘。真儒運斗樞。道化迪天顯。朝論惜才難。逸民大蒐獮。豈聞任方物。包貢遺羽籥。招車必翹翹。前席思簪簞。王甥欲好懷。高意恐難轉。長篇題遠筒。封寄淚空潛。遙知雲際開。灰飛黃鍾管。

贈張仲謀

車如雞栖馬如狗。閉門常多出門少。去天尺五張公子。官居城南池館好。健兒快馬紫游韁。迎我不知沙路長。江榆老柳媚寒日。枯荷小鴨凍野航。津人刺船起應客。遙知故人一水隔。下馬素酒呼三遲。騎奴笑



言客竟癡。向來情義比瓜葛。萬事略不置。叮咛。追數存亡異憂樂。燭如白虹貫酒卮。開軒臨水弄長笛。吹落殘月風淒淒。城頭漏下四十刻。破魔驚睡聽新詩。君詩清壯悲節物。政與秋蟲同一律。爾來更覺苦語工。思婦霜碓搗寒月。朱顏綠髮深誤人。不似草木長青春。潔身好賢君自有。今日相看進於舊。以茲敢傾一杯酒。爲太夫人千歲壽。

送薛樂道知鄖鄉

黃山葉縣連牆居。謝公席上對樗蒲。雙鬢女弟如桃李。蚤許歸我舍中雛。平生同憂共安樂。歲晚相望青雲衢。去年樽酒輦轂下。各喜身爲反哺烏。城頭歸鳥尾畢逋。春寒啄雪送行車。解珮我無明月珠。折柳下對千里駒。念君胸中極了了。作吏辦事猶詩書。濁酒挽人作年少。關防心地亦時須。鄖鄉縣古民少訟。但問自己不關渠。登臨一笑雙白髮。宜城凍筍供行廚。人生此樂他事無。行李道出漢南都。寄聲諸謝今何如。謝公書堂迷竹塢。手種竹今青青否。我思謝公淚成雨。屬公去漉穰下土。

送張沙河游齊魯諸邦

張侯去沙河。三食鄴下麥。筆力望臯董。頗遭俗眼白。平生學經綸。胸中負奇畫。未論功活人。飽飯不常得。妻寒尙賓敬。兒餓猶筆墨。側聞共伯城。魚稻頗宜客。又待塵生甑。欲往立四壁。平生貸米家。十輩來薄責。囊無孔方兄。面有在陳色。守株伺投兔。歲晚將何獲。廣道無人行。春風轉沙石。栖栖馬如狗。去謁東侯伯。



布衣未可量。蒼髯身八尺。魚乾要斗水。士困易爲德。譬之舉大木。人借一臂力。諸公感意氣。豈待故相識。吾窮乏祖餞。折柳當馬策。

送吳彥歸番陽

學省困齋鹽。人材任尊獎。倥侗祝螟蛉。小大器嬰旅。諸生厭晚成。躡學要僧駟。摹書說偏旁。破義析名象。九鼎奏簫韶。爰居端不饗。青衿少到門。庭除晝閒敞。竹風交槐陰。三見秋氣爽。時賴解事人。載酒直心賞。吳郎楚國材。幽蘭秀榛莽。彥國吐嘉言。子將喜標榜。平生欽豪俊。久客慕鄉黨。虛齋延灑掃。薄飯薦脍鯨。詩句唾成珠。笑嘲愜爬痒。春夏頻謝除。曾未厭來往。歸雁多喜聲。寒蟬停哀響。黃花滿籬落。白蟻鬧甕盎。留君待佳節。忽忽戒徂兩。親戚傷離居。交遊念疇曩。棋局無對曹。樗蒲失朋長。問君去爲何。雲物愁莽蒼。壽親髮斑斑。千里勞夢想。家雞藁頭肥。寒魚受罾網。甘旨竅中廚。伊啞弄文槓。此行樂未央。安知川塗廣。深秋上滄江。遠水平如掌。人生要得意。壯士多曠蕩。野鶴疲籠樊。江鷗戀菰蔣。本來丘壑姿。不著芻豢養。寄聲謝鄉鄰。爲我具兩漿。有路卽歸田。君其信非誑。

薛樂道自南陽來入都留宿飲會作詩餞行

薛侯本貴胄。射策一矢中。金蘭託平生。瓜葛比諸從。數面尙成親。況乃居連棟。交遊及父子。講學連伯仲。奴人通使令。孩稚接戲弄。相憐負米勤。同力采蘭供。每持君家書。平安覩欸縫。秦人與吾彘。憂樂一體共。



釋之廷尉曹。微過成繫訟。從此張長公。不肯爲時用。丘阿無梧桐。曲直不在鳳。生涯谷口耕。世事邯鄲夢。自君抱憂端。酒碗未忍餽。高秋自南歸。意氣稍寬縱。黃花尙滿籬。白蟻方浮甕。私言助燕喜。且莫戒輜重。霜風獵帷幕。銀燭吐蠅蝨。密坐幸頗歡。劇飲寧辭痛。疎鐘鳴曉撞。小雨作寒霧。廐馬蕭蕭鳴。征人稍稍動。九衢槐柳中。縱緩青絲鞵。朱樓豪士集。紅袖清歌送。河鯉獻鱸材。江橙解包貢。蟹擘鵝子黃。酒傾琥珀凍。舉觴遙酌我。發噓知見頌。行行鞭箠倦。短句煩屢諷。

次韻奉送公定

去年君渡河。棗下實離離。今年君渡河。剝棗詠豳詩。直緣恩義重。不憚鞍馬疲。詩書半行李。道路費歲時。親交歎存沒。學問訪闕遺。我多後時悔。君亦見事遲。卽此有真意。定非兒女知。虛名無用處。北斗與南箕。燕趙游俠子。長安輕薄兒。狂掉三寸舌。躡登九級墀。覆手雲兩翻。立談光陰移。敵血盟父子。指天出肝脾。從來國器重。見謂骨相奇。築巖發夢寐。獵渭非熊螭。百工改繩墨。一世擅文詞。全人脰肩肩。甕盎嫵且宜。大槐陰廣庭。女蘿綿絡之。韶陽兩兄弟。還自妒娥眉。工顰又宜笑。百輩來茹咨。班姬輕鴻毛。更合衆口吹。引繩痛排根。蒙蔽枉成帷。唯恐出已上。殺之如弈棋。塵埃百年琴。絕絃爲鍾期。落落虎豹文。義難管中窺。至今楊子雲。不與俗諧嬉。歲晚草玄經。覃思寫天維。脫身天祿閣。危於劍頭炊。臥聞策董賢。閉門甘忍飢。五侯盛賓客。騶轡交橫馳。時通問字人。得酒未曾辭。近者君家翁。天與脫漚鞮。已爲冥冥鴻。矰繳尙安施。



養蘭尋僧圃。愛竹到水湄。北闕免朝請。西都分保釐。文章九鼎重。富貴一黍累。趙良請灌園。但爲商君嗤。棄甲尙文過。咒多牛有皮。出仕書掣肘。歸來菊荒蕪。不爲五斗折。自無三徑資。勝箭洗蹠血。歸鞍懸月支。斯人萬戶侯。造物付鑪錘。我觀史臣篇。疏略記糟醅。譬如官池蛙。誰能問公私。君懷明月珠。簸弄滄海涯。深房珮芳蘭。固是王所姬。南貢尙包橘。漢濱莫大隨。每來促談塵。風生塵竹枝。骯髒得家法。伊優不能爲。但聽呼樗蒲。便足解人頤。功成在漏刻。穎利處囊錐。失勢落坑穿。寒窳如愁鴟。得馬折足禍。亡羊多岐悲。屢敵因心計。伏兵幾面欺。長戈仰關來。吐欵受羈縻。萬事只如此。畢竟誰成虧。愛君方寸間。醇朴乃器師。安得擺俗纏。東岡並鉏犁。由來在陰鶴。不必振羽儀。送行傾車蓋。載酒滿鴟夷。天高木葉落。潦退河流卑。屯雲奉六幕。新月吐半規。人生會面難。取醉聽狂癡。語穿發欺笑。一作期一笑詩鋒犯嘲譏。懸知履霜來。少別爲不怡。天津媚河漢。闕角挂秋霓。中有鬼與神。赤舌弄陰機。夜光但什襲。出懷卽瑕疵。去去善逆旅。凍醪約重持。山藥倒藤架。紅梨帶寒曦。坐須騎奴還。淹留歲恐期。無爲出門念。牽衣嬰孺啼。短韻願成頌。時時寄相思。

對酒歌答謝公靜

我爲北海飲。君作東武吟。看君平生用意處。蕭灑定自知人心。南陽城邊雪三日。愁陰不能分皂白。摧輪腕蹄泥數尺。城門晝閉眠賈客。移人僵尸在旦夕。誰能忍長待食麥。身憂天下自有人。寒士何者愁填臆。



民生政自不願材。可乘以車可鞭策。君不見海南水沉紫旃檀。碎身百煉金博山。豈如不蒙斧斤賞。老大絕崖霜雪間。投身有用禍所集。何況四達之衢井先汲。昨日青童天上回。手捧玉帝除書來。一番通籍清都闕。百身書名赤城臺。飛昇度世無虛日。怪我短褐趨塵埃。願謂彼童子。此何預人事。但對清樽卽眼開。一杯引人著勝地。傳聞官酒亦自清。徑須沽取續吾瓶。南山朝來似有意。今夜倘放春月明。

戲贈彥深

李原字彥深。厚之弟。居南陽。

李髯家徒立四壁。未嘗一飯能留客。春寒茆屋交相風。倚墻捫蝨讀書策。老妻甘貧能養姑。寧翦髮鬢不典書。大兒得殮不索魚。小兒得袴不索襦。庾郎鮭菜二十七。太常齋日三百餘。上下分膳一飽飯。藏神夢訴羊蹴蔬。世傳寒士有食籍。一生當飯百甕菹。冥冥主張審如此。附郭小圃宜勤鋤。葱秧青青葵甲綠。早韭晚菘羹糝熟。充虛解戰賴湯餅。芼以苜蓿與甘菊。幾日憐槐已著花。一心呪笋莫成竹。羣兒笑髯窮百巧。我謂勝人飯重肉。羣兒笑髯不若人。我獨愛髯無事貧。君不見猛虎卽人厭麋鹿。人還寢皮食其肉。濡需終與豕俱焦。飫肥擇甘果非福。蟲蟻無知不足驚。橫目之民萬物靈。請食熊蹯楚千乘。立死山壁漢公卿。李髯作人有佳處。李髯作詩有佳句。雖無厚祿故人書。門外猶多長者車。我謂楊雄逐貧賦。斯人用意未全疎。

寄南陽謝外舅



謝公逐偃蹇。南陽無舊廬。天與解纓紱。元非傲當塗。庖丁釋牛刀。衆手斫大觚。白雲曲肱臥。青山滿床書。妙質落川澤。果然天網疎。然知一作今人巧。未覺古人迂。築場歲功休。夜泉鳴竹渠。胸懷鬱磊隗。此物諒時須。兒能了翁事。安用府中趨。孫能誦翁詩。乃是千里駒。人生行樂耳。用舍要自如。我方神其拙。社櫟官道樗。公猶憂斧斤。睥睨斲樽壺。萬古身後前。芭蕉秋雨餘。少年喜狡獪。叱化粒成硃。謨功可歌舞。學古則媛姝。所好果不同。未可一理驅。眇忠忘言對。安得南飛鳧。鄙心生蔓草。萌芽望耘鉏。離筵如昨日。春柳見霜枯。未辱錦繡段。時蒙雙鯉魚。憶在參几杖。雍容覲規模。引接開藻鑒。高明通事樞。門生五七輩。寂寞半白鬚。談經落塵尾。行樂從藍輿。看竹辟疆宅。閱士黃公壚。雪屋煮茶藥。晴簷張畫圖。幽寺促燈火。青氈置樽蒲。遶牀叫一擲。十白九雉盧。蔡澤來分功。袁耽必上都。開旗縱七走。破竹殄羣胡。成梟燭爲明。挾長朋佐呼。終飲見溫克。所爭匪錙銖。誰令運甕翁。見謂牧猪奴。事託丈人重。乃愛屋上烏。舊言如對面。形迹滯舟車。風簾想隱几。天籟鳴寒梧。尙喜讀書否。還能把酒無。鄴城渺塵沙。冠蓋若秋渠。相過問寒溫。意氣馳九衢。楚客雖工瑟。齊人本好竽。永懷溟海量。北斗不可料。勝夜親筆墨。因來明月珠。

和謝公定征南謠

傳聞交州初陸梁。東連五溪西氏羌。軍行不斷蠻標盾。謀主皆收漢畔亡。合浦譙門腥血沸。晉興城下白骨荒。謀臣異時坐致寇。守臣今日愧包桑。已遣戈船下灘水。更分樓船浮豫章。頗聞師出三鷓路。盡是中



屯六郡良。漢南食麥如食玉。湖南驅人如驅羊。營平請穀三百萬。祁連引兵九千里。少府私錢不可知。大農計歲今餘幾。士兵番馬貔虎同。蝮蛇毒草篁竹中。未論芻粟捐金費。直愁瘴癘連營空。我思荊州李太守。欲募蠻夷令自攻。至今民歌尹殺我。州郡擇人誠見功。張喬祝良不難得。誰借前筭開天聰。詔書哀痛言語切。爲民一洗橫尸血。摧鋒陷堅賞萬戶。塹山堙谷窮三穴。南平舊時頗臣順。欲獻封疆請旄節。廟謀猶計病中原。豈知一朝更屠滅。天道從來不爭勝。功臣好爲可喜說。交州鷄肋安足貪。漢開九郡勞臣監。呂嘉不肯佩銀印。徵側持戈敵百男。君不見往年瀕海未郡縣。趙地閉關罷朝獻。老翁竊帝聊自娛。白頭抱孫思事漢。孝文親遣勞苦書。稽首請去黃屋車。得一亡十終不忍。太宗之仁千古無。

寄題欽之草堂

河南有伏流。經營太行根。盛德不終晦。發爲清濟源。公家濟源上。太行正當門。修竹帶藩籬。百禽鳴朝暾。仰視浮雲作。俯窺流水奔。相望有盤谷。李愿故居存。主人國之老。實惟商巖孫。班行昔供奉。屢進逆耳言。天子色爲動。羣公聲亦吞。肅肅冰霜際。不改白玉溫。出處士所重。其微難共論。公勿懷草堂。朝廷待公尊。

和答梅子明王楊休點密雲龍

小壁雲龍不入香。元豐龍焙承詔作。二月常新官字蓋。游絲不到延春閣。去年曾口滅光輝。人間十九人未知。外家春官小宗伯。分送蓬山裁半壁。建安甕椀鷓鴣斑。谷簾水與月共色。五除試湯飲墨客。泛甌銀



粟無水脈。辟宮邂逅王廣文。初觀團團破龍紋。諸公自別淄澠了。兔月葵花不足論。石磴春芽風雪落。養澆肺渴初不惡。河伯來觀東海若。鹿逢朱雲真折角。子真雲孫吐成珠。廟堂只今用諸儒。鍊成五石補天手。上書致身可亨衢。顧我賜茶無骨相。他年幸公肯相餉。

次韻子瞻春菜

北方春蔬嚼冰雪。妍暎思采南山蕨。韭苗水餅姑置之。苦菜黃鷄羹糝滑。蓴絲色紫菰首白。萋蒿牙甜燂頭辣。生菹入湯翻手成。芼以薑橙誇縷抹。驚雷菌子出萬釘。白鵝截掌鼈解甲。琅玕林深未飄籜。軟炊香杭煨短茁。萬錢自是宰相事。一飯且從吾黨說。公如端爲苦筍歸。明日青衫誠可脫。

次韻答堯民

君開蘇公詩。疾讀思過半。譬如聞韶耳。三月忘味歎。我詩豈其朋。組麗等俳玩。不聞南風絃。同調廣陵散。鶴鳴九天上。肯作家鷄伴。晁子但愛我。品藻私月旦。官閒樂相從。梨栗供杯案。門靜烏雀嬉。花深蜂蝶亂。忽蒙加禮貌。齋戒事措盥。問大心更小。意督辭反緩。君材於用多。舞選弓矢貫。聰明回自照。勝已果非懦。我如相繪事。素質施朽炭。古來得道人。非獨大庭館。晁子已不疑。冬寒春自暖。繫表知藥言。擇友得苟粲。

再和寄子瞻聞得湖州

天下無相知。得一已當半。桃僵李爲仆。芝焚蕙增歎。佳人在江湖。照影自娛玩。一朝入漢宮。掃除備冗散。



何如終流落。長作朝雲伴。相思欲面論。坐起雞五旦。身慚尸廩祿。有罪未見案。公又雄萬夫。皦皦不自亂。臧穀皆亡羊。要以道湔盥。傳聲向東南。王事不可緩。春波下數州。快若七札貫。椎鼓張風帆。相見激衰懦。空文不傳心。千古付煨炭。安得垂天雲。飛就吳興館。魚鱉柳絮肥。筍煮溪沙暖。解歌使君詞。樽前有三粢。

答王道濟寺丞觀許道寧山水圖

往逢醉許在長安。蠻溪大硯磨松烟。忽呼絹素翻硯水。久不下筆或經年。異時踏門闖白首。巾冠欹斜更索酒。舉杯意氣欲翻盆。倒臥虛樽將八九。醉拈枯筆墨淋浪。勢若山崩不停手。數尺江山萬里遙。滿堂風物冷蕭蕭。山僧歸寺童子後。漁伯欲渡行人招。先君笑指溪上宅。鷓鷯白鷺如相識。許生再拜謝不能。元是天機非筆力。自言年少眼明時。手揮八幅錦江絲。贈行卷送張京兆。心知李成是我師。張公身逐銘旌去。流落不知今主誰。大梁畫肆閱水墨。我君盤礴忘揖客。蛛絲煤尾意昏昏。幾年風動人家壁。雨雪泔泔滿寺庭。四圍冷落讓丹青。笑訓肆翁十萬錢。卷付騎奴市盡傾。王丞來觀皆失席。指點如見初畫日。四時風物入句圖。信知君家有摩詰。我持此圖二十年。眼見綠髮皆華顛。許生縮手入黃泉。衆史弄筆摩青天。君家枯松出老翟。風煙枯枝倚崩石。蠹穿風物君愛惜。不誣方將有人識。

過家

絡緯聲轉急。田車寒不運。兒時手種柳。上與雲雨近。舍傍舊傭保。少換老欲盡。宰木鬱蒼蒼。田園變畦畛。



招延屈父黨。勞問走婚親。歸來翻作客。顧影良自哂。一生萍託水。萬事雪侵鬢。夜闌風隕霜。乾葉落成陣。燈花何故喜。大是報書信。親年當喜懼。兒齒欲毀亂。繫船三百里。去夢無一寸。

食笋十韻

洛下斑竹笋。花時壓鮭菜。一束酬千金。掉頭不肯賣。我來白下聚。此族富庖宰。鹽栗戴地翻。穀觶觸墻壞。鰾臠入中厨。如償食竹債。甘菹和菌耳。辛膳膈薑芥。烹鵝雜股掌。魚鼈亂羣介。小兒哇不美。鼠壤有餘嘔。可貴生於少。古來食共噫。尙想高將軍。五溪無人采。

蕭巽葛敏修二學子和予食筍詩次韻答之

北饌厭羊酪。南庖豐笋菜。自北初落南。幾爲兒所賣。習知價廉平。百態事烹宰。鹽晞枯臘瘦。蜜漬眞味壞。就根煨茁美。豈念炮烙債。咀吞千畝餘。曾次不薑芥。二妙各能詩。才名動江介。詩論多佳句。膾炙甘我嘔。因君思養竹。萬籟聽秋噫。從此繕藩籬。下令禁漁采。

一作下書  
示漁采

韭黃照春盤。菰白媚秋菜。惟此蒼竹苗。市上三時賣。江南家家竹。剪伐誰主宰。半以苦見疎。不言甘易壞。葛陂雕龍睡。未索兒孫債。懶膽能分杯。虎魄妙拾芥。此物於食殺。如客得僎介。思入帝鼎烹。忍遭飢涎嘔。嬾林供翰墨。礎杵風號噫。每下歎枯株。焚如落樵采。

答永新宗令寄石耳



飢欲食首山薇。渴欲飲潁川水。嘉禾令尹清如冰。寄我南山石上耳。筠籠動浮烟雨姿。淪湯磨沙光陸離。竹萌粉餌相發揮。芥薑作辛和味宜。公庭退食飽下筯。杞菊避席遺萍螯。雁門天花不復憶。況乃桑鵝與楮雞。小人藜羹亦易足。嘉蔬遺餉荷眷私。吾聞石耳之生常在蒼崖之絕壁。苔衣石腴風日炙。捫蘿挽葛探萬仞。仄足委骨豺虎宅。佩刀買犢劍買牛。作民父母今得職。閔仲叔不以口腹累安邑。我其敢用鮭菜煩嘉禾。願公不復甘此鼎。免使射利登嵯峨。

彫陂

彫陂之水清且泚。屈爲印文三百里。呼船載過七十餘。褰裳亂流初不記。竹輿嘔啞山徑涼。僕姑呼婦聲相倚。篁中猶道泥滑滑。僕夫慘慘耕夫喜。窮山爲吏如漫郎。安能爲人作嚆矢。老僧迎謁喜我來。吾以王事篤行李。知民虛實應縣官。我寧信目不信耳。僧言生長八十餘。縣令未曾身到此。

長句謝陳適用惠送吳南雄所贈紙

廬陵政事無全牛。恐是漢時陳太丘。書記姓名不肯學。得紙無異夏得裘。琢詩包紙送贈我。自狀明月非暗投。詩句縱橫剪宮錦。惜無阿買書銀鈎。蠻溪切藤卷盈百。側釐羞滑蠶羞白。想當鳴杵砧面平。桃榔葉風溪水碧。千里鵝毛意不輕。瘴衣腥膩北歸客。君侯謙虛不自供。胡不贈世文章伯。一涔之水容牛蹄。識字有數我自知。小時雙鈎學楷法。至今兒子憎家雞。雖然嘉惠敢虛辱。煮泥續尾成大軸。寫心與君心莫



傳平生落魄不問天。樽前花底幸好戲。爲君絕筆謝風煙。已無商頌猗那手。請續南華內外篇。

上大蒙籠起乙卯晨

黃霧冥冥小石門。苔衣草路無人迹。苦竹參天大石門。虎迹兔蹊聊倚息。陰風叟林山鬼嘯。千丈寒藤遶崩石。清風源裏有人家。牛羊在山亦桑麻。向來陸梁慢官府。試呼使前問其故。衣冠漢儀民父子。吏曹擾之至如此。窮鄉有米無食鹽。今日有田無米食。但願官清不愛錢。長養兒孫聽驅使。

勞坑入前城乙卯飯後

刀坑石如刀。勞坑人馬勞。窈窕篁竹陰。是常主逋逃。白狐跳梁去。豪猪森怒嗥。黃雲覺日瘦。木落知風饒。輕軒息源口。飯羹煮溪毛。山農驚長吏。出拜家騷騷。借問淡食民。祖孫甘餽糟。賴官得鹽喫。政苦無錢刀。

乙卯宿清泉寺

稅輿陟高岡。卻立倚天壁。就輿亂清溪。轉石飛霹靂。十步一沮洳。五步一枳棘。上方未言返。豁見平土宅。田家雞犬歸。佛廟檀欒碧。蓮蕩落紅衣。泉泓數白石。人如安巢鳥。稍就一板息。鐘魚各知時。吾亦自得力。

丙辰仍宿清泉寺

山農居負山。呼集來苦遲。既來授政役。謠詠謂余欺。按省其家資。可忍鞭扶之。恩言諭公家。疑阻久廼隨。滕口終自愧。吾敢乏王師。官寧憚淹留。職在拊嫠嫠。所將部曲多。溷汝父老爲。西山失半壁。且復下囊輜。



啼鴉散篇帙。休吏稅巾衣。石泉鼓坎坎。竹風吹參差。晝冷行熠燿。壁蟲催杼機。昏釭夜未央。高枕夢登巖。

己未過太湖僧寺得宗汝爲書寄山蘋自酒長韻詩寄答

從學晚聞道。謀官無見功。早衰觀水鑒。內熱愧鄰邦。北鄰有宗侯。治劇乃雍容。摩手撫鰥寡。藁礎磔強梁。桃李與荆棘。稱物施露霜。政經甚縝密。私不蚍蜉通。吏舍無請賕。家有侯在堂。府符下鹽策。縣官勸和羹。作民敏風雨。令先諸邑行。我居萬夫上。關情世無雙。此邑宅巖巖。里中頗秦風。翁媪無恙時。出分如蜂房。一錢氣不直。白挺及父兄。簪筆懷三尺。揖我爲我臧。向來豪傑吏。治之以牛羊。我不忍敵民。教養如兒甥。荆雞伏鵠卵。久望羽翼成。訟端洶洶來。諭去稍聽從。尙餘租庸調。歲歲稽法程。按圖索家資。四壁達牖窗。揜目鞭朴之。桁楊相推棖。身欲免官去。驚馬戀豆糠。所以積廩鹽。未使戶得烹。八月醺社酒。公私樂年登。遣徒與會稽。而悉走荻篁。吾惟不足遣。夙駕略我疆。邑西軟戾地。是嘗嬰吾鋒。齟齬其強宗。彼乃可使令。夙夜於遠郊。草露沾帷裳。入磴履虎尾。捫蘿觸臺芒。借問夕何宿。烟邊數峯橫。松竹不見天。蟠空作秋聲。谷鳥與溪瀨。合絃琵琶箏。稅駕亂石間。巖寺鳴疎鐘。山農頗來服。見其父孫翁。苦辭王賦遲。戶戶無積藏。民病我亦病。呻吟達五更。韻爲誦書語。一作書空語行歌類楚狂。舉鞭問嘉禾。秣馬可及城。惜哉憂城旦。不得對榻床。洒筆付飛鳥。北風吹報章。書回銀鈎壯。句與麝煤香。浮蛆撥官醅。傾壺嫩鵝黃。山氣常翳翳。此物可屢觴。蘋藥割紫藤。開籠喜手封。味溫頗宜人。芼以石飴薑。舉杯引藥糜。詠詩對寒江。寄聲甚勞苦。相思



秋月明。我邑萬戶鄉。其民資囂凶。欲割以壽公。使之承化光。反以來壽我。中有吞舟鯨。銅墨俱王命。職思慰孤惻。何時賭一擲。燒燭呪明瓊。

庚申宿觀音院

谷底一墟落。地形如盎盆。棖題相照耀。其民頗家溫。土風甚於秦。不可借釜甌。僧屋無陶瓦。剪茅蒼竹樊。借問僧安在。乞飯走諸門。人闕鳥鳥語。簟涼風水文。旁有蜂蜜廬。頗聞衙集喧。將雨蟻爭丘。鑿兵復追奔。紅英委鳳翼。赤幘峨鷄冠。吸烹寒泉窟。伐燭古松根。相戒莫浪出。月黑虎夔藩。

金刀坑迎將家待追漿坑十餘戶山農不至因題其壁

窮鄉阻地險。篁竹嘯夔魃。惡少擅三窟。不承吏追呼。老翁燕無凶。偃蹇坐里閭。後生習聞見。官不禁權輿。懷書斥長吏。持杖鑿公徒。遂令五百里。化爲豺豕墟。古來沈牛羊。檄水臣鱷魚。猛虎剝文章。矧而民髮膚。哀哉奉其身。曾不如鳥烏。破家縣令手。南面天子除。要能伐強梁。然後活惻孤。屬爲民父母。未教忍先誅。山川甚秀拔。人物亦詩書。十室有忠信。此鄉何獨無。

代書

阿熊去我時。秋暑削甘瓜。離別日日除。蓮房倒箭韞。得書報平安。肥字如栖鴉。汝才躍鑪金。自必爲鑊錡。窮年抱新書。挽條咀春葩。弄筆不能休。屈宋欲作衙。屈指推日星。許身上雲霞。安知九天關。虎豹守夜叉。



祝田操豚蹄持狹所欲奢。文章六經來。汗漫十牛車。譬如觀滄海。細大極龍蝦。古人以聖學。未肯廢百家。舊山木十圍。齋堂綠陰遮。紅稻香盂飯。黃鷄厭食鮭。摩挲垂便腹。頗復讀書耶。念汝齒壯矣。無婦助烹茶。父兄亦憐汝。須兒牧犬猴。且伐千章材。贈行當馬馱。羸糧果後時。定隨八月槎。覺民在中林。丁丁聞兔置。奉身甚和友。幹父辦咄嗟。臺源吟松瀨。先生岸巾紗。留客醉風月。槃筯供柔嘉。仍工朱絲絃。洗心拂奇邪。孤臣發楚調。傾國怨胡笳。把筆學周鼓。字形錐畫沙。詩書乃甫好。不爲蓬生麻。元明祖師禪。妙手發琵琶。已無富貴心。鼓吹一池蛙。天民服農圃。頗復秋斂賒。下田督耒耜。入嶺按新畬。悉力輸王賦。至今困生涯。知命叔山徒。爐香嚴佛花。唯思苾芻園。脫冠著袈裟。起家望兩季。佩金踢朝鞞。嘉魚在南國。宗廟薦鱸鯨。我爲萬夫長。朝論不齒牙。刺頭簿領中。蚤蝨廢搔爬。世累已纏縛。官箴易疵瑕。何時烟雨裏。驅羊入金華。遣奴迫王事。不暇學驚蛇。

學一作草

寄陳適用

日月如驚鴻。歸燕不及社。清明氣妍暖。疊疊向朱夏。輕衣頗宜人。裘褐就拋架。已非紅紫時。春事歸桑柘。空餘車馬跡。顛倒桃李下。新晴百鳥語。各自有匹亞。林中僕姑歸。苦遭拙婦罵。氣候使之然。光陰促晨夜。解甲號清風。卽有幽蟲化。朱墨本非工。王事少閑暇。幸蒙餘波及。治郡得黃霸。邑鄰陳太丘。威德可資借。決事不遲疑。敏手擘泰華。頗復集紅衣。呼僚飲休假。歌梁韻金石。舞地委蘭麝。寄我五字詩。句法窺鮑謝。



亦嘆簿領勞。行欲問田舍。相期黃公壚。不異秦人炙。我初無廊廟。身願執耕稼。今將荷鋤歸。區芋畦甘蔗。觀君氣如虹。千輩可陵跨。自當出懷璧。往取連城價。賜地買歌童。珠翠羅廣廈。富貴不相忘。寄聲相慰藉。

讀方言

八月梨棗紅。繞牆風自落。江南風雨餘。未覺衣衾薄。壁蟲憂寒來。催婦織衣去聲著。荒畦杞菊花。猶用充羹臠。連日無酒飲。令人風味惡。頗似楊子雲。家貧官落魄。忽聞輜軒書。澀讀勞輔齟。虛堂漏刻間。九土可領略。願多載酒人。喜我識字博。設心更自笑。欲過屠門嚼。往時抱經綸。待價一丘壑。卜師非熊羆。夢相解靡索。所欲吾未奢。倘使耕可穫。今年美牟麥。廚饌豐餅拓。摩挲腹中書。安知非糟粕。

送彥孚主簿

斯文當兩都。江夏世無雙。叔度初不言。漢庭望風降。中間渺人物。潛伏老螻螿。本朝開典禮。械櫜作株椿。世父盛文藻。如陸海潘江。三戰士皆北。鞬弓錦韜社。白衣受傳詔。短命終螢窗。夢升臥南陽。耆舊無兩龐。空鑱歐陽銘。松風悲隴瀧。四海羣從間。邇來頗瑋淙。主簿吾宗秀。其能任爲邦。軀幹雖眇小。勇沉鼎可扛。擇師別陳許。取友觀羿逢。折腰佐髯令。邑訟銷吠虬。時邀府中飲。下箔蠟燒釭。紅裳笑千金。清夜酒百缸。同僚有惡少。嘲謔語亂咙。君但隱几笑。諸老歎敦龐。況乃工朱墨。氣和信甚扛。持此應時須。十年擁麾幢。相逢常鞅掌。衙鼓趨鬢鬢。簿書敗清談。汗顏吏樅樅。臨分何以贈。要我賦蘭茝。黃華雖衆笑。白雪不同腔。



野人甘芹味。敢饋厭羊羶。願余百短拙。飽腹戇豚肱。維思解官去。一丘事耕耰。君當取富貴。鐘鼓羅擊撞。伏藏黜黜徑。猶想足音登。

和曹子方雜言

正月尾。垂雲如覆盂。雁作斜行書。三十六陂浸烟水。想對西江彭蠡湖。人言春色濃如酒。不見插秧吳女手。冷鄉小塢頗藏春。張侯官居柳對門。當風橫笛留三弄。燒燭圍棋覆九軍。盡是向來行樂事。每見琵琶憶朝雲。只今不舉蛾眉酒。紅牙捍撥網蛛塵。曹侯束書丞太僕。試說相馬猶可人。照夜白。真乘黃。萬馬同秣隨低昂。一矢射落阜鵬雙。張侯猶思在戎行。橫山虎北開漢疆。冷卿智多髮蒼浪。牛刀發硎思一邦。政成十綴舞紅粧。兩侯不如曹子方。朵頤論詩蝟毛張。龜藏六用中有光。何時端能俱過我。掃除北寺讀書堂。菊苗煑餅深注湯。更碾盤龍不入香。

戲贈曹子方家鳳兒

東芽入湯獅子吼。荔子新剝女兒頰。鳳郎但喜風土樂。不解生愁山疊疊。目如點漆射清揚。歸時定自能文章。莫隨閩嶺三年語。轉卻中原萬籟簧。閩嶺一作阿國

送張材翁赴秦簽

金沙醱醖春縱橫。提壺粟留催酒行。公家諸父酌我醉。橫笛送晚延月明。此時諸兒皆秀發。酒間乞書藤



紙滑北門相見後十年。醉語十不省七八。吏事袞袞談趙張。乃是樽前緣髮郎。風悲松丘忽三歲。更覺綠竹能風霜。去作將軍幕下士。猶聞防秋屯虎兕。只今陛下思保民。所要邊頭不生事。短長不登四萬日。愚智相去三十里。百分舉酒更若爲。千戶封侯儻來爾。

奉謝劉景文送團茶

劉侯惠我大玄璧。上有雌雄雙鳳跡。鵝溪水練落春雪。粟面一杯增目力。劉侯惠我小玄璧。自裁半壁煮瓊糜。收藏殘月惜未碾。直待阿衡來說詩。絳囊團團餘幾壁。因來送我公莫惜。箇中渴羗飽湯餅。鷄蘇胡麻煮同喫。

謝景文惠浩然所作廷珪墨

廷珪履墨出蘇家。麝煤添澤紋鳥鞞。柳枝瘦龍印香字。十襲一日三摩挲。劉侯愛我如桃李。揮贈要我書萬紙。不意神禹治水圭。忽然入我懷袖裏。吾不能手抄五車書。亦不能寫論付官奴。便當閉門學水墨。灑作江南驟雨圖。

題落星寺

落星開土深結屋。龍閣老翁來賦詩。寺僧擇隆作宴處。軒爲落星之勝處。坐小。蜂房各自開戶牖。處處煮茶藤一枝。絕一作絕筆。無人知。僧隆畫甚富。而寒。香與世隔畫圖妙絕。



過致政屯田劉公隱廬

兒時拜公床。眼碧眉紫烟。舍前架茅茨。爐香坐僧禪。女奴煮鬯粟。石盆瀉機泉。今來掃門巷。竹間翁蛻蟬。堂堂列五老。勝氣失江山。石盆爛黃土。茅齋薪壞椽。女奴爲民妻。又瘞蒿里園。當年笑語地。華屋轉朱欄。課兒種松子。傘蓋上參天。投策數去日。木行天再環。先生古人風。鐵膽石肺肝。眼前不可意。壯日挂其冠。解衣廬君峯。洗耳瀑布源。霧豹藏文章。驚世時一斑。衆人初易之。久遠乃見難。憶昔子政在。爲翁數解顏。五兵森武庫。河漢落舌端。王陽已富貴。塵冠不肯彈。呻吟刊十史。凡例墨新乾。宰木忽拱把。相望風隧寒。百楹書萬卷。少子似翁賢。上參一作高參

貴池

池人祀昭明。爲郭西九郎。時新覆大舟。水死十二人。以爲神之威也。

橫雲初抹漆。爛熳南紀黑。不見九華峯。如與親友隔。憶當秋景明。九老對几席。何曾閉蓬窗。臥聽寒雨滴。不食貴池魚。喜尋昭明宅。筆硯鼠行塵。芝菌生銅鬲。思成佳句夢。貽我錦數尺。屬者浪吞舟。風雹更附益。老翁哭婦兒。相將難再得。存亡如日月。薄蝕行道失。流俗暗本原。謂神吐其食。神理儻有私。丘禱久以默。

庚寅乙未猶泊大雷口

廣原暉終風。發怒土囊口。萬艘萍無根。迺知積水厚。龍鱗火熒熒。鞭笞雷霆走。公私連檣休。森如束春韭。倚筇蒹葭灣。垂楊欲生肘。雄文酬江山。惜無韓與柳。五言呻吟內。慚愧陶謝手。送菜煩鄰船。買魚熟溪友。



兒童報晦冥。正晝見箕斗。吾方廢書眠。鼻鼾鞞囊吼。猶防盜窺家。嚴鼓申夜守。冶城謝公墩。牛渚蕩子婦。何時快登臨。篙師分牛酒。

乙未移舟出口

畏風濤復入。遂宿焉。同行有劉三班善射。沙夾遇盜。劉手殺三人。

江湖吞天胸。蛟龍垂涎口。養軀無千金。特爲親故厚。本心非華軒。而與馬爭走。聘婦緝落毛。教兒耨葱韭。衣食端須幾。將老猶掣肘。安能詭隨人。曲折作杞柳。桓公甕盎瘦。楚國不龜手。生涯但如此。那問託婚友。久陰快夜晴。天文若科斗。村南鬼火寒。村北風虎吼。野人驅鷄豚。縛落堅纏守。劉郎弓石入。猛氣壓馮婦。一試金僕姑。歸飲軟臂酒。

阻水泊舟竹山下

竹山蟲鳥朋友語。討論陰晴怕風雨。丁寧相教防禍機。草動塵驚忽飛去。提壺歸去意甚真。柳暗花濃亦半春。北風幾日銅官縣。欲過五松無主人。

次韻伯氏長蘆寺下

風從落帆休。天與大江平。僧坊晝亦淨。鐘磬寒逾清。淹留屬暇日。植杖數連甍。頗與幽子逢。煮茗當酒傾。攜手霜木末。朱欄見潮生。檣移永正縣。鳥度建康城。薪者得樹鷄。羹孟味南烹。香秔炊白玉。飽飯愧閒行。叢祠思歸樂。吟弄夕陽明。思歸誠獨樂。薇蕨漸春榮。



贈別李端叔

我觀江南山。如目不受垢。憶食江南薇。子獨於我厚。在北思江山。如懷冰雪顏。千峯上雲雨。岑絕何由攀。當時喜文章。各有兒子氣。爾來領須白。有兒能拜起。讀書浩湖海。解意開春冰。成山更崇堀。願我醜丘陵。白玉著石中。與物太落落。溼渭相將流。世不名清濁。乞言既不易。贈言良獨難。古來得道人。挂舌屋壁間。牧羊金華道。載酒太玄宅。支頤聽晤語。願君喙三尺。我行風雨夜。船窗聞遠鷄。故人不可見。故人心可知。

曉放汴舟

秋聲滿山河。行李在梁宋。川塗事鷄鳴。身亦逐羣動。霜清魚下流。橘柚入包貢。又持三十口。去作江南夢。

發舒州向皖口道中作寄李德叟

黑雲平屋簷。一作崔嵬晨夜隔星月。曉裝商旅前。冰底泥活活。野人攘畔耕。一作侵蹇馬不能滑。駝裘惜

蒙茸。俱落水塘缺。孤村小蝸舍。乞火乾履襪。前登極崢嶸。一作高寒他日飛鳥沒。寒花委亂草。耐凍鳴風葉。一作

耐凍風葉間江形篆平沙。分派回勁筆。髯弟不俱來。得句漫剗剗。一作漫得卻望同安城。唯有松鬱鬱。遙

知浦口晴。諸峯見明雪。一作松雪

徐孺子祠堂

喬木幽人三畝宅。生芻一束向誰論。藤蘿得意干雲日。簫鼓何心進酒樽。白屋可能無孺子。黃堂不是欠



陳蕃古人冷淡今人笑。湖水年年到舊痕。

池口風雨留三日

孤城三日風吹雨。小市人家只菜蔬。水遠山長雙屬玉。身閒心苦一春鉏。翁從旁舍來收網。我適臨淵不羨魚。俛仰之間已陳迹。莫窗歸了讀殘書。

思親汝州作

歲晚寒侵遊子衣。拘留幕府報官移。五更歸夢三百里。一日思親十二時。車上吐茵元不逐。市中有虎竟成疑。秋毫得失關何事。總爲平安書到遲。

衝雪宿新寨忽忽不樂

縣北縣南何日了。又來新寨解征鞍。山銜斗柄三星沒。雪共月明千里寒。小吏忽一作時須束帶。故人頗問不休官。江南長盡梢雲竹。歸及春風斬釣竿。

郭明父作西齋于穎尾請予賦詩

食貧自以官爲業。聞說西齋意凜然。萬卷藏書宜子弟。十年種木長風烟。未嘗終日不思穎。想見先生多好賢。安得雍容一樽酒。女郎臺下水如天。

戲詠江南土風



十月江南未得霜。高林殘水下寒塘。飯香獵戶分熊白。酒熟漁家擘蟹黃。橘摘金苞隨驛使。禾舂玉粒送官倉。踏歌夜結田神社。游女多隨陌上郎。

和答孫不愚見贈

詩比淮南似小山。酒名麴米出雲安。且憑詩酒勤春事。莫愛兒郎作好官。簿領侵尋台相筆。風埃蓬勃使星鞍。小臣才力堪爲掾。敢學前人便挂冠。

次韻裴仲謀同年

交蓋春風汝水邊。客牀相對臥僧氈。舞陽去葉纔百里。賤子與公俱少年。白髮齊生如有種。青山好去坐無錢。烟沙篁竹江南岸。輸與鷓鴣取次眠。

稚川約晚過進叔次前韻贈稚川并呈進叔

人騎一馬鈍如蛙。行向城東小隱家。道上風埃迷阜白。堂前水竹湛清華。我歸河曲定寒食。公到江南應削瓜。樽酒光陰俱可惜。端須連夜發園花。

同世弼韻作寄伯氏在濟南兼呈六舅祠部學士

山光掃黛水按藍。聞說樽前愜笑談。伯氏清修如舅氏。濟南蕭灑似江南。屢陪風月乾吟筆。不解笙簧醉舞衫。只恐使君乘傳去。拾遺今日是前銜。



次韻蓋郎中率郭郎中休官二首

仕路風波雙白髮。閒曹笑傲兩詩流。故人相見自青眼。新貴即今多黑頭。桃葉柳花明曉市。荻芽蒲筍上

春洲。定知聞健休官去。酒戶家園得自由。郭文時御道中野服過親黨飯。頗為分臺御史所訶。故有此句。

世態已更千變盡。心源不受一塵侵。一作險阻艱難親得力。是非憂樂飽經心。青春白日無公事。紫燕黃鸝俱好音。付與兒

孫知伏臘。聽教魚鳥逐飛沈。黃公壚下曾知味。定是逃禪入少林。

和張沙河招飲

張侯耕稼不逢年。過午未炊兒女煎。腹裏雖盈五車讀。囊中能有幾錢穿。況聞縑素尙黃葛。可怕雪花鋪

白氈。誰料丹徒布衣侶。今朝忽有酒如川。

次韻答柳通叟求田問舍之詩

少日心期轉繆悠。蛾眉見妒且障羞。但令有婦如康子。安用生兒似仲謀。橫笛牛羊歸晚徑。捲簾瓜芋熟

西疇。功名可致猶回首。何況功名不可求。

謝送宣城筆

宣城變樣蹲一作雞距。諸葛名家捋一作鼠鬚。一束喜從公處得。千金求買市中無。漫投墨客摹科斗。勝

與朱門飽蠹魚。愧我初非草玄手。不將閒寫吏文書。



和陳君儀讀太真外傳三首

扶風喬木夏陰合，斜谷鈴聲秋夜深。人到愁來無處會，不關情處總傷心。

梁州一曲當時事。一作開元夢記得曾拈玉笛吹。端正樓空春晝永，小桃猶學淡燕支。

高麗條脫瑠紅玉。一作雙條脫玻璃玉邏迤琵琶撚綠絲。一作三尺琵琶綠繭絲蛛網屋煤昏故物。一作澤歇此生唯有夢來時。

時。

楊朴墓

三尺孤墳一布衣，人言無復似當時。千秋萬歲還來此，月笛烟莎世不知。楊朴喜吹笛。作莎詩極工。

戲和舍弟船場探春

雨餘禽語催天曉，月上梨花放夜闌。莫聽遊人待妍暖，十分傾酒對春寒。

百舌解啼泥滑滑，忽成風雨落花天。城南一段春如錦，喚取詩人到酒邊。

次韻寅菴四首

四時說盡菴前事，寄遠如開水墨圖。略有生涯如谷口，非無卜肆在成都。旁籬榛栗供賓客，滿眼雲山奉

宴居。閒與老農歌帝力，年豐村落罷追胥。

兄作新菴接舊居，一原風物萃庭隅。陸機招隱方傳洛，張翰思歸正在吳。五斗折腰慚僕妾，幾年合眼夢



鄉閭白雲行處應垂淚。黃犬歸時早寄書。

大若塘邊獨網魚。小桃源口帶經鉏。詩催孺子成鷄柵。茶約鄰翁掘芋區。苦棟狂風寒徹骨。黃梅細雨潤如酥。此時睡到日三丈。自起開關招酒徒。

未怪窮山寂寞居。此情常與世情疎。誰家生計無閒地。太半歸來已白須。不用看雲眠永日。會思臨水寄雙魚。公私逋負田園薄。未至妨人作樂無。

呻吟齋睡起二首

槠几坐清晝。博山凝妙香。蘭牙依客土。柳色過鄰牆。巷僻過從少。官閒氣味長。江南一枕夢。高臥聽鳴榔。牆下蓬蒿地。兒童課剪除。蔓蒿隨分種。杞菊未須鉏。河水傳烽火。交州報捷書。無能落閒處。慚愧飽春蔬。

和師厚郊居示里中諸君

籬邊黃菊關心事。窗外青山不世情。江橘千頭供歲計。秋蛙一部洗朝醒。歸鴻往燕競時節。宿草新墳多友生。身後功名空自重。眼前樽酒未宜輕。

次韻外舅謝師厚喜王正仲三丈奉詔相南兵回至襄陽捨驛馬就舟見過三首

漢上思見龐德公。別來悲歎事無窮。聲名籍甚漫前日。須鬢索然成老翁。家釀已隨刻漏下。園花更開三四紅。相逢不飲未爲得。聽取百鳥啼怱怱。



能來問疾好音傳。蹇步昏花當日痊。烹鯉得書增目力。呼兒扶立候門前。游談取重慙犀首。居物多贏昧計然。唯有交親等金石。白頭忘義復忘年。  
語言少味無阿堵。冷冰一作雪相看有此君。燈火詩書如夢寐。麒麟圖畫屬浮雲。平章息女能爲婦。歡喜兒曹解綴文。憂樂同科惟石友。別離空復數朝曛。

夜發分寧寄杜澗叟

陽關一曲水東流。燈火旌陽一釣舟。我自只如常日醉。滿川風月替人愁。

次韻胡彥明同年羈旅京師寄李子飛三章一章道其困窮二章勸之歸三章言我亦欲歸耳

胡李相甥也故有檳榔之句

看除日月坐中銓。一歲應無官九遷。葱韭盈盤市門食。詩書滿枕客牀氈。留連節物孤朋酒。惱亂鄰翁謁子錢。誰料丹徒布衣侶。困窮且忍試新年。

丁未同升鄉里賢。別離寒暑未推遷。蕭條羈旅深窮巷。蚤晚聲名上細氈。碧嶂清江元有宅。白魚黃雀不論錢。檳榔一斛何須得。李氏弟兄佳少年。

畏人重祿難堪忍。閱世浮雲易變遷。徐步當車飢當肉。鉏頭爲枕草爲氈。元無馬上封侯骨。安用人間使鬼錢。不是朱門爭底事。清溪白石可忘年。



上蕭家峽

玉筍峯前幾百家。山明松雪水明沙。趁虛人集春蔬好。桑菌竹萌煙蕨芽。晚年本云。荷蓀歸來有蕨芽。

出迎使客質明放船自瓦窰歸

鼓吹喧江雨不開。丹楓落葉放船回。風行水上如雲過。地近嶺南無雁來。樓閣人家捲簾幕。菰蒲鷗鳥樂灣洄。惜無陶謝揮斤手。詩句縱橫付酒杯。

登快閣

癡兒了卻公家事。快閣東西倚晚晴。落水千山天遠大。澄江一道月分明。朱絃已爲佳人絕。青眼聊因美酒橫。萬里歸船弄長笛。此心吾與白鷗盟。

題安福李令朝華亭

丹楹刻桷上崢嶸。表裏江山路眼平。曉日成霞張錦綺。青林多露綴珠纓。人如旋磨觀羣蟻。田似圍碁據一枰。對案昏昏迷簿領。暫來登覽見高明。

寄舒申之戶曹

吉州司戶官雖小。曾屈詩人杜審言。今日宣城讀書客。還趨手板傍轅門。江山依舊歲時改。桃李欲開煙雨昏。公退但呼紅袖飲。剩傳歌曲教新翻。



弈碁一首呈任公漸

偶無公事客休時。席上談兵校一作角。兩碁心似蛛絲遊碧落。身如蝸甲化枯枝。湘東一目誠甘死。天下中分尙可持。誰爲吾徒猶愛日。參橫月落不曾知。

奉答李和甫代簡二絕句

山色江聲相與清。卷簾待得月華生。可憐一曲並船笛。說盡故人離別情。  
夢中往事隨心見。醉裏繁華亂眼生。長爲風流惱人病。不如天性總無情。

次韻君庸寓慈雲寺待韶惠錢不至

主簿看梅落雪中。閨人應賦首飛蓬。問安兒女音書少。破笑壺觴夢寐同。馬祖峯前青未了。鬱孤臺下水如空。江山信美思歸去。聽我勞歌亦欲東。

奉同公擇作揀芽詠

赤囊歲上雙龍壁。囊貢小團亦單壘。唯揀芽則雙壘。曾見前朝盛事來。想得天香隨御所。延春閣道轉輕雷。元豐末作延

春閣

元明題哥羅驛竹枝詞

尺五攀天天慘顏。鹽煙溪瘴鎖諸蠻。平生夢亦未嘗處。聞有鴉飛不到山。風黑馬跪驢瘦嶺。日黃人度鬼



門關黔南去此無多遠。想在夕陽猿嘯間。

長沙留別

折腳鐺中同淡粥。曲腰桑下把離杯。知君不是南遷客。魍魅無情須早回。

元明留別

桃榔笋白映玉箸。椰子酒清宜具觴。市井衣裳半夷夏。陰晴朝暮變炎涼。莫推月色共千里。不寄江南書一行。無賴笳聲上雲漢。曉來偏繞九迴腸。

宿山家效孟浩然

秋陽沉山西。委照藩落下。霧連雲氣平。濛濛翳中野。空村晚無人。一二小蝸舍。老翁止客宿。喬木縻我馬。松爐依稀煙。槁竹照清夜。幽泉抱除鳴。生涯渺蕭灑。翁家炊黃粱。殺雞延食罷。問余所從誰。庸詎學丘也。投身解世紛。耻問老農稼。予生久遭回。百累未一謝。斑斑吾親髮。弟妹逼婚嫁。無以供甘旨。何緣敢閒暇。安得釋此懸。相從老桑柘。

漫尉

并序。庚戌爲葉縣尉時作。

庭堅讀漫叟文。愛其不從於役。而人性物理。瀟然詣於根理。因戲作漫尉一篇。簡舞陽尉裴仲謨兼寄贈郝希孟胡深夫二同年。爲我相與和而張之。尙使來者知居厚爲寡悔之府。然知我罪我。皆在此詩。



豫章黃魯直。既拙又狂癡。往在江湖南。漁樵乃其師。腰斧入白雲。揮車棹清溪。虎豹不亂行。鷗鳥相與嬉。遇人不崖異。順物無瑕疵。不知愛故厭。不悔爲人欺。晨朝常漫出。莫夜亦漫歸。漫尉葉公城。漫撫病餘黎。不篡非已事。不趨非吾時。人罵狂癡拙。魯直更喜之。或請陳漫尉。壽尉蒲萄卮。酒行激懦氣。攘袂起哨規。君子守一官。烏肯苟簡爲。奈何如秋葭。信狂風離披。漫行恐汗德。漫止將敗機。漫默買猜謗。漫言來詬譏。漫尉謝答客。願客深長思。漫行無軌躅。漫止無鬪鞮。漫默怨者寡。漫言知者希。吾生漫叟後。不券與之齊。於戲獨如子。因使目爲眉。強顏不計返。乾坤一醯雞。崑崙視糟垤。旣化不自知。悔吝雖萬塗。直道甚坦夷。覆轍索孤竹。奔車求仲尼。以旌招虞人。賤者不肯尸。玉潤安可涸。日光安可緇。斯言出繫表。當以罔象窺。賦分有自然。那用時世移。吾漫誠難改。盡醉不敢辭。

按田 并序

余與晁端國斯道奉檄按馬鞍山東滄河稻田陂。官丁誤引道左次。水澤山深。徑危泥濘。堅冰長幹。挾馬僅可以度。行五十里。遂不容馬。步沮洳。虎迹新往來。烏鳥叢噪。荆榛盡日出入。乃至河上。集近山之農。告以獻利者。皆以爲瀕水爲舍。居旁治新田。果蓏有畦。桑棗成行。自山之東西。皆不可爲陂。滄河原出四頭山。支分爲三。其一盡南出。少折而東入舞陽。其一稍西流。又折而北入石塘河。其一滄河也。出山而東流。卒與一水合而入汝河。汝河今漕河也。吾二人旣臨河。具知獻利者之狀。而余獨有感焉。頃



歲肉食者以羌胡爲憂。師老西鄙。而士大夫知與不知。爭道孫吳。覆軍殺將。開虜之輕量中國心。而富貴者今日比肩。近者朝言多在民事。欲化西北之麥隴。皆爲東南之稻田。良吏攘臂起。郡有召信臣。縣有史起矣。夫土性者。自先生所不能齊。而一切不問。薊夫故苗灌爲新田。茫茫水陂。丘壟平盡。其君子威以法刑。其小人毒以鞭朴。有舉斯有功。有功斯有賞。作者之議曰。前日吏持印相授。以媮眼前。而厚利棄於蒼烟野草之間。是豈不可笑。以余觀之。恐是非特未定也。觀朝廷之意。初不責必成。奉承者。要必有功。遂失之耳。語曰。事傳三人。輒失其真。詩曰。周爰咨謀。蓋使指也。今也咨謀者不慘怛。以告者未忠信歟。夫聽言之道。必以事觀之。奪民之故習。而強以所未嘗。其利安在。興利者受實賞。力田者受實弊。郡縣行空文。朝廷收虛名。名爲利民。其實害之。議者謂之有意於民乎。吾不知也。以爲有功於民乎。今旣若是矣。予旣有是言。思道屢歎而已。是日所至已遠。不能歸。遂宿水濱民家。北風黃草。破屋見星。月與晁五引酒相酌。忽然已醉。不知跋涉之勞也。綴以詩。強思道和之。

河水積崢嶸。山雪晴索寞。幽齋怯寒威。況復出城郭。馬爲蝟毛縮。人歎狐裘薄。淤泥虎跡交。叢社烏聲樂。橋經野燒斷。崖值天風落。洩雲迷鴻濛。戴石瘦犖嶭。攀緣若登天。扶服如入橐。窮幽至河麋。落日更槃礴。新民數十家。飄寓初棲託。壯產無惰農。荒榛盡開鑿。臨流遣官丁。悉使呼老弱。恩言諭官意。鄆水陂可作。春秧百頃杭。秋報千倉穫。掉頭笑應儂。吾麥自不惡。麥苗不爲稻。誠恐非民瘼。不知肉食者。何必苦改作。



我行疲鞍馬。且用休羈絡。艱難相顧歎。共道折腰錯。勢窮不得已。來自取束縛。月明夜蕭蕭。解衣寬帶索。臥看雲行天。北斗挂屋角。析薪爨酒鼎。興至且相酌。

將歸葉先寄明復季常

初日照屋山。好鳥哢簷角。卷簾吏卻掃。齋舍寒蕭索。呼兒芻春醪。期與夫子酌。簡書驅我出。衝雪凍兩腳。莫行星輝輝。曉起雞喔喔。青煙過空村。商旅無遠橐。豈不欲少留。王事苦敦薄。平生白眼人。今日折腰諾。可憐五斗米。奪我一溪樂。公等何逍遙。睥睨寄講學。談犀振清風。碁局落秋雹。雲陰愁濛鴻。山路險犖确。慎無告歸軒。使我數日惡。羸驂逆歸心。旋潭蹶霜灤。悲嘶惜鄴泥。短筮冷難捉。南征喜氣動。迎面蛛絲落。買網鱸金橙。歸償炊黍約。

新寨餞南歸

初更月蝕缺半壁。三更北風雪平屋。夜寒置酒送歸客。長歌燕雁燈前落。故園無書已十月。目極千里雲水隔。客方有行乃未已。歸且經予江上宅。比鄰諸老應相問。爲道於今不如昔。新知翻手覆手間。故人江南與江北。有時日高天氣清。炙背南軒把書策。可憐斯人巧言語。今已埋沒黃土陌。乃知生前傾意氣。不用身後書竹帛。往在江南最少年。萬事過眼如鳥翼。夜行南山看射虎。失腳墜入崖底黑。卻攀荆棘上平田。何曾悔念身可惜。辭家上馬不反顧。談笑據鞍似無敵。邇來多病足憂虞。平地進寸退數尺。意氣索然



成老翁。所有鬢髮猶未白。閒居爲婦執薪爨。宿處野人爭臥席。昔壯今衰殆不如。吾恐未必不爲福。寄聲諸老善自愛。客行努力更強食。門前種柳今幾長。戒兒勿令打鷓鴣。不晚歸來躑躅間。爲公置酒臨江閣。

曉起臨汝

缺月欲崢嶸。鳴雞有期信。征人催夙駕。客夢未渠盡。野荒多斷橋。河凍無裂壑。羸馬踏冰翻。疑狐觸林遁。清風蕩初日。喬木轉幽韻。崧高忽在眼。岌峨臨數郡。玄雲默垂空。意有萬里潤。寒暗不成雨。卷懷就膚寸。觀象思故人。動靜配天運。物來斯一時。無得乃至順。涼暄但循環。用舍誰喜愠。安得忘言者。與講齊物論。

戲贈陳季張

氣清語不凡。郭與陳季優。季子有美質。明月懸高秋。詞談貫百家。炙轂出膏油。放聲寄大塊。肆情無去留。方圓付自爾。規矩爲瘡疣。當其說荒唐。衆口莫能咻。書案鼠篆塵。銜蔬滿床頭。居不省家舍。那問犬馬牛。吾嘗觀聖人。與世爲獻酬。道通衆人行。智欲萬物周。微言觀季子。頗亦有意不。季子捧腹笑。吾豈措紳囚。我將乘扶搖。南與大鵬遊。相羊九萬里。厭則下滄洲。黃子失所答。如耕不能耰。井蛙延海鱉。樂事擅一丘。束牲盟伯夷。固自取擲揄。無心以觸物。愛子如虛舟。維楫苟不存。傾覆當誰尤。尙思濟來者。非但自爲謀。

卽席

落葉不勝掃。月明樹陰疎。親鄰二三子。樽酒相與俱。霜栗剝寒橐。晚菘煮青蔬。解官方就門。敦薄無簡書。



純益氣蕭蕭。未羈天馬駒。元禮喜作詩。豪氣小未除。大薛知力學。日來反三隅。小薛受善言。如以柳貫魚。天民嘗逸駕。近稍就檝株。知命雖畸人。清談頗有餘。阿盧快犢子。規矩尙小殊。不材於用少。我則澗底樗。會合只偶然。等閒異秦吳。人生一世間。何異樂出虛。過耳莫省領。披懷使恢疎。買網尙可鱸。倒壺更遣沽。不當愛一醉。倒倩路人扶。

和舍弟中秋月

高秋搖落四十五。清都早霜凋桂叢。纖塵不隔四維淨。寒光獨照萬象中。少年氣與節物競。詩豪酒聖難爭鋒。桓伊老驥思千里。尙能三弄當清風。廣文陋儒懶於事。浩歌不眠倚梧桐。百憂生火作內熱。何時心與此月同。後生晚出不勉學。從漢至今無楊雄。天馬權奇大宛種。吾家阿熊風骨聳。言詩已出靈運前。行身未聞孟軻勇。明窗文字不取讀。蜘蛛結網塵堆壅。少壯幾時夏已秋。待而成人吾木拱。憐汝起予秋月篇。我衰安得筆如椽。但使樽中常有酒。不辭座上更無氈。把詩問字爲汝說。便當侯家歌舞筵。

秋懷二首

秋陰細細壓茅堂。吟蟲啾啾昨夜涼。雨開芭蕉新聞舊。風撼篔簹宮應商。砧聲已急不可緩。簷景旣短難爲長。狐裘斷縫棄墻角。豈念晏歲多繁霜。

茅堂索索秋風發。行繞空庭紫苔滑。蛙號池上晚來雨。鵲轉南枝夜深月。翻手覆手不可期。一死一生交



道絕湖水無端浸白雲。故人書斷孤鴻沒。

四月末天氣陡然如秋。遂御袂衣游北沙亭觀江漲。

沙岸人家報急流。船官解纜正夷猶。震雷將雨度絕壑。遠水黏天吞釣舟。甚欲去揮白羽箠。可堪更着紫茸裘。平生得意無人會。浩蕩春鉏且自由。

何造誠作浩然堂。陳義甚高。然頗喜度世飛昇之術。築屋飯方士。願乘六氣遊天間。故作浩然詞以贈之。

萬物浮沉共我家。清明心水徧河沙。無鈎狂象聽人語。露地白牛看月斜。小雨呼兒藝桃李。疎簾幃客轉琵琶。塵塵三昧開門戶。不用丹田養素霞。

答余洪範

懸磬齋廚數米炊。貧中氣味更相思。可無昨日黃花酒。又是春風柳絮時。

次韻任道食荔支有感

一錢不值程衛尉。萬事稱好司馬公。白髮永無懷橘日。六年怱悵荔支紅。

韓信爲黃幾復作

韓生高材跨一世。劉項存亡翻手耳。終然不忍負沛公。頗似從容得天意。成臯日夜望救兵。取齊自重身。



已輕躡足封王能早寤。豈恨淮陰食千戶。雖知天下有所歸。獨憐身與噲等齊。蒯通狂說不足據。陳豨孺子胡能爲。子嘗貰酒淮陰市。韓信廟前木十圍。千年事與浮雲去。想見留侯決是非。丈夫出身佐明主。用舍行藏可自知。功名邂逅軒天地。萬事當觀失意時。

以右軍書數種贈丘十四

丘郎氣如春景晴。風暄百果草木生。眼如霜鶻齒玉冰。擁書環坐愛窗明。松花泛硯摹真行。字身藏穎秀勁清。問誰學之果蘭亭。我昔頗復戲墨卿。銀鈎蠶尾爛箱籛。贈君鋪案黏曲屏。小字莫作癡凍蠅。樂毅論勝遺教經。大字無過瘞鶴銘。官奴作草欺伯英。隨人作計終後人。自成一家始逼真。卿家小女名阿潛。眉目似翁有精神。試留此書他日學。往往不減衛夫人。

贈別幾復

風驚鹿散豫章城。邂逅相逢食楚苹。佳友在門忘燕寢。故人發藥見平生。只今滿坐且樽酒。後夜此堂還月明。契闊愁思已知處。西山影落莫江清。

趙令許載酒見過

玉馬何時破紫苔。南溪水滿綠徘徊。買魚斫鱸須論網。撲杏供盤不數枚。廣漢威名知訟少。平原樽俎費詩催。草玄寂寂下簾幙。稍得閒時公合來。



和答趙令同前韻

人生政自無閒暇。忙裏偷閒得幾回。紫燕黃鸝驅日月。朱櫻紅杏落條枚。詩成稍覺嘉賓集。飲少先愁急板催。親遣小童鉏草徑。鳴騶早晚出城來。

趙令答詩約攜山妓見訪

晴波瀾縹漾潭隈。能使游人判不回。風入園林寒漠漠。日移宮殿影枚枚。未嘗綠蟻何妨撥。宿戒紅粧莫待催。缺月西南光景少。仍須挽一作擔取燭籠來。

春近四絕句

閨後陽和臘裏回。濛濛小雨暗樓臺。柳條榆莢弄顏色。便恐入簾雙燕來。亭臺經雨壓塵沙。春近登臨意氣佳。更喜輕寒勒成雪。未春先放一城花。小雪晴沙不作泥。疎簾紅日弄朝暉。年華已伴梅梢晚。春色先從草際歸。梅英欲盡香無賴。草色才蘇綠未勻。苦竹空將歲寒節。又隨官柳到青春。

迎醇甫夫婦

陳甥歸約柳青初。一作飲麥隴纖纖忽可鉏。望子從來非一日。因人略不寄雙魚。園中鳥語勸沽酒。窗下日長宜讀書。策馬得行休更秣。一作遠已令童稚割生芻。一作平安行



登南禪寺懷裴仲謀

茅亭風入葛衣輕。坐見山河表裏清。歸燕略無三月事。殘蟬猶占一枝鳴。天高秋樹葉公邑。日暮碧雲樊相城。別後寄詩能慰我。似逃空谷聽人聲。

夏日夢伯兄寄江南

故園相見略雍容。睡起南窗日射紅。一作相攜猶聽隔溪春。睡起開書見手封。詩酒一年談笑隔。江山千里夢魂通。河天月

暈魚分子。榭葉風微鹿養茸。幾度白沙青影裏。審聽嘶馬自搯筇。一作白髮倚門愁絕處。可甚衣斷去時縫。

同孫不愚過昆陽

田園恰恰值春忙。驅馬悠悠昆水陽。古廟藤蘿穿戶牖。斷碑風雨碎文章。真人寂寞神為社。堅壘委蛇女

採桑。拂帽村帘誇酒好。為君聊解一瓢嘗。今昆陽有水。俗號灰河。圖經乃以為壞河。予考之。皆不然。正在昆陽城南。恐是昆水。地理志言昆水出

南。儻是乎。

題雙鳧觀

飄蕭閱世等虛舟。一作人世。若虛舟。歎息眼前無此流。滿地悲風盤翠竹。半叢寒日破紅榴。青山空在衣冠古。一作

不逐市朝改。白鶴不歸歸一作來。宮殿秋。王令平生樽酒地。千年萬歲想來遊。

雪中連日行役戲書簡同僚



簡書催出似驅雞。聞道飢寒滿屋啼。炙背宵眠楮火。嚼冰晨飯薩波螯。風如利劍穿狐腋。雪似流沙飲馬蹄。官小責輕聊自慰。猶勝擐甲去征西。

客自潭府來稱明。因寺僧作靜照堂求予作

客從潭府渡河梁。籍甚傳誇靜照堂。正苦窮年對塵土。坐令合眼夢湖湘。市門曉日魚蝦白。鄰舍秋風橘柚黃。去馬來舟爭歲月。老僧元不下胡床。

道中寄景珍兼簡庾元鎮

傳語濠州賢刺史。隔年詩債幾時還。因循樽俎疎相見。棄擲光陰只等閒。心在青雲故人處。身行紅雨亂花間。遙知別後多狂醉。惱殺江南庾子山。

喜念四念八至京

朔雪蕭蕭映薄幃。夢回空覺淚痕稀。驚聞庭樹烏烏樂。知我江湖鴻雁歸。拂榻喜開姜季被。上堂先着老萊衣。酒樽煙火長相近。酬勸從今更不違。

講武臺南有感

月明猶在搭衣竿。曉踏臺南路屈盤。騶子雨中先馬去。村童煙外倚牆看。鴉啼宰木秋風急。鷺立漁船野水乾。花似去年堪折贈。插花人去淚闌干。



# 宛丘詩鈔

張耒字文潛號柯山人稱宛丘先生楚州淮陰人少善屬文遊學于蘇轍轍愛之因得從軾遊稱其汪洋冲澹有一唱三歎之聲第進士歷官至直龍圖閣知潤州坐蜀黨徙宣州謫監黃州酒稅徽宗起爲太常出知潁汝復坐黨籍落職在潁時聞蘇軾訃至爲舉哀行服遂貶房州別駕安置於黃後五年得許自便居陳時二蘇及黃晁諸人相繼殄歿惟耒尙存士人就學者衆分日載酒肴事之其名益甚卒年六十一史稱其詩效白居易樂府效張籍然近體工警不及白而醞藉閒遠別有神韻樂府古詩用意古雅亦長慶爲多耳子瞻謂秦得吾工張得吾易謾相壓也要在秦晁以上

休日同宋遐叔詣法雲遇李公擇黃魯直公擇烹賜茗出高麗盤龍墨魯直出近作數詩皆奇絕坐中懷無咎有作呈魯直遐叔

休日不造請出遊賢友同城南上人者宴坐花雨中金猊散香霧寶鐸韻天風鳥語演實相飯香悟真空  
尙書二三客淨社繼雷宗黃子發錦囊句有造物功握中一寸煤海外千年松誰降午睡魔賜茗屠團龍  
晁子臥城西咫尺不可逢豈無坐中客終覺欠此公歸帽見新月撲衫暮塵紅困眠有餘想卻聽寺樓鐘  
掛虎圖于寢壁示結穉



畫工出幻事。縞素發原藪。蕭蕭白茅低。凜凜北風走。眈然老於菟。舉步安不驟。目光爛雙射。怒吻呀欲受。彼彪擲其旁。文彩淡初就。雖然竊形似。已足走百獸。煩君衛吾寢。振此蓬華陋。坐令盜肉鼠。不敢窺白晝。

神運殿望香爐天池等峯晚宿官廳明日早發

遠公不出山。坐受龍天供。地祇敢愛寶。木石親輸送。巖巖千年屋。山立屹不動。風雲宿脩梁。星斗近華棟。亭亭碧香爐。舊荀時自涌。五雲嚴擁衛。天樂下鸞鳳。神池闕寶像。光怪發巖洞。誰能陟其顛。手攬游龍鞚。東堂黃金藏。龍象儼環拱。蕭條亡國輦。拙撲昔誰用。掃堂爲一睡。清極乃無夢。思歸戒晨發。結束勤僕從。鴻鍾振林莽。月落朝嵐重。再往墮渺茫。猿鶴應嘲諷。

贈張公賁

我昔爲諸生。奉書諫議公。後來辱稱獎。禮數賓客同。決科甫弱冠。年少氣如虹。歸來陪後乘。不責醉後恭。孤舟梁宋郊。旅態萃百窮。拜公睢陽府。笑語若春風。人事不可期。俯仰異吉凶。平生丹竈術。馬鬣哭新封。十年得吾弟。懷舊涕沾胸。清貧守家法。眉宇肖德容。交臂是非外。爲察兄弟中。東軒語長夏。葵竹羅青紅。西舍雪夜飲。玉顏醉瑤鍾。欲飲徑相就。三更叱闍翁。鯨吸絕遺滴。山頽信傾峯。搜抉盡醬茹。楂梨倒筐籠。通宵兩沈醉。午起頭如蓬。人生定當爾。事去挽驚鴻。河梁繫君馬。一笑喜相逢。憐君碧紗幌。夜淚哭韋叢。我方困齏鹽。酸寒官辟廂。同尋舊遊地。塵壁冒絲蟲。啼鳥古寺閑。夏陰小園空。酒市逢好好。琵琶失玲瓏。



歌舞一分散。賓僚亦西東。忘情猶一歎。齊物論非通。官冷隱朝市。端能信余慵。人生當富貴。子盍自磨礪。便當引五車。一一貯心胸。功就蠅作垤。業成虵化龍。北郊分袂歸。作惡驚兒童。長謠代晤語。發子一笑哄。

離黃州

扁舟發孤城。揮手謝送者。山回地勢卷。天豁江面瀉。中流望赤壁。石腳插水下。昏昏烟霧嶺。歷歷漁樵舍。居夷實三載。鄰里通假借。別之豈無情。老淚爲一洒。篙工起鳴鼓。輕櫓健於馬。聊爲過江宿。寂寂樊山夜。

宿樊溪

黃州望樊山。秀色如可鑒。扁舟橫江來。山腳繫吾纜。大川失洶湧。淺水澄可攬。北風吹疎雨。夜枕舟屢撼。齊安不可望。滅沒孤城暗。奔流略溪口。龍脣屢窺瞰。平生千金質。戒懼敢忘慙。茲遊定何名。耿耿有餘念。

道士磯

匡廬奠九江。苗裔遍南服。橫江蔽原野。內外實一族。危磯插江生。石色擘青玉。蛟龍穴亂石。猿獮在喬木。我行季冬月。江蹟在山腹。扁舟如鏡面。清淨不可觸。躋攀旣不可。千古長幽獨。緬想邃古初。巢居戒樵牧。

離樊口宿巴河遊馬祈寺

扁舟下樊溪。江南正清瀉。曉登巴河岸。極目望春野。步尋脩竹寺。古木爭偃亞。云昔孫仲謀。刑牲致師禡。雄圖邈已矣。英概足悲吒。石梯造雲霧。丹白開廣廈。山僧安寂寞。畏冷不出舍。勞生渴閑境。頓使我心寫。



晚江平若席。風勢欲相借。

龜陵灣阻風三日遙禱孤山而風止

積水多疾風。三日阻我舟。天寒波濤惡。岸窟騰龍虬。五更船篷鳴。冷氣入衾裯。平明諸山雪。爛熳鋪琳瑯。篙工笑相顧。白我巴船頭。永愧小孤神。霧鬢橫星眸。倉卒禱卽應。知我厭滯留。稍晴景物好。柳色含新柔。春風我故舊。迎我入東州。

自離富池凡三禱順濟龍求便風皆獲應又風日清霽舟行安穩委曲如所欲感而成詩

旗尾指船頭。篙工告風便。張帆施雙櫓。去勢如脫箭。船傍兩高山。過目若流電。波平舟穩駛。客寢兀未變。吾聞江西龍。神力回宇縣。往來萬夫禱。正直乃獲願。嗟余何所恃。誠恪無所薦。神豈哀吾窮。有賜不待獻。乃知人窮我。本不坐神譴。人間事苦異。未易以言辨。坐令千里遠。近若在几研。慙非謝宣城。援筆賦靜練。

出山

青山如君子。悅我非姿媚。相逢一開顏。便有論交意。今晨決然去。慘若執我袂。謂山無見留。此事寧久置。道邊青髮翁。下有白玉髓。斲之龍蛇窟。自足飽吾世。平生耽幽獨。乃若安朝市。一官等塵垢。安得敗成計。草堂醉老子。虎溪大開士。寄語二主人。爲留三畝地。

離陽翟



驅車發潁川。回望失嵩少。霜氛塞層空。黯淡寒日曉。原田際天平。百里見飛鳥。纍纍道傍丘。石獸臥衰草。不知誰氏碑。剝裂偶未倒。支離見隸字。書帶漢筆妙。遺墳不可問。文彩竟何效。永年恃金石。此計久可笑。昔遊已三歲。存沒傷懷抱。飽諳人世憂。安得身不老。

次潁川

許昌古名都。氣象良未替。客子遠道來。塵埃滿襟袂。黃昏造孤驛。買飯嚼枯葢。庭寬蟾蜍高。霜氣徹寒被。賴攜朱提杯。可具一飲費。無人勸我酌。孤燭伴客醉。笙簫誰家樓。語笑月中市。何人不行樂。而我獨涕淚。夜長更漏稀。風急鼓鼙駛。天明卷席去。行止隨所值。

同楊二十緱氏寺宿草酌張正民秀才見訪

契闊千里別。惻愴難具言。殷勤一宵語。願子未卽眠。空堂燈火青。旅褐借僧氈。勞勞一杯酒。不解道路寒。經年相從樂。旣別亦茫然。人間事盡爾。聚散亦何歎。但悲多難身。尙獲朋友權。間關百憂中。一笑直萬錢。長子年未冠。已雄羣少年。嶮嶮坐我側。紫眸秀雙顴。壯志激衰懦。清談破愁煎。天明卽分散。奈此情悁悁。

初到都下供職寄黃九

千里不相見。勞勞復何辭。不應一城中。耿耿令我思。僦舍酒家樓。椎壚卷其旗。鼠壤敗晨炊。守翁噪羣兒。馬傍挾兩羸。雙踵待刻移。五日長安塵。故山夢中歸。何以洗我心。望君青松姿。懷情久不吐。古屋絃悲詩。



晚歸寄無咎

屋東雲移山，屋西日半壁。餘天一劍青，遠雨萬絲白。官事癡可了，未遭官長責。惟應晁夫子，不可別頃刻。

西山寒溪，一本云寄邠老。挈家同潘郎。游寒溪西山二寺。詩中亦顏邠老書齋名也。

茲行頗閒暇，聊此一作山水間。況一作有所攜人，臭味同一源。山蹊並脩澗，嘉木間蒲蓮。杉松開一作古

刹一作寺，始覺此溪寒。孤亭出屋背，石磴相牽攀。迎客窮道人，俯僂髻眉斑。釋子一作草草具麤糲，雖貧有餘歡。

一本有三杯徑就醉。午馳一作登西山去。路作九曲彎。山禽慣不驚。夏木秀且繁。緬懷紫髯公，奠玉祠

天壇，豪彊一作有遺韻。興廢一作無留觀，空崑一泓泉。引余掬清甘，一作至人悲熱惱。遺一作

此消昏煩，一作我茶非世間。天上蒼月團，為爾惜不得。烹啜一作澆晨飡，深一作出谷晚易陰。快一作

清雨時班班，一作但見夾道松。龍鬚溼蒼顏，念一作我亦顏人。深屏一作居閉深，柴一作關不使倒珠玉。

使一作濟，我胸中慳之官亦漫浪。遇勝卻一作盤桓，平生據頑鈍。信命傲憂患，言歸徒旅一作疲。就蔭休征

鞍。

讀中興頌碑

玉環妖血無人掃，漁陽馬厭長安草。潼關戰骨高於山，萬里君王蜀中老。金戈鐵馬從西來，郭公凜凜英  
雄才，舉旗為風偃為雨。洒灑九廟無塵埃，元功高名誰與紀。風雅不繼騷人死，水部胸中星斗文。太師筆



下蛟龍字。天遣二子傳將來。高山十丈磨蒼崖。誰持此碑入我室。使我一見昏眸開。百年廢興增歎慨。當時數子今安在。君不見荒涼渙水棄不收。時有遊人打碑賣。

出長夏門初望龍門

出郭心已清。青山忽相對。遊人傍流水。俯仰秀色內。誰張蒼玉屏。中斷神斧快。清伊瀉其間。銀漢曳天派。參差樓觀出。杳靄林麓邃。巖聲答遠響。水影弄空翠。同遊得君子。同榮教興與烟霞會。選勝雖自茲。高懷已塵外。

飯昭果寺

飄然乘興遊。看酒笑俗具。僧居致野飯。草草亦有趣。山僧慣迎客。煮茗新泉注。巖花得春遲。晚秀見紅素。蕭蕭野市井。人物自來去。溪光送孤舟。石色照素樹。題名掃高壁。歲月記所遇。書罷迹已陳。出門猶反顧。

石樓

清溪若奔虬。八鎖束其頸。犇騰去莫脫。擺掣恣驍猛。嘈嘈戰風霆。萬鼓助其勁。聲驅石崖動。氣抱晴日冷。我來怯初登。注視久乃定。悠悠山川闊。寸目羅萬景。平生林野趣。疎放謝鞭警。會期山月出。一嘯清夜永。

上方

足躡青玉磴。躋攀不知勞。回頭瞰木抄。始覺所歷高。孤鳥去滅沒。奔溪深怒號。白日當畫梁。青雲送微颿。



坐久神慮平。微涼清骨毛。但驚塵垢容。俯仰近赤霄。古壁有遺字。昔人嗟寂寥。南風不知暑。古木常蕭蕭。

廣化遇雨

浮雲蔽高峯。臺殿延晚色。風聲轉谷豪。雨腳射山白。東樓瞰虛明。龍甲排檜柏。蕭森異人境。坐視動神魄。撞鐘寺門掩。晚霽尙殘滴。相攜下山去。塵靜馬無迹。歸來解鞍歇。新月如破壁。但恐桃花源。回舟已青壁。

贈無咎以既見君子云胡不喜爲韻八首

平生懷想人。握手良未易。接君同舍歡。此事非此世。十年淮海夢。一笑相逢地。投分白首期。願言何有既。賢愚譬觀形。美醜不自見。醫肱待三折。劍鐵要百鍊。磨君古青銅。汰揀寄明辨。一智出千愚。食芹敢忘獻。文風還正始。磊落有諸君。長者進後生。亦使我有聞。譬如狸與虎。偶使並稱文。終然不可及。困我力空勤。文衰東京後。特起得韓子。支撐誹笑中。久乃化而靡。籍湜旣洒掃。後生始歸市。垂君拯溺手。請效我一指。詩壇李杜後。黃子擅奇勳。平生執羈勒。開府與參軍。舉世秉筆徒。吟哦謾云云。安知握奇律。一字有風雲。觸有羸其角。進有跋其胡。膏車秣吾馬。白日在脩途。雖乏無何杯。頗多未見書。力學致事功。良田本深鉏。黃子少年時。風流勝春柳。中年一鉢飯。萬事寒木朽。室有僧對談。房無妾持帚。此道人人事。誰令余獨不。南山縛虎師。肯顧世書字。揚眉哦楚喉。鼎畔倒侯喜。詩聲一蒼蠅。下到霹靂耳。庸庸老尋常。物外有奇偉。

與潘仲達二首



東風沛甘雨。百物一時好。江南桃李盡。紅紫到百草。道傍負擔子。寒食歸祭禱。念我淮上丘。三年不躬掃。淮陽牡丹花。盛不如京洛。姚黃一枝開。衆艷氣如削。亭亭風塵裏。獨立朝百蓼。誰知臨老眼。得到美葵藿。

次韻秦觀

琬琰非世珍。昔以羊皮換。嗟君復何求。衆棄乃所玩。十年少游兄。閉口受客難。二毛纔一第。俗子猶憤惋。人間異巧拙。善琢貴顏汗。嬋娟守重閨。倚市爭倩盼。君胡寶滯貨。屢辱訪衰懦。譬猶臥仆塗。更侑觥與散。球然瑚璉質。磨琢爭璀璨。遲君三年鳴。更用驚我慢。

阿几

小兒名阿几。眉目頗疎明。日來書案傍。學我讀書聲。男兒事業多。何必學讀書。自古奇男子。往往羞爲儒。阿几笑謂爺。薄雲無密雨。看爺飢寒姿。兒豈合富貴。翁家破篋中。惟有書與史。教兒不讀書。更欲作何事。

宿虹縣驛

長隄隘舟車。上下無暫歇。煎熬古驛門。聒聒爭瑣屑。東南淮浙富。輸餽日填咽。楚風習喧卑。吳舌動嘲啞。平生耽靜意。投鬧劇含噓。況茲道路勤。強食慰飢渴。年來嵩洛興。久與泉石結。終當卜吾廬。雲山對華髮。

有感二首

昨日鷓作巢。今者鷓哺兒。念知三月闌。春物行已稀。晚風颯不收。殘紅怨餘姿。回風起輕寒。擁爐火重吹。



燈明夜齋靜。目澁臨書遲。病齒不飲酒。持杯勸妻兒。豈無兒女心。惆悵桃李蹊。彼昏安目前。丈夫方有思。古今不殊途。掩卷獨長想。炎爐與死灰。相去如反掌。彼昏誠不知。一醉富莫量。那知道傍殍。曾是厭盃盎。一金短販兒。豈暇議得喪。但怜反覆閒。觀者爲惆悵。聖賢蹈大方。不苟目前妄。寄身愛憎間。得失眞一餉。天寒城南寺。門外無馬迹。東風雪疾消。春泥深一尺。豈無老款段。畏蹶不敢策。還歸見兒女。怕冷不下席。楊雄玄未就。雙鬢颯已白。雖云客載酒。此意終岑寂。功成則有命。生事亦人力。胡爲不自勤。守此欲何獲。田桑既有裕。醪醴亦餘溢。嗟哉好事客。從古百無一。

秋感二首

秋日無遠暉。秋草無美姿。殘蛩弔白日。寒鳥悲空枝。時節一如此。余出悵安歸。強歌不成音。還坐空涕垂。感動百慮進。觸心遂紛披。棄捐勿復道。日暮眠吾帷。

秋山多遠聲。日暮尤百態。百風落高樹。清澗瀉寒瀨。鳴蜩默誰憐。瘖死不償罪。蛩啼獨不已。有愬未逢解。天時激汝曹。寧自知進退。吹噓成踴躍。芻狗忌徹祭。庭空月宵挂。園冷露晨沛。嗟哉心難忘。撫事還感慨。

魯直惠洮河綠石作冰壺研次韻

洮河之石利劍矛。磨刀日解十二牛。千年虜地因沙礫。一日見寶來中州。黃子文章妙天下。獨駕八馬森



幢旒平生筆墨萬金直。奇煤利翰盈篋收。誰持此研參案几。風瀾近手寒生秋。包持投我棄不惜。副以清詩帛加璧。明窗試墨吐秀潤。端溪歙州無此色。野人齋房無玩好。慚愧衣冠陳裸國。晁侯碧海爲文辭。盤礪萬頃澄清漪。新篇來如徹扎箭。勁筆更似畫沙錐。知君自足報蒼壁。愧我空賦瓊瑰詩。

王晉卿惠詩逾年不報累來見索而王許酒未送因次其韻督之

酸寒杜陵老。痛飲遺身世。雲安小縣麴米春。遙知美味無多子。猶令此老氣如虎。傲兀幾以醉爲累。爭如侯家美酒如江湖。金鎗犀杓與之俱。玉壺滿傾春水快。銅槽夜滴秋雨疎。主人文章足賓客。許致麴生來坐側。三杯脫帽我家風。渴如旱田占雨虹。冷官如餅君未見。腹惟貯水冰生面。鳴鞭走送煩騶轡。坐對朝雲北風起。未欲煩公大作讌。老夫自斟看深淺。

福昌秋日效張文昌二首

秋野無人秋日白。禾黍登場風索索。豆田黃時霜已多。桑蟲食葉留空柯。小蝶翩翩晚花紫。野鶉啄粟驚人起。洛陽西原君莫行。秋光處處傷人情。黃桑蕭蕭秋水清。田中日午村鷄鳴。場邊九月禾黍熟。空原雉飛飽新穀。棗籬蟲鳴村路曲。道邊古墳生野菊。人稀田闊草茫茫。落陽秋深能斷腸。

題韓幹馬圖



頭如翔鸞月頰光。背如安輿鳧臆方。心知不載田舍郎。猶帶開元天子紅袍香。韓幹寫時國無事。綠樹陰低春晝長。兩髯執轡儼在傍。如瞻馳道黃屋張。北風揚塵燕賊狂。廐中萬馬歸范陽。天子乘騾蜀山路。滿川苜蓿爲誰芳。

罔沙阻風

大江春風浪如屋。客舟迎風罔沙宿。連檣接桅古岸傍。岸頭無人春草綠。船頭日出炊烟起。買魚攜菜來就市。漁人水惡不出門。蕭條野市無雞豚。堤邊紙錢灰若雨。洗酒賽神巫降語。南人艇子不避風。橫江五兩翩翩去。

有感三首

郁城本自貳師謀。騎士拔劍猶封侯。董生明經守正直。白首區區相侯國。參差世事足嗟歎。平聲我笑羣兒較目前。可能董子之榮辱。乃在封侯得失間。

羣兒鞭笞學官府。翁憐兒癡傍笑侮。翁出坐曹鞭復呵。賢於羣兒能幾何。兒曹相鞭以爲戲。翁怒鞭人血流地。等爲戲劇誰後先。我笑謂翁兒更賢。

南風霏霏麥花落。豆田漠漠初垂角。山邊夜半一犁雨。田父高歌待收穫。雨多蕭蕭蠶簇寒。蠶婦低眉憂繭單。人生多求復多怨。天工供爾良獨難。



到陳午憩小舍有任王二君子惠牡丹二槃皆絕品也是日風雨大寒明日作此詩呈希古  
初來淮陽春已晚。下里數楹聊寢飯。此邦花時人若狂。我初稅駕遊獨懶。任王二君真解事。走致兩槃紅  
紫爛。天姝國艷照葭屋。持供佛像安敢慢。江湖逢春豈無花。格頑色賤皆可揀。譬觀中州燕趙態。一洗千  
里窮荒眼。風波歷盡還故郡。此願誰知輒先滿。那知中夕忽凜烈。臥擁牛衣眠失旦。名園泥淖安可入。坐  
惜殘芳風雨散。東鄰夫子亦嗜酒。臥聽午鷄方起盥。晴明猶及一寓目。我老尙能揮大醜。

次韻答天啓

黃鍾無聲登瓦釜。蔡子青衫在塵土。逼人爽氣百步寒。知子胸中有風雨。三年河東走胡馬。絕口魚鰕便  
酪乳。歸來萬卷付一讀。不學兒曹用心苦。周瑜陸遜久寂寞。千年北客嘲吳語。莫徒彩筆雲錦張。要是寶  
劍蛟龍舞。天兵百萬老西北。快馬如飛不出戶。眼看六纛出麒麟。走取單于置刀俎。

赴亳州教官次韻和中書錢舍人及亳守晁美叔見贈

久知疎慵難應接。勉強一官親訟牒。羈窮正似鳩無巢。擺去不如魚有鬣。從來書史鈍蹊徑。更歎詩騷窮  
事業。幾思狐白易絮纈。羞褫舊服求新袂。又憐夸毗竟何得。把玩區區一蚊睫。久知趨向合飢寒。正藉文  
章謾嘯嘯。紫微丈人椽作筆。誰得羸師輕傳謀。知擒敢慢武侯縱。有穿前知魯侯歛。荒蕪滿編求指摘。望  
以餘光分晷晷。乃蒙稱屈力褒揚。不意糞壤藏諸篋。獲如丘陵飽則可。良御不悅猶非獵。平生賞遇有君



子處世雖鈍吾知捷。清閒得食學官祿。願以詩書填吻頰。牙懸喜校鄴侯籤。藤織新成沈郎笈。晁公聲名三十載。餘事筆蹤傳法帖。紫芝眉宇望不遠。屈指數日無旬浹。黃衫健步書見賜。紫誥除官等何躡。久懷薄技待後乘。宜管盈囊紙來歛。坐乖前計空惋悵。袖裏從今雙手擊。醉歸應被官長瞋。未飽徒勞方朔憺。蘇叔黨呂知止自許下見訪叔黨有詩戲贈以此奉答

三年齊安看江山。可當中原故人面。北來塵埃逢故人。眼前卻作江山見。君似江山定不疎。能出吾言世亦無。蘇郎下筆妙無敵。呂郎與談驚未識。鳳雛驥子未宜輕。囊空各有千金壁。贈君錦繡英瓊瑤。報我琅玕金錯刀。溪毛潢污未相棄。歲暮與君甘緼袍。

遊武昌

一葉橫江凌浩渺。李君見我迎門笑。鵝黃初熟醅旋壓。書室焚香地新埽。淋漓歌笑不知夜。竹榻枕藉眠諸少。老人被暖覺獨晚。驚起東南日如燒。四明陳子定愛客。生火寒廳邀我到。盤肴香潔具俄頃。鱸斫寒魚初出沼。仲謀霸氣久寂寞。元子亭基尙危峭。荆榛荒梗上石磴。人物清江開野廟。莫投明府快一飲。主意殷勤賓屢醺。星河破碎歸中夜。明日清淮理歸棹。王家園館靜人眼。挂壁於菟疑欲嘯。殺鷄爲黍辦倉卒。看畫烹茶每醉飽。還家閉門空寂歷。勝境目前皆了了。茲遊可再誰汝嗇。老嬾似不能輕矯。西山得霜瘦如削。蕭寺崢嶸出粉籛。幸余腰髀猶足使。與子凌寒恣遊眺。



秋雨小酌贈賈七

出門秋雨泥漫漫。嗟哉后土何時乾。官曹事休歸舍臥。破屋淅淅西風寒。弱妻傾榼勸我起。稚子笑語爭杯盤。我生樂事但如此。爲爾一醉愁腸寬。仕塗翩翩鬪巧捷。華裾鮮黻相追攀。老來百事覺羞恥。懶伴兒女塗鉛丹。賈郎豪華獨異我。粉腮玉指雙鵝鬢。清眸侑酒醉百醖。肯咀貧甕寒螿酸。堂前菊花日以好。落砌撼撼梧桐殘。當謀痛飲待九日。豪氣一壓龍山桓。

寓陳雜詩

朝雨如霧絲。咫尺不相辨。俄然晨光漏。紺碧出天面。天工易明晦。頃刻俄屢變。今朝事大定。雲物卷組練。客有北來說。蝮生被數縣。穀穗無一粒。遺稈如立箭。卑田成大澤。投種哀莫見。官人懵不知。猶喜輸租辦。興懷及鰥寡。猶愧吾飽飯。

開門無客來。永日不冠屨。客知我老懶。投刺輒復去。端成兩相忘。因得百無慮。故人在旁郡。書信不能屢。興哀東坡公。將揜邨山墓。不能往一慟。名議真有負。可能金玉骨。亦逐黃壤腐。但恐已神仙。裂石終飛去。我不知暑退。但覺衣汗乾。頗怪庭中天。湛然青以寬。有物叫草根。啾啾自相喧。問知已新秋。大火流金丸。天工變寒暑。正爾事亦繁。靜觀付一笑。吾事寧相關。但思筋力健。悠然佳意還。喧喧憎鄰里。砧杵亂人眠。秦子死南海。旅骨還故墟。辛勤一生事。空得數編書。琅琅巧言語。玉佩聯瓊琚。知者能幾人。憎者頗有餘。



書生事業薄。生世苦勤劬。持以待後世。何足潤槁枯。興懷及平昔。使我涕漣如。道路阻且長。悲哉違撫孤。

寄李端叔

陳墟自古皇。疆野實楚縣。沃野接神畿。荒溝漕淮甸。民風靜而陋。原隰平以遠。我來逢艱歲。禾黍秋色淺。荒居咽蛩蚓。風雨老藜莧。閉門謝車馬。隱几親筆硯。馬迹巷泥深。庖烟簷日晏。深居窺老易。妙理珠自玩。困享方寸足。夸安勞遠願。乖離感歲月。老色各滿面。友道古所敦。尺書莫辭倦。

秋日曬古城

秋日曬古城。西風振塵埃。出門何所之。壞道連蒿萊。飛鳴鷄犬稀。破屋枯壕隈。老圃理蔬畦。晚甲瘦未開。輸人暮出城。栖鴉一一回。悵然心不怡。歸坐勸一杯。

孫志康許爲南釀前日已聞糴米欣然作詩以問之

平生一尊酒。風月不可無。謫官將十年。一醉未易圖。市豈無旗亭。官亦有酒壚。薄苦與釀酸。一滴不可沽。英英孫夫子。臭味真吾徒。自云得異蘖。乃出粳稻腴。藏久精粹去。去者乃其粗。醞釀纔浹日。芳甘已盈壺。僮人喻其力。若火經茅蘆。此語真野陋。殆出負販夫。前日聞吉語。糴便已在途。每恨陳乏糴。價直如買珠。憐君久客囊。傾倒無復餘。假器走僕僮。供我一笑娛。欲爲漉巾潛。請學滌器如。作詩以訊之。何日陳尊盂。

歲暮卽事寄子由先生



歲暮淮陽客。貧閒兩有餘。朝昏面壁坐。風雪閉門居。老去深依佛。年衰更嗜書。未能忘素業。聊用慰窮途。下里皆貧屋。開門卽古城。雞豚來近舍。舂汲賴鄰夫。雪壓移來竹。霜萎自種蔬。烏皮蒙燕几。褐帽裹僧顛。肉似聞韶客。齋如持律徒。女寒愁粉黛。男窘補衣裾。已病藥三暴。辭貧飯一盂。長餅臥牆角。短褐倒天吳。宵寐衾鋪鐵。晨炊米數珠。大撓隨杜脛。葛製暖寒軀。時命今如此。功名已矣乎。談愁風射馬。拙待兔逢株。久慕真乘樂。深諳夢境虛。誰憐九頓首。止有一長吁。瞻望身空老。蒼茫歲欲除。何當聞妙誨。鯨別待完膚。

贈翟公巽

我昔出守來丹陽。江流五月如探湯。史君之居在山腹。繞舍樹石何青蒼。千年藥根蟠井底。靈液浸灌通寒漿。人言枸杞精變狗。夜吠往往聞空廊。金山蕩瀟浪花裏。一舸遙去隨漁郎。最奇巖齋人迹少。乳水時滴白石牀。翠鼉坡陁負日色。白騎掀舞占風祥。我留金山凡十日。窮探力取無遺忘。南風吹我渡江去。已厭淮南塵土黃。二十年間多少事。身如疲馬起復僵。淮南窮棲衆人後。朝食不充藜苳腸。公來衰顏得一笑。側聽高論驚尋常。窮閭過我坐至暮。滿懷珠玉無糝糠。乃知世間有清議。未可盡以已意量。精金白璧天所寶。理無破碎委道旁。半年耳冷不聞此。過公矍然神激昂。論交自顧已老醜。從事理絕隨飛翔。斯文有屬不但爾。因公作詩我涕滂。

北鄰賣餅兒。每五鼓未旦。卽遶街呼賣。雖大寒烈風不廢。而時略不少差。因爲作詩。且有所警。



示桔槔

城頭月落霜如雪。樓頭五更聲欲絕。棒盤出戶歌一聲。市樓東西人未行。北風吹衣射我餅。不憂衣單憂餅冷。業無高卑志當堅。男兒有求安得閒。

書初涼夜至將曉

靈壽寺作

秋房燈火清。人語久已寂。城遠不聞更。警柝鳴未息。橫參已入地。斗柄當天植。乃知三更中。市廛已寂歷。我時守書几。磨墨傾硯滴。反覆小學書。昏目如芒刺。試尋鄰房僧。鼻鼾背負壁。體勞徑就枕。冷夢分南北。覺來寺鐘鳴。僧禮像前席。須臾聞梵唄。木魚如叩石。舉頭視東牖。朝日已淡白。反身起披衣。神爽健筋力。亟來酒甕邊。側聽聲唧唧。

霜後步西園

濃霜午喧妍。短日淡無色。回風振中園。搖落聲策策。草根飢鳥啄。飛舞時嘖嘖。野荒無遺粒。卒歲將何食。鮮鮮西墻下。幽草弄寒碧。四時不吾欺。聊假汝頃刻。

呈徐仲車

朝日照高簷。夜霜猶在瓦。纖纖牆邊柳。春色已可把。殘年能幾何。奔駛劇湍瀉。雖無功名求。衰暮亦悲吒。出門問徐子。兩計決取捨。爲當勉自修。汲汲不可暇。爲當飲美酒。送老在杯斝。子當指我途。我卽策其馬。



但恐懶拙姿。終非服勤者。

讀戚公恕進卷

世方尚纖柔。子獨不可揉。人皆喜嘽嘽。子語不出口。嶮然卽之高。俗子競譏詬。我嘗要之難。快使暴其有。乃知謗之非。更覺非所厚。由來難小知。此固可大受。讀書常辛勤。世務飽經構。琅琅滿編文。一一可推究。俗儒昧事實。文字工綵繡。可觀不可用。章甫冠士偶。子能獨不然。渾樸謝雕鏤。寧爲目前玩。功見施設後。知心古所難。形兀實見售。嗟君聽者寡。風雨但孤雛。又思理難常。功業亦邂逅。豈令匠石斤。常縮袖間手。無爲扣角歌。且進滿尊酌。但非遽可合。有所待而偶。干將伏黃土。氣乃在牛斗。願君久自安。蔽抑寧復久。

贈江瞻道

我行于四方。其所急者友。嗚呼得之難。百不一邂逅。人心不可齊。若十指於手。隨其短與長。亦各有所取。剛或礦而折。柔有弱而仆。質良文不揚。中美外莫副。寬壺泛以枵。狹盎迫而陋。此猶其大概。瑣屑難悉究。譬如選長材。棄百不一有。其間雖得之。猶或煩矯揉。我友居淮濱。飲德昔自幼。豈期羈旅間。乃獲聞警效。嗟君如美玉。外徹中乃厚。埋藏困塵埃。要以不可垢。他人十不一。子乃得八九。餘虧能幾何。不待勉而就。乃知昔求艱。特以見未久。但憂奔莫及。敢憚喘而走。我心子所知。淺落無所囿。是以行于世。往往得譏詬。人才如其面。不自知好醜。立之明鑑前。乃見其可否。子於我無嫌。告我當苦口。我惟於改過。竊不敢自後。



嗟予迫飢寒。子亦仰五斗。何當兩有歸。投老作鄰叟。

與友人論文因以詩投之

我雖不知文。嘗聞於達者。文以意爲車。意以文爲馬。理強意乃勝。氣盛文如駕。理維當卽止。妄說卽虛假。氣如決江河。勢順乃傾瀉。文莫如六經。此道亦不捨。但於文最高。窺不見隙罅。故令後世儒。其能及者寡。文章古亦衆。其道則一也。譬如張衆樂。要以歸之雅。區區爲對偶。此格最汙下。求之古無有。欲學固未暇。君爲時俊髦。我老安苟且。聊獻師所傳。無以吾言野。

寄答參寥五首

昔我初見子。子時客京師。聞名久不獲。旣得過所知。示我一卷書。大小百首詩。我嗜不可輟。熊蹯薦朝飢。約子彭城游。念當行有期。中間忽倉卒。決去不子辭。子後來高郵。我居淮之湄。中間無百里。詩句屢交馳。客來得子書。云子久南歸。投書不能讀。恨我聞之遲。使我早知此。扁舟尙能追。遠別不執手。近居不相攜。每念念恨者。耿耿中腸悲。子行日已南。我去日已西。音書不可頻。何以慰我思。

蘇公守吳興。山水方有主。子兮從之遊。掛錫當可駐。塵埃困孤鶴。念子久失所。秋風展其翼。道使萬里去。青雲引高唳。爽絕誰敢伍。余駒欲西秣。使我江海櫓。平生二三子。往往在南土。子才得所樂。我拙日益魯。拳拳相思心。契闊不得語。



秦子我所愛。詞若秋風清。蕭蕭吹毛髮。肅肅爽我情。精工造奧妙。寶鐵鏤瑤瓊。我雖見之晚。披豁盡平生。又聞從蘇公。復與子同行。更酬而迭唱。鐘磬日撞鳴。東吳富山水。草木餘春榮。悲余獨契闊。不得陪酬賡。我生爲文章。與衆常不偶。出其所爲詩。不笑卽譎詬。少年勇自辯。盛氣爭可否。年來知所避。不敢出諸口。時時未免作。包以十襲厚。低心讓兒曹。默默衆人後。見君不能已。頗亦陳所有。君豈少取之。時以佳句授。幽絃喜有聽。清唱慰孤奏。如何瞥然去。使我不得友。蕭蕭江湖客。疎瘦若秋竹。苦心爲詩章。日夜撓心腹。清絃無浮聲。促柱有哀曲。湔湔幽巖泉。一一清可掬。人生於文章。初苦力不足。及其成欲售。又困瞽者目。子從吳興公。乃獨獲所欲。得意有知賞。幽懷免窮獨。嗟余失所投。痛學自藏覆。子當慰我窮。時寄書數幅。

夏日雜感二首

羣動入夜息。我歸亦安眠。脫我身上衣。投枕體晏然。朝日常營營。有生不可閑。羲和戢其光。幸此須臾間。人生一世中。大小無百年。胡爲不自暇。長抱勤苦歎。才者勇設施。誕者夸死權。彼有驅其心。欲休諒無緣。我本與世疎。少慵老成頑。何爲不引去。坎軻行所艱。娟娟簷前月。雖缺自媚好。團團理絲蟲。養身恃其巧。無能老蝙蝠。乘夜出堂奧。那能捕飛蚊。未解聒耳鬧。悲歌草間蚓。辛苦自鳴噪。爾生可以默。何所欲而躁。嗚哇訴其渴。謂若天可禱。瘖蟬死不鳴。豈以訴無效。



悠悠羣動情，誰得辨醜好。我歌豈徒然，亦用自警告。

西華道中

我行陳許郊，十里平若掌。居民雜荆榛，耕少地多曠。野兔作跳奔，驚鳶或高颺。喬林多疾風，寒澗有餘漲。棘籬蔽茅屋，鷄犬入村巷。主人掃土場，秣馬具朝餉。童兒汲土井，敗飯堆瓦盎。勿悲爲生陋，自足無他望。嗟余走薄宦，奔走年將壯。長抱羈旅愁，何時稅歸鞅。

讀蘇子瞻韓幹馬圖

我雖不見韓幹馬，一讀公詩如見者。韓生畫馬常苦肥，肉中藏骨以爲奇。開元有臣善司牧，四十萬匹屯山谷。養之罕用食之豐，力不會施空長肉。韓生圖像無乃然，我謂韓生巧未全。君不見昔時騏驥人未得，飢守鹽車唯有骨。昂藏不受塵土侵，伯樂未來空佇立。騏驥乏食肉常臞，韓生不寫瘦馬駒。誰能爲驥傳之圖，不如凡馬飽青芻。

再和馬圖

我年十五遊關西，當時唯揀惡馬騎。華州城西鐵驄馬，勇士十人不可羈。牽來當庭立不定，兩足人立迎風嘶。我心壯此寧復畏，撫鞍躡鞿乘以馳。長衢大呼人四走，腰穩如植身如飛。橋邊爭道挽不止，側身逼墮壕中泥。懸空十丈才一擲，我手失轡猶攢蹄。迴頭一躍已在岸，但見滿道人嗟咨。關中平地草木短，盡



日散漫游忘歸。驅馳寧復受鞭策。進止自與人心齊。爾來十年我南走。此馬嗟嗟入誰手。楚鄉水國地卑汗。人盡乘船馬如狗。我身未老心已衰。夢寐時時猶見之。想圖思畫忽有感。況復慷慨吟公詩。達人遇境貴不惑。世有尤物常難得。寧能使我卽無情。搔首長歌還歎息。

再寄子由先生

宛丘之別今五年。汴上留連纔一日。賤生飄泊客東南。憂患侵陵心若失。先生神貌獨宛然。但覺巖巖瘦而實。有如霜露入秋山。掃除繁蔚峯巒出。自言近讀養生書。頗學仙人餌芝朮。披尋圖訣得茯苓。云是松間千歲物。屑而爲食可不飢。功成在久非倉卒。上侔金石免毒裂。下比草木爲強崛。涓涓漱納白玉津。鍊以真元納之骨。神仙自是人不知。豈爲難求廢其術。我聞公說心獨嗟。欲問太虛窮恍惚。奈何不使被金朱。乃俾枯槁思巖窟。又觀世事不可常。倚伏誰能定於一。終身軒冕亦何賴。況有朝升而暮黜。何如端坐養形骸。壽考康寧無天屈。乃知豈卽非良圖。卻笑兒曹嗜糠粇。青衫弟子昔授經。賦分羈窮少倫匹。自知無命作公卿。頗亦有心窮老佛。但思飽暖願卽已。妄意功名心實不。終期策杖從公游。更乞靈丸救衰疾。

寄楊應之

應之蹉跎三十九。猶着青衫困塵垢。高才逸氣老益奇。我每事之安敢友。逢時則駕子何患。有才未用誰之醜。暴得從來失常速。徐驅未用鞭其後。掃除萬事付諸命。收拾至樂歸之酒。聞公頗以飲自名。我亦抗



衡能至斗。京師常恨酒不足。貧旅僅得糊其口。乃知一飲尙間關。功坐萬古知難偶。百年痛飲乃良圖。安用金朱裹枯朽。我生自斷計已決。君亦我徒能爾否。揚眉鼠子事輕肥。眨眼小兒夸謹厚。須防仰赫忌鷓鴣。更慮致蹙逢芻狗。獨醒不若鋪其糟。羣犬猶須避而走。遭刑每笑嵇叔夜。得計須師彭澤叟。我官古邑洛之陽。聞有山川亦清秀。行當釀秫從子遊。更以新詩相獻侑。

招潘郎飲

老人夜短睡不足。勃公窗外強知時。五更未明語千萬。更憎林間鷓鴣兒。吹紅洗白雨三日。吾園花蕊已離披。一年春事坐如此。白首窮謫歸無期。念此徑須沾酒飲。買魚烹肉勸妻兒。更呼東鄰好酒伴。爲我醉倒塔前泥。

郭圃送蕪菁感成長句

蕪菁至南皆變菘。菘美在上根不食。瑤簪玉筍不可見。使我每食思故國。西鄰老翁知我意。盈筐走送如雪白。蒸烹氣味元不改。今晨一滄如南北。孔明用蜀最艱窘。百計捃拾無遺策。當時此物助軍行。渭上褒中有遺植。英雄臨事究瑣屑。終服奇才屈強敵。想見躬耕自灌畦。當時有意誰能測。

讀守道詩

仁宗之初公有聲。一世懦者聞之驚。力行古義不顧俗。師事孫子傳其經。掃堂捧杖供賤役。侍師之坐隨。



師行質疑問道無敢變。當世始知師與生。作爲文章不徒發。譏切時事排公卿。俗儒毀譽無所出。乃取過行爲譏評。過於仁義罪固小。矯弊自合違中行。人皆不及子獨過。兩者之罪誰爲輕。開編偶誦子詩句。辭氣磊落嚴以清。吟哦令我不能捨。想見眉宇寒崢嶸。高風一泯不可見。安得壯士能經營。惜哉朽骨不可作。徂徠廢土知誰耕。

對雪呈仲車

學堂歲暮無來客。殘雪漫漫風獵獵。當庭古柳三四株。老翁攜帚收殘葉。二年閒散百事情。飢寒不自勤。鉏鍤囊空餽倒誰復救。典衣買酒將空篋。人間萬事苦難齊。以醉驅愁最奇捷。丈夫未死誰能測。幽憂何自同兒妾。飲酣耳熱詩興適。直上虛空恣陵躡。飢喉凍噤誰與解。正藉醺酣得嚙嚼。少年舉白未嘗辭。漸老深杯見還怯。何當共有種秫田。免向官壚走書帖。

己未四月二十二日大雨雹

夜來飛雹驚我眠。大者磊落幾如拳。起聽但覺屋欲動。簷瓦破墜無復全。是日晚晴星斗出。鏡靜萬里無雲煙。乾坤變化竟誰使。造作詭怪須臾間。鄰家老翁髮已白。云昔見此今十年。木衰火濫氣浮洩。激此陰沴成冰堅。儒生臆度知是否。天事誰得窮其源。屋頭雛鴉失其母。足傷翅折亦可憐。

早作



鷓鴣夜寒不得眠。永夜相語高樹顛。鴉鳴最早尤喧闐。啼呼相應動百千。老雞睡起足攣拳。側頭端如聞九天。引吭一唱鳴宮懸。時哉不後亦不先。朦朧初日見山川。吾廬人起有炊煙。

讀李愷碑

自唐中微北方沸。胡馬長鳴飲清渭。李公守節陷賊庭。身死髑髏行萬里。愷及盧奕並傳首。百年事往誰復省。一丘榛莽無人祭。荒碑半折就磨滅。後人空解傳其字。殺身不畏真丈夫。自古時危知烈士。俗書小技何足道。嗟我但欲揚其事。寥寥獲麟數千載。末學褻貶多非是。高文大筆誰復作。紕臣餓夫須有待。紛紛後世競著述。紙墨徒爲史官費。卻嗟何獨此事然。搔首碑前空嘆慨。

秋蔬

荒園秋露瘦韭葉。色茂春菘甘勝蕨。人言佛見爲下筍。俗言八月韭佛開口。芼炙烹羹更滋滑。其餘瑣屑皆可口。蕪菁脆肥薑菹辣。藏鞭雛筍纖玉露。映葉乳茄濃黛抹。已殘枸杞只留枿。晚種萑苴初生甲。南來食魚忘肉味。久思吾土牛羊茁。軟炊一飽老有味。痛飲百壺今不說。蒲團齋罷欠申時。自覺少年心解脫。

瓜洲謝李德載寄蜂兒木瓜筆

瓜洲蕭索秋江渚。西風江岸殘紅舞。津亭永夜守青燈。客睡朦朧聽江雨。青罇曉酌遣懷抱。但恨鬱鬱將誰語。敲門忽得故人書。洗手開緘見眉宇。蜂兒肥膩愈風痺。木瓜甘酸輕病股。銛鋒皓管見還愧。老去筆



硯生塵土。北歸飄泊亦何事。篙工已束橫江櫓。天寒應客太昊墟。當遣何人具雞黍。

未寒熱伏枕已數日。忽聞車騎明當按頓睡。中得韻語數句。上呈四丈龍圖兼記。至日之飲。山羊卷酥如切玉。剪毛胡羊花作肉。燭前醉客淋漓時。山泉更煮如珠粟。深泥三尺歸不記。日到牀前初睡足。爾來七日戰寒熱。朝飯齋糜不盈掬。客來但辦君且去。臥聽涓涓雪消屋。因山事嚴京兆出。十驛人。人如在目。馳裘便面行野時。晴郊已動陳根綠。

和晁應之憫農

南風吹麥麥穗好。飢兒道上扶其老。皇天雨露自有時。爾恨秋成常不早。南山壯兒市兵弩。百金裝劍黃金縷。夜爲盜賊朝受刑。甘心不悔知何數。爲盜操戈足衣食。力田竟歲猶無獲。飢寒刑戮死則同。攘奪猶能緩朝夕。老農悲嗟淚沾臆。幾見良田有荆棘。壯夫爲盜羸老耕。市人珠玉田家得。吏兵操戈恐不銳。由來殺人傷正氣。人間萬事莽悠悠。我歌此詩聞者愁。

九月十二日入南山憩一民舍冒雨炙衣久之

石稜如刀不容步。上挽垂藤下無路。風寒雨滑徒旅愁。捨馬杖藜泥沒屨。躋攀顛墜不容髮。目眩心寒驚反顧。亦知垂堂有遺戒。身仰微官欲誰憖。蕭蕭茅屋映絕壁。門外濶濶清泉注。解衣就火不能暖。旋拾山薪伐溪樹。山翁生未食醯醢。脫粟寒蔬度朝暮。人間平地固不少。何用巖嶇守麕兔。秋聲四起山靄夕。壞



屋疎籬睡無處。披裘結束相勸歸。過盡重雲下山去。

蕭朝散惠石本韓幹馬圖馬亡後足

世人怪韓生。畫馬身苦肥。幹寧忍不畫驥骨。當時廐馬君未知。開元太平國無事。戰馬卷甲飽不騎。玉關橐駝通萬里。長安第宅連諸姨。笙歌錦繡遍一國。六龍長閒空食粟。霜甜秋草沙苑遊。日暖春波渭川浴。雕圓腰穩日生光。細尾豐膺毛帖肉。珠鞍玉鞚驕不行。豈有塵埃侵四足。韓生丹青寫天廐。磊落萬龍無一瘦。豈知車下骨如牆。飢齧草根刺傷口。君家古圖才半身。千里騰驥已有神。迴身側顧不無意。剪鬣絡頭嗟失真。君不見太宗戰馬拳腹毛。身騎此馬縛羣豪。龍虎精神金鼓氣。豈有閒地供脂膏。至今畫圖快胸臆。想見虬鬚親破賊。那知但愛廐中肥。漁陽筋脚蹄如石。神駒入水隨煙雲。蜀山石路無行人。六驥悲鳴足流血。騎驪遺事一酸辛。

次韻君復七兄見贈

老知山林等朝市。扁舟誰能問行止。長淮十日浪吹沙。春風正攪驪龍睡。幽人輒語破永日。衝泥攜手林間寺。坐中知兄病當已。眉宇氤氳有佳氣。華池神酒不用醒。人生和暢自忘形。扶持陰德鬼神在。洗除世緣煩惱輕。東來自慚雙鬢改。相逢獨覺兩眼明。論詩尙愛淡生活。學道久嘆閒名聲。嗟我塵埃費昏旦。補別自憐聞道晚。還丹欲問僕僕仙。僕謂陸先生也。僕一菴更伴騰騰嬾。騰騰古禪宿。春陰夜薄月朦朧。劇談



燭盡樽亦空。他日重逢龐處士。可能猶與世人同。兄斷愛屏欲專意。禪悅。故比龐公。

離泗州有作

舸艤大艚來何州。翩翩五兩在船頭。淮邊落帆汴口宿。橋下連檣南與北。南來北去何時停。春水春風相送迎。沙岸飛鷗舊相見。短亭楊柳不無情。清歌一曲主人酒。主人壽客客舉手。明日酒醒船鼓鳴。沙邊破堠不知名。行人十里一回首。雲邊猶有埧亭亭。

汴上觀迎送有感

居人憐客千里來。掃堂爲客致酒杯。夜闌再拜客辭去。樽前美人不成舞。陽關八疊倒玉船。消魂此地自年年。船頭旗竿船尾桅。南遊江海北長安。長亭出城十餘里。柳邊人家飯遊子。少年此地幾經過。白頭相逢可奈何。

奉先寺

荒涼城南奉先寺。後宮美人官葬此。角樓相望高起墳。草間柏下多石人。秩卑焚骨不作塚。青石浮屠當丘壠。家家墳上作享亭。朱門相向無人聲。樹頭土梟作人語。月黑風悲鬼搖樹。宮中養女作子孫。年年犢車來作主。廢后陵園官道側。家破無人掃陵域。官家歲給半千錢。街頭買餅作寒食。

送程德孺赴江西



程侯治楚我獨知。去時民作嬰兒啼。歸來明光見天子。還把一節大江西。年來屢下寬大詔。赤子未免寒與飢。恩如憂病政如藥。知病無藥何由治。朝廷法度寄吏手。付授得所乃合宜。事如白黑初易睹。敗以容悅相蒙欺。此行委寄意不淺。列城數十受指麾。任官輕外最弊法。省閣無補真何爲。遙知敏手多暇日。不廢樽俎還蛾眉。從君多乞歙州紙。歲晏天祿供吟詩。

敍十五日事

五更聞鐘自驚起。坐守殘燈具冠履。昏昏病眼正團花。獨愛當庭月如水。強驅睡味誰不仁。漠漠黑甜留兩眦。忽驚左掖漲風埃。已趨上閣鏘環珮。平明原廟煥金碧。飢投敗幕滄寒餌。紛紛僕僕酸兩脛。肉食當然賤何事。走馬還家百不問。掃榻伸腰真有味。起來炊熟日亭午。槐葉新成庭覆翠。翻書弄翰老自笑。飽食安眠計難遂。古來高士不入城。肯聽鳴雞踏朝市。

官閒

官閒吏歸早。歲晏寒欲盛。槐稀庭日多。鳥下人語靜。幽花破寒色。過雁驚秋聽。酒賤莫厭沽。北風行欲勁。

冬日放言六首

小兒喜學書。滿紙如棲鴉。老婦寒不績。當戶理琵琶。樽中有神物。快寫如流霞。三杯任兀兀。凍臉生春華。寒羊肉如膏。江魚如切玉。肥兔與奔鶉。日夕懸庖屋。嬉嬉顧妻孥。滋味喉可欲。謫官但強名。比者何不足。



日暮歸飲酒。兒女戲我前。須臾徑三酌。據榻已醺然。老妻坐我傍。餚馘屢炮煎。大勝劉伶婦。區區爲酒錢。我初謫官時。帝問司酒神。曰此好飲徒。聊給酒養真。去國一千里。齊安猶最醇。失火而遇雨。仰戴天公仁。秦人焚詩書。意欲遂絕滅。六經至今存。何曾損毫髮。興衰有天理。人力自淺拙。不憂驪山墓。回首遭發掘。元子本豪爽。頗復有俗氣。孟嘉亦可人。乃與較權勢。崛強盡百年。究竟成何事。江左無英雄。汝得免徒隸。

潘郎以予生日見過致酒出兩詩

東風沛甘雨。百物一時好。江邊桃李盡。紅紫到百草。道傍負擔子。寒食歸祭禱。念我淮上丘。三年不躬掃。淮陽牡丹窟。盛不數伊洛。姚黃一枝開。衆豔氣如爍。亭亭風塵表。獨立朝萬萼。誰知臨老眼。更復美葵藿。

嘲南商

兩袖全正帛。望知江淮客。深藏計算苦。好鬪意氣窄。愁逢湯餅盃。遇鮮論甕咋。市南沽茅柴。歸店兩顴赤。十二月二十六日日。聞東堂啄木聲。忽記作福昌尉時。在山間。環舍多老木。臘後春初。此烏尤多。聲態不一。今琵琶箏中所效。既不類。又百不得一二云。福昌。河南屬邑也。

田家三首

睡起聞啄木。忽憶福昌春。官舍題詩壁。如今經幾人。猶能老耽酒。依舊拙謀身。尙想蘭宮路。東風清洛濱。野塘積水綠可染。舍南新柳齊如剪。去冬雪好麥穗長。今日雨晴初擇繭。東家饋黍西舍迎。連臂踏歌村。



市晚婦騎夫荷兒扶翁。月出橋南歸路遠。  
社南村酒白如餳。鄰翁宰牛鄰媪烹。插花野婦抱兒至。曳杖老翁扶背行。淋漓醉飽不知夜。裸股掣肘時  
謹爭。去年百金易斗粟。豐歲一飲君無輕。  
新見鵲銜廷樹枝。黃口出巢今已飛。栗留啄椹桑葉老。科斗出畦新稻齊。田家苦作候時節。汲汲未免寒  
與飢。去來暴取獨何者。請視七月豳人詩。

海州道中二首

孤舟夜行秋水廣。秋風滿帆不搖槳。荒田寂寂無人聲。水邊跳魚翻水響。河邊守罾茅作屋。罾頭月明人  
夜宿。船中客覺天未明。誰家鞭牛登隴聲。  
秋野蒼蒼秋日黃。黃蒿滿田蒼耳長。草蟲唧唧鳴復咽。一秋雨多水滿轍。渡頭鳴舂村徑斜。悠悠小蝶飛  
豆花。逃屋無人草滿家。纍纍秋蔓懸寒瓜。

女兒祠下

山邊白雲閒不掃。山下松花龍甲老。東風古柏吹暖香。廟前土馬荒春草。朝霞爲裳水爲珮。守廟千年老  
龍在。清風掃堂神暮還。山頭月出溪潺潺。

福昌北秋日村行



秋野無人秋日白。禾黍登場秋索索。豆田黃時霜已多。桑蟲食葉留空柯。小蝶翩翩晚花紫。野鶉啄粟驚人起。洛陽西原君莫行。秋光處處傷人情。

黃桑蕭蕭新雨晴。田中日午村雞鳴。場頭九月禾黍熟。空原雉飛飽新穀。棘籬蟲鳴村路曲。路邊古墳生野菊。人稀田闊草茫茫。洛陽秋深能斷腸。

從黃仲閔求友于泉

炎暑戰已定。清秋當抗衡。碧雲生雁思。幽草見蛩情。噉麥村墟靜。觀書枕簟清。誰能酌玄酒。來破屈原醒。

借一韻

贈陳履常

勞苦陳夫子。欣聞病肺蘇。席門迂次數。僧米及時無。旨蓄親庖急。青錢藥裹須。我場方不給。何以繫君駒。

至安化驛先寄淮陽故人

蕭條安化驛。倦客思悠哉。積水連天闊。青山送客來。疎籬風捲葉。敗屋雨生苔。寄語淮陽舊。人今放逐回。

秋日

隕葉鳥不顧。枯莖蟲莫吟。野荒田已穫。江暗夕多陰。夜語聞山雨。無眠聽楚砧。弊裘還補綻。披拂動歸心。

發安州作



積雨陂塘秀。南風蒿艾肥。烏犍立犗隴。白鳥下深畦。雲木叫杜宇。曉林啼竹雞。平生倦游興。賴有濁醪攜。  
都梁亭下

金塔青冥上。孤城莽蒼中。淺山寒帶水。旱日白吹風。人事劇翻手。生涯真轉蓬。高眠待春漲。鮭菜伴南公。  
二月二日臧舟徐城戲呈戚郎

自嗟爲客久。羈旅過淮時。雪野挑蔬瘦。霜天暖酒遲。流年下坡轂。萬事覆枰碁。異日懷陳迹。孤舟近古祠。  
舟中曉思

樹色未啼鳥。槳聲初度航。客燈青映壁。城角冷吹霜。飄泊年來甚。羈游情易傷。年豐清潁尾。吾計亦差良。  
酬同年徐正夫司戶時公欲卜築嵩洛間

少別老相見。無言空惘然。功名屬多病。詩酒樂衰年。釜厭顏公粥。囊須趙壹錢。歸裝何日辦。嵩少好林泉。  
今早將飲酒聞鶯有感

蕭條古蘭若。春日等閒斜。唧唧初聞燕。忽忽又過花。舊游都似夢。到處卽爲家。把酒聽鶯處。羈懷感歲華。  
破幌

破幌一點白。臥知千里明。低窗通雪氣。喬木尙風聲。傳警軍城靜。鳴鐘梵刹清。高眠尋斷夢。鄰樹已烏驚。



卷簾新月上。林影散微茫。庭草鳴蟲近。風燈秋幌涼。長年唯有病。晚歲苦多傷。身世竟何就。吾將問蜀莊。

日落

日落長雲暗。風悲古岸秋。渚鷗遙避客。野蝶戲隨舟。疎拙資微祿。飄零厭遠遊。若無尊裏酒。何物與消愁。

舟行卽事二首

古岸生微靄。空林掛夕陽。霞輝明野色。天影戰波光。集鳥村墟暗。鳴蟲禾黍荒。秋高孤月靜。天末巧雲長。沙晚橫歸艇。川晴列去檣。登臨自多感。何必寄他鄉。去去路日遠。行行歲向深。晚田荒更闊。秋野曉多陰。岸蓼飛寒蝶。汀沙戲水禽。迎風蘆顫葉。眩目棗裝林。早蟹肥堪薦。村醪濁可斟。不勞頻悵望。處處有鳴砧。

秋懷次韻晁應之三首

木落晚風急。宵涼侵暑衣。有期惟向老。無計未成歸。只益顛毛脫。還從髀骨肥。感時仍弔古。回首意多違。衰鬢不堪洗。病軀先覺陰。天寒白日短。歲暮亂山深。薄酒醒無力。危絃奏不禁。謀身老逾拙。三聽洛陽砧。清秋萬里興。力疾上高臺。歲熟雉兔飽。風高榆柳摧。晚篁元自綠。幽菊爲誰開。寂寞無人問。鄉書久不來。

宿銅陵

山色日已遠。間人歸路長。碧天涼後闊。秋物雨餘荒。人靜路傍寺。鳥啼林下房。銅陵竟何就。空死漢吳王。



漣水

孤舟逆水上。野靜聞水聲。鷗飛不遠水。寒浪濺霜翎。夜氣岸兼木。夕光潭照星。長吟弄雙槳。知有魚龍驚。

索莫

索莫歸未得。閒雲還滿空。愁吟對寒日。不睡到晨鐘。衣喜初冬寄。書憐手自封。何當聽夜雪。暖酒夜爐紅。

冬夜

山靜寒雲薄。天空孤月明。霜桐占堦影。風葉繞廊聲。經濟心難就。蹉跎歲屢更。冥鴻本清遠。何事亦宵征。

和西齋

山色供開鏡。溪光照掩扉。暗蟲先夜響。萎葉近秋飛。灌壠晴蔬出。閒籠暮鶴歸。鳴琴坐朗月。輕露點秋衣。

春寒

客舍逢桃李。清尊聊自懽。夢中驚夜雨。醉裏度春寒。草色遠還綠。鳥聲晴更繁。預期多病眼。花發更辭看。

歲暮書事五首

歲晏北風疾。山空萬谷號。木枯隨意折。鴻斷不成高。深屋支蓬戶。燼爐暖緼袍。老天元不寐。鳴竹鼓蕭騷。風捲塵沙白。雲垂雪意凝。夜山時叫虎。晚市早收燈。園栗炮還美。村醪醉不能。三年官况味。真是冷於冰。牛羊已歸去。殘照滿山陂。霜雁田中靜。風鳶木杪悲。川原今自若。龍虎昔交馳。丘隴耕桑盡。千年不復知。



原廟依岡起。傳聞世祖營。南陽無雉雉。熊耳合投兵。霜日蓬原路。天風柏殿聲。山川英氣在。不負昔聞名。北風吹馬疾。石徑上危基。野俎飽貍脯。山鑪煮橡糜。寒耕敲凍石。獵火上風枝。留滯親麋鹿。多慙髮欲絲。

莫春三首

還將多病眼。冉冉對殘春。啼鳥日求侶。晚花如向人。物情懶着意。杯酒最關身。亦有功名志。吾生付大鈞。應接非吾事。深幽興有餘。筍深鳴鳥下。花薄午風疎。草淺見飛雉。溪清生細魚。端居亦多趣。不用席門車。紅點薔薇架。綠深桃李蹊。語鶯知果熟。忙燕聚新泥。節物有常態。羈游無定棲。寧須說鵬鷄。物理固應齊。

宿東魯父店二首

夕陽低欲盡。春淺色蕭條。暝色催歸牧。炊煙向晚樵。疎星臨水際。遠火隔村橋。黯黯柴門夜。栖鴉對寂寥。郡國何時極。羈愁觸處生。望隨天不盡。春共野兼平。煙樹淮南闊。漁鹽楚俗輕。飄零五年別。歎息鬢毛更。

春望

鳥去晴雲外。帆歸芳草邊。平淮分綠野。春樹接低天。殘枿寒餘燒。新青雨後田。年來千里目。容易淚雙懸。

夜意

荒城轉五更。北斗向誰傾。穴鬪時爭鬪。林栖或自驚。老來神慮淡。睡足骨毛輕。石磬催僧粥。低窗枕畔鳴。

春望



暖日晴薰草。清淮闊浸天。地卑連遠水。城廢入春田。目極風燈外。愁懸淚臉邊。人生苦多感。花柳自年年。

同七兄及崧上人自墳莊還寺

和風快人意。岸幘晚衿涼。日落野痕碧。月生淮際光。論詩得靈運。靜語屬支郎。不是耽閑散。從來懶性長。

蔡河漲

渾渾雖未已。浩浩竟東歸。闊處長天近。澄邊一鳥飛。西風疎葦亂。斜日遠村微。淹泊從吾道。扁舟伴釣磯。

初秋對雨

閉戶理殘編。疎慵得自便。朝涼清病思。秋雨對高眠。屋冷深藏燕。槐疎溼抱蟬。所忻堂下菊。芳意已鮮鮮。

泊長平晚望

川穩夷猶棹。春歸杳靄天。翠深交岸樹。綠遠望川田。漁酒數家市。帆檣何處船。登臨一回首。無恨亦依然。

發長平

歸牛川上渡。去翼望中迷。野水侵官道。春蕪沒斷堤。川平雙漿上。天闊一帆西。無酒消羈恨。詩成獨自題。

夏日五言十二首

過雨芰荷亂。繁陰竹樹多。雛聲知鳥哺。萍動見魚過。細逕饒苔蘚。陰牆引薜蘿。角巾從倒側。疎懶欲如何。蚓壤排晴圃。蝸涎印雨堦。花鬚嬌帶粉。樹角老封苔。問字病多忘。過鄰慵卻迴。晚涼還盥櫛。對竹引清杯。



山雨晴來暑。溪雲暗復興。林塘陰不解。巾几潤還蒸。書帙慵披蠹。槃飡厭撲蠅。老來疲茶甚。多病日侵陵。  
朝雨來還密。村墟一望間。遠聲唯野竹。潤色但青山。書史供高臥。莓苔只閉關。蕭蕭覺秋興。飄颻近衰顏。  
細徑依原僻。茅蓬四五家。山田來雉兔。溪雨熟桑麻。竹籠辰收果。茅菴夜守瓜。頗知農事樂。從此問生涯。  
養拙貧無事。深幽樂更真。簷巢偷哺子。樹啄巧藏身。竊果鶯知主。移居蟻過鄰。老夫朝食美。薦俎有谿鱗。  
謝守常搜句。陶潛亦效官。傍溪分水細。過巘得天寬。布種隨蔬隴。尋香到藥欄。野裝兒稚笑。繩屨鹿衣冠。  
久與山川約。那無風月情。經營元闊略。疎放自平生。山友招相見。鄉書向遠征。慇懃語歸計。貧病苦難成。  
種藥幽人事。還披本草經。出山拋舊翠。過雨有新青。術受壺中祕。方傳肘後靈。不辭勤服餌。爲變髮星星。  
陶令拋官易。龐公去隱深。由來浮世事。可見昔人心。卜築閒多思。奔馳病不禁。簷楹來燕雀。鸞鶴自山林。  
蛩怨青莎老。螢飛積水深。庭除延夜色。砧杵發秋心。雄劍鳴初匣。寒衣補硬針。老來詞賦懶。從使二毛侵。  
夜色川原合。秋聲草木催。星辰隨地闊。河漢寫山來。栖鶴涼先警。飢鳥夕未回。高樓對斜月。鳴笛正清哀。

蒙恩除奉常有感

平生秉周禮。投老奉龍旂。斥逐偶不死。歸來敢恨遲。門闌走賓客。行李飭妻兒。又踏長安道。多慚鬢有絲。

冬日雜興六首

小園晴自掃。曝日坐前軒。野鼠穿山葉。寒鳥啄草根。短籬藩隙地。別逕入孤村。幽趣供岑寂。淹留不復論。



水落橋痕在。沙乾岸草枯。霜餘槐老壯。風際竹清疎。啄木高逾響。鵲鴿飛且呼。二年親友絕。唯有對禽魚。池館留餘雪。西山照夕曛。臘催梅蘂近。春向鳥聲新。愁思仍當病。風光欲近人。年年桃李樹。相對只傷神。空山身欲老。徂歲臘還來。愁怯年年柳。傷心處處梅。綠蔬挑甲短。紅臘點花開。冰雪如何有。東風日夜回。南壁蒼崖壯。窮冬井落閑。風聲先老樹。日色避諸山。落雁飢相向。啼烏夕自還。微微寒月影。蓬戶已深關。擊柝山城閉。疎燈野店扃。疾風鳴夜谷。晴水動浮星。霜翼歸何晚。鄰機織未停。短歌時自和。愁絕更誰聽。

建平途次

野橋田徑滑。官路柳條新。流水伴遲日。野花留晚春。點空知去翼。衝綠有歸人。自笑諳岐路。無勞更問津。

北橋送客

橋上垂楊繫馬嘶。橋頭船尾插紅旗。船來船去知多少。橋北橋南長別離。亭上幾傾行客酒。遊人自唱少年辭。百年回首皆陳迹。浮世飄零亦可悲。

九日獨遊懷故人

故人分散在天涯。九日登臨獨嘆嗟。人世光陰催日日。鄉閭時節自家家。風煙滿眼臨秋盡。鼓角荒城送日斜。取醉憑誰正烏帽。遣愁猶強插黃花。

夜



木落風高砧杵傷。孤城更漏入秋長。寒生疎牖人無夢。月過中庭樹有霜。報落梧桐猶隕葉。知時蟋蟀解親牀。年年多病渾無寐。靜對楞嚴一炷香。

春日

輝輝暖日弄遊絲。風軟晴雲緩緩飛。殘雪暗隨冰筍滴。新春偷向柳梢歸。可憐客鬢蹉跎老。每惜梅花取次稀。何事都城輕薄子。買驢酤酒試春衣。

探春有感二首

出城但怪風光老。草色蒼茫柳色深。煙樹遠浮春縹緲。風光不動日陰沉。芳郊未厭縈紆入。美酒何妨取次斟。羸馬青衫亦何事。一生空負野人心。

柳萼蒙茸待放綿。櫻桃新葉大如錢。深春冷落花殘後。寒食朦朧月淡天。獨坐每將詩作伴。遣愁安得酒如泉。傷心千里休凝望。城外東風草滿川。

暇日同孫畢二同舍遊李氏園亭

蕩蕩東風散客心。出門驅馬問園林。花房待暖徐徐放。柳色隨春旋旋深。城郭遠來無俗客。松篁深處有幽禽。主公留壁題詩句。應許騷人盡日吟。

暮春



夜雨輕寒拂曉晴。牡丹開盡過清明。庭前落絮誰家柳。葉裏新聲是處鶯。白髮生來如有信。青春歸去更無情。便當種秫長成酒。遠學陶潛過此生。

將至壽州初見淮山二首

浩蕩平波欲接天。天光波色遠相連。風鳴兩槳初離浦。岸轉青山忽對船。澤國秋高添氣象。人家南去好風煙。步兵何必江東走。自有鱸魚不直錢。

晚繫孤舟古岸隈。蒹葭風定渚鷗回。山兼野色蒼茫去。月向淮心晃蕩來。秋色解將愁並至。年華偏與客相催。青衫手板徒勞爾。富貴功名安在哉。

將別普濟二首

老松疎竹寺門幽。九月輕寒襲客裘。漠漠淮煙天際晚。蕭蕭山雨坐中秋。風前紅葉知時落。籬下黃花對客愁。爲語老僧無我笑。此生終待老林丘。

孤城淮北晚鐘殘。落日橋邊送客鞍。物外樓臺秋更豁。山深松竹晚多寒。窗風細細侵衣冷。簷雨蕭蕭到夜闌。佳境欲留嗟不可。塵埃蹤跡但悲歎。

發泗州

萬艘獵獵戰風桅。我亦孤舟別岸隈。漠漠曉雲生木末。蕭蕭飛雨送帆開。消磨歲月書千卷。零落江湖酒



一盃因病得州真。漫爾功名於我亦悠哉。

夏日雜興二首

牆下溪流清且長。夾溪喬木雨蒼蒼。裊風翠果擎枝重。照水圓荷舞葉涼。蝸殼已枯黏粉壁。燕泥時落污書牀。南山野客閑相過。贈我能攜藥滿筐。

蔬圃茅齋三畝餘。溪光山影動浮虛。病妻老去唯尋藥。稚子年來解愛書。中散無堪心放蕩。馮君已老興蕭疎。全真養素安吾分。敢謂軒裳不我如。

送楊補之赴鄂州支使

相逢顧我尙童兒。二十年來鬢有絲。涕淚兩家同患難。光陰一半屬分離。扁舟又作江湖別。千里長懸夢寐思。何日粗酬身世了。卜鄰耕釣老追隨。

送楊念三監簿侍行赴鄂渚

楚天南去水冥冥。鄂渚悠悠到幾程。京洛信稀千里隔。江湖春盡一帆輕。莫辭送別青春滿。會是相逢白髮生。飽讀詩書取卿相。不應如我老無成。

寄榮子雍二首

東風三月洛陽城。傾蓋相逢氣倍增。看盡園花方信馬。飲斜樓月更挑燈。年光飄忽雙馳轂。心事蕭條一



老僧酒病年年慵把筆。新文寄我苦憑陵。  
家家新酒滴新醅。殘歲崢嶸春欲回。霜野寂無新到雁。雪林寒有欲開梅。關河路永雙橫轍。天地身閑一  
舉杯。酬答風光千點淚。怯將愁眼更登臺。

陳履常惠詩。有曾門一老之句。不肖二十五歲。謁見南豐舍人於山陽。始一書而褒。與過宜陽。  
有同途至亳之約。未以病不能如期。後八年始遇公於京師。南豐門人唯君一人而已。感舊  
慨歎。因成鄙句。願勿他示。

南豐塚木已蕭蕭。猶有門人守一瓢。文彩自應傳壺奧。典刑猶可想風標。紛紛但見侏儒飽。寂寂誰歌隱  
士招。十載弊冠彈未得。簪纓知復爲誰彰。君知己甚多。未聞特  
達之薦。可無嘆耶。

泊舟候水

一水悠悠斷復連。卸帆終日小灘前。青旂招飲篙工醉。五兩欹風賈客眠。樹色遠分芳草路。鳥行斜斷夕  
陽天。漁舟慣伴危檣宿。饋我霜鱗不用錢。

同李十二醉飲王氏牡丹園二首

東風窮巷只埃塵。誰見城南萬朵新。不問主人聊一飲。爲攜佳客送餘春。比君意氣三年老。貸我疎狂一  
味真。醉裏尙能馳馬去。看君倒著接籬巾。



吹盡紛紛桃李塵。天香國豔一翻新。正過穀雨初晴日。分得西都太半春。舊態似推新艷好。紅芳不似淡粧真。予嗟久得丘園意。何日相逢一幅巾。

晝臥懷陳三時陳三臥疾

睡如飲蜜入蜂房。懶似遊絲百尺長。陋巷誰過居士疾。春風正作國人狂。吟詩得瘦由無性。辟穀輕身合有方。欲餉子桑歸問婦。一瓢過午尙懸牆。

將至海州明山有作

望望孤城滄海邊。好雲深處是人煙。鳥飛山靜晴秋日。水闊人閑熟稻天。旂影遠搖沽酒市。棹歌歸去隔村船。功名富貴非吾事。誓斷明山數畝田。

秋日登海州乘槎亭

海上西風八月涼。乘槎亭外水茫茫。人家日暖樵漁樂。山路秋晴松柏香。隔水飛來鴻陣闊。趁潮歸去櫓聲忙。蓬萊方丈知何處。煙浪參差在夕陽。

屋東

蒼鳩呼雨屋東啼。麥穗初長燕子飛。竹裏人家鷄犬靜。水邊官舍吏民稀。溪聲夜漲寒通枕。山色朝晴翠染衣。賴有西鄰好詩句。賡酬終日自忘飢。



題齋壁

松庭日午聽啼鶯。簾外人稀睡老鈴。已歎近秋添白髮。更因多病讀黃庭。江魚未上烹難致。江魚未上。則不漁。丹。絕無魚。吳酒空斟醉易醒。好住安心莫惆悵。此身天地一浮萍。

己卯十二月二十日感事

蹉跎流落已華顛。又見荆湖一歲遷。人怯苦寒愁日短。天收殘臘放新年。園林寂歷飄梅後。里巷經過爆竹前。自料知非猶得在。潛心久學衛蘧先。

未將之臨淮旅泊泗上屬病作迎候上官不敢求告北歸尤劇疎拙無以自振但自憫歎耳  
謀身不解免飄蓬。零落孤舟西復東。雙鬢雖青應早白。病顏更醉不成紅。崎嶇避俗人難合。憔悴多愁疾易攻。蓴菜碧鱸秋正美。步兵終欲向江東。

望龜山二首

淮上風高寒日西。龜山嶺下山雲歸。游人苦恨日已晚。青山自與雲爲期。輕舟漁子犯煙去。照水白鷗窺影飛。人間不作逍遙客。老又塵埃空滿衣。  
日落看山山更青。原頭啼鳥已春聲。可憐山近不能到。盡日與山相對行。雲裏人家自來往。天邊樓閣遠分明。白鷗不解游客意。驚起碧煙深處橫。



次韻答存之

環堵蕭然汝水隈。孤懷炯炯向誰開。青春不覺書邊過。白髮無端鏡上來。祭竈請鄰聊復爾。賣刀買犢豈難哉。故人休說封侯事。歸釣江天有舊臺。

離天長寄周重實

相逢握手便忘形。射策天門盡弟兄。浮世有誰尊道義。青衫自笑爲功名。高談未盡胸中意。作別猶如夢後驚。半夜扣門投野寺。天寒孤月更分明。

題堂下桐

零落當軒兩樹桐。秋來相伴一衰翁。寒枝向月空餘影。隕葉知時不待風。故國山川天黯淡。美人音信雁西東。歲華節物俱寥落。滿眼牢愁賴酒攻。

登海州城樓

城外滄溟日夜流。城南山直對城樓。溪田雨足禾先熟。海樹風高葉易秋。疎傅里閭詢故老。秦皇車甲想東游。客心不待傷千里。檻外風煙盡是愁。

秋日憶家

汨汨流光長遠客。年年秋至是離家。孤城入夜寒更迴。霜月滿天歸夢賒。撼撼老桐風後葉。娟娟疎菊雨



殘花。茅簷布被猶無力。長走塵埃真可嗟。

七言

飛鴻歸盡燕將還。亭院深沉人倚欄。斜搭鞦韆寒食雨。已黃楊柳暮春寒。密裝杏萼紅如糝。半落梅花香未殘。人世年年非舊事。感時唯有淚沈瀾。

京師廢宅

當道朱門白晝扃。高堂歌吹久無聲。古窗積雨昏殘晝。朽樹經陰長寄生。門下老人時洒掃。舊時來客歎平生。艷姬驕馬知何處。獨有庭花春自榮。

登城樓

沙雨初乾巾褐輕。獨披衰蔓步高城。天晴海上峯巒出。野暗人家燈火明。歸鳥各尋芳樹去。夕陽微照遠村耕。登樓已恨荊州遠。況復安仁白髮生。

送泗州推官王永年致仕還鄉王年四十而致仕士大夫所少也

爲憶田園便拂衣。休官退勇似君稀。塵埃擺脫青衫去。閭里驚嗟白髮歸。南畝稻粱仍歲熟。舊山芝朮入秋肥。百年從此皆閑日。寄語人間浪是非。

和卽事



溪如圓塹木如城。魚鳥從遊信此情。啅雀踏枝飛尙裊。仰荷承雨側還傾。彈琴廢久重尋譜。種藥多求旋記名。于世久判無妙策。直應歸學老農耕。

自海至楚途次寄馬全玉

迂疎懷抱獨君知。杖拂親依卽我師。一句未能參妙道。數篇空復得新詩。子方奮迅雲間翮。我厭追隨世上兒。安得巖垆兩如志。銅餅烏几爲君攜。

蕭蕭柳岸野風秋。虹挂前山晚雨收。回首孤城空綠樹。滿川斜日放歸舟。年來雙淚供愁盡。老去勞生幾日休。試問故人思我否。夢魂猶在海邊州。

高城欲去更徘徊。病眼登臨強一開。風物盡爲愁裏景。山川疑是夢中來。此生雙鬢何勞白。未老塵心可得灰。欲把煩愁付盃酒。祇應清夢待尊壘。

生涯飄泊一航輕。浩蕩晴川送我行。北望山川連海壯。南來風月近淮清。人家稻熟豐年滿。澤國天高秋意生。唯有羈愁消不得。登臨清淚落如傾。

蕭蕭晚雨向風斜。村遠荒涼三四家。野色連雲迷稼穡。秋聲催曉起蒹葭。愁如夜月長隨客。身似飛鴻不記家。極目相望何處是。海天無際落殘霞。

夏日三首



長夏村墟風日清。簷牙燕雀已生成。蝶衣曬粉花枝午。蛛網添絲屋角晴。落落疎簾邀月影。嘈嘈虛枕納溪聲。久判兩鬢如霜雪。直欲樵漁過此生。

黃簾翠幕斷飛蠅。午影當軒睡未興。枕穩海魚鑄紫石。扇涼山雪畫青絳。廊陰日轉彫欄樹。坐冷風生玉盃冰。滿案詩書塵蠹甚。故應疎懶過炎蒸。

棗徑瓜畦經雨涼。白衫烏帽野人裝。幽花避日房房斂。翠樹含風葉葉涼。養拙久判<sub>平</sub>藏姓字。置身安事巧文章。漢庭卿相皆豪傑。不遇何妨白髮郎。

和晁應之大暑書事一首

蓬門久閉謝來車。畏暑尤便小閣虛。青引嫩苔留鳥篆。綠垂殘葉帶蟲書。寒泉出井功何有。白羽邀涼計已疎。忍待西風一蕭颯。碧鱸東鱸意何如。

遣興次韻和晁應之四首

老去詩書倦討論。一尊相對尙慇懃。鍛鑪放蕩狂中散。書閣蕭條老子雲。要路交親嗟隔闊。他鄉耆舊飽知聞。衰遲多病頭風甚。解寄斯文獨有君。

西風淅淅滿征衣。天畔危亭面翠微。雲解映山常漠漠。葉知辭樹亦依依。苦飢黃鵠猶謀食。無事輕鷗得遠飛。落日秋風滿江漢。杖藜三嘆未能歸。



夜泛孤舟清洛津。宓妃輕步若爲親。清涵星漢光垂地。冷覺魚龍氣近人。鏡裏悲秋雙鬢髮。馬邊隨客兩京塵。愁心欲比東流水。袞袞無窮日日新。

蓬門烏雀啗黃昏。歸逕牛羊各有羣。水闊蛟龍陰後出。山空虎豹夜深聞。西來谷引秦川雨。南去秋連楚澤雲。唐漢廢興無處問。西風禾黍但丘墳。

自巴河至蘄陽口道各得二詩示仲達與秬同賦

落月娟娟墮半環。嘔鷗鳴櫓轉荒灣。東南地缺天連水。春夏風高浪卷山。旅食每愁村市散。近秋已覺暑衣單。自慙老病心兒女。三日離家已念還。

浩浩渾流卷白沙。中流鼓楫四無涯。喜逢山色開眉黛。愁對江雲起砲車。雨足川原豐稻菽。日斜鷗鷺滿蒹葭。長年怕作扁舟客。賴有高談一笑譁。  
舟人占雲若砲車起。輒急避。乃大風候也。驗之信然。

離富池望廬岳是日入夾口直達潯陽遂舍大江之險示同行

山秀江清三百里。與君三宿一扁舟。飲殘桑落溪雲暮。臥冷桃笙楚雨秋。舟隱長江逢夾口。眼明五老立雲頭。幾年澤國行將遍。歸與親朋說舊遊。

二十三日卽事

已逢斌媚散花峽。不怕艱危道士磯。啼鳥似逢人勸酒。好山如爲我開眉。風標公子鷺得意。跋扈將軍風



斂威到舍將何作歸遺。江山收得一囊詩。

渡洛因泛舟東下數里頗憶淮上

汙汙清洛轉山隈。渺渺東流不復回。輕鳥竟隨青嶂去。亂波爭泛夕陽來。偶驚舟楫鄉心起。乍脫塵埃病眼開。疑是盱眙郭門外。月明帆席過清淮。

縣齋

只合門如野叟家。市朝聲利苦諠譁。但知得醉頻酤酒。何處逢春不見花。暗樹五更雞報曉。晚庭三疊鼓催衙。知君宰邑端無事。吟笑何妨到暮鴉。

和周廉彥

天光不動晚雲垂。芳草初長襯馬蹄。新月已生飛鳥外。落霞更在夕陽西。花開有客時攜酒。門冷無車出畏泥。修禊洛濱期一醉。天津春浪綠浮堤。

春日遣興二首

流光向老惜芳菲。搔首悲歌心事違。綠野染成延晝永。亂紅吹盡放春歸。荆榛廢苑人閑牧。風雨空城鳥夜飛。斷送一翻桃李盡。可憐桑柘有光輝。

日烘煙柳軟於絲。桃李成塵綠滿枝。芳草有情隨處好。落花無賴信風吹。關心傷感知何處。過眼芳菲能



幾時一病春來妨痛飲。遣愁唯有強裁詩。

遣興次韻和晁應之二首

日落村墟煙靄青。草根促織晚先鳴。羣山袞袞望中去。新月娟娟愁裏生。暗峽風雲秋慘淡。高城河漢夜分明。寄書故國還羞澀。白首蕭條老病嬰。露下風悲螢火流。周南羈客意悠悠。山川老去三年淚。關塞秋來萬里愁。慣逐魚禽諳異俗。每因霜月夢滄洲。一拋硯井雙蓬鬢。天畔詩成獨倚樓。

僦居小室之西。有隙地不滿十步。新歲後稍暖。每開戶春色鬪進。戲名其戶曰嬉春。因爲此詩。蒼蒼老檜已消雪。冉冉煙蕪欲鬪妍。圍得青春數畝地。斷將平楚一方天。春風入戶如相覓。新月低窗最可憐。老子婆娑便終日。一壺春酒與周旋。

發安化回望黃州山

流落江湖四見春。天恩復與兩朱輪。幾年魚鳥真相得。從此江山是故人。碧落已瞻新日月。故園好在舊交親。此生可免嘲僮父。莫避北風京洛塵。

離光山驛

郵亭結束問殘更。斜月西南雞未鳴。草草勞人常少睡。綿綿遠道苦無情。田家稔熟人情好。野路雨餘秋



氣清老得一州藏。拙去。鶴鸞臺閣盡豪英。

臥病月餘呈子由

風葉鳴窗已復朝。喚回歸夢故山遙。酒壺暗淡浮塵集。藥鼎青燐敗葉燒。閉戶獨依寒蟋蟀。移牀更就雨芭蕉。雪深欲請安心術。長日如年未易消。

謁太昊祠

千里垂精帝道尊。神祠近止國西門。風搖廣殿松杉老。雨入脩廊羽衛昏。日落狐狸號草莽。年豐父老薦雞豚。舊遊零落今誰在。塵壁蒼茫字半存。

上元思京輦舊遊

九門燈火夜交光。羅綺風來撲面香。信馬恣穿深柳巷。隨身偷看隔簾粧。身拘薄宦安知樂。心逐流年暗減狂。留滯山城莫嗟嘆。貂蟬從古屬金張。

春晚有感

洛川三月鶉鴉鳴。游絮縈空塵不驚。茸茸草色鋪風軟。點點楊花着水輕。何處浮雲度天末。不妨微雨破春晴。江南有客增歸思。悵望汀洲蘋芷生。

次韻張公遠二首



襄王坐上徵詞客。子建車前步永妃。瞥過低鬟流盼處。爭先含笑獨來時。東邊日下終無雨。闕上書時合有碑。腸斷吳王煙水國。扁舟何日逐鷗夷。  
平淡春雲捧額浮。秋光劍戟近人流。無腸可斷方爲恨。有藥能治不是愁。可待挑琴知有術。未傳驅豆更無謀。遙知添得春窗夢。尤在尊前燭下羞。

泊舟都梁亭二首

旅枕無眠客夢勞。五更傍舍一雞號。淮天水闊浮梁小。城郭霜晴寶塔高。梅鎖冷香通雀啄。水翻新綠出漁篙。君恩許作還鄉客。肯對江蘼賦廣騷。  
微春已動陳根綠。晴日初流大澤澌。客路苦寒唯飲酒。老年便暖屢添衣。霜林背日梅遲拆。冰渚知春雁早飛。江上三年陳迹在。年年穿竹摘梅時。

都梁雪天晚望

浮梁淮面欲龍騰。金碧浮屠間玉層。古岸蕭條風卷雪。長河咽絕水浮冰。留連淮汴殘年客。蹭蹬塵埃一老僧。聞道都梁梅未拆。可隨桃李畏嚴凝。

舟中書事

久客益知行路難。鏡中雙鬢不須看。山川積雪堅冰地。舟楫長淮古汭間。餽費主人勤俗禮。書來故里勸



加滄北歸漸踏塵埃道。盡日危亭且看山。

讀黃魯直詩

江南宿草一荒丘。試讀遺編涕不收。不踐前人舊行迹。獨驚斯世擅風流。一尊華髮江邊客。萬里黃茅嶺外州。虎豹磨牙九關邃。重華可訴且南遊。辛巳歲。魯直見余黃州江上。

離山陽入都寄徐仲車

孤城芳樹碧層層。村落黃昏只見燈。回首事如前夕夢。出門心似下山僧。仕求行道時難偶。意欲謀閑力不能。寄語東臯多釀酒。待余歸日解行滕。

題淮陰孫簿壁

荒涼官舍對淮流。樽酒相逢爲少留。夾道老椿鴉哺子。隔牆芳草牧呼牛。渡頭人散前村市。天際帆來何處舟。自古詩人最多感。新篇應解寫騷愁。

宿泗洲戒壇院

樓上鳴鐘門夜扃。風簷送雨入疎櫺。老僧坐睡依深壁。童子持經守暗燈。千里塵埃長旅泊。五年憂患困侵陵。誰知避世天然子。一見禪翁便伏膺。天然丹霞也。

宿柳子觀音寺



黃塵滿道客衣穿。古寺荒涼暫息肩。倦體臥來便穩榻。汗顏濯去快寒泉。野僧治飯挑蔬至。童子攜茶對客煎。夜久月高風鐸響。木魚呼覺五更眠。

己未早春有感

南國柳黃鶯未知。人情何事恨春遲。雪抽宿麥晴來葉。雨長枯榆燒後枝。載酒有誰尋寂寞。受薪只合學支離。近知壁觀安心法。亦擬平治不作詩。

同袁思正諸公登楚洲東園樓

杖藜蕭颯對雲沙。白首逢春只歎嗟。身老易傷千里日。眼驚還見一年花。地平曠野連雲直。天帶清淮向海斜。尚有風光供醉筆。我生詩酒是生涯。

同周楚望飲花園

杖藜攜手踏青苔。蕭洒池亭爲客開。柳色漸經秋雨暗。荷香時與好風來。斜陽似欲粧詩句。新月邀將入酒杯。身世已甘長寂寞。忘形賴有子徘徊。

赴官壽安泛汴

西來秋興日蕭條。昨夜新霜緝縑袍。開遍菊花殘藥盡。落餘寒水舊痕高。蕭蕭官樹皆黃葉。處處村旗有濁醪。老補一官西入洛。幸聞山水頗風騷。



寄蔡彥規兼謝惠酥梨

洛川北岸錦屏西。竹樹蕭蕭面翠微。風月有情常似舊。山川信美不如歸。文章送老甘無用。魚鳥從游久息機。寄語長安倦遊客。年來何事素書稀。

三鄉懷古

清洛東流去不還。漢唐遺事有無間。廟荒古木連空谷。宮廢春蕪入亂山。光武祠連昌宮南陌絮飛人寂寂。空城花落鳥關關。登臨幾度游人老。又對東風鬢欲斑。

水軒書事招壽安僚友

官閑不覺簿書勞。一簟清風午枕高。靜拂小屏圖女兒。就書新竹記離騷。城空鬪雉孤飛健。柳暗雛鷺學語嬌。東縣官曹誰過我。欲酤村酒具山庖。

官舍歲暮感懷書事三首

衙鼓寥寥送夕陽。經時無客上高堂。淵明柳老秋多雨。子敬氈寒夜有霜。山樹葉稀晴摘果。齋爐灰暖曉焚香。經綸自有英雄在。閑散須教屬漫郎。

脩竹高槐交映門。公居瀟灑近山雲。醉眠多似陶彭澤。官況貧於鄭廣文。秋菊擣麈供曉餌。寒松收子和香焚。經年門巷無車馬。只有清風伴此君。



霜菊娟娟尚有花。蕭條廳樹暮啼鴉。萬竿脩竹開侯府。十里青山隱相家。麋鹿並遊諳野性。詩書相對是生涯。冷官自有貧中樂。敢向朱門肉食誇。

春陰

漠漠重雲向晚低。臘寒新去有餘威。風捎簷滴難開幌。潤引爐香易着衣。把酒自傾金錯落。探春誰汗錦障泥。山城冷落無歌舞。只有芳醪取次攜。

至日有感

一臥孤村兩見冬。獨搔華髮思無窮。荒山極目漫汗雪。老樹當庭晝夜風。佳節妻兒具樽酒。茅齋斟酌慰愁翁。未央曉賀瞻天冕。正在爐煙縹緲中。

歲暮福昌懷古

少年詞筆動時人。末俗文章久失真。獨愛詩篇超物象。祇應山水與精神。清溪水拱荒涼宅。幽谷花開寂寞春。天上玉樓終恍惚。人間遺事已埃塵。李賀宅。

永城道中

東行十日何所有。衰草白茅梁宋陂。天風官樹吹半折。欲雨野雲垂不飛。十年所遇半陳迹。千里獨愁懷所思。他日江湖片帆去。白頭青鏡久相期。



送曹子方赴福建運判

平生鄴下曹公子。家世風流合有文。橫槊尙傳瞞相國。紫髯不是畫將軍。詔書寬大民何怨。刺史威嚴吏合勤。好作楚詞更下俚。雲中一降武夷君。

和無咎二首

年芳經雨能幾許。客愁得暖不肯融。眼看乳鵲行已哺。手種小桃隨分紅。世情付睡莫涇渭。物態逢春無異同。清時賴是未禁酒。須惜紅紫轉頭空。愛酒苦無阿堵物。尋春那有主人家。未容黃蜂釀成蜜。已怕惡雨不容花。雲間明月誰可攬。海中蟠桃良未涯。浮名誤人不得脫。黑髮減來那復加。

雙槐晚秀三月一日初見新葉

東皇無處著繁華。亦復分張到我家。他日老蒼悲敗枿。今晨嫩綠出新芽。禿翁承弁纖纖髮。村婦縈鬟草草花。桃李蹊中人迹絕。綠陰門巷正藏鴉。

秋思

故帷陳迹生蛛網。古殿苔深疊綠繒。簷雨晚秋鳴槁葉。窗風深夜觸孤鐙。

送李十之陝府



斷蓬泛梗偶相依。一別重逢又幾時。人世悲歡消遣盡。爲君流淚忽沾衣。

余向集賢殿試罷。寓居京師常游西岡。錢昌武郎中之第。時同會者。河東柳子文。與錢氏三子。夏中余出京。今纔半年。而昔日所游者。或東或西。有不知所如者。古人所謂俯仰之間。已爲陳迹者歟。夫求昨日之我於今日。終其身而不得。而況偶然相值。聚而旋散者歟。追記春睡詩一首。乃寓錢第所爲者。

東風冷峭着衣寒。雲影陰沉美睡天。青杏園林花落盡。晚風吹雨溼鞦韆。

### 上元都下二絕

淡薄晴雲放月華。晚粧新暈臉邊霞。管絃樓上爭酤酒。巧笑車頭旋買花。  
驕馬金鞭白面郎。雙鬟小女坐車箱。輪聲轆轤歸何處。留得紅籠絳臘香。

### 別錢筠甫三絕句

倦客無眠聽曉鐘。五更蠟燭淚銷紅。城西古寺同來處。今日分攜獨向東。  
春燈欲盡曉雞啼。殘月影中征馬嘶。爲語相逢不須喜。相逢終有道分離。  
原頭綠盡柳初芟。落月滿川風滿山。已過寺西三十里。爲君回首駐征銜。

### 田家二絕



門外清流繫野船。白楊紅槿短籬邊。旱蝗千里秋田淨。野秫蕭蕭八月天。  
新插茅簷紅槿籬。秋深黃葉已飛飛。灘頭水闊孤舟去。渡口風寒白鷺啼。

舟行六絕句

獵獵西風秋水清。野花寒草傍流生。沙邊水鶴待魚立。石底暗蛩先夜鳴。  
船尾初回轉野灣。波平天淨惜投竿。飛飛小蝶秋花晚。噴噴沙禽野水閒。  
落景秋雲晚不開。天寒古岸野船回。初驚波面微瀾起。已覺風前細雨來。  
渡頭風雨晚生寒。蓑笠漁翁坐釣船。爲問蓬中有魚否。一雙新鱖出籠鮮。  
天寒野店斷人行。晚繫孤舟浪未平。半夜西風驚客夢。臥聽寒雨到天明。  
渡頭煙雨欲昏天。灣畔枯桑繫客船。風打蓬窗秋浪急。一杯寒酒夜深眠。

題壽陽樓二絕

渺渺長淮去不休。行人獨上壽陽樓。一闋長歌不須唱。山川都是舊時愁。  
長淮不斷水悠悠。樓下行人淮上樓。誰謂滿前風景好。古今供作別離愁。

閱事說於予友隴西子。

太湖上絕句

風蕩雲容不成雪。柳偷春色故衝寒。湖邊艇子衝煙去。天畔青山隔雨看。



誰道原頭春未回。柳梢黃軟凍齊開。爭驚臘日嶢嶢盡。急問田翁乞野梅。  
自上元後閒作五首

閭闔樓南粉署西。舊時種柳長應齊。如今冷落窮山縣。臥聽春風百鳥啼。  
東風吹雨夜侵階。樓角長煙曉未開。何事舊時愁意緒。一翻春至一翻來。  
面冷春霜拂瓦乾。曉風吹雨凍闌干。柳梢黃弱梅苞破。更放東君幾日寒。  
燈火人家夜不收。三更明月過南樓。風煙隨處自能樂。何事客心還獨愁。  
喧喧野縣自笙歌。風捲高雲天似波。誰謂樓前明月好。月明多處客愁多。

寫情

牆外誰家桃李開。何由花下一徘徊。先教飛絮傳愁去。卻遣遊絲取藥來。

春詞

靄靄芳園誰氏家。朱門橫鎖夕陽斜。鳩鳴鵲噪閑庭館。盡日春風吹百花。

看花

風暖日高花氣動。鳴鳩乳燕自求羣。經營美景還詩匠。傾掃頑愁賴酒軍。

晚歸



學省歸來門巷秋。伴眠書史滿牀頭。低雲漠漠梧桐晚。屏上江山亦解愁。

傷春

浮雲冉冉送春華。怯見輕寒日欲斜。一夜雨聲能幾許。曉來落盡一城花。

元忠學士八兄未離京師遠蒙追送許惠服丹法託故竟未惠及賦四絕句

身逐孤舟似斷雲。故人追送尙慇懃。秋城夜泊西風岸。落葉悲蟲獨自聞。哀柝苦催空壁月。悲蟲真弔短檠光。無情少壯拋人去。只有窮愁氣味長。

昔見將軍破虎韉。事見歐集玉堂曾共掃千言。功名老去皆蹉跌。相見諄諄勸學仙。

無復顛狂似少時。逢君猶自說娥眉。玉堂舊事君休念。兩袖啼痕又送誰。

寓楚題楊補之官舍

一辭螭陛走天涯。客路悠悠老歲華。住久不知身是客。自來堂下採黃花。

傷春

嫩紫妖紅惜不得。亂隨風雨點蓬蒿。荒田野草花開晚。主管春光輸爾曹。

七月十六日題南禪院壁

秋林落葉已斑斑。秋日當庭尙掩關。掃榻晝眠聽鳥語。可憐身世此時閒。



絕句二首

照水輕明楊柳牙。隔林相映占巢鴉。東風香草城邊路。到處人家盡是花。  
淮上春風萬鼓聲。落帆舟泊岸邊磯。喧喧野市殘陽裏。酤酒攜魚客散歸。

雨後遊朱園

綠葉陰陰護翠枝。晚花雖小亦應稀。東風不惜殘桃李。吹作春愁處處飛。

雜詩

病腹難禁七椀茶。小窗睡起日西斜。貧無隙地栽桃李。日日門前自買花。

春雨中偶成二首

廉纖小雨作春愁。吹溼長雲漫不收。架上醅醱渾着葉。眼明新見小花頭。  
春陰只與睡相宜。臥聽鳴禽語復飛。一縷斷香浮不散。何人深院晝薰衣。

牆東

牆東椿老葉已盡。堂下菊叢無復香。長安風埃歲已晚。閉門不出馬毛長。

項城道中

塵壁蒼茫有舊題。十年重見一傷悲。野僧欲與論前事。自說年多不復知。



懷金陵二首

璧月瓊枝不復論。秦淮半已掠荒村。青溪天水相澄映。便是臨春閣上魂。會作金陵爛漫遊。北歸塵土變衣裘。芰荷聲裏孤舟雨。臥入江南第一州。

柳

永豐坊裏舊腰支。曾見青青初種時。看盡道邊離別恨。爭教風絮不狂飛。

晚春初夏絕句二首

少室山前日日風。望嵩樓下水溶溶。卷將春色歸何處。盡在車前榆莢中。睡足高簷春日斜。碾聲初破小龍茶。樓邊綠樹飛紅盡。春色牆陰老薺花。

謾呈無咎

題扇燈前亦偶然。那知別後遠如天。去年醉舞看花處。獨聽琵琶卻惘然。

泊楚州鎖外二首

襄王席上舊行雲。二十年間生死分。可惜風流一坏土。年年春草斷人魂。流落相逢二十年。羞將白髮對嬋娟。如何見我都依舊。添得尊前一惘然。

慈湖中流遇大風舟危甚食時風止遊靈巖寺



心悸西江浪似山。眼明僧舍一窗閒。從今要見廬山面。畫作屏風靜處看。  
觀魚亭呈陳公度

獵獵微風波面開。近人鷗鷺不相猜。尊前忽起扁舟興。新管江南山水來。  
紹聖甲戌侍立集英殿臨軒試舉人作此兩絕

春來小殿雪初殘。曉日曛曛未破寒。黃繖當軒公事退。君王緩步侍臣閒。  
弱歲干名翰墨場。春寒搖筆試西廂。茫然二十年間事。還着春衣侍玉皇。

題周文翰郭熙山水

洞庭葉落萬波秋。說與南人亦自愁。指點吳江何處是。一行鴻雁海山頭。

夜聞風雨有感

留滯招提未是歸。臥聞秋雨響疎籬。何當粗息飄萍恨。卻誦僧窗聽雨詩。

偶題二首

相逢記得畫橋頭。花似精神柳似柔。莫謂無情卽無語。春風傳意水傳愁。  
春水長流鳥自飛。偶然相值不相知。請君試採中塘藕。若道心空卻有絲。

青桐道中值雨凡數里舟行久之頗有江湖之思二首



繫馬操舟問檝師。卻疑淮口挂帆時。人間遷改何須問。便作江湖未可知。  
冥冥煙外鳥飛歸。野老得魚收網迴。隔浦斷霞沉欲盡。半彎新月出雲來。

福昌官舍後絕句四首

淮南梅柳想春還。怯去西州歲暮寒。唯有看山心未厭。晴明終日在闌干。  
無客門闌盡日扃。兩行喬木擁寒廳。吏胥借問官何在。流水聲中看竹行。  
臥聽堂南布穀鳴。隴頭細麥已青青。慙慙謝汝催春種。我爲無田豈懶耕。  
不掃竹根藏筍茁。旋培殘雪擁蘭芽。爲君更接櫻桃樹。付與春風換卻花。

無題二首

風槐已疎遽如許。夜蛩雖怨可若何。出門蹄道苔痕滿。隱几書塵鼠蹟多。  
晚起清秋一枕涼。四簷鳴雨下淋浪。竹籠焙藥時添火。書榻焚香卻閉房。

雪溪道至四安鎮

茗雪清秋水底天。夜帆燈火客高眠。江東可但鱸魚美。一看溪山直萬錢。

聞蛩二絕

晚風庭竹已秋聲。初聽空階蛩夜鳴。流落天涯聊自得。今宵爲爾感平生。



二年江海轉萍蓬。白髮蒼顏換舊容。新月窺簷風動竹。宣城今夜又聞蛩。

雨中題壁

去年此日泊瓜洲。衰柳蕭蕭繫客舟。白髮天涯嘆流落。今年對雨古宣州。

預作冬至

紫壇曾從奠琳琅。親被天人玉冕光。今日黃州山下寺。五更聞雁滿林霜。在皇帝禮席左。曾與捧策。見上冕玉簪。

白如雪。為燭所照。出光數尺云。

聽鳴禽

流滯江邊鬢已霜。又聞春鳥啁朝陽。他時北去懷陳迹。寒竹疎梅黃土岡。

曉雨

輕陰江上千峰秀。小雨墻邊百草生。惟有春禽慰孤客。曉啼渾似故園聲。

春蔬

新春書劍滯江城。又見南蔬入旅羹。關心太昊祠前路。小甲連畦帶雪青。余有蔬圃在陳州太昊祠南。

春日懷淮陽六絕

西城門外古壕清。太昊祠前春草生。早晚粗酬身計了。長為閒客此間行。



靈通禪刹古叢林。永日惟聞鐘梵音。閱世興亡千室佛。百年風雨古牆金。靈通院石晉末所創。有千佛殿。壁繪用金。

最愛南城汲井園。春來蔬甲不勝繁。人家斷處無鷄犬。遲日東風似古原。

黃巢寨南琵琶溝。古原芳草靜春流。大編舸。舸何處客。檣竿西北是神州。

莽莽郊原帶古丘。漸漸隴麥散羊牛。杏花楊柳春濃處。一片青帘慰客愁。

城中萬枝木芍藥。姚黃一萼得春多。日日踏春渾坐此。人間無醉奈渠何。

上元三絕句

清晨謁帝大明宮。拜賜歸來夜過中。余在祕書近十年。每歲上元晨。趨大慶門上。賜茶酒。拜謝退。率一二同舍。近午駕回。至夜

分。必醉歸。歲率為常。一夢十年身老矣。山城風月作過從。

酤酒壚邊人若市。算商亭下浪連天。張君官況今如此。豈有工夫作醉眠。

江邊燈火似秋螢。哀怨山歌不可聽。自怪今春牢落甚。禪房止酒讀黃庭。

春日書事

蟲飛絲墮兩悠颺。人意遲遲日共長。春草滿庭門寂寂。數樵窗日挂空堂。

柯山雜詩二絕句

幽人睡足岸綸巾。策杖開門卯酒醺。黃葉滿山烏鵲噪。江城秋日少人行。



蕭蕭茆屋土山前。翁媪關門去穫田。朝日滿簷雞犬靜。荻籬深處有炊煙。

絕句九首

天高列岫出林外。霜落大江流地中。晚日橋邊數歸牧。牛羊部分聽兒童。  
樹頭三唱雞賓日。門外斜行雁寄書。十月江城霜霰薄。滿山林葉亂藍朱。  
曉起山鴉噪作團。西園霜木倚空寒。風高斷雁呼前伴。雨止歸雲赴舊山。  
千林黃葉摠飛霜。寂歷疎梅未肯粧。誰信輪囷臥山木。心知九地有微陽。  
空山風雨冷蓬茅。晨起幽人理緼袍。深閉衡門且無出。濕雲如墨怒江號。  
老去不禁茶力悍。兩甌破盡五更眠。月團三百真魔物。欲乞當壚當酒錢。  
讀書老眼苦眠昏。茗飲無端遣夢魂。到處相逢真可喜。祇應酒是好知聞。  
黃葉桑林赤土岡。蓬茅小逕度牛羊。似聞流宄之唐汝。歎息何人爲發倉。  
歲弊寒驕風落山。臥聽園木怒濤翻。去年慈德門東雪。永夜宮廊喝探暄。  
數十鋪。直廡官吏。達旦不能寐。

黃累年旱飢流民就食唐汝。去年春大雪中。予以禮官奉欽聖喪事。入宿內東門。凡

齋中列酒數壺皆齊安村醪也。今日亦強飲數杯戲成絕句奉呈爾老昆仲

曾嘗玉帝碧琳腴。不醉長安市上酤。作史官時歲節賜御醪飲濕先生今已矣。啜醪留得與門徒。東坡三年黃州城



臘月下旬偶作

歲暮煙霜澤國寒。曉鴉鳴處是柯山。地爐有火尊餘酒。自起焚香深掩關。

二月二日挑菜節大雨不能出

久將菘芥芼南羹。佳節泥深人未行。想見故園蔬甲好。一畦春水轆轤聲。  
北方治菜畦如茶枰。次第相及。殊可觀也。

也殊可觀也。

寒食日作

荒山野水非吾土。寒食清明似去年。楊柳插門人競笑。吳夷不信子推賢。  
黃岡有官人效北方以麩作子推貫柳插門上者邦人怪之。

東堂初寒創意作竹屏障門。屏腳偶得朽梅株截用之。完固質野有可喜者二首。

丈室新幘用此君。  
如用鄮子之用。碧琅玕插古槎根。白雲一片當空下。護此寒堂宴坐人。

簡册林中老蠹魚。年來窮謫尙耽書。竹幘風下憑烏几。畫作柯山居士圖。

地爐

歲陰慘澹不可出。竹榻地爐聊自安。黃葉滿山籬落晚。北風吹雨溼荒寒。

久雨

欹簷積雨苔生瓦。陋巷人稀泥及門。坡下牛羊來遠墅。舍傍麻糝接荒村。



秬移宛丘牡丹殖畦竇齋前作絕句示秬秸和

千里相逢如故人。故栽庭下要相親。明年一笑東風裏。山杏江桃不當春。

余元祐六年六月罷著作佐郎除秘書丞。是歲仲冬復除著作郎兼史院檢討。復至舊局題屏。庭樹應知我相逢益老蒼。別來秋苦雨。但見瓦松長。









# 具茨集鈔

晁冲之字叔用。初字用道。舉進士。與陵陽喻汝礪爲同門生。少年豪華自放。挾輕肥游帝京。狎官妓。李師師纏頭以千萬。酒船歌板。賓從雜遝。聲豔一時。紹聖初。黨禍起。羣從多在黨中。被謫逐。遂飄然棲遁。于具茨之下。號具茨先生。十餘年後。重過京師。憶舊游。作無題詩二首。爲時所傳。時諸公謀欲用之。高挹不顧。至疾革。取平生所著。曰是不足以成吾名。悉焚之。故其詩不多。呂紫微位之江西派中。云衆人學山谷。叔用獨專學杜詩。衆求生西方時。秀實獨求生兜率。然又云叔用嘗戲謂我詩非不如子。只子差熟耳。答云。熟便是精妙處。叔用大笑。此亦紫微多上人語耳。若其淵淳雅亮。筆有餘閒。未肯退下一格也。劉後村稱其意度容闊。氣力寬餘。一洗詩人窮餓酸辛之態。南渡後。惟放翁可以繼之。其見許如此。足爲雅鑒。

## 古樂府

大星何歷歷。小星爛如石。掖垣崔嵬橫紫微。十二羽林森北極。今夕何夕月欲沒。虎抱空關龍厭直。崢嶸北斗著地垂。手去瓠瓜不盈尺。嚴陵醉臥光武傍。浮楂正值天孫織。王良挾策飛上天。傳說空騎箕尾立。君不見茂陵棄子欲登仙。自將壯士終南邊。忽然遭窘出璽綬。歸來下詔除民田。阿瞞急示乘輿物。鮮卑



仍棄珊瑚鞭。又不見古來垂堂戒華屋。敵國挾輶戎接轂。白龍魚服誤網羅。孔雀金花被牛觸。

夷門行贈秦夷仲

君不見夷門客有侯嬴風。殺人白晝紅塵中。京兆知名不敢捕。倚天長劍著崆峒。同時結交三數公。聯翩走馬幾馬驄。仰天一笑萬事空。入門賓客不復通。起家簪笏一作筆明光宮。嗚呼男兒名重太山身如葉。手犯龍鱗心莫懼。一生好色馬相如。慷慨直辭猶諫獵。

陸元鈞宰寄日注茶

我昔不知風雅頌。草木獨遺茶比諷。陋哉徐鉉說茶苦。欲與淇園竹同種。又疑禹漏稅九州。橘柚當年錯包貢。腐儒妄測聖人意。遠物勞民亦安用。含桃熟薦當在盤。荔子生來枉飛鞚。羊薤異好亦何有。蚶菜殊珍要非奉。君家季疵真禍首。毀論徒勞世仍重。爭新鬪試誇擊拂。風俗移人可深痛。老夫病渴手自煎。嗜好悠悠亦從衆。更煩小陸分日注。密封細字蠻奴送。槍旗卻憶採擷初。雪花似是雲溪動。更期遺我但敲門。玉川無復周公夢。

贈僧法一墨

黃山之巔百尺松。虬枝偃蓋連羣峯。山神守護魑魅避。道人翦伐天爲容。捫崖蹠蹕篝火遠。絕壁晻靄凝煙濃。玄霜霏霏玉杵下。捕麋煮角當嚴冬。陰房風日不可到。律琯吹盡灰無蹤。小書細字著名姓。黃金照



耀圖雙龍。守臣再拜選進日。九關有詔開重重。老儒偶得實天幸。千金更買無由逢。上人澹泊何所好。工書草隸如飛蓬。苦來求我惜不得。一酬十載相過從。君不見玉堂詞人紫垣客。拜賜舞蹈黃羅封。長安紙價猶未貴。江南江北山皆童。

法一以余所贈墨爲不佳

上人好事世莫當。羅列四寶如文房。廣交往往得奇物。有墨尺度如圭長。秋麋折角膠與力。春麝入臍煤生香。已將雪覆輕羅帕。更令花映紅紗囊。草堂老人不自料。亦藏一餅誇精妙。自言和壁持贈君。反爲燕石遭譏誚。嗚呼萬事孰不然。古今工拙那同調。君不見當年諸李數不到。廷寬只今賜墨無老潘。

復以承晏墨贈之

我聞江南墨官有諸奚。老超尙不如廷珪。後來承晏復秀出。喧然父子名相齊。百年相傳文斷碎。彷彿尙見蛟龍背。電光屬天星斗昏。雨痕倒海風雲晦。卻憶當年清暑殿。黃門侍立才人見。銀鈎灑落桃花牋。牙牀磨試紅絲研。同時書畫三萬軸。大徐小篆徐熙竹。御題四絕海內傳。祕府毫芒惜如玉。君不見建隆天子開國初。曹公受詔行掃除。王侯舊物人今得。更寫西天貝葉書。

東陽山人僻居

我家京洛間。桂玉資薄產。平生丘壑心。水竹不滿意。清晨有客吳中來。山川指授收奇才。笑談長揖波浪



下。懷抱遠承一作陳巖穴開。東陽山人高華隱。豪俠持身復修謹。旁山多闢黍稷田。碧溪東流汲春醞。溪南一畝當翠微。秋風萼熟菰葉肥。龜魚上帶藻荇動。鷗鷺下拂芙蓉飛。亭陰野塘亦新築。溪山共作窗中綠。諸郎年少皆知書。子夜哦詩動修竹。歲時冠蓋如浮雲。擊鐘鼎食江淮聞。愛山自比謝康樂。好士不減春申君。我欲沿溪揚小楫。亭邊共醉藤蘿月。叩門夜訪君家時。扁舟重載山陰雪。

同魯山韓丞觀女靈廟前險石

君不見魯陽之西兩山麓。十里連岡寫平陸。青林白晝暗古祠。雀啅虛簷蛛網屋。屋邊怪石何瑰奇。鳳筋虎骨連肌肉。巉巖欲下落澗渚。瀕洞千鈞一毫屬。天匠惟知刻畫功。鬼力深憂護持哭。前峯高蹇下如揖。餘峰危慄皆俯伏。披尋宿莽得佳趣。窪爲溪壑呀爲谷。香爐佛迹不在外。仙掌蛾眉此其足。秀潤潛涵夏木清。空濛映帶春江綠。我知此必蘊靈異。何止懷藏易城玉。閨寂嗟來麋鹿游。孤峻幸免牛羊觸。自經千載禹刊鑿。不逢萬里秦驅逐。踟躕三遶回高岡。卻立下視雲蒼蒼。古今誰爲好事者。後有韓子前奇章。君不見玉川先生洛陽宅。脩竹蕭蕭獨爲客。它年如與鶴乘軒。可來相見銅駝陌。

題魯山溫泉

平生耳熟聞驪山。夢寐不到臨潼關。當年太液金井碧。溫泉宛在關山間。憶昔君來必十月。騎玉花驄帶風雪。太真獨侍沐浴邊。鯨甲龍鱗影清絕。五十年昇平一迷。卻驅萬騎出關西。自爲前朝同禍水。翻令後



代異廉溪。君不見汝海之南魯山左。亦有此泉名不播。征夫問路說湯頭。可憐是亦陳驚坐。

香山示孔處厚

我來南經幾山過。馬行似衝山色破。風煙席卷巖穴開。澗花縈迴水流左。懸崖彷彿聞松聲。下瞰幽深鳥飛墮。老夫它年有所歸。定結白茅依紫邏。日高下馬古寺卜。魚鼓欣聞脫清餓。道人碧眼照川谷。雲起盤陀藉高坐。殷勤勸我更莫歸。唳鶴啼猿亦相和。窗前笑喚祁孔賓。世間安用招魂些。

簡江子之求茶

政和密雲不作團。小夸寸許蒼龍蟠。金花絳囊如截玉。綠面彷彿松溪寒。人間此品那可得。三年聞有終未識。老夫於此百不忙。飽食但苦夏日長。北窗無風睡不解。齒頰苦澀思清涼。故人新除協律郎。交游多在白玉堂。揀牙鬪夸皆飫嘗。幸爲傳聲李太府。煩渠折簡買頭綱。

田中行

落葉如流人。遷徙不可收。嚴霜枯百草。清此山下溝。我行將涉之。脫屣笑復休。憮然顧籃輿。崎嶇反經丘。天風吹我裳。彼亦難久留。晚過柳下門。鳥聲上嘲啾。父老四五輩。向我如有求。邀我酌白酒。酒酣語和柔。指云此屋南。頗有良田疇。勸我耕其中。庶結同社游。吾母性慈儉。此事誠易謀。伯也久吏隱。可以吾無憂。請歸召家室。賣衣買肥牛。所望上帝喜。祈穀常有秋。



送王敦素樸

先君有六女。所託皆高門。季也久擇壻。晚得與子婚。子家望海內。實惟謫仙孫。筆也有家法。勢作風雷奔。結交多英豪。坐致名譽喧。憶昔識子初。河流出崑崙。中間一再見。騏驥始伏轅。去年接同居。底裏見所存。磊落忠義人。愛國憂黎元。使當元祐時。密勿與討論。上可參廊廟。下可裨諫垣。惜哉不遇知。白髮早已繁。卑官不可說。感激猶主恩。爛熳有歸期。繫舟古槐根。祖餞無酒食。贈遺請以言。子家鐘山下。隨事有田園。竹徑背古寺。草堂面江村。高軒納翠微。修筒引潺湲。林影散疎帙。山色搖酒罇。日飲建康水。時登謝公墩。沉酣左氏學。浩蕩極辭源。客至勿多語。欲吐且復吞。書來無忽忽。慰我別後魂。

紀愁

北風吹我裳。夏潦漂我屋。牛羊踐我稼。雀鼠耗我穀。雪寒墮我指。雨淫疾我腹。朝行桑榆間。秋序傷遠目。莫涉水之涯。含沙中兩足。攬轡馬病黃。伏軾輿脫轅。陟山旣見虎。還舍乃對鵬。一沐三握髮。十飯九不肉。先生昔離垢。居士今耐辱。飽聞戒畏塗。那知有沈陸。

和四兄雪夜韻

夏蟲不知冰。越犬不識雪。我獨冰雪間。肘見冠纓絕。青燈挂長檠。文字夜涉獵。問米米已無。問酒酒已竭。當時陶淵明。同日無此闕。置書忽不樂。面壁臥嘔噎。蟲犬兩不如。悲歌聊一發。



和十二兄五首

淵明詩百篇。無一不說酒。四顧宇宙間。獨與此物厚。子雲苦家貧。日給或亡有。艱難識奇字。草玄至白首。時時載酒來。尚乃好事友。吾足斯人徒。性亦嗜醇酎。寧知俗士嫌。益覺兒女醜。孰云醉無度。婉婉一作春月柳。區區布肉論。遲速同一朽。但看古聖賢。得如飲者不。

伯也今代豪。嗜詩如嗜酒。賦多轉遒勁。語老愈深厚。塵言刪不存。妙句元自有。白華忽補亡。關雎不爲首。墳麓起兄弟。珠玉到朋友。吟詠九日菊。沉酣八月酎。搜剔發清新。聯翩雜奇醜。詳味吁謨章。用意過楊柳。但使身愈窮。未信名可朽。不知造物意。令作清廟不。

崎嶇謫仙人。豪放一寓酒。平生韓荊州。未識意已厚。幙府強辟召。此例未見有。書幣入吾廬。鞍馬望隴首。出處計已熟。不復訊交友。南山別何時。氣尚若酣酎。籌策屈大才。談笑誅小醜。戍角斷落梅。羌笛起折柳。將軍意未快。戰士骨已朽。請公入參謀。可用和戎不。

先生翰墨英。揮灑每被酒。氣凌蒼柱穹。勢壓坤軸厚。俊拔今固無。妙絕古未有。驚鸞忽矯翼。犇馬時驤首。高步褚薛流。下視鍾王友。好事隨取之。所至具名酎。簡疎秦隸奇。譎怪夏篆醜。么麼張芝草。嫵媚元和柳。載觀碑籍存。尚恐金石朽。未知太極成。有請於公不。

我家溱洧間。春水色如酒。嵩少在吾旁。日夕意亦厚。田園雖不廣。幽興隨事有。藥畦灌陳根。芋區採駢首。



春郊餉耕徒。秋社接酒友。飽誦傳家書。促釀供客耐。益知簡易真。未媿疎拙醜。邇來居東都。物色不見柳。造次遇摧折。荏苒及衰朽。欲歸便可爾。未知公果不。

次韻集津兄會羣從王敦素宿王立之園明日西征馬上寄示諸人以道嘗監陝府集津倉

秋高訪幽居。風急桑未落。天寒雞犬靜。地僻門巷闊。主人避世賢。自說久棲泊。呼兒出罇罍。黎粟亦不惡。賓客四五人。談笑動林薄。夜闌慘無懽。離憂條中作。伯也天下士。千金輕一諾。揮斥楊墨徒。正是鄒魯學。如何但銀魚。生事了無託。惜哉桃李姿。見笑葵與藿。雞鳴驅車行。令人意參錯。

復至新鄉廨寄張穉

驅車出吾廬。落月猶在樹。我行欲何之。所以河源去。去去益以遠。炯炯不可論。羣語車鐸間。尙想兒女喧。稍涉原上路。漸見柳下村。霧草結宿露。風林散朝暾。悠悠望遽廬。我僕欣載犇。昔出日在畢。今出畢中昏。昔如水上鷗。今如檻中猿。所憂負平生。豈但感寒暄。明濟十里黃。漪漪見淇園。晚投伯氏廨。拓落復何言。周覽故時居。恸見松菊存。故侶未易招。且自置肴尊。

書懷寄李相如

秋風吹畦蔬。農事亦已闌。黃黃杞下菊。佳色尸冢間。我生復何如。憔悴嘗照顏。清晨戴星出。薄暮及日還。骯髒二十載。老髮羞儒冠。天末有佳人。秀擢如芝蘭。憮然念夙昔。風流得餘懽。緬想蒲柳姿。與君同歲寒。



一別事瓦裂。令人氣如山。

戲李相如攜婦還金鄉

舍人固多奇。奉壁登章臺。君王擊缶罷。將軍負荆來。長卿束髮時。亦復悅名字。一從臨邛游。心迹了不似。茂陵未得仕。要是才足依。高堂援哀琴。月出載婦歸。文君入成都。乃復愧四壁。晚見負弩來。良悔抱頸泣。效古別昭德羣從

十載一相逢。相見無浹旬。一生能幾別。且復無此身。昔別尙可惜。此別重惜之。兩髀跨鞍馬。非復少壯時。它人怪康強。自覺筋力衰。所苦氣如縷。所憂命如絲。死生亦大矣。而乃常別離。人生一月間。得笑無六七。朝爲衆狙喜。莫作枯魚泣。已矣泉下人。優哉冢中骨。

雪效柳子厚一作贈一兄上人

月落雞聲寒。曉色靜茅屋。開門驚不知。夜雪壓修竹。槎牙生新冰。鱗甲刻溪谷。晶晶洲渚明。冽冽川原肅。孤蹲雀不動。沉酣客猶宿。呼童晨汲歸。獨漱寒泉玉。

擬一上人懷山之什

中夜雪打窗。燈暗火照屋。袖手地爐火。餅聲起絲竹。憶我故山房。松風韻崖谷。山空牛斗寒。寺靜魚鼓肅。西塞鹿不歸。東嶺鶴獨宿。更想醉翁亭。兩峰高並玉。



傷心時籍潞公宅

沙路朱幡想馭軒。傷心歲月似星奔。平泉有墅空流水。綠野無人但繞垣。九老畫圖傳盛事。四朝書史載殊恩。如何坊者持錢過。已向比隣問子孫。

送惠純上人游閩

蚤聽閩人說土風。此身嘗欲到閩中。春溝一作春甌水動茶花白。夏谷雲生荔子紅。襟帶九江一作楚樹接。山不斷。梯航百粵一作連越嶺海相通。北窗夜展圖經看。手自題書寄一作索筆遠公。

次四兄以道韻效李義山雪

莫冬一丈長安雪。壯士臨風獨慨慷。門巷豈無騎馬客。江湖猶有捕魚郎。夜平蔡賊兵輕敵。曉入梁園賦擅場。載酒欲尋誰與飲。江梅頭白自悲傷。

次二十一兄季此韻

憶在長安最少年。酒酣到處一欣然。獵回漢苑秋高夜。飲罷秦臺雪作天。不擬伊優陪殿下。相隨于菟過樓前。如今白髮山城裏。宴坐觀空習斷緣。

和江子我竹夫人

黃藤白簟倦呼盧。高臥南窗示楮模。郭芍藥情元最密。鄭櫻桃迹近相疎。下帷度日甘同夢。隱几終年得



異書。晚向禪房陪杖屨。清秋霜霰意何如。

答韓君表

百年鄂杜家相近。人物凋零我獨驚。但見少陵能繼祖。不聞小陸可優兄。終朝詩賦逾仍鬱。老去文章健更成。敢擬濟河輕一戰。隱然望已一作望怯長城。

和葉甥少蘊內翰重開西湖見寄二首

使君重鑿西湖罷。也復封詩寄我來。洲上新題花鳥處。苑中舊體柏梁臺。風煙直覺鍾山近。魚鳥渾疑澗水開。揮翰玉堂還有日。行春停騎且留杯。

一麾偃蹇江湖去。五馬侵尋觀闕來。就日金波通漢苑。望雲玉澗斷蘇臺。自迎檝立看時渡。近聞買妾手種花行到處開。笑語風流韓別駕。莫令鸚鵡訴餘杯。

和寄葉甥少蘊內翰見招

翰林赫奕今如此。莫道人惟舊雨來。龐老終身遠州府。劉郎何面向春臺。八兄常言少蘊亦欲見招園宜杏子非時結。溪闊梅花過日開。兩地聲聞無百里。相望一覆手中杯。

次韻再答少蘊知府甥和四兄以道長句并見寄

錦袍昔是詩成得。別墅今非棋賭來。山蔚藍光交抱舍。水桃花色合圍臺。通人竹塢深深入。謝客松扉遠



遠開定與西湖爭勝負。只應惟欠使君杯。  
塵埃自與青雲斷。歲月誰令白髮來。數口無歸關外客。一春多病望中臺。常閑水上鷗從遠。只老籠中鶴  
任開。日日避愁無處脫。直須到手不停杯。

復和少蘊內翰甥兼謝伯蘊通判兄再贈

西湖波浪還佳色。風物悲人老可驚。游接竹林公對叔。夢迷春色我思兄。酒沾鸚鵡杯行盡。前與伯蘊兄  
詩。常有鸚  
戲。杯之詩傍蟾蜍研立成。壯思不逢韓吏部。高名誰伴謝宣城。

復用韻

史奏德星今復聚。鄉評月旦昔何驚。潁川人望須公守。荀氏家聲付此兄。湖影龜魚同聚散。棠陰燕雀半  
生成。若為修禊無絲竹。古調新詩唱渭城。少蘊新作木蘭花詩。奇絕。

次韻集津兄懷嵩少示王立之

早聞三十六峰前。願寄茅茨一澗邊。谷轉馬蹄山繚繞。巖開虎口樹嬋娟。陽坡日煖宜瓜地。陰嶺天寒熟  
芋田。便好與公相隱去。不宜相對尚茫然。

睡起

素屏紋簟徹輕紗。睡起冰盤自削瓜。風笳微微開綠籜。雨槐細細落黃花。經營薄產初無意。補葺疎籬漸



有涯待得高秋尋靖老。臨流坐石問丹砂。

贈山人沈廣漢

禪房白几靜無塵。野服黃冠意甚真。避世全生深得策。閉門謝客亦高人。忍情斷酒非關病。隨意收書不計貧。近約嵩陽陳叔易。趁移丹竈過殘春。

都下追感往昔因成二首

少年使酒走京華。縱步曾遊小小家。看舞霓裳羽衣曲。聽歌玉樹後庭花。門侵楊柳垂珠箔。窗對櫻桃卷碧紗。坐客半驚隨逝水。主人星散落天涯。春風踏月過章華。青鳥雙邀阿母家。繫馬柳低當戶葉。迎人桃出隔牆花。鬢深釵暖雲侵臉。臂薄衫寒玉映紗。莫作一生惆悵事。鄰州不在海西涯。

送僧歸建州

清秋顚汝歸時晚。不及羣公送惠休。曲几數行題字別。扁舟幾日爲詩留。東吳楊柳雲中渚。南越梅花雪外洲。萬里故鄉聊一到。江山風物往來游。

送王敦素樸

龍蟠山色引衡廬。霜落江清影碧虛。鼓枻厭騎沙苑馬。行厨欲食武昌魚。緩歌玉樹翻新曲。趣入金鑾續



舊書官達故人稀會面。君來相見肯如初。

再至徐州示諸弟

去年客徐得范子。今年客徐不得人。斷無草木與同味。宛有魚鳥來相親。南尋白門傍山麓。西望黃樓行水濱。還家作詩示羣從。早晚一遊攜二陳。

留別江子之

盡室飄零去上都。試於溱洧卜幽居。不從刺史求彭澤。敢向君王乞鏡湖。平日甚豪今潦倒。少年最樂晚崎嶇。故人鼎貴甘相絕。別後君須寄一書。

別昭德弟愴然傷懷

吾廬去汝到何期。四十年間此別離。合抱樹元從舊種。幾叢菊始自新移。老無兄弟飄零日。遠有公卿曠絕時。努力不思勤負米。欲求三徑可從誰。

客有駑馬不肯借作詩誚之

胡兒少欲立奇功。貴買西宛玉面驄。金躩蹠微鳴躡影。錦連乾不動追風。庭槐洗立清陰下。沙路調行返照中。出郭借人乘豈肯。自誇騎入大明宮。

別飾道二十弟



飄零南北一衰門。知是澶淵五世孫。嗟我獨無兄弟在。憐君尙有典刑存。老身素苦貧常瘦。病日仍緣哭  
轉昏。它日汝歸馳駟馬。訪吾肯過浣花村。

自然詩并序

七里先生江子我。築土三尺名曰自然亭。余謂先生不獨有亭。亦有自然箕斗。自然絲麥。凡亭之內。服  
食器用。無不自然者。先生可謂自足者也。雖然。無乃多虛少實乎。子我掀髯大笑。余欣然賦之。  
先生手不廢經營。白屋憑虛結此亭。燕麥兔絲侵密坐。南箕北斗挂疎櫺。青松夾日交傾蓋。翠柏分風倚  
列屏。莫道君家無長物。案頭燈火有流螢。

敦素有以書局處之者作詩迎之

君王側席訪詞臣。萬里江湖賀子真。翰苑向來非此老。道山何處得斯人。朝回金馬門前曉。宴罷銅駝陌  
上春。底事年年最如意。春風還試綵衣新。

寄王立之

臘雨城南宅。衝寒憶屢陪。拊憐庭下石。問訊竹間梅。諸子鷹門立。羣公跋馬回。不知多病後。誰與倒樽罍。  
避暑普淨院

天矯柏如龍。清陰闕一宮。庭無御史雨。門有大王風。今日名天下。羣公坐此中。阿戎相就語。歷歷見元豐。



僧舍小山

此老絕蕭灑。久參曹洞禪。胸中有丘壑。左手取山川。樹小風聲細。巖深日影圓。江湖不歸客。相對一茫然。愛此聚沙戲。知自法王孫。一運郢斤手。都無禹鑿痕。藤梢未挂壁。荷葉欲生盆。笑問山陰道。潛通何處村。爛石有佳色。禪房疊更幽。九疑峰不斷。十字水長流。枕簟日逃暑。軒窗時臥遊。吾衰更何往。只此對湯休。

寄江子之

平生江季子。疎懶近忘吾。不啻三年別。如何一字無。燒丹岫嶼令。釀酒步兵厨。二者將安擇。功名莫浪圖。初來東里

乘流從此去。河漢失清都。送騎沙邊散。征帆雨外孤。挾雌棲隴雉。生子哺巢烏。宇宙將焉往。飄飄盡畏途。至東里次前韻

茂陵家四壁。不必在成都。老矣招魂苦。傷哉問影孤。市中寧有虎。屋上豈無烏。四海皆行路。吾何必此途。和四兄以道閒居感歎有作

掩卷忽不樂。捫心空浩歎。家聲畏淪墜。世態屬艱難。月倒迎門屣。風彈挂壁冠。蕭然對孤竹。一笑共衰殘。復次韻

出門吾所嬾。無客亦何歎。舉世遽如許。孤風良獨難。荒蕪蔣詡徑。破敝晏嬰冠。興發看山去。書籤記讀殘。



再至都城

崢嶸花萼西。清曉望猶迷。御路紅塵合。宮槐碧瓦齊。夾城知輦過。複道覺香低。中使傳宣入。千門避馬蹄。

送僧

無端伏枕日。不見放舟時。晚得平安報。初成送別詩。山深歸履急。江闊度杯遲。定許同香火。終參惠遠師。

秋雨感事

苦雨荒秋宅。寒生木葉悲。半垂藤護壁。中缺蔓穿籬。書校時開帙。壺提日繫絲。儒冠吾已誤。何責五男兒。

問訊次九日韻

問訊西南戍。提封莫遠開。休傳通蜀道。端可棄輪臺。擬上平戎策。慙無屬國才。何須千里馬。遠自渥洼來。

夏室

夏室不禦暑。竹陰新未交。幽花時結子。晚燕續開巢。午夢還高枕。晨炊出近庖。此生吾自了。客至莫相嘲。

次韻江子我見寄

敢恨新居僻。深懷故國尊。耕耘得遺物。版築尙頽垣。溪隔城南寺。崖通市北門。它時如訪我。但認語音存。

過陳無己墓

以我懷公意。知公待我情。五年三過客。九歲一門生。近訪遺文錄。重經故里行。寄書無鄭尹。誰爲葬彭城。



行武涉田中

慣習兒童喜。從容父老懽。桔槔看俯仰。稼穡愧艱難。荷葉生池岸。蒲萄落井幹。求田如得此。當爲駐征鞍。

重過鴻儀寺

秋色遽如許。寒花奈若何。客行傷老大。野次記經過。廢圃猶殘菊。枯池但折荷。吾生與物態。天意豈蹉跎。

別飾道二十弟賁之

少傅三朝老。文章壯九州。賦詩資政殿。賜字太清樓。拔燭辭軒陛。簪花近冕旒。慶門吾老矣。華國汝能不。

別息道二十二弟兌之

中令有清德。風流二百年。舉家惟食粥。絕口不言錢。里閭容吾老。庭闈賴汝賢。陶丘過范蠡。莫泛五湖船。

和虞道二十三弟豫之

向別已復久。此懷誰與明。書來慰吾意。詩重識君情。放鶴惜未到。飛鴻今尙橫。何由一隨汝。端爲薄浮名。

決道念八弟得小金印以詩贈之夬之

季也獲金印。籀文秦不如。情知非鬼篆。恨不識天書。池靜龜游罷。庭閑鵲鬪餘。春風還舊物。疎俊獨憐渠。

贈江子我子之

江郎淮海秀。經術古同師。溫潤無前輩。清新有近詩。一丘須早計。五斗莫堅辭。獻賦修竿牘。知君定不爲。



謝富察見過

飯蔬君莫厭。瓜菓我時須。自可隨豐儉。誰能問有無。墮蜂衝博局。驚燕避投壺。不憚過從遠。頻來訪老夫。

戲留次哀三十三弟頌之

白下春泥尙未乾。汴流更待小潺湲。不知汝定成行不。寒食今無數日間。

春日

男兒更老氣如虹。短鬢何嫌似斷蓬。欲問桃花借顏色。未甘着笑向春風。

陰陰溪曲綠交加。小雨翻萍上淺沙。鵝鴨不知春去盡。爭隨流水趁桃花。一本作春色不堪流水送雙浮鳴鴨趁桃花。

以少炭寄江子之

金籍曾通玉虛殿。仙曹擬拜翠微郎。莫嫌薄上溫馨火。猶得濃薰篤耨香。溫馨火事。見李義山詩。

戲成

長夏軒窗倚碧岑。人間塵土莫相侵。榴花不得春風力。顏色何如桃杏深。

和二十二弟

靜處偷看肘後書。幽棲古有此人無。綠蕤青箬非吾事。白浪狂風滿太湖。襟抱恢疎老更寬。笑談終夕盡君歡。主人更有桃花面。病眼其如隔霧看。



秋夜情

獨眠百感秋夜情。孤城急雨中聞更。明朝覽鏡視鬢髮。不知白從何處生。

題超化寺壁

曲池風定碧瀾平。小白魚如鏡裏行。水竹再來應識我。壁間不用更題名。

送人遊江南

湧金門外斷紅塵。衣錦城邊着白蘋。不到西湖看山色。定應未可作詩人。

過王立之故居

酴醿架倒花仍發。一作花無主薜荔牆摧石亦移。一作客有誰此地與君凡幾醉。年年同賦蠟梅詩。

夜行

老去功名意轉疎。獨騎瘦馬取長途。孤村到曉猶燈火。知有人家夜讀書。

春晚圃田道中

度柳穿橋聽午雞。一溝春水國門西。行人不用傷新別。看取塵間萬馬蹄。酒酣馳馬笑彎弓。便擬長驅向虜中。但恐老儒無骨相。不堪劍履畫南宮。君王重老降褒書。特賜宣陽宅一區。聞說會稽人不識。鑑湖還肯借臣無。



和王立之蠟梅

茅簷竹塢雨幽奇。岸幘尋花醉亦知。崖蜜已成蜂去盡。夜寒惟有露房垂。老去攀翻興益奇。招攜風月作新知。但令春釀常如此。百罰深盃亦倒垂。

贈江端本子我

韓免雞豚今日債。斷除妻子宿生緣。豐登便是人天供。努力東臯自種田。過陳無己墓

鎖門脫落封將盡。題壁污漫字不分。我亦嘗參諸弟子。往來徒步拜公墳。

立春

巧勝金花真樂事。堆盤細菜亦宜人。自慚白髮嘲吾老。不上譙門看打春。

與秦少章題漢江遠帆

楚山全控蜀。漢水半吞吳。老眼知佳處。曾看八境圖。江山起暮色。草木斂餘昏。誰感離騷賦。丹青弔屈原。雲埋鳳林寺。浪打鹿門山。今日江風惡。郎船勸不還。江闊雁不到。山深猿自迷。傳聞杜陵老。只在灑東西。



石似浣沙石。江如濯錦江。征帆向何處。雲霧晦蓬窗。

龍興道中

澗道垂黃花。山城擁紅葉。人爭小舟渡。馬就平沙涉。

謝任伯久無書。常子然寄茶謝之。因簡任伯。

諫議茶猶送。郎官迹已疏。斜封三道印。不奉一行書。



# 陵陽詩鈔

韓駒字子蒼蜀仙井監人嘗在許下從蘇轍學稱其詩似儲光羲遂名於時政和以獻頌補假將仕郎召試賜進士除祕書正字尋坐蘇氏黨謫知分寧召爲著作郎奏舊祠祭樂章辭多牴牾因更撰定五十餘章遷中書舍人兼修國史權直學士院復坐鄉黨曲學提舉江州太平觀卒於撫州詩有磨淬翦截之功不吝改竄有寄人數年復追取更定一二字者故其集不多而密栗以幽意味老淡直欲別作一家紫微引之入江西派駒不樂也

## 利濟橋亭詩

朝奉郎張公得其先父遺碑以附家集從諸公索詩予爲作此

大夫官業世所驚老覺軒冕非眞榮斯文自屬吾黨事正恐無路逃虛名生猶不見皇甫謐死豈肯投劉禹錫茂陵一幅入漢宮世間共怪無遺帙哀哉若人用意深自言身作鶴鳴陰著書遺子三萬軸人初笑我籛無金萬仞磨崖利好語那知百年蒼蘚汗爾來夜夜虹貫天山下居民未知處周詩不列石鼓歌後世恐嘆遺羲娥于今購市完家集野老何知亦摩挲川流可平石可腐只此殺青垂萬古五百驪珠固已奇插架不知猶幾許公今未暇歸田廬且當驅童曬蠹魚不辭借取車連軫要讀人間未見書



善相陳君持介甫子瞻手字示予戲贈短歌

古來相馬失之瘦。仲尼亦作喪家狗。唇紅齒白癡小兒。不差障面欺羣醜。鶴沖居士術如神。東走梁宋西峨岷。諸公蹭蹬未遇日。座中知是非常人。只今白髮無餘產。短褐逡巡列侯館。世人胸中無黑白。不如居士明雙眼。嗟予塵貌天所付。不須強覓封侯處。書生只倚一片心。它日相逢記裴度。記一作說

送葛亞卿欲行不一過僕

吾廬偪仄門三尺。慚愧春風巧相覓。叩關惟許葛王孫。有時籍草傾餘瀝。汝不如南池主人車載客。紅旗皂蓋行遠陌。又不如東郭公子柳藏門。青娥綠髮坐開樽。是身牢落終何爲。人不汝嫌汝自嗤。伸眉一笑能幾時。忽聞春盡王孫歸。春風欲盡猶有情。飄英墮絮俱傷神。王孫未歸迹已掃。秣馬膏車何太早。明日一杯愁送春。後日一杯愁送君。君應萬里隨春去。若到桃源記歸路。

陽羨葛亞卿爲海陵尉作葺春軒余爲賦之

昔聞先生隱吳儂。當窗十里橫烟峰。今見先生爲楚吏。繞墻四面縈烟水。從來楚俗帶吳風。曲折徑路深房櫺。舍前繫船柳千丈。舍後參天竹萬叢。千籤插架似蓬館。白拂挂壁如僧宮。掃地焚香欣客至。羹魚飯稻愁樽空。不溷不清惟寂寞。大笑先生致身錯。青山猶作布衣心。朱門卻有田居樂。筆回造化天工怒。胸包今古時人愕。甘窮自許元次山。蹈海還尋魯仲連。吾曹一歡豈易得。世間百歲俱可憐。何用北窗翻巧



策。且向東亭弄春色。我當酌酒壽主人。灘前飛下雙鷗鷺。

謝錢珣仲惠高麗墨

王卿贈我三韓紙。白若截肪光照几。錢侯繼贈朝鮮墨。黑如點漆光浮水。舊傳績溪多老松。奚超旣死松亦空。易水良工近名世。珍才始不歸潘翁。蕭然南堂一居士。赤管險麋無月賜。借問玄圭何自來。去年海中持節使。明窗晏坐不忽忽。引紙磨墨寒生風。自笑平生縮蛇蚓。更慙爾雅注魚蟲。殷勤二物從來遠。裨海環瀛眼中見。若欲揮寫藏名山。不如卻作談天衍。

送松陵老農

呼舟越洪濤。笑識江南山。此行爲子來。政擬一笑歡。相逢不忍別。丘壑同躋攀。如何舍我去。使我心悵悵。子實名家後。翰墨素所便。老農雖自謂。念子安知田。世故亦已足。擾擾徒自憐。天寒歲且盡。趣駕扁舟還。

淮上書事

平楚盡積水。長淮多奇峰。蕭條月曜夜。浩蕩風鳴冬。客行未可歸。弊裘那得重。寒氣搜病骨。清潭貌衰容。遠遊有滯念。將老無懽悰。故國渺萬里。去此嗟誰從。

至國門聞蘇文饒將出都戲贈長句兼簡其兄世美

去年夷門十月雪。九衢日昃行人絕。騎驢兀兀無所之。破袖迎風手龜裂。渡橋並塹得君家。入門脫帽猶



凜冽急燃濕束煖我寒。徐出清醕寧我渴。君家自無儋石儲。蟹黃熊白能俱設。平生見酒脣不濡。是夕連觥耳方熱。羣奴夜僵喚不聞。我亦鼾鼻眠東閣。明朝起過城南翁。尙記新聲一笑發。東歸每嘆懷抱真。西來又喜顏色接。方將慷慨豁心胸。未用崢嶸驚歲月。城南詩翁況遠來。門前雪泥又活活。豈知萬事不可期。卻樹吳橋背城闕。人生動若參與商。咫尺無論限秦粵。君聞吾語雖少留。但恐一歡成電掣。念昔相見無它娛。誦詩徵事相誇捷。氣凌俗子旁若無。偶坐時聞竊喞啞。于今落落誰汝憐。老屋陳編自怡悅。寄言詩翁尙留滯。歲晚勤迂故人轍。

題中寂堂

虎臥文公廬。鳥窠道林室。本自無俗喧。何由辨真寂。逃溺必登山。避燔必趨澤。君看好靜人。萬慮固未息。是心倘已刳。對鏡起亦得上人。早聞道。晚順世間迹。振衣下靈岩。飛錫來上國。高堂亦何有。萬卷繞四壁。客來倚風廊。晤語終日夕。莫言門如市。中有忘機客。吾曹詩酒汗。此道誰目擊。唯應寂時趣。獨有青士識。

送子飛弟歸荆南

往在東堂時。唯汝年尙少。木槍鬪羣兒。竹弓射飛鳥。今來跨鞍馬。昂然丈夫表。入門恍莫識。與語意方了。脫汝來時裝。夜闌酌清醪。當歌喜未定。感舊色已慙。念我三年官。自裹衣中鈔。東去盡勾吳。北行薄全趙。汝亦上岷峨。大江窮浩渺。一年兩附書。皮筒到家少。那知此相遇。乾鵲果前兆。我性本齊緩。汝資誠楚慄。



相逢各相規。一月語連曉。憶汝初結髮。讀書先尉繚。謂須壯執爨。單于壘時挑。豈期尙羈旅。但存雙目瞭。我恨緣詩窮。賃屋隘而湫。尙盈三尺牀。使汝眠奧窔。二升糴祿粟。醜婢羹茶蓼。時時得鶉兔。傍竈親燔燎。纔爲十日歡。鄰里厭煩擾。朝來着戎服。數匝郿條繞。辭我出門去。歸袖風矯矯。還家對寒食。渚宮聞雉鷲。想見阿頌君。把卷倚叢篠。弟妹乘羊車。堂前走相嬲。何當總見之。緩我歸思杳。汝歸與俱來。繁臺及秋杪。

贈趙伯魚

昔君叩門如啄木。深衣青純帽方屋。謂是諸生延入門。坐定徐言出公族。爾曹氣味那有此。要是胸中期不俗。荊州早識高與黃。誦二子句聲琅琅。後生好學果可畏。僕常倦談殊未詳。學詩當如初學禪。未悟且徧參諸方。一朝僂罷正法眼。信手拈出皆成章。

答蔡伯世食筍

蓴絲化鹽豉。槐葉資新麪。豈知苦竹萌。風味常獨擅。昔我居錦城。屢喫田家飯。扶杖自入箒。煨此犢角鹽。後參鶴林禪。餽我桑門饌。烝烝沸鼎中。亂下白玉片。惟無它物乘。始覺真味現。三年客東都。錦籜寧復見。千金洛陽來。惟充大官膳。前時過君食。欣逢故人面。那知列仙臞。已雜蒯通雋。吾寧飽甘肥。憤吒那忍嚙。請歸謂主孟。尉人後當諫。苦苣雜嘉蔬。沉香和甲煎。柯亭旣誤椽。畫障或遭練。古來可歎事。千載寄明辨。作詩弔籜龍。助子當食歎。



食煮菜簡呂居仁

曉謁呂公子。解帶浮屠宮。留我具朝飧。喚奴求晚菘。洗著點鹽豉。鳴刀芼薑葱。俄頃香馥坐。雨聲傳鼎中。方觀翠浪涌。忽變黃雲濃。爭貪歛鉢暖。不覺定盃空。憶登金山頂。僧飯與此同。還家不能學。空費烹調功。硬恐動牙頰。冷愁傷肺胸。君獨得其妙。堪持餉衰翁。異時聞豪氣。愛客行庖豐。殷勤故煮菜。知我林下風。人生各有道。旨蓄用禦冬。今我無所營。枵腹何由充。豈惟臺無餽。菜把尙不蒙。念當勤致此。亦足慰途窮。

送倪巨濟將仕

汴流六月翻黃沙。小舟兀浪如乘槎。赤日下照烘朝霞。腹鳴肩舉氣喘呀。夜眠僕夫股相加。柂樓晨飯羹黃茄。時時矯首望土岸。木末殷轉江洲車。渴逢石泉不得汲。椎鼓催發無停櫂。問君何爲趣還家。答云五載居京華。夜窗讀書眼生花。每食不飽潛咨嗟。母髮半白弟髻丫。有妹久闕躬絲麻。寄書細字如昏鴉。問胡眷戀歸期賒。來時書笈手自拿。今歸上堂兩腳靴。壽觴要及開霜瓜。子志如此良可嘉。勸子博學如橫置。麋麟兔鹿盡所遮。或典而法浮而葩。要歸于正謹去邪。行如種植慎萌芽。念當務實勿求誇。我行買犢耕三巴。佇子佳譽來天涯。

出宰分寧別舊同舍五首

公車八千言。自獻十二旒。落筆中書罷。石渠並英游。方欣洛陽遇。已慨周南留。明堂富榱桷。詎須汝薪樛。



三年望龍斷。艱難身百憂。鬢髮五分白。更落天南陬。  
念我行老矣。才拙世所捐。青綾未頻直。黃紬且安眠。飽聞縣西寺。修椽壓山顛。中容五百衆。上堂鼓闐闐。  
王程倘餘暇。茲焉著幽禪。自擷雙井茶。與僧酌雲泉。  
昔慚芸閣姿。斥守蒲城市。五占天雞星。未收逐臣淚。歸聞長樂鐘。疲馬思一試。挈挈今又東。敝邑臨無地。  
人生縛微官。大似侏儒戲。升沉各幾時。怨欣兩當置。  
益昌剗移文。道州拙催科。我愚象二子。將奈分寧何。吾君放勛姿。于今萬邦和。縣令但拱手。排衙鼓鳴鼙。  
故人怒挽船。勸勿凌江波。君其謝故人。我亦聊絃歌。  
陽山昔御史。夷陵前校書。坐法竄未久。遇赦罪已除。故時同舍郎。半直承明廬。獨奔江西縣。道里三千餘。  
皇明透羽掘。倘復哀臣愚。念當脫江瘴。與子聯朝裾。

入鳴水洞循源至山上

崇山蓄靈泉。萬古去不息。瀦爲百斛深。散入千渠溢。其東匯民田。又北尋山腋。斷崖如破瓜。飛瀑中蕩激。  
大聲或雷霆。細者亦竽瑟。末流垂半山。十里見沸白。得非拖天紳。常恐浮地脈。呂梁丈人老。尙與汨偕出。  
我欲蹋驚湍。下窮齷齪石。惜哉意徒然。屬此歲凜凜。安得汝南周。斷取白蛟脊。歸之龍泉峰。山門夜喧席。  
分寧大竹。取爲酒罇。短脰寬大。腹可容二升。而漆其外。戲爲短歌。



此君少日青而臞。爾來黑肥如瓠壺。縮肩短帽壓兩耳。無乃戲學騶侏儒。人言腹大中何有。不獨容君更容酒。未須常要託後車。滑稽且作先生友。少陵匏樽安在哉。次山石臼空飛埃。茆簷對客夜驚笑。麴生叩門何自來。老向人間不稱意。但覺淵明酒多味。乞取田家老瓦盆。伴我年年竹根醉。

湖南有大竹。世號貓頭。取以作枕。仍爲賦詩。

湖南人家養狸奴。夜出相乳肥其膚。買魚穿柳不蒙聘。深蹲地底老欲枯。誰將作枕置榻上。擁腫似慣眠氈毼。慵便玉枕分已無。孫生洗耳非良圖。茅齋紙帳施團蒲。與我同歸夜相娛。更長月黑試拊臥。鼠目尙爾驚睍盱。坐令先生春睡美。夢魂直饒赤沙湖。更煩黃嬾好看取。走入旁舍無人呼。

題湖南清絕圖

故人來從天柱峰。手提石廩與祝融。兩山坡陀幾百里。安得置之行李中。下有瀟湘水清瀉。平沙側岸搖丹楓。魚舟已入浦溆宿。客帆日暮猶爭風。我方騎馬大梁下。怪此物象不與常時同。故人謂我乃絹素。粉精墨妙煩良工。都將湖南萬古愁。與我頃刻開心胸。詩成畫往默惆悵。老眼復厭京塵紅。

送趙承之祕監出守南陽

繁臺十月寒飈颺。置酒共祖南陽侯。九士一客相獻酬。皆言南陽山水幽。菊泉釀酒不論石。上酥醍醐出肥牛。使君樓前橘柚古。丞相堂下蒲蓮稠。夜燃蠟炬賓醉舞。春風歌眠百花洲。各持一觴勸公飲。此行樂



矣公何求。我獨倚杖商聲謳。此公人間第一流。方今羣賢從法駕。金絨塞路嘶驂騑。獨令此公守一州。臨分慷慨淚莫收。南陽南陽樂復樂。歸來歸來無久留。

次韻館中諸公遊慈雲寺

嘉蔬隨客庖。香飯出僧甑。聊爲一飽謀。未暇談禪病。二公當代豪。詞林氣方盛。五言謹詩律。百罰嚴酒令。樂與同舍郎。共此給園淨。想像斜川遊。何如舞雩詠。甘瓜自雍丘。肥芡來新鄭。肴果各有攜。笑我室懸罄。陋質謝不往。實愧瓊瑤映。人生一車足。那須富千乘。有興驅短轅。寧辭沮洳徑。及時速行樂。莫待苦腳脛。炎暑忽已闌。當念時難更。

飲酒次人韻

淺瀨見魚遊。澄潭知鶴沒。疑乘青霞珮。徑墮白銀闕。平生探學海。中年悟禪悅。應須臨渺瀰。庶以稱超越。回塘大圓鏡。新蒲細於髮。綠扇互低昂。玉顏爭秀發。良辰宴觴豆。炎曦脫巾襪。荷聲過急雨。竹影敷涼月。緩行躡芳草。移坐蔭深樾。何當酒拍浮。恣聽舟搖兀。而我方抱鉛。上馬自腰笏。叩門不聞呼。造席無乃咄。詎敢陵崆峒。幸許窺剗劒。願公開迷雲。令我入理窟。雄篇出月脇。妙思露天骨。蹇步那由追。智井媿先竭。

題采菊圖

往在京口。爲曾公卷題采菊圖。九日東籬采落英。白衣遙見眼能明。向令自有杯中物。一段風流可得



成。蔡天啓屢哦此時。以爲善。然余嘗謂古人寄懷於物。而無所好。然後爲達。況淵明之真。其於黃花直寓意耳。至言飲酒適意。亦非淵明極致。向使無酒。但悠然見南山。其樂多矣。遇酒輒醉。醉醒之後。豈知有江州太守哉。當以此論淵明。復作二首。

黃菊有何好。且寄平生懷。遇酒興不淺。無酒意亦佳。此理誰復明。自昔寡所諧。空餘采菊圖。寂寞懸高齋。今日菊始華。叢雁鳴相和。若無一觴酒。如此重九何。悠然數酌盡。會心豈在多。醒來不復記。散髮東山阿。去冬除守歷陽。未上。召還西掖。今夏自應天尹。移知齊安。道由歷陽。珪老相訪。奉簡一首。

嘗聞歷陽郡。寺有褒禪山。及我分竹符。欲往窮躋攀。驅車發半道。尺一喚我還。歎息巖下水。何時照衰顏。復持齊安節。稅駕臨通闕。屬有行役累。無由叩僧關。珪公岷峨秀。逸韻超人寰。攜詩遠過我。慇懃請加刪。少年意氣盛。笑我毛髮斑。夜語不知寢。起看江月灣。浮生浪擾擾。萬法本自閑。爲吏何足論。誓將老榛菅。買田未及議。我實貧非慳。奉乞一菴地。往來泉石間。

武寧道中

小灘嘈嘈大灘惡。朝行羊腸暮鹿角。盡日拖舟不得前。忽然筲斷千尋落。上梁左側石子多。兩船與石鳴相摩。臥聽溪帥倚篙哭。將如四十二灘何。羊腸鹿角上梁皆灘名

次韻曾通判登擬峴臺



朝攜筇杖來。暝倚胡床坐。循牆讀遺碑。歲久苔蘚澹。烈風無時休。於茲驗真箇。曾郎吐佳句。勢突黃初過。交遊得詩流。吾儕可相賀。念昔逢大梁。一別九鑽火。再見疑前身。居然客愁破。世久無若人。子豈伯休那。曾時丁憂。千山厭露宿。一壑期雲臥。子少方鵬騫。吾衰作鳶墮。篇成不敢出。畏子詩眼大。唯當事深禪。諸方參作麼。文章真綺語。季緒徒瑣瑣。安得京口歸。秋江細扶柁。

題蕃騎圖

塞上一作沙揚漠漠黃雲秋。黃鬚胡兒騎紫騮。一作白馬攙前弄風走。胡兒掣轡空驤首。廻鞭慎莫向南馳。漢家將軍方打圍。奪弓射汝猶可脫。奪汝善馬何由歸。

題韓晁畫瀛洲學士圖

咸陽中天開帝君。羣公下直承明廬。長鞦短轡褒衣裾。蒼頭廬兒爭走趨。韓侯畫此時無虞。瀛洲仙人樂有餘。我生不及正觀初。忽思十年身校書。吟詩天街騎蹇驢。爾來戎馬方馳驅。眼厭繡掘蒙諸子。把卷未展先欷歔。

順老寄菜花乾戲作長句

道人禪餘自鉏菜。小摘黃花日中曬。峨眉榎脯久不來。麴糵薑絲典刑在。封題寄我紙作囊。中有巴蜀齋廚香。起炊曉甑八月白。配此春盤一掬黃。榎軟木耳八月白稻名也



李氏娛書齋

欲樂誑凡夫。須臾皆變壞。唯書有真樂。意味久猶在。李君名家流。事業窺前輩。澹然無他娛。開卷與心會。憶吾童稚時。書亦甚所愛。傳抄春復秋。諷誦晝連晦。飲食忘辛鹹。汗垢失盥類。爾來歡喜處。乃在文字外。卷藏二萬籤。斐几靜相對。此樂君未知。狂言勿吾怪。

送王祕閣二首

烏衣諸王吾早聞。晚塗獨識和州孫。風流踏拖欲垂盡。文采陸離今尙存。奉祠乃是衰翁事。如君胡爲亦爲此。僕夫在門君疾驅。往獻天子平邊書。

右軍池頭鷓鴣呼。康樂臺下移檉疎。碧山學士此築室。白髮散人來卜居。身隨沙鷗臥烟雨。十年無書上公府。枉作西班老從臣。看君才華不能舉。

送里人陳會往見江西漕使

勸君少留持一觴。與君鄉里皆陵陽。兒童共戲苦鹽岸。老大相逢烏石岡。拾遺平生丈人行。拊我謂我能文章。豈知今無一絲長。但餘顛華面顏蒼。君行往見玉節郎。感時憂國歌慨慷。餉師十萬西平羌。笑我挾複山中藏。

夜與疎山清公對語。因設果供戲成長句。



落葉屑窅鳴風廊。四無人聲夜未央。道人過我談眞常。客舍有底相迎將。竹鑪篝火曲木牀。烏柏爲燭楓  
脂香。青梨纍纍釘坐光。黃甘十子近著霜。醯梅蜜杏經年藏。紅糝綴枝加柘漿。蓴藕諸芋藁荷薑。堆盤滿  
案次第嘗。憶初見翁修水旁。轉頭八十鬚眉蒼。爾時尊宿略喪亡。屹如樅檜老不僵。而我昔漫參朝行。十  
年投閑坐老狂。人生一夢炊黃粱。諸法本閒人自忙。況今世故甚擾攘。與翁幸憩菩提坊。夜闌一酌餘甘  
湯。它年此樂不可忘。

上泰州使君陳瑩中

當年賢路雜薰蕕。歎息諸公善自謀。今日在前皆鼎鑊。後來知我獨春秋。海邊已擊師襄磬。湖上新逢范  
蠡舟。惟有書生更無事。不妨挾冊更西游。

聞富鄭公少時隨侍至此。讀書景德寺。後人爲作祠堂。因跋余舊詩後。以自嘲。

藤床瓦枕快清風。破悶文書亦漫供。鄉信未傳霜後雁。羈懷生怯晚來鐘。淹留已辦三年計。流落應無萬  
戶封。猶有壁間詩句在。他時誰肯寫塵容。

海氣昏昏又嘯風。一杯扶病要時供。三年閉戶兒童怪。千古閑情我輩鐘。若得黃甘應手種。更求青李莫  
函封。疎頑自笑將安適。寄謝江山好見容。

次韻留別南公



天遣吾曹與世疎。那將窮技學黔驢。只今年少身多病。是處愁深淚濺裾。此去不須論塞馬。向來猶有葬江魚。虛名只用驚兒輩。要作生涯莫著書。

九絕爲亞卿作

離歌三疊最關情。不省從來此地聞。早是春殘心事惡。落花陰裏更辭君。君去東山踏亂雲。後車何不載紅裙。羅衣浥盡傷春淚。只有無言持送君。更欲罇前抵死留。爲君徐唱木蘭舟。臨行翻恨君恩雜。十二金釵淚總流。世上無情似有情。俱將苦淚點離罇。人心真處君須會。認取儂家暗斷魂。君住江濱起畫樓。妾居海角送潮頭。潮中有妾相思淚。流到樓前更不流。憶汎郎舟共採蓮。今來揮淚送郎船。回書倘寄新翻曲。湖上何人爲扣舷。一夢巫陽樂已窮。三年猶復怨匆匆。倏雲驟雨成何事。未必三年抵夢中。妾願爲雲逐畫檣。君言十日看歸航。恐君回首高城隔。直倚江樓過夕陽。初合雙鬟說後期。相盟不在已相知。來時休落春風後。卻漫嘲儂子滿枝。

送俞仲寬赴宿倅

年少場中晚節寒。去年揮手下天關。何人肯踢風波路。自古難言骨肉間。十里卽應歸漢闕。一帆從此別



淮山。艤舟如得僧伽印。未用將身付等閒。

五月八日游北禪師川登塔。盡七級。僕能三級而已。晚過公晦。偶作二首。

徐郎胸次已冰清。北寺清游更絕塵。不欲茹葷緣道友。肯來出郭是詩人。憐君遠客情能爾。看我題名墨尚新。誰有好方扶腳力。故鄉歸去蹋峨岷。

鐵鑲銅鑲一一開。肩輿不問主人來。已登白塔吾休矣。更上紅亭子壯哉。世外清歡須邂逅。城頭落日共徘徊。雲樓五月滄洲趣。羞殺初無八斗才。

曾大父有詩云。三春拂榻花黏袖。午夜淘丹月在池。舍弟子飛歸蜀。與語及此。因取爲韻。

去蜀初遊楚。吾方十二三。無成今長大。送汝不勝慙。還家倘無事。莫負故園春。衣錦兒嬉爾。從來笑買臣。艤舟不能前。已復日西沒。贈子以幽蘭。秋風正披拂。野宿月團欒。風餐氣蕭颯。從來對牀地。只今懸一榻。入蜀尋幽跡。應先到浣花。誠知錦城樂。亦記早還家。魚游因餌得。鳥困坐糲黏。顧我今如此。空懷石井鹽。逢年要力耕。善舞須長袖。北山休移文。南山歸種豆。



一棹送君歸。酒醒秋江午。正是蓴鱸時。思君在何許。  
明月落帆時。荒山孤夜夜。回首白雲飛。吾親在其下。  
客行宜努力。時亦近醇醪。一盞熏人醉。雲安米正陶。  
爾去逢諸父。髯霜貌渥丹。貧窮宜此報。富貴卻難安。  
揚州十里春。蛾眉半輪月。茲游真不凡。詩成想清絕。  
吾祖屯田公。遺書悉安在。爲我謝諸兄。蠹魚時一曬。  
故山不可到。歸夢到天池。想見山中叟。磨崖待我詩。

次韻參寥

此身不擬墮塵緣。長恐驚鴻落響弦。踢盡世間千澗壑。歸來胸次一山川。  
深宮木末猶秋色。故國天涯只暮烟。憑仗道人分石磴。要看庭下玉龍旋。  
且向家山一笑懽。從來烈士直如弦。君今振錫歸千頃。我亦收身入兩川。  
短世驚人如掣電。浮雲過眼亦飛烟。何當與子超塵域。下視紛紛蟻磨旋。

秦興道中

縣郭連青竹。人家蔽綠蘿。地偏春事少。山迥夕陽多。暗水披崖出。輕船掠岸過。  
傳呼細扶柁。吾老怯風波。



智勇師歸永嘉。自言所居在萬竹間。乞詩送行。

上人歸去家何許。萬竹深圍一把茅。踢盡叢林參白足。卻來江檻俯青郊。夜階蔌蔌風翻籟。春路冥冥雨放稍。肯拚清陰分百十。暮年思與子論交。

送黃若虛下第歸湖南

時人會傍高門走。獨肯來游翰墨場。已有哲兄如叔度。定知吾子勝文強。長淮白浪搖春枕。故國青山接夜航。乞得功名歸遺母。未應深羨綠衣郎。

館中直宿書事

十載名山慣杖藜。清都直宿夢魂疑。臥聞長樂鐘聲近。尙憶寒山半夜時。北風吹馬襲貂裘。薄雪連雲凍未收。銀闕晝開禽鳥白。信知三館是瀛洲。

行至華陰呈舊同舍

落日同騎款段游。倦依松石弄清流。蓬萊漢殿春分手。一笑相逢太華秋。

次韻思聰

欲問琴聰水鏡篇。竭來端爲著幽禪。五更下馬呼殘夢。數面成親是宿緣。伏腦憐君有犀骨。騰身笑我不鳶肩。白頭奔走襄陽道。空誦新詩憶浩然。



和李上舍冬日書事

北風吹日晝多陰。日暮擁階黃葉深。倦鵲遶枝翻凍影。飛鴻摩月墮孤音。推愁不去如相覓。與老無期稍見侵。顧籍微官少年事。病來那復一分心。

偶書二絕呈館中舊同舍

去年看曝石渠書。內酒均頒白玉腴。今日醉登延閣望。幾人回首憶窮途。御本曾看錦帕舒。醉驚飛閣上凌虛。而今臥病衡門底。自曬茆簷幾卷書。

送蘇世美東歸

東游兩見鶴林春。晚愧先生作並鄰。罇俎每留倉猝客。典刑猶識老成人。繫舟一笑都門外。賣劍歸耕潁水濱。意氣年來類兒女。別離不覺淚橫巾。京口尋山每見攜。鶴林問法更追隨。本無物累那成癖。肯借人書未必癡。食粥往年容乞米。一罇今日細論詩。邗溝好去春風暖。莫忘椎冰共載時。

梅花三首

江南歲晚雪漫漫。澗谷梅花巧耐寒。幸有幽香當供給。不辭三載滯西安。雲根細路遶溪斜。日出烟銷水見沙。只度關山魂已斷。可須疎雨濕梅花。



籃輿曉入關山路。玉節珠旛次第開。白髮微官何用許。似憐身出道山來。

夜泊寧陵

汴水日馳三百里。扁舟東下便開帆。且辭杞國風微北。夜泊寧陵月政南。老樹挾霜鳴窸窣。寒花垂露落毵毵。茫然不悟身何處。水色天光共蔚藍。

庚子年還朝飲酒絕句

三年逐客臥江皋。自與田翁酌小槽。飲慣茆柴諳苦硬。不知如蜜有香醪。往時看曝石渠書。內酒均頒白玉腴。落魄十年無復醉。因公今日識官壺。

送海常化士

好去凌空錫杖飛。鳳林關外道場稀。莫言衲子籃無底。盛取江南骨董歸。

次韻何文縝種竹

杜陵窮老覓楸栽。不似何郎種笛材。三徑莫憂荒草合。一樽如與故人開。未堪急雨枝枝打。便有幽禽日  
日來。坐誦東坡食無肉。詩腸日午轉飢雷。

次韻王給事觀殿試唱名

集英春殿唱諸生。日轉觚稜晚色清。近侍皆分金帶赤。內人爭看雪衣明。內人多自昇平樓上下觀罷朝詔賜羣公坐。



合殿歡傳萬歲聲。我老倦隨宮漏永。江南江北聽鼙更。

次韻翁監再來館中

歸老江湖久自盟。睡餘且復對空林。重來內閣人誰健。慣踏天街馬不驚。已喜劉歆分七略。尙傳韓愈誨諸生。太平潤色須公等。應許吾兼吏隱名。

次韻館中上元游葆真宮觀燈

百千燈射水晶簾。尙覺游人意未厭。多病只思田舍樂。夜歸烟火望茅簷。玉作芙蓉院院明。博山香度小崢嶸。直言水北人稀到。也有槃姗勃窣行。鴨綠未全生曲沼。鵝黃先已上柔柯。故應春物撩詩思。白髮明朝一倍多。開卷愛公如李益。解言明月逐人來。多情如共春流轉。刻燭題詩又一回。澹澹新粧帶淺啼。催車只待日平西。驂騮也自知人意。散入千花了不嘶。申應時卜居京口。名之曰雲棲。又曰小築。乞詩送行。

客舍秋來憶舊居。一帆歸去落東吳。他年寄我新詩句。卽是雲棲小築圖。

次韻何文縝舍人後省致齋

夜直沉沉浴殿南。春風想對百花潭。藤牀轉枕尋餘夢。粉壁題詩倚半酣。追記舊游時一笑。歡參真理莫



多談白頭初試絲綸手。歸去扶犁意亦甘。

次韻侯思孺將至黃州見簡

未用船頭報水程。爲君持酒打愁城。青山久負當年約。白髮多從客路生。點檢轉工新句法。揩磨難減舊風情。小留莫道無供給。一味東籬有落英。

故資政忠惠韓公挽詞

藉甚中山守。風流世有人。獵圍邊月曉。筵踏塞花春。金絮盟猶在。灰釘事已新。使公長臥護。何地起胡塵。以正賜庫蒲萄醅。送何斯舉復次其韻

歎息蘇公無恙日。坡頭自築小山房。五年不識宮壺味。只以春江當酒觴。老臣政實不堪論。尙得君王賜酒樽。異日黃州成故事。蒲萄醅熟記初元。

登赤壁磯

緩尋翠竹白沙游。更挽藤梢上上頭。豈有危巢與棲鷗。亦爲陳迹但飛鷗。徑營二頃將歸老。眷戀羣山爲少留。百日使君何足道。空餘詩句在江樓。

某已被旨移蔡。賊起旁郡。未果進發。今日上城。部分民兵。閱視戰艦。口號三首。病守雖閑鬢未蒼。尙能談笑坐胡牀。指揮一掃妖氛盡。便自關山向汝陽。



昨夜黃昏得蠟書。老臣恨已解兵符。莫將箭污愉兒血。留與官家北射胡。十二月得京城蠟彈。有旨守臣部兵應援。  
百憂前日總薰心。一笑朝來得好音。絕域不須遮虜障。今年自有殺胡林。

次韻耿龍圖秣陵書事

十月舟藏一作橫蘆荻林。客衣頓覺夜寒侵。亂離祇有窮途淚。勳業都無過去心。敢恨青鞋踏江浦。近傳黃屋渡淮陰。中興氣象須公等。是日頻聞正始音。

次韻金陵趙德夫使君上元三絕

小風吹水漲平湖。屋角殘冰亦已無。投老只圖春睡足。可須山鳥強招呼。  
臥聽秦淮嗚咽聲。起看江月暮潮平。舊時憶在延真觀。玉作芙蓉院院明。  
憶昨宣和從武皇。春風省試御袍香。自從翠蓋尋沙漠。無復徵歌出洞房。

次韻南溪觀魚

城西鼓櫂又城東。不待溪分上下風。碧樹垂楊間黃綠。冰盤行鱸簇青紅。橫塘日暮林巒合。斷岸秋來浦溆通。安得此身無世累。便隨漁艇入空濛。

再次韻兼簡李道夫

麥秋宜晚起。況復雨頻頻。桃竹猶能杖。柴車未可巾。閑分酒賢聖。靜記藥君臣。會有騎鯨李。來陪賀季真。



李侯梨釘坐。風味勝仁頻。投老須鳴玉。相看尙秃巾。便應尋木客。何必問波臣。不復來城市。從人笑我真。  
猶記一麾出。敢論三顧頻。餘生過飛鳥。幻事捏空巾。學道無疑怖。憂時有主臣。買舟苕霅去。我亦號玄真。  
漢書主臣  
皇恐之貌

次韻錢遜叔侍郎見簡

白頭逢世難。無地可推愁。曉日瞻天闕。春風憶御溝。他年余老蜀。萬戶子封留。尙記臨川郡。溪山爛熳遊。  
往歲自京口。與曾公永宏父同行。至下蜀。因次前韻簡之。

下蜀追隨日。歡言一散愁。籃輿轉陂路。小楫渡潮溝。萬里家何在。三年淹此留。猶欣遲暮眼。見子並英遊。  
撫州邂逅彥正提刑道舊感歎輒書長句奉呈

憶在昭文並直廬。與君三歲侍皇居。花開輦路春迎駕。日轉蓬山曉曝書。學士南來尙巖穴。神州北望已  
丘墟。愁逢漢節滄江上。握手秋風淚滿裙。

送曾宏父

見子京汪尙少年。大梁重見已翩翩。頃來更覺文章進。他日寧容老病先。梅谷舊題幽谷引。橘陂新和泮  
陂篇。常慚散吏空稱賞。不敢吹噓上九天。

乃翁名見豫章詩。學術傳家有大兒。四海共推文賦早。三年應訝省郎遲。生逢側席求賢日。卽是摩霄聳



壑時若到朝廷問衰朽。爲言常宿畏人知。

次韻錢遜叔侍郎見簡

掃地焚香元自喜。傍門騎馬向來慵。田園此去須安枕。海岱今年不舉烽。已分瘦藤扶病骨。生憎明鏡寫衰容。兩公故是經綸手。足問腰金早晚重。

信州連使君惠酒戲書絕句謝之

憶傾南庫官供酒。共賞西京勅賜花。白髮逢春醒復醉。豈知流落在天涯。故事每歲洛陽頁花。賜館職百朵。并賜南庫法酒。

次韻錢遜叔謝曾使君送酒

誰憐定武故將軍。侍郎常除定帥醉舞狂歌老更真。好事時分小槽酒。殘樽也到白頭人。

次韻曾寺丞觀早朝上徐諫議

憶昨飄然下葉闈。十年江海望嚴宸。遙知駐蹕艱危地。尙有憂時老大臣。已起陽城無諫諍。又傳陸贄掌絲綸。爲公細數能文士。幾箇麒麟閣上人。

次韻徐翰林

遠聞仙伯上神山。始覺升平氣象還。一夢休論玉堂事。兩行曾綴紫宸班。想燒傳燭書天詔。看翦花驥出帝關。尙憶平生故人否。夜驅黃犢在田間。



某頃知黃州。墨卿爲州司錄。今八年矣。邂逅臨川。送別二首。

自罷黃州守。殊方任轉流。寧論九年謫。已判一生休。此士真材傑。諸公定挽留。倘歸存老病。車騎擁西疇。盜賊猶如此。蒼生困未蘇。今年起安石。不用哭包胥。子去朝行在。人應問老夫。髭鬚衰白盡。瘦地日攜鉏。

送雲門妙喜遊雪峰

老子幽棲地。勞君从見存。夜氈從栗爆。午盃看茶翻。舊事時追憶。深禪得細論。還應雪峰老。領衆待雲門。

送東林珪老遊閩二絕

直自三湘到七閩。無人不道竹菴名。詩如雪竇加奇峭。禪似雲居更妙明。竹菴端爲故人留。尙許衰翁預勝流。寄語叢林好清客。未宜輕輓雪峰毬。

卽席送呂居仁

一樽相屬兩華顛。落日臨分更泫然。蹀躞鳴珂君得路。伶俜散策我歸田。近聞南國生涯盡。厭見西江殺氣纏。欲買扁舟吳越去。看山看水樂餘年。

余往歲與遜叔侍郎同寓廣陵。靖康元年。遜叔守符離。余被召過焉。未幾余守南都。遜叔移真定。過留數日。紹興二年。復同寓臨川。感念疇昔。奉送一首。

廣陵三歲共祠宮。二月帆開二水風。北渚蕩舟公醉我。南湖張樂我留公。豈知去國千山外。又復連牆一



笑同。喪亂難堪重離別。可無書札問衰翁。

余爲著作郎。如瑩爲司令。官舍皆在左掖門外。高頭坊。紹興四年。如瑩持節江西道。撫相訪。輒成長句。

邂逅都城接下風。官居總在日華東。門瞻曲角趨朝近。路轉高頭出局同。今日繡衣新使者。晚塗霜鬢舊鄰翁。一盃無復當時樂。赤縣黃圖淚眼中。

次韻曾吉父見簡

往歲滄波轉地流。是身如沫信沉浮。初聞盜賊奔他境。漸見衣冠集此州。病欲深耕歸谷口。禪須未句問巖頭。膺門也自知人喜。有客清真似子不。

六月二十一日。子文待制見訪。熱甚。追記館中納涼故事。漫成一首。

漢閣西頭千步廊。與君長夏對胡牀。陰陰檜色連宮草。寂寂棋聲度苑墻。細乳分茶紋簟冷。明珠擘芡小荷香。身今老病投炎瘴。最憶冰盤貯蔗漿。

送子文待制歸蜀

家近錦江歸未得。見人之蜀便淒然。聞君細說開州好。勸我來依刺史賢。當路尙多豺虎鬪。遠湖曾帶犬羊羶。何時萬里雲沙靜。穩上沙頭上水船。



送范叔器次路公弼韻

晚塗淹泊向誰論。白髮名卿肯見存。雒邑風流餘此老。故家文獻有諸孫。寺連狹徑曾傾蓋。船擁清溪尙一樽。小駐鄱陽未宜遠。欲憑書尺問寒溫。

謝人送鳳團及建茶

白髮前朝舊史官。風爐煮茗暮江寒。蒼龍不復從天下。拭淚看君小鳳團。山瓶慣識露芽香。細蕝勻排訝許方。猶喜晚塗官樣在。密羅深碾看飛霜。

頃年侍立集英殿。見周表卿唱名第二。客居臨川。表卿爲宜黃丞。歲滿訪別。作詩送之。

往時束帶侍明光。曾看揮毫點御牀。只道驩驩已騰踏。不知鷓鴣尙摧藏。官居四合峰巒雨。驛路千林橘柚霜。莫爲艱難歸故里。漢庭今重甲科郎。

似矩尙書帥桂道。由臨川賦詩三首。貽彥章內翰。謹次元韻送行。

喪亂垂離數。衰慵問訊疎。新霜上鬚鬢。老淚溼襟裾。忽報迎車騎。遙知奉璽書。豈惟謀郤縠。文亦似相如。有人談五嶺。齒翠象衡廬。地長十尋竹。波跳三尺魚。看公羅鈇鉞。笑我老耕鋤。敢望頻書札。相望萬里餘。郡戟蒼山上。平分二水流。四時無癘氣。五管有賢侯。靜契羅公遠。禪參帛道猷。人生一麾樂。不必向中州。

曹山老送筍蕨與諸禪客同食戲成



楚寺瓶罌至，吾廬水竹幽。開緘喜風韻，喚客少淹留。蕨帶寒山醬，筍兼頭子油。誰能知許味，一飽併無憂。

送宜黃宰任滿赴調

故老凋零盡，君猶識了翁。君與了翁同縣，自言慕其為人。知名節似，不但里閭同。政府方交辟，高賢豈久窮。他年汝溪上，伴我釣秋風。

送張右丞司赴召

老夫宴坐臨川寺，五見君爲萬里行。病馬不辭遭掣頓，雲鵬那復計期程。遙知此去常乖隔，莫惜書來訪死生。早與朝廷定巴蜀，故山遲暮欲歸耕。



# 鷄肋集鈔

晁補之字无咎。濟州巨野人。年十七。從父官杭州。著七述。言錢塘山川風物之麗。時東坡爲通判。正欲作賦。見之稱嘆曰。吾可閣筆矣。由是知名。舉進士。試開封及禮部別院。皆第一。神宗閱其文曰。是深於經術。可革浮薄。累仕著作郎。充祕閣較理。國史編修。尋坐修神宗實錄失實。降官。徽宗召還。未幾。復以黨論坐貶。還家。葺歸來園。自號歸來子。大觀末。出黨籍。起知泗州。卒。有集七十卷。自謂食之則無得。棄之則可惜。故名鷄肋集。

## 視田五首贈八弟無斁

河流之所濡。一斛泥數斗。我莊當水窮。乃比石田瘦。尙無東陵瓜。況有南山豆。天雨不可期。且復鞭牛後。蘇秦不願印。迺在二頃田。東皋五十畝。力薄荆杞填。擇高種苜蓿。不溼牛口涎。拙計安足爲。朝往而莫旋。薄遊廢家務。待子營糗糧。莊奴不入租。報我田久荒。凌矜馬到門。肆兀牛臥場。立苗蒼耳根。此策殊未長。家世不爲農。長安有大第。官糧弗充口。萬里聊自庇。一從學聱牙。世事百色廢。賣牛姑補屋。歲晚霜雪至。居貧廢文字。銚鋤學苦耕。怪子獨伶俜。久與地力爭。苦耕又不時。狐虺日縱橫。高原一釋耒。歎息心怳怳。卽事一首次韻祝朝奉十一丈



平生交游情。獨處不可乍。那爲一馬飲。濁水噴百馬。弦歌高樓上。但恨知者寡。大人遺世心。口語儻能借。不然抱幽璞。終歲裹幙屨。坐令青蠅繁。暫出刑兩踝。儒冠成自誤。歸去無屋瓦。賴逢里中賢。築室各瀟灑。及時秣麥賤。樽酒得同把。安能效乾沒。肩與市人亞。居然邑里號。曾墨爲還駕。況在竈奧間。欲耻王孫賈。東方錢二百。得米稚啼嘔。嘲笑坐窮辰。無肉飽伏假。尙聞剝啄聲。聊復屣屐迓。子常妙工詩。蘇李掩曹謝。有時醉醪醕。大小翻盞罍。倒牀鼻息惡。喚起對殘燧。復古志尙奇。衆競方獨暇。捫蝨與人言。豈不逢譴訝。崇朝潔腹坐。往往食旁舍。子固業少成。議論媿風雅。嘗聞莊生說。乃慕巨魚化。平居似晏子。志念能自下。而我獨迂疎。通人所譏罵。正賴觴詠中。得意自陶寫。留連接清晤。欲起不能罷。是時春雨餘。桑密鳩鳴野。城隅園圃近。欵段亦時跨。便恐百卉闌。隗晚侵朱夏。人生形骸累。未免俗情詐。此理豈外求。猶煩詹尹卦。清風穆然在。如渴啗甘蔗。況我自散材。谷口窮耕者。去年秋不在。匏瓠緣庭架。低回迫榮利。妻子憐王霸。橫經亦彊顏。已取或人捨。但慮宰我愚。松柏談三社。倏然一室內。黃卷開佳話。尺璧競寸陰。寧復當論價。吟哦愁肝腎。蟋蟀弔長夜。鄙俚頗近情。持用自悲詫。功名與道義。熊掌偕魚炙。二事良難兼。夫子賢點也。

謁岱祠卽事

澤南三百里。極望橫天雲。雲端色凝黛。諦視初可分。崢嶸介丘像。頃刻有變化。慘澹殊明昏。天行帝出震。其位生物元。不周僨西北。川乃東南奔。寧知六鼇死。竟使二山淪。不有是難傾。孰維大塊根。



嘗聞周官說。實惟天帝孫。神靈所鎮守。民物斯芘存。幽明膺一理。有道惟常尊。不覺下馬拜。僮奴亦蹲循。迺知正直理。足使冥頑敦。三王有損益。商人所尊神。明法或不懼。夜行安得逡。以此輔世教。庶幾驅驚民。莫宿太平驛。不眠慮絲棼。明朝好天色。萬象開胚渾。勢橫恆碣盡。支壓齊魯蹲。五色冒日觀。一握通帝閭。恢拓下摧確。青蒼上氤氲。泉石競沮洳。煙嵐互紛綸。高舉躡風海。深蹠蹈火輪。濤波卷堆阜。一一溟渤吞。棊枰視井邑。七箸藏松椿。碧瓦峙雙闕。紅牆繚長闔。願瞻巖闕客。內滌邪垢魂。賜臣登絕頂。一覽神秀原。萬壑射窈窕。三壇轟嶙峋。莽不覩項領。何能窮脰跟。稍稍指鳧繹。依依數亭云。松列大夫爵。羸識將軍墳。瑣屑澗花麗。霏微崖藥嶼。廣大良有以。奇險安足論。瑰詭有形上。頽然德彌惇。得無希夷子。做世逃深蓊。亦有黃冠士。照對如麈麈。此曹嚙草木。語道良未聞。解榻坐中觀。洗心馳大鈞。形氣要得一。不然隨物泯。是事亦姑置。幽尋聊可勤。初疑無字碑。瑩潔誰敢文。又怪玉女井。高絕何由漚。俯穿鬪仙巖。鳥下天壁垠。側度五賢堂。熊經背逡巡。劍石危數履。女蘿柔屢捫。揮斥八極遠。風來袂軒軒。廖廓自無梯。猶疑天可賓。陰谷不敢視。恐落魑魅羣。安得遂獨往。身如黃鵠翻。周流遍五嶽。採掇芝英繁。卽欲憩圓嶠。或當止崑崙。衆真迎我語。一笑顏玉溫。是中差可樂。子胡戀塵樊。答此太遺物。身閒猶事君。重華迹已遠。秦漢事方煩。成功屬吾宋。五禮垂後昆。皇帝二載春。臣備太史員。紬繹自帝典。頗識康哉言。泥金白玉字。願頌無前勳。有志類韓愈。無書愧文園。臣髮將雪素。臣心猶日暎。今此在林藪。跳身同猱猿。徒觀衆山小。愁絕下天門。



遊信州南巖

南巖夫何爲。山作天倚蓋。山南豁山腹。飛頂覆其外。初如鵬將翔。膺擊羣麓背。乍似海大魚。呀口噉而噉。當空橫廣額。架屋喉舌內。仰窺駭憑凌。俯進愁壓墜。嘗聆釋氏說。仰覆各世界。千間未可著。五畝良不隘。清冷氣射人。熱惱從此潰。崖奔木疎瘦。谷遠鳥幽怪。問僧何年居。投老四五輩。問客何人來。官滿或一再。而予與二子。高興偶相戒。松舟下清江。毛髮數鰕蟹。藍輿上峻嶺。幢節望杉檜。李侯助門胄。文彩山作繪。趙君儒林孫。嫺美蘭結珮。不爲城郭遊。繼月此于邁。寧知老逾拙。意在精賞退。得居溪南山。食飲與山對。夔魍入奧突。雲雨出巾袖。古人戒賤目。慣覩誰復貴。顧此誠未逢。欣然與心會。彭湖兩崖蹙。泉作一線霈。禪月古臺空。靈山自明晦。搜奇獲三勝。趣嬾同一慨。但憂久聱牙。尙喜無蒂芥。平生所驅使。詩酒俱好在。天涯得吾侶。物外從所快。便欲登赤城。一觀天宇大。

再次韻文潛病起

淮浦見之子。春風初策名。頗訝謫仙人。有籍白玉京。晚遇廣文直。老交心愈傾。同升芸香府。偶坐華髮生。斯人自龍性。意變難章程。耆酒不疵吝。身如秋葉輕。自言士處世。何必冰雪清。交遊滿臺省。毀譽半王城。不肯效俯仰。畏高侮鰥惇。常思老伊潁。紫蟹羞吳杭。我輒抵掌和。音同磬隨笙。小人奉慈親。皆嘗小人羹。寒衣婦補綻。學績女娉婷。日欲江海去。心期楊柳青。衆木構大廈。豫章倚孤撐。如子足醫國。可容移疾行。



丹書紫皇告。玉篆五嶽形。何必陶隱居。吞霞養純精。訪道自素約。諧心期莫齡。但恐牽俗緣。志大功不成。息交屏妻子。此語不須驚。

送學生李公裕兄弟赴省集

閉門圍火談。開戶雪一尺。黃昏具盃酒。知君遠行役。君家三兄弟。頗謂各無敵。容父學知方。大道通四驛。吉父尤頡頏。天池觀水擊。仁父少而奇。乃是夜光璧。李侯有此子。便可臥安席。家居樂與餌。聊以止過客。豈無一束芻。空谷不可食。宵人操寵利。徒手捕蜴蜥。公等寧復然。烏黑鵠自白。屠龍業有用。未厭所從僻。富貴念昔時。城東雪中跡。

題四弟以道橫軸畫

黃葉滿青山。枯蒲靜寒水。鳧鴈下坡塍。牛羊散墟里。擔穫莫來歸。兒迎婦窺籬。虎頭無骨相。田野有餘思。同畢公叔飲城東

西城昔相值。桃初兩三紅。翩翩鶩長陌。春風搖馬鬃。後君歸幾日。游絮已濛濛。解鞍不待憩。相命古原東。芍藥雖俗花。狂姿幸時供。平生於知己。千過不一逢。感君欲開口。清洩出霑胸。君如陶淵明。不爲五斗恭。胡爲青綸上。朱墨紛外蒙。棄官能從我。短後追田翁。銅斗釀秫麥。竹枝弋鳧鴻。何必悲無衣。緼屨聊御冬。九辯太高潔。五噫苦羈窮。置此無滑和。天情反其中。市藥非市名。名聞藥何庸。十漿饋五漿。猶畏聞者從。



如何艷城畔。夜夜生長虹。

次韻四弟以道十二弟叔與法王唱和兼示无斃弟二首。

少時勇遊山。說山喜動色。中年謫南方。廬阜得深歷。當時不類謫。忘腰帶之適。怪人肝鬲異。破賊喜折屐。只今竄林下。織衣而耕食。緬懷茲兩士。吾宗氣相得。吾春種桃時。子曉尋嵩日。似聞黃面子。爲採烏頭出。去年陟岱宗。一士世莫識。天門邀之下。傾倒意已極。斯人與人異。龍虎兩超忽。重尋亦無路。顛雨石崖坼。吾人伯仲間。一語可物色。氣自寡所諧。窮乃足所歷。家風藐五世。不肯適人適。意行無險易。又跣不著屐。文詞如苦李。慘腹人莫食。猶矜不傳妙。坐恐兒曹得。學憐新又新。老奈日復日。伯以最恬愉。何由採之出。无斃能寡言。猶堪謝前識。叔與氣尙豪。搯頤視屋極。斯文惡表襮。枯魚戒所忽。應如魯宮籥。藏壁俟其坼。

北京學直舍對客

鳥聲落簷間。竹色在戶外。解屣置遺前。放杖當椅背。默然仰棟時。往與古初會。有時遺坐客。十問不一對。尙因呼乃覺。笑自謝頑昧。知非慕蘧子。事去等蜩蛻。一生所未免。飲食與眠睡。所以更頽然。可樂本非內。有心欲何用。橋起則形累。賴客同門生。曠蕩乃不愧。

送君

送君上馬時。不道朝鑪燠。春風入木心。皮膚發紅綠。春風良易莫。那得勤行路。且莫望南窗。胡蝶飛無數。



上馬

上馬笑屬君。歸期在十日。來時草白芽。歸時青鬱鬱。來噴馬蹄急。歸噴馬蹄緩。人心自如此。馬蹄終不變。

贈文潛甥楊克一學文與可畫竹求詩

與可畫竹時。胸中有成竹。經營似春雨。滋長地中綠。興來雷出土。萬籟起崖谷。君今似與可。神會久已熟。吾觀古管葛。王霸在心曲。遭時見毫髮。便可驚世俗。文章亦技爾。詎可枝葉續。穿楊有先中。未發猿擁木。詞林君張勇。此理妙觀燭。君從問輪扁。何用知聖讀。

補樂府三首

荳葉黃

蒹葭蒼。荳葉黃。南村不見岡。北村十頃疆。東家車滿箱。西家未上場。荳葉黃。野離離。鼠窟之。兔入畦。豕母從豚兒。豕啼豚咿咿。銜角復銜其。荳葉黃。穀又熟。翁媪衰。舖糜粥。荳葉黃。葉黃不獨荳。白黍堪作酒。瓠大棗紅皺。荳葉黃。穰穰何膻膻。腰鎌獨健婦。大男往何許。官家教弓刀。要汝殺賊去。

漁家傲

漁家人言傲。城市未曾到。生理自江湖。那知城市道。晴日七八船。熙然在清川。但見笑相屬。不省歌何曲。忽然四散歸。遠處滄洲微。或云後車載。藏去無復在。至老不曲躬。羊裘行澤中。



御街行

雙闕齊紫清。馳道直如線。煌煌塵內客。相逢不相見。上有高槐枝。下有清漣漪。朱欄夾兩邊。貴者中道馳。借問煌煌子。中道誰行此。且復就下論。驄馬知雜事。官卑有常度。那得行同路。相效良獨難。且復東西去。

和關彥遠秋風吹我衣

海中羣魚化黃雀。林鳥移巢避歲惡。鄴王城上秋風驚。昔時城中鄴王第。只今蔓草無人行。但見黃河咆哮奔碣石。秋風吹灘起沙礫。翩翩動衣裳。游子悲故鄉。忽憶若耶溪頭采薪鄭巨君。南風溪頭曉。北風溪頭昏。一行作吏。此事便廢。夢中葉落。覺有歸意。歸歟歸歟。吾黨成斐然。君今生二毛。我亦非少年。胡爲車如鷄。栖鄴城裏。朝風吹馬鬃。莫風吹馬尾。與人三歲居。如何連屋似千里。我則不狂。曾謂吾狂。不吾知。亦何傷。安能戶三尺。喙家一吭。人亦有言。人各有志。吞若雲夢者八九。長劍耿介倚天外。有如陳仲舉。庭宇亦不治。吾乃今知貴。不若賤。無憂。富不若貧。無求。負日之燠。吾重裘。芹子之飫。吾食牛。心戰故臞。得道故肥。吾封侯。匹夫懷璧。將誰尤。歸歟歸歟。豈無揚雄宅。一區舍前。青山木扶疎。舍後流水有菰蒲。今我不樂。日月除。尺則不足。寸有餘。七十二鑽。莫能免豫。且無所可用。乃有百歲樗。龔生竟天天。年非吾徒。

開梅山

開梅山。梅山開自熙寧之五年。其初連峯上參天。巒崖盤嶽閔羣蠻。南北之帝鑿混元。此山不圯藏雲煙。



躋攀鳥道出蒼蔚。下視蛇脊相夤緣。相夤緣。窮南山。南山石室大如屋。黃閔之記盤瓠行跡。今依然。高辛氏時。北有犬戎寇國。中下令購頭首。妻以少女。金盈斗。遍國無人有畜狗。厥初得之。病耳婦。以盤覆瓠。化而走。堪嗟吳將軍。屈死狝狝口。帝皇下令萬國同。事成違信道不容。竟以女妻之。狗乃負走。逃中山崖。幽絕不復人跡通。帝雖悲思深。往求輒遇雨與風。更爲獨力之衣。短後裾。六男六女相婚姻。木皮草實五色文。武溪赤髀皆子孫。侏離其聲異言語。情黠貌癡喜安土。自以吾父有功母帝女。淩夷夏商間。稍稍病侵侮。周宣昔中興。方叔幾振旅。春秋絕筆逮戰國。一負一勝安可數。邇來梅山特險阻。黃茅竹箭霑霧雨。南人顛踣斃溪弩。據關守隘類穴鼠。一夫當其阨。萬衆莫能武。欲知梅山開。誰施神禹斧。大使身服儒。賓客盈幕府。檄傳徭初疑。叩馬卒歡舞。坦然無障塞。土石填溪渚。伊川被髮祭。一變卒爲虜。今雖關梁通。失制後誰禦。開梅山。開山易。防獠難。不如昔人閉玉關。

富春行贈范振

錢塘江北百里餘。漲沙不復生菰蒲。沙田老桑出葉麤。江潮打根根半枯。八月九月秋風惡。風高駕潮晚不落。鼓聲瑟瑟櫓咿喔。爭湊富春城下泊。君家茅屋並城樓。不出山行不記秋。越船吳帆亦何故。今年明年來復去。

胡戢秀才效歐陽公集古作琬琰堂



君不見廬陵公。往爲學士修書日。詔畀千金訪遺逸。遺文逸字往往出。故都易姓幾兵火。量臀鼎腹細詰。拙道人岫嶼空有聞。丘陵仙鬼事恍惚。共和十鼓記亡一。嶧山肉在無復骨。雲陽八體又瓜剖。至使漢童訛尉律。世儒詭正何足臧。公家安取千軸藏。仲尼猶及史之闕。有馬借人吾敢忘。題籤甲乙潁水陽。後來胡君癖膏肓。傾家自構琬琰堂。搜羅近出補厥亡。荒林圯冢見未嘗。南觀禹穴計渺茫。閉門睥睨在一牀。常恨平生好古家無力。騎馬蹊田觀斷刻。中郎二字煩走驛。率更三日勞野食。長年囊褚況易擲。兒作摹朱婦遮壁。願從胡君丐無有。十百數中聊取仿。胡君今逸民。盱眙不見十五春。坐令鉛槧老壯士。朝廷豈無憂國人。曩時豪氣今雖在。會面只謀千日醉。聽君汗漫馳古先。世事無何付蟬蛻。

黃河

黃河齧小吳。天漢失龜鼈。靈原潭下藕爛死。只有菖蒲不生節。白馬橋邊迎送胡。冀州斷道無來車。新隄築得高嶺嶮。舊隄杵聲未可絕。

酬李唐臣贈山水短軸李爲刑曹杜君章知賞。

大山宮。小山霍。欲識山高觀石腳。大波爲瀾。小波爲淪。欲知水深觀水津。營丘於此意獨親。杜侯所與復有人。不見李侯今五載。苦向營丘有餘態。齊紈如雪吳刀裁。小毫束筍縑囊開。經營初似雲煙合。揮灑忽如風雨來。蒼梧決漭天無日。深巖老樹洪濤入。榛林闔漠猿狖寒。苔蘚侵淫螺蚌溼。紛紛禽散江干沙。有



風北來吹蒹葭。前洲後渚相隨沒。行子漁人歸徑失。李侯此筆良已奇。我聞李侯家朔垂。跨河而北寧有之。曷不南遊觀禹穴。梅梁鑱澀萍滿皮。神物變化當若斯。元君畫史雖天與。我論絕藝無今古。張顛草書要劍舞。得意可無山水助。他日李侯人益慕。

跋遮曲

君不見魯中羣兒歌跋遮。跋遮跋遮何語耶。吳歛越吟初不省。恐自塞北傳胡笳。跋遮胡爲樂中華。試歌河漲水漸尖車。河中耕泥春種麻。麻生三歲不開花。腰菱兩角黑如鴉。漁父笑且語。誰能跋遮舞。君不見前年大旱河草黃。草中魚子化飛蝗。又不見往年大雨雨決渠。渠中朽瓜生老魚。蝗飛食場穀。擊鼓煩趁撲。我家家具如笱束。今年梁山撓濁淤。兒無鋤。麻姑來。漁荷鋤。往賣鋤。買網空市無。丁丁斲舩斲屋樞。艇子如星喚施罟。夜唱跋遮曲。羣鳴起白鳧。

贈戴嗣良歌時罷洪府監兵過廣陵爲東坡公出所獲西夏刀劍東坡公命作

三郎少日如乳虎。代父搏賊驚山東。硬弓長箭取官職。自說九戰皆先鋒。將軍拳勇饋不繼。痛惜靈武奇謀空。城頭擲揄下俛走。壯士志屈羞填胸。平生山西踏霜雪。洪府下溼號兒童。聞名未識二十載。初見長揖東坡公。銳頭短後凜八尺。氣似飲井垂檐虹。只令不語當陣立。望見已是千夫雄。往年身奪五刀劍。名玉所標犀札同。晨朝攜來一府看。竊指私語驚庭中。紅粧擁坐花照酒。青萍拔鞘堂生風。螺旋鋸鏗波起。



脊白蛟雙挾三蒼龍。試人一縷立褫魄。戲客三招森動容。東坡喜爲出好礪。洮鴨綠石如堅銅。收藏入匣人意定。蛾眉稍進琉璃鍾。太平君子尙小恙。戒懼邾小母。莽蜂舞千兩。階庶可觀。跳空七劍。今何庸。我爲蘇公起揚鱗。雅歌緩帶聊堪同。從公請礪歸作硯。聞公嘗諫求邊功。

茗雪行和於潛令毛國華

茗溪清。雪溪綠。溪水灣環繞天目。山間古邑三百家。日出隔溪聞打衙。長官長髯帽烏紗。不曾執板謁大尹。醉臥紫蘭花影斜。紫蘭花開爲誰好。年年歲歲溪南道。不見西陵白髮人。荆江夜雪唱陽春。陽春絕唱和者寡。客醉聞之雙淚灑。夜來魂夢海中山。縹緲雲濤煙浪間。雲濤煙浪不可渡。睡覺秋風落桐樹。秦吉了。秦吉了。言語無人會。無人會得奈君何。且向紫蘭花下醉。

芳儀怨事見虜廷雜記

金陵宮殿春霏微。江南花發鷓鴣飛。風流國主家千口。十五吹簫粉黛稀。滿堂侍酒皆詞客。拭汗爭看平叔白。後庭一曲時事新。揮淚臨江悲去國。令公獻籍朝未央。敕書築第優降王。魏俘曾不輸織室。供奉一官奔武彊。秦淮潮水鍾山樹。塞北江南易懷土。雙燕清秋夢柏梁。吹落天涯猶並羽。相隨未是斷腸悲。黃河應有卻還時。寧知翻手明朝事。咫尺人生不可期。蒼黃三鼓滹沱岸。良人白馬今誰見。國亡家破一身存。薄命如雲信流轉。芳儀加我名字新。教歌遣舞不由人。採珠拾翠衣裳好。深紅退盡驚胡塵。陰山射虎



邊風急。嘈雜琵琶酒闌泣。無言徧數天河星。只有南箕近鄉邑。當時千指渡江來。同苦不知身獨哀。中原骨肉又零落。寄詩黃鵠何當回。生男自有四方志。女子那知出門事。君不見李君椎髻泣窮年。丈夫飄泊猶堪憐。

### 五丈渠

五丈渠。河水齧堤三里餘。懸流下噴水渤潏。訛言相驚有怪物。灤東漁子浮兩舸。清晨徑流雙鬣搖。驚人跳起橫觸島。大鱗十尺長夭矯。殺之信宿不敢言。並村稍稍聞者誼。伐鱗剖肉擔揭去。兩日一村貓犬飫。夜來水泛州西原。青青百頃白波翻。里巫推變咎漁子。豫且賊神實爲此。此邦一年不穀食。賣魚取錢當常職。聞道相家口。津人無敢憑。大魚死。小魚靈。

### 閻子常攜琴入村

閻夫子。通古今。家徒四壁猶一琴。今年二月雨霖霖。喜君壠麥如人深。屋間幽默咸池音。高山流水我非聽。聽我說君辛苦吟。薛老村西十里地。旱日燎原無柳林。芒屨曳杖逐鎌籠。當午未食饑燒心。芸芸麥田翻黃波。蝻蟲盤穗如蝸螺。麥未收打催種荳。屋下跡少田間多。閻夫子。時我過。我與夫子良同科。四體雖勤口舖衆。煮豆然箕窮奈何。人謂君琴語辛苦。此曲無奈傷天和。君不見夫子宋圍不糝猶弦歌。

### 收麥呈王松齡秀才



晁莊寂莫依東山。王莊負郭容往還。東山刺薊深一尺。負郭家近饒盤餐。穿鞵戴笠隨麥隴。旱日炎炎煙燎顏。賤貧辛苦事當爾。君屋鱗鱗三百間。

飲城西贈金鄉宰韓宗恕

大夫盤中定州蓋。三舉檐花舞淩亂。請君行蓋且莫稽。爲君起賦飲城西。城西古道如澗深。東風吹沙不見林。虛堂更覺野原闊。榆柳浩浩波濤吟。雜花一園來遠道。兩株江南梅更好。櫻桃已晚猶爛漫。百株如雪聊可繞。常時東風無此寒。常時諸君無此閒。且看瓶口似魚貫。莫惜面文如纈斑。大夫工爲宋玉賦。思不能涯字無數。秀才酷類東野貧。白屋青山愁曲身。籍咸不肯羞北阮。主簿高材卽仇覽。成詩午景已妍和。罷酒花開應更多。山翁歸不醉。當奈峴山何。

和王仲甫病暑

吳邦憚暑如蜂蠆。河曲還遭長日曬。蔗漿金盃賴蠲煩。內託潛陰數爲敗。黃昏乍快風吹髮。驅拊蚊虻坐明發。青衫主簿氣如雲。茂陵無事悲消渴。望洋河伯何爲者。兩涘無因辨牛馬。何生狂夢涸歸墟。喉舌湯湯未勞瀉。能來一嗽華池津。七椀清風立有神。更尋齒下微妙訣。遣君體適仍魂平。案頭白紙如堆雪。人事紛紛日將月。與君未遇尤四時。利害相磨生內熱。

贈送張愈秀才



秋水幽幽濟河道。君掛蒲帆若飛鳥。西風黃葉滯公車。鷄黍從君懷故廬。男兒自有四方志。世上相期獨榮利。昔時馬周徒步動天子。君今有用當如此。

李成季得閻子常古琴作

昔人流水高山手。此意寧從絃上有。閻侯卷舌臥閻里。意向是中留不朽。似聞綠綺置床頭。暑雨東城無麥秋。趙傳和氏齋五日。吳得湛盧當兩州。李侯得意誇題柱。成詩欲使邀諸路。自有桓山石室彈。深屋時聞繭抽緒。無琴尙可何獨絃。要識精微非度數。人生有累無非失。我欲心灰木爲質。嬾從徽的自凝塵。老向詩書逾愛日。自言結習久難除。猶理斷編尋止息。焦城卜築近連軫。歸約閻侯亦蕭瑟。舊聞君祖課木奴。試買瑕丘百株栗。

同魯直文潛飲刑部杜君章家次封丘杜觀仲韻

廷尉風流才絕塵。最憐高髻歌陽春。兩鬢亦解倚瑟語。催送花前紅袖舞。黃張翰墨海內名。席上生風清夏宇。封丘自倚筆勢豪。不怕當筵賦鸚鵡。對酒含情古所憐。樂事幾時如過雨。阮公鑪邊不擬歸。陸郎班騅無用嘶。長燈照出簾幙外。缺月墮落藩牆西。斗酒雙魚何足貴。李侯氣許山東吏。正須新麵雜青槐。千里紫葍江上來。長船刻玉流霞動。快引不須帆櫓送。自作新詩碧牡丹。箸擊盃翻釵墜鳳。芍藥佳名聞昔人。滿插不辭歸帽重。倒牀任作鼻鳴雷。屋上啼烏還喚夢。



贈麻田山人吳子野

余見待制李公誠之於汶上。蘇密州在焉。始聞子野名。

汶陽我昔見蘇李。人言吳子歸未幾。長嘯春風大澤西。卻望麻田山萬里。不逢鄭老溪上箭。欲致朱公路。傍米今年窮巷絲生髮。馬尾吹風化衣袷。定知赤鯉驀波濤。何意黃冠驚僕妾。琅函萬過陰魄悲。心無丹白鑪生兒。山中種芝豈無侶。成都醉眠未當去。願從王烈或見呼。試訪孫登竟無語。棄家內愧非此流。此身天地一虛舟。未應齒豁塵埃裏。乞與青精救白頭。

送北京學生曹慈明秀才之京師

魏武子孫今寂莫。唐來只有畫將軍。鄴城初見黃須面。尙喜登堂詞若雲。乃公白首圖籍裏。小心恐懼教其子。文章錦心仍繡腑。屠龍殫家安用許。半年繫舩康海門。官忙不共持一樽。岡頭梨花吹欲盡。淮口汴流來正渾。鄙夫日欲向吳越。官滿一封飛魏闕。著書虎觀未敢言。蔽身蟬葉真癡絕。

次韻和趙令僉防禦春日感懷

春塍雪消龜兆坼。凍柳冰蒲俱好色。走馬城東眼乍驚。可憐前日非今日。結交從古天地間。百年誰見一人閒。王城塵土化衣袷。五鼓驅車休夜闌。況我崎嶇二三子。聖恩釋累從甌蠻。雄豪久鍛酒量窄。奕懦新長詩辭慳。王孫物外有高興。數攜王趙兩紅顏。上書自去千牛衛。掛席欲過三神山。灰餘方烈竈下響。霧廓初見岩中斑。醉吟誰共可憐春。江南太守舊詩人。賡酬不減笙磬答。秀發更爲煙霞新。萬卷藏書韋杜



曲憶子陳詩一言足得意鱸魚故未饜多情桃葉應相逐努力閒平盛世名歸及春風雙鬢綠

漫成呈文潛

無心看春只欲坐偶騎馬傍春街行可憐愁以草得暖一寸心從何處生  
十年閉戶不作舞爲客一整紅羅裙莫倚琵琶解寫怨朱簾垂下阿誰聞  
平時無歡苦易醉自怪飲樂顏先醜乃知醉人不是酒真是情多非酒多

吳松道中二首

停舟傍河滸四顧盡荒原日落狐鳴冢天寒犬吠村繫帆凌震澤搶雨入盤門  
悵望夫差事吳山闕楚魂曉路雨蕭蕭江鄉葉正飄天寒鴈聲急歲晚客程遙  
鳥避征帆卻魚驚蕩槳跳孤舟宿何許霜月繫楓橋

濟州道中寄葉助秀才

曉路入西郊新霜着髣毛貧交借羸馬慈母授征袍野靜狐狸出天寒鴈鵠高  
艱難憶親舊清淚漬平臬

原上

閉門遺日月原上感年華久旱無場藿重陽有野花蕭蕭幾家靜脈脈一歧賒  
向晚悠然去秋風馬尾斜

同魯直和普安院壁上蘇公詩

畏暑聊尋寺追涼故遶池雨園鳩喚婦風徑燕將兒散篆縈簾額留雲暗井眉  
龍蛇動屋壁知有長公詩



次韻鄧正字慎思秋日同文館

平生鄧夫子。文墨晚相依。臺閣佳聲在。湖湘爽氣歸。慎思潭人再入館。詩誇束筍密。髮歎耨苗稀。勤苦千秋事。川明水孕璣。

雄深張子句。山水發天光。黃鵠愁嚴道。玄龜困呂梁。愛君豪穎脫。嗟我病倉囊。驥尾何當附。西風萬里長。

屬文潛

蔡侯南國秀。經緯耿昭回。文史蛙生甑。風雲蟄起隈。吾君求助意。之子爲時來。萬縷防秋費。何如一士才。屬天啓

氣入中秋勁。更傳午夜長。青燈蛾舞急。白月鴈啼涼。羈旅生來慣。淹留久卻忘。吟詩酬鄧子。畢昴出東方。  
千秋嶺上

永日倦高躋。盤回四望迷。松根危抱石。嶺路曲隨溪。馬腹飛雲薄。山腰過雨低。陰崖不可度。誰此構長梯。  
送會稽關彥遠罷官河北

君年長我二十五。偶以氣同均。弟彘三歲吹沙禹。河曲一身飛艇越雲門。未緣狗監知才思。端向牛衣無涕痕。秋月圓時應待我。慧林孤磬澹朝曛。

己酉六月。赴上饒之謫。醕臣以詩送行。次韻留別。



小雅思深志不悲。反騷未與昔人違。五車謾苦君何益。三徑都荒我未歸。要過香鑪雙履步。卻從彭蠡一帆飛。它年笑向張公子。應帶煙霞滿客衣。

魚溝懷家

生涯身事任東西。藥笥書囊偶自贖。柳嫩桑柔鴉欲乳。雪消冰動麥初齊。沙頭晚日檣竿直。淮上春風鴈鶩低。歸去未應芳物老。桃花如錦遍松溪。

送曹子方福建轉運判官

談經草檄鬢華生。初擁閩山傳節行。江入桐廬青欲斷。溪從劍浦碧來迎。茶雖戶種租宜薄。鹽不家煎價欲平。要使祈招歌德意。君恩不爲遠人輕。

泗州王諫議明叟留飲

雲水東遊蚤歲懷。半生塵土卻教回。兩行堤柳關心在。一點淮山入眼來。北省主人誇酒好。南風稚子喜帆開。揚州底事牽行色。端爲瓊花芍藥催。

澠池道中寄福昌令張景良通直

十年一夢間湖湘。欲往從之道阻長。可但知君愛彭澤。不應言我薄淮陽。馬穿嶠底流泉白。鳥下關頭落照黃。愁作驛亭寒不寐。懷人思古九迴腸。



次韻邠倅王征夫

函谷鷄鳴滿面塵。夫君泛愛尙爲親。清時有味俱吾黨。黃髮相看更幾人。物理未驚翁喪馬。世情應笑子知津。似聞絕塞風沙苦。只約觥船莫負春。

蠖軒孤坐寄曹南教授八弟

畏暑經旬不涉街。蠖軒孤坐壁生苔。出簷碧筍猶爭長。映戶丹榴故後開。雙蝶風前愁夜去。一蟬雨外送秋來。曹南瘦弟應相憶。白首遷兄未放回。

遊華嶽歸道中望仙掌

深巖踏遍尋歸路。仙掌依然在碧虛。無限遊人重駐馬。豈惟狂客倒騎驢。掛圖天漢朝霞上。落影秦關夕照餘。千古全生纔一士。可憐登覽盡丘墟。希夷祠堂在觀中。

罷蒲乾濠道中寄府教授之道弟

衝寒到郡待花開。花未開時卻遣回。敢意三年容我隱。只如千里訪君來。二嶠穀擊何爲者。五老雲蘿安在哉。更約劖詩猿虎谷。它年重過掃莓苔。

元符戊寅與无斲弟卜居緡城東述情

四海一居何處卜。北窗祇取見家山。要無名利來心曲。便有園林出世間。拙宦莫興三黜歎。老歸未厭百



年閑先君餘慶期之子。吾駕如今不可還。

次韻李秬祥符軒

雲端紅粉拊雕欄。謝守綸巾語笑間。游客乍驚人外境。居僧初識面前山。暫來猶足留公賞。借與真堪著我頑。鈴閣多餘賓從少。誰教餅盎不曾閑。補之自謂。

國子監莫歸

杖屨清晨往。縑囊薄莫歸。閑官廳事冷。蝴蝶上堦飛。

答李令

知音慚李令。問我復何爲。道義惟添睡。功名只有詩。

譙國嘲提壺

何處提壺鳥。荒園自叫春。夕陽深樾裏。持此勸何人。

陌上花事見蘇先生詩。

荆王夢罷已春歸。陌上花隨莫雨飛。卻喚江船人不識。杜秋紅淚滿羅衣。臨安城郭半池臺。曾是香塵撲面來。不見當時翠鞵女。今年陌上又花開。雲母蠻牋作信來。佳人陌上看花回。妾行不似東風急。爲報花須緩緩開。



外舅杜寺丞永城守水作詩寄呈

雪消冰動看通津。草長江南岸岸春。莫唱龍舟五更曲。揚州楊柳解愁人。

約李令

茆檐明月夜蕭蕭。殘雪晶瑩在柳條。獨約城隅閑李令。一盃山芋校離騷。

和胡戢

相逢樽酒未辭深。握手盱眙十載心。車馬淒涼人夜別。出門落月與橫參。聞說歸心已浩然。蘇門況有子雲廬。廣文不去慚官長。繫馬堂階要酒錢。

題工部文侍郎周翰郭熙平遠二首

漁村半落楚江邊。林外秋原雨外天。誰倚竹樓邀大鵬。天涯暮色已蒼然。洞庭木落萬波秋。說與南人亦自愁。欲指吳松何處是。一行征鴈海山頭。

赴廣陵道中三首

醉臥符離太守亭。別都絃筦記曾稱。淮山楊柳春千里。尚有多情憶小勝。南都留守使雙鬢勸酒。小勝其字也。

急鼓鼕鼕下泗州。卻瞻金塔在中流。帆開朝日初生處。船轉春山欲盡頭。

楊柳青青欲哺烏。一春風雨暗隋渠。落帆未覺揚州遠。已喜淮陰見白魚。



揚州雜詠

阜茨村南三里許。春江不隔一程遙。雙堤鬪起如牛角。知是隋家萬里橋。  
龍興寺裏青雲榦。后土祠中白雪葩。五百年間城郭改。空留鴨脚伴瓊花。  
宿采石。追懷沈丘叔父。同應詔。渡此。今二十七年矣。而叔父謝世。補之方遠適。泣涕成篇。  
二十七年前。應詔。黃昏同上木蘭舟。江山依舊人琴寂。白首南遷淚迸流。

題廬山

南康南麓江州北。五百僧房綴蜜脾。盡是廬山佳絕處。不知何處合題詩。

遇赦北歸

山猶故險水猶奔。無復前年濺淚痕。自是人心隨境別。櫓聲帆色盡君恩。

皖口寄懷前大平守陳公度。龍舒人。

常愛東陵早拂衣。我行曾不叩荆扉。憑君天柱峯頭望。看我扁舟幾日歸。

初望廬山

休說江南青未了。一菴一徑可容身。宦程正迫西風急。未是廬山竚足人。

貴溪在信州城南。其水西流七百里入江。



玉山東去不通州。萬壑千巖隘上游。應會逐臣西望意。故教溪水只西流。

泊思禪寺呈廖明略其地蓋干越寺在琵琶洲上

遲君干越思禪寺。彌月忘歸住翠嵐。忽見琵琶洲上月。始驚全室在天南。

將行陪貳車觀燈

行歌紅粉滿城歡。猶作常時五馬看。忽憶使君身是客。一時揮淚逐金鞍。

栗區村與無斃別

十年投分皆卿相。四海論心只弟昆。老憶歸耕困隨牒。春風揮淚栗區村。

題穀熟驛舍二首

驛後新籬接短牆。枯荷衰柳小池塘。倦遊到此忘行路。徙倚軒窗看夕陽。  
一官南北鬢將華。數畝荒池淨水花。掃地開窗置書几。此生隨處便爲家。



# 道鄉詩鈔

鄒浩字志完。常州晉陵人。第進士。爲太常博士。哲宗擢爲右正言。時廢孟后立賢妃劉氏。浩切諫削官。羈管新州。徽宗立。召還復官。問諫草安在。曰焚之矣。退告陳瓘曰。禍在此乎。異日奸人妄出一緘。則不可復辨也。蔡京用事。果爲僞疏陷之。遂謫衡州。尋竄昭州。五年得歸。復直龍圖閣。病卒。高宗贈寶文閣直學士。賜諡忠嶺。表歸後。自闢小圃。號曰道鄉。故學者稱道鄉先生。

## 秋蠅

秋風快如刀。着木木欲折。蕃鮮轉淒淒。入眼無一悅。青蠅獨何爲。飛鳴猶未滅。造化本無私。爾生亦偶竊。念方三伏中。日車午停轍。下照人世間。何異紅爐熱。勁鳥倦戢翼。猶獸喘吐舌。惟人於此時。體懈劇疲茶。虛堂幸可逃。枕簟隨意設。好睡邊韶同。素懶嵇康埒。更此值清涼。酣寢謂須決。雙睫纔欲交。汗膚遭爾齧。營營不絕聲。宛類讒口吶。使我寢不安。欲息還復挈。況如一簞貧。未能萬錢歡。園蔬薦脫粟。杯盤殊滅裂。雙筯纔欲拈。咀嚼遭爾餐。適從何處來。食飲汗修潔。使我味不甘。欲嚙還復噎。毆除付疲兵。祇足增跛蹙。宜哉孫權彈。爲爾情激切。期望秋風回。一掃無餘孽。偶此延朝昏。勿謂風不烈。氣候侵凝凜。龍蛇且藏穴。爾形大豆然。豈能堅如鐵。



再酬仲儒

龍團方啓封。數子已驚視。端如肖壁人。騎羊入城肆。又如金谷姿。不合樓前墜。囊衣本酸寒。茶具無一是。紛紛詰鄰家。浪欲學擁鼻。秋空輒雲雷。祕惜乃天意。未敢還巾車。且集諸生試。豈非今年芽。歲月與君異。直須如印刳。詩驛趼來使。念君才患多。落筆有餘思。盈編故可期。河流幾時泚。君應嘲馬肝。不食亦知味。

次韻韓君表雪中感懷

龍衣不解顏。憂民向來急。天高委真符。年豐兆原隰。連山水氣昏。過雲鴈聲澀。先春凌馬奔。投隙作塵入。瀕竹乍蕭蕭。驚風還汲汲。頗輕花鬪狂。肯共雨爭溼。夜半回曉光。木杪森鵠立。開編適吾心。鼓枻輟清集。一飽儻可償。萬事非所及。想見秋稼前。腰鎌荷青笠。

仲益約遊延慶不至作此戲之

出門無他岐。一徑指山麓。餘寒弄晴陰。浙瀝散輕玉。我僕亦賞心。我馬亦飛肉。回首幕中英。文書正拘束。戲督潛亭作春羹。

戲督潛亭作春羹

先生家中餘玉粒。粉以爲餅陪春羹。春羹品物謝時味。江流暖泛園中英。晴窗對案忽舉首。徑走長鬚呼友生。襄陽大夫腹如鼎。一著九牛猶未盈。懽然放筯卽過我。自嘆珍庖逾大烹。且言初意亦在我。屬我府事留西城。先生飯不飯俗客。若苦轉眄相倒傾。東風雕剝物物好。槎頭縮頸尾不赧。藥苗蔬甲破土出。似



與米齊爭功名。應憐十載瘦藜莧。爲我一除饑腸鳴。

潛亨既見和再作此贈之

不作苟見如君平。不以禮屈如樊英。屢屢堅臥三十載。凜凜風聲人自傾。牆東牆西過高馬。往往愧汗面發頰。豈知嗜欲極豺虎。白晝擇肉無厭盈。有時一飯稔奇禍。他年五鼎還遭烹。狡兔未滅黃犬在。突兀上蔡空前城。先生謝去既飽德。鼓腹之趣終難名。更要我輩集匙筯。風雨不變如鷄鳴。自憐頭額乏奇表。幾與齏鹽同此生。不愁捩手遂傾覆。只愁未至聞夏羹。

嘲仲益

春時殖蘭甚勤。比新東軒。遂悉鋤去。或者訊笑。則曰予將易竹於此。作此戲之。

低簷廕茅竹。陋如野人居。夫子筦爾笑。曰此真吾廬。庭前鬱喬木。庭後猶榛蕪。芟削隨手淨。春蘭殖扶疎。光影動窗几。馨香襲文書。皎然紉佩心。邂逅同三閭。爾來基構新。百事凌往初。突兀煥華屋。茅竹掃莫餘。雙楠庭之珍。斬伐殊榮枯。要知碧油幢。特立當階除。念念入勳業。不與蓬華俱。蘭雖不生門。安能追誅鋤。剖琴如剖薪。烹鶴如烹魚。珠玉抵飛鳥。罇鍾委洪爐。逝矣覆轍存。來車猶此涂。尙欲取修竹。永以娛朝晡。問竹竹無言。冷風一虛徐。

別零陵

零陵距中邦。道阻五千里。我以放逐來。本非心樂只。身止高山巔。忽忽彌半禩。人情久自親。況復多可喜。



坐使故鄉念如火沃之水罪大不得留。今茲動行李。昭州雖嶺南。流寓蓋均耳。儻未還庭闈。在彼猶在此。胡然當作離。耿耿殊不已。物我要兼忘。咄哉從此始。

詠路

赤路如龍蛇。不知幾千丈。出沒山水間。一下復一上。伊予獨何爲。與之同俯仰。

聞彥和過桂州

人臣難有己。況復顧其家。忘家以徇國。致主爲助華。割愛非不仁。成功詎能加。御史殿中傑。指摘一旦生。疵瑕昔如鵠矯雲。今如兔罹罟。省符到房陵。驅逐殊喧譁。卽日出門來。形影自天涯。羈凰攜衆雛。驚散隨風沙。渺漭失處所。何由書報嘉。君心固已定。聞者空傷嗟。

大雨中接憲使因成小詩呈陽先生

霜風折木雨如傾。斂板泥中厮役并。遙想先生鼓琴罷。觀書正傍短燈檠。

二月十五日朝拜建隆橋上偶作

單衣迎犯曉風清。斗柄回南月尙明。柳密行人看不見。輪蹄相屬但聞聲。

湖上雜詠

荷葉如錢三月時。幅巾藜杖一追隨。爾來勝事知多少。惟有風標公子知。杜牧之以白鷺爲風標公子。



何處清風作晚涼。解衣相與面滄浪。青萍紫荇令人恨。遮卻琉璃萬頃光。  
華亭標格本青雲。邂逅西湖秋復春。作意一聲君會否。鷓鴣集處是真人。  
疾病經旬厭藥杯。喜君折簡傍湖來。濃雲幾敗乃翁事。賴有南風爲約開。  
穰東驛壁間有詩因次其韻

早行

朝來由氣銳。前程入馬蹄。天形隨月見。斗柄傍人低。路轉纔縈白。沙平豈辨泥。  
露零欺鬢髮。犬吠隔蒿藜。恍惚南柯夢。參差逢氏迷。比經十里堠。始報一聲雞。  
似脫關中日。如趨圯下蹊。脩真空有術。習懶信無梯。行李幾時北。武當猶在西。  
誰知貴公子。角枕正清閨。

順陽東山下小池用西伏牛亭。謝公定韻。

行盡江山知幾重。山前池沼尙殘紅。塵埃滿眼欣相見。駐馬垂楊夾岸風。

將到均州

武當孤壘插天西。一見都忘渴與饑。倦客惟貪早休歇。不知匏繫未成歸。

入試院呈同事章顯父推官及監試柴承之朝奉



漢江洶洶不知休。江上譙門鼓角秋。匹馬崎嶇隨國事。同心邂逅得儒流。何妨蟋蟀牀頭急。況是芭蕉雨脚收。別乘端容共蕭散。從今相與傲浮丘。

鄰家集射

牆東金鼓不停聲。知是將軍奕世孫。莫浪鳴弓向飛鴈。一年一度到中原。

雨中

五月沉陰久不開。冷風吹雨滿天街。老農且莫愁蠶麥。丞相祈晴已宿齋。

謝潛亨惠芸香紫桃

暑窗已覺書生蠹。饑腹還驚雨後雷。珍重先生解人意。芸香桃實一時來。

聞存之遊京師且邸報達官有薦之者

昨來不肯聽朝鷄。乞得真宮即日歸。老衲蒲團閑共倚。少師玉麈醉同揮。誰知捷徑嵩山在。未覺心馳魏闕非。綠鴨陂中釣竿手。只應從此叩黃扉。存之曾有詩云。從來釣竿手。不解叩黃扉。

仁老寄墨梅

前年謫向新州去。嶺上寒梅正作花。今日霜縑玩標格。宛然風外數枝斜。

懷何伯震



我別家時君在牀。後來南北兩相忘。直饒伏枕到新歲。也勝投身居瘴鄉。孤節未嘗交世俗。清貧何以度星霜。皇天默相誰窺得。看取他年吾道光。

懷張晉卿

年少東鄰新親家。奮然鱗鬣脫泥沙。傳聞昨者數時弊。想見邇來雙鬢華。局上光陰聊鬪馬。盃中意氣莫生蛇。江鱸已過河魴出。准擬從君烹荻芽。

又得敷文書

一封黃勅下天關。嶺表湖南釋舊跼。吏部回頭真可笑。拾遺作伴竟同還。張公洞裏花流水。揚子江邊雪滿山。更約家居多暇日。相從莫遣鬢毛斑。

送王裘仲侍親赴闕

置榻初相得。膏車忽起行。秋風無限事。春酒不勝情。原憲何曾病。丘明竟有聲。從容湖上語。它日看功成。







# 淮海集鈔

秦觀字少游。一字太虛。揚州高郵人。豪雋慷慨。溢於文詞。舉進士不中。盛氣好奇。讀兵家書。見蘇軾於徐。爲黃樓賦。軾以爲有屈宋才。介其詩於王安石。亦謂清新如鮑謝。軾勉以應舉。爲親養。始登第。筮仕。元祐初。軾以賢良方正薦於朝。除祕書正字。兼國史院編脩官。日有研墨器幣之賜。紹聖初。坐黨籍。出判杭州。以增損實錄。貶監處州酒稅。使者承風旨。伺過失。無所得。則以謁告寫佛書爲罪。削秩編管橫州。徙雷州。徽宗放還。至藤州。出遊華光亭。爲客道夢中長短句。索水飲。笑視水而卒。朱子謂渠詩。合下得句便巧。呂居仁云。少游過嶺後詩。嚴重高古。自成一家。故當時於蘇門並稱秦晁。晁以氣勝。則灑衍而新崛。秦以韻勝。則追琢而淳泓。要其體格在伯仲。而晁爲雄大矣。

## 泊吳興觀音院

金刹負城闔。閬然美栖止。卞山直穹窿。茗水相依倚。霜檜鬱冥冥。海棕鮮嶷嶷。廣除庇夏陰。飛棟明朝晷。溪光鳧鷖邊。天色菰蒲裏。緒風傳晝焚。壁月窺夜禮。洩雲彗層空。規荷鑑幽泚。舳舻煙際下。鍾磬林端起。聳牙戲清深。嶽峯撲空紫。所遇信悠然。此生如寄耳。志士耻溝瀆。征夫念桑梓。攬衣軒楹間。歎歌何窮已。

## 田居四首



雞號四鄰起。結束赴中原。戒婦預爲黍。呼兒隨掩門。犁鉏帶晨景。道路更笑喧。宿潦濯芒屨。野芳簪髻根。霽色披宵靄。春空正鮮繁。辛夷茂橫阜。錦雉嬌空園。少壯已雲趨。伶俜尙鴟蹲。蟹黃經雨潤。野馬從風犇。材落次第集。隔塍致寒暄。眷言月占好。努力競晨昏。

入夏桑柘稠。陰陰翳虛落。新麥已登場。餘蠶猶占箔。隆曦破曾陰。霽靄收遠壑。雌蜺臥淪漪。鮮飈泛藜薄。林深鳥更鳴。水漫魚知樂。羸老厭煩歎。解衣屢盤礴。蔭樹濯涼颺。起行遺帶索。家婦餉初還。丁男耘有託。倒筒備青錢。鹽茗空垂橐。明日輸絹租。鄰兒入城郭。

昔我蒔青秧。廉纖屬梅雨。及茲欲成穗。已復頽星暑。遲暮易昏晨。搖落多砧杵。村迥少過從。客來旋炊黍。興發卽杖藜。未嘗先處所。褰裳涉淺瀨。矯首沒孤羽。藪祠土鼓悲。野埭鷓鴣舞。雉子隨販夫。老翁拜巫女。辛勤一作艱難稼穡事。惻愴田疇語。得穀不敢儲。催科吏傍午。

嚴冬百草枯。鄰曲富休暇。土井時一汲。柴車久停駕。寥寥場圃空。跼跼烏鳶下。孤榜傍橫塘。喧春起旁舍。田家重農隙。翁媪相邀迓。班坐醺酒醪。一行三四謝。陶盤奉旨蓄。竹筴羞雞炙。飲酣更獻酬。語闕或悲咤。悠悠燈火暗。刺刺風飈射。客散靜柴門。星蟾耿寒夜。富疑作當。

寄題傅欽之草堂

河陽有洑流。經營太行根。盛德不終晦。發爲清濟源。斯堂濟源上。太行正當門。仰視浮雲作。俯窺流水犇。



脩竹帶藩籬。百禽鳴朝噉。相望有盤谷。李愿故居存。主人國之老。實惟商巖孫。班行昔供奉。亟進逆耳言。天子色爲動。羣公聲亦吞。蕭條冰霜際。不改白玉溫。出處士所重。其微難具論。公勿思草堂。朝廷待公尊。

次韻邢敦夫秋懷十首以微雲淡河漢疎雨滴梧桐爲韻。

驅車陟高丘。卻望大梁圻。馳道入雙闕。勾陳連太微。夷門壯下屬。清洛相因依。美哉吾黨士。皋高良可希。暮有二客至。俱以能禪聞。一枝惠林出。一派智海分。言各不相可。往來劇絲棼。謝客姑舍是。妨余醉看雲。昔者曾中書。門戶實難瞰。筆勢如長淮。初源可觴濫。經營終入海。欲語焉能暫。斯人今則亡。悲歌風慘澹。渤海有巨鼈。其顛冠嵯峩。宿昔常小抃。八紘相盪摩。忽遭龍伯人。一舉空潮波。取皮煎作膠。清此崑崙河。蝮蛇初螫手。壯士斷其腕。豈不悲毀傷。所卹在軀幹。西羌沙鹵地。置戍或煩漢。雞肋不足云。阿瞞妙思算。湯湯辟靡流。中有學子居。但說若稽古。言猶三萬餘。來者轉相祖。詞林日凋疎。稍喜績溪令。入校天祿書。匠氏構明堂。百材入斤斧。儻非豫章棟。冗長亦焉取。英英范與蘇。器識兼文武。胡爲先一州。不用作霖雨。憬彼高句麗。來脩裔夷職。天都富如海。勞汝送涓滴。軸鱸尾相銜。遠近困供億。止沸當絕薪。揚湯百無益。祖宗舉賢良。充富多名儒。執事惡言者。此科爲之無。雖有仲舒錯。或橫江潭魚。果欲鳴鳳至。還當種椅梧。邢侯秋臥疴。揮毫見深衷。賡者二三子。翕然笙磬同。不爲兒女姿。頗形四方風。屬有山水念。因之絲與桐。

春日雜興十首



飄忽星氣徂。青陽迫遲暮。鳴飛各有適。赤白紛無數。雨砌墮危芳。風軒納飛絮。褰帷香霧橫。岸幘雲峰度。林影舞窗扉。池光染衣履。參差花鳥期。蹭蹬琴觴趣。撫事動幽尋。感時遺近慕。秣馬膏余車。行行不周路。結髮謝外好。僂俛希前修。繆挾江海志。耻爲升斗謀。齟齬歷難刻。晝賤貧多覺。尤發軔背伊闕。解驂憩邗溝。丹鉛費永晷。麴蘖馭深愁。璧月鑒簾櫳。珠星絡梧楸。泯泯渠水駛。霏霏花霧浮。公子悵何許。撫膺徒離憂。潭潭故邑井。猗猗上宮蘭。不食自清潔。莫服更幽閒。志士耻弱植。卷跡甘飢寒。佳晨追長觀。觸物懸悲端。川途眇回遠。經歲曠音翰。豈不慕裘馬。詭得非所安。蟬冕多忧迫。繩樞尠憂患。枉尋竟何補。方枘誠獨難。吳會雖褊小。海濱富奇峰。天雞一號叫。劍戟明遙空。谿谷相徑復。深林杳攢叢。猿吟虎豹啼。雲氣迷西東。中有遯世士。超然闕孤蹤。被蘭服明月。起坐松聲中。夜鍛吸沆瀣。朝琴庇青葱。騎星友元氣。巢許安可同。俛眄區中人。飛埃集毛鋒。問津或不繆。從子遊鴻蒙。東方有美人。容華茂春粲。抱影守單棲。含睇理哀彈。聲意一何切。所歡邈雲漢。徒然事膏沐。孰與徂昏旦。微誠浪自持。嘉月忽復晏。巧轉度虛樞。飛紅觸幽幔。歲歲芳草滋。夜夜明星爛。合并會有時。索居不必歎。寢瘵倦文史。駕言從遨嬉。颺風舉遙淑。規日麗清漪。含桃粲朱實。杜若懷碧滋。娉娉弱絮墮。囿囿文魴馳。明霞廓遠矚。哀禽攪離思。緝草天際合。孤雲川上移。寬閒絕輪鞅。重復多路岐。信美難久佇。歸歟從所治。昔我遊京室。交通五陵間。主客各英妙。袍馬相追攀。千金具飲啜。百金顧吹彈。纓弁羅廣席。當頭舞交竿。



鮮粧耀淥酒。采纈生風瀾。燈燭暗夜艾。士女紛相班。歡娛易徂歇。轉盼如飛翰。蹙蹙負孤願。離離銜永歡。山鳥窺茗飲。簷花笑蔬飧。棄捐勿重陳。事定須蓋棺。

客從遠方來。遺我昭華管。吹之動人心。異境生虛竅。礚礚青嶂橫。泱泱春溜漸。馬蹄交狹邪。車轂錯平坦。士女競芳辰。禽魚蔭修竿。依微認睇笑。淩沒見纖短。停吹歛泯滅。耿耿復空館。靈物信所珍。顧恨知音罕。桃李用事辰。鮮明奪雲綺。繁華一朝去。默默慚杞梓。時徂鷹化鳩。地遷橘爲枳。獨有羨門生。後天猶不死。

猶一作常

藝籍燔祖龍。斯文就淪喪。帝矜黔首愚。諸雋一作雄出相望。楊馬操宏綱。韓柳激頽浪。建安妙謳吟。風概亦超放。玉繩帶華月。豔豔青冥上。奕世希末光。經緯得無妄。兒曹獨何事。詆斥幾覆醬。原心良自誣。猥欲私所向。螳螂拒飛轍。精衛填溟漲。咄咄徒爾爲。車海固無恙。鷓鴣日彫滅。黃口紛冗長。投袂睇層霄。茲懷誰與亮。

同子瞻端午日遊諸寺賦得深字

太史抱孤韻。暢懷在登臨。別乘慚鄒枚。佳辰事幽尋。參差水石瘦。窈窕房櫳深。清磬發疎箔。妙香橫素襟。復登翠堵坡。環回矚嶽崟。雙溪貫城郭。暝色帶孤禽。涼飈動爽籟。薄雨生微陰。塵想澹清漣。牢愁洗芳斟。揮箠訂往古。援毫示來今。悔無刻燭敏。續此金玉音。



寄陳季常

一鉤五十轄。始具任公釣。揭竿趣灌瀆。與爾不同調。先生本西蜀。俠氣見英妙。哀憐世間兒。細黠似黃鷄。侍童雙擢玉。鬢髮光可照。駿馬錦障泥。相隨窮海嶠。平生攜手好。十七登廊廟。小生相吏耶。徒枉尺書召。暮年更折節。學佛得心要。嚮馬放阿樊。幅巾對沉燎。冷冷屋外泉。兀兀原頭燒。欲知山中樂。萬古同一笑。

送少章弟赴仁和主簿

我宗本江南。爲將門列戟。中葉徙淮海。不仕但潛德。先祖實起家。先君始逢掖。議郎爲名士。余亦忝詞客。風流以及汝。三通桂堂籍。汝弱不好弄。文章有新格。久從先生遊。術業良未測。武林一都會。山水富南國。下有賢別駕。上有明方伯。干將入砥礪。驥馱就啣勒。勿矜孔鸞姿。不樂棲枳棘。吳中多高士。往往寄老釋。辯才雖物化。參寥猶夙昔。投閒數訪之。可得三友益。少來輕別離。老去重乖隔。念汝遠行役。惘惘意不懌。道山雖云佳。久寓有飢色。功名已絕意。政苦婚嫁迫。終從大夫議。稅駕邗溝側。追蹤漢兩疎。父子老阡陌。

送李端叔從辟中山

人畏朔風聲。我聞獨寬懷。豈不知凜冽。爲自中山來。端叔天下士。淹留蹇無成。去從中山辟。良亦慰平生。與君英妙時。俠氣上參天。孰云行半百。身世各茫然。當時兒戲念。今日已灰死。著書如結菴。聊以忘憂耳。駸駸歲逾盡。淮海歸無期。功名良獨難。雖成定奚爲。念君遠行役。中夜憂反側。攬衣起成章。贈以當馬策。



次韻夏侯太沖秀才

儒官飽閒散。室若僧房靜。北窗腹便便。支枕看斗柄。或時得名酒。停午猶中聖。醒來復何事。秉筆賦秋興。焉知懶是真。但覺貧非病。茫茫流水意。會有知音聽。鐘鼎與山林。人生各天性。

雷陽書事三首

駱越風俗殊。有疾皆勿藥。束帶趨祀房。瞽史巫紛若。絃歌薦繭栗。奴主洽觴酌。呻吟殊未央。更把雞骨灼。一笛一腰鼓。鳴聲甚悲涼。借問此何爲。居人朝送殤。出郭披莽蒼。磨刀向猪羊。何須作佳事。鬼去百無殃。舊傳日南郡。野女出成羣。此去尙應遠。東門已如雲。蚩氓託絲布。相就通慇懃。可憐秋胡子。不遇卓文君。

海康書事十首

白髮坐鉤黨。南遷海瀕州。灌園以糊口。身自雜蒼頭。籬落秋暑中。碧花蔓牽牛。誰知把鉏人。舊日東陵侯。荔子無幾何。黃柑遽如許。遷臣不惜日。恣意移寒暑。層巢俯雲木。信美非吾土。草芳自有時。鷓鴣何關汝。卜居近流水。小巢依嶽岑。終日數椽間。但聞鳥遺音。鑪香入幽夢。海月明孤斟。鷓鴣一枝足。所恨非故林。培塿無松柏。駕言出焉遊。讀書與意會。卻掃可忘憂。尺蠖以時詘。其信亦非求。得歸良不惡。未歸且淹留。粵女市無常。所至輒成區。一日三四遷。處處售鰕魚。青裙腳不襪。臭味猿與狙。孰云風土惡。白州生綠珠。海康臘己酉。不論冬孟仲。殺牛搗祭鼓。城郭爲沸動。雖非堯曆頒。自我先人用。大笑荆楚人。嘉平獵雲夢。



粲粲菴摩勒。作湯美無有。上客賦驪駒。玉奩開素手。那知蒼梧野。棄置同芻狗。荆山玉抵鵠。此事繇來久。裔上桑柘稀。蠶月不紡績。吳綃與魯縞。取具網船客。一朝南風發。家室相咻迫。半賈鬻我藏。倍稱還君息。一雨復一暘。蒼茫颶風發。怒號兼晝夜。山海爲顛蹶。云何大塊噫。乃爾不可遏。黎明衆竅虛。白日麗空闊。合浦古珠池。一熟胎如山。試問池邊蜺。云今累年閒。豈無明月珍。轉徙溟渤間。何關二千石。時至自當還。

馬上口占二首

向晨結束事長途。利風括面冰在鬚。岡窮得水馬不進。霧暗失道人相呼。悠悠旁舍見汲井。軋軋隔林聞輓車。遊目騁懷自可樂。勿憶鄉縣增煩紆。

霜風稜稜萬木枯。梅花破萼猶含鬚。田家往往事遊獵。追逐狐兔相號呼。微茫山中起狂燒。隱約林梢低日車。馬頭漸覺有佳趣。勿厭溪陌多縈紆。

和黃法曹憶建溪梅花同參寥賦

海陵參軍不枯槁。醉憶梅花愁絕倒。爲憐一樹傍寒溪。花水多情自相惱。清淚班班知有恨。恨春相逢苦不早。甘心結子待君來。洗雨梳風爲誰好。誰云廣平心似鐵。不惜珠璣與揮掃。月沒參橫畫角哀。暗香銷盡令人老。天分四時不相貸。孤芳轉盼同衰草。要須健步遠移歸。亂插繁華向晴昊。

題驪鬘圖



雙瞳夾鏡權協月。尾鬣蕭森澤於髮。鞍銜不施韁復脫。旁無馭者氣騰越。地如砥平丘隴滅。天寒日暮抱  
飢渴。驥首號鳴思一發。超軼絕塵入恍惚。東門金鑄久銷歇。曹霸丹青亦云沒。賴有龍眠戲揮筆。眼前時  
見千里骨。玉臺閭闔相因依。嗟爾龍媒空自奇。鸞旗日行三十里。焉用逐風追電爲。

以蓴薑法魚糟蟹寄子瞻

鮮鯽經年漬醪醪。團臍紫蟹脂填腹。後春蓴苗滑於酥。先社薑芽肥勝肉。鳧卵纍纍何足道。釘餽盤殮亦  
時欲。淮南風俗事瓶罌。方法相傳爲旨蓄。魚鱠蜃醢薦籩豆。山簌溪毛例蒙錄。輒送行庖當擊鮮。澤居備  
禮無麋鹿。

輦下春晴

樓闕過朝雨。參差動霽光。衣冠紛禁路。雲氣繞宮牆。亂絮迷春闊。鶯花困日長。經旬牽酒伴。猶未獻長揚。  
睡起

睡起東軒下。悠悠春緒長。爬搔失幽囀。款欠墮危芳。蛛網留晴絮。蜂房受晚香。欲尋初斷夢。雲霧已冥茫。  
對淮南詔獄

淮海行搖落。文書亦罷休。風霜欺獨宿。燈火伴冥搜。笳動朱樓曉。參橫粉堞秋。更拚飛鏡破。應得大刀頭。  
次韻答米元章



嗜好清無滓。周旋粲有文。揮毫春在手。岸幘海生雲。花鳥空撩我。蓴鱸正屬君。惟應讀雌蜺。差不愧王筠。

宿參寥房

鄉國秋行暮。房櫳日已暝。驚風多犯竹。破月不藏星。鉤箔簷花動。抄書燭燼零。非關相見喜。自是眼長青。

次韻傳道自適兼呈都司芸叟學士

楚國陳夫子。周南頗滯留。弊袍披槁葉。瘦馬兀扁舟。藥餌過三伏。文書散百憂。何人共禪悅。居士有浮休。

遊龍門山次程公韻

路轉橫塘入亂峰。遍尋瀟洒興無窮。樓臺特起喧卑外。村落隨生指點中。溪傍五雲清逗玉。松分八面翠成宮。歸途父老欣相語。今日程公昔謝公。

遊龍瑞宮次程公韻

靈祠真館闕山隈。形勢相高對越臺。莓徑翠依屏上轉。藕花紅繞鑑中開。鶴啣寶箭排煙去。龍護金書帶雨來。夾道萬星攢騎火。滿城爭看使君回。

次韻朱李二君見寄二首

東阡北陌坐淹時。偶爲高風振羽儀。十丈蓮花開處遠。三年楮葉刻成遲。鬢毛但速安仁老。錢粟難輸曼倩飢。尙賴故人遙省憶。發揮春色有新詩。



萬古流空一鳥沈。衣冠常苦事違心。七行俱下知君舊。四者難并笑我今。梅已偷春成國色。雲猶憑臘造天陰。美人綠綺煩遙贈。莫致南金增永吟。

寄題倪敦復北軒

倪郎才韻照冰壺。北向開軒頗自娛。簷度蕙風鳴鵲鷁。壁經梅雨畫蠅螭。觥籌交錯銀河挂。文史縱橫角簟鋪。官舍私居同是漫。莫嗟三徑就荒蕪。

次韻子由題平山堂

棟宇高開古寺間。盡收佳處入雕欄。山浮海上青螺遠。天轉江南碧樹寬。雨檻幽花滋淺淚。風卮清酒漲微瀾。遊人若論登臨美。須作淮東第一觀。

次韻子由題摘星亭迷樓舊址

崑崙左右兩招提。中起孤高雉堞西。不見燒香成宿霧。虛傳裁錦作障泥。螢流花苑飛星亂。蕪滿春城綠髮齊。長憶凭欄風雨後。斷虹明處海天低。

次韻子瞻贈金山寶覺大師

雲峯一變隔炎涼。猶喜重來飯積香。宿鳥水干迎曉鬧。亂帆天際受風忙。青鞋踏雨尋幽徑。朱火籠紗語上方。珍重故人敦妙契。自憐身世兩微茫。



遊鑑湖

畫舫珠簾出繚牆。天風吹到芰荷鄉。水光入座杯盤瑩。花氣侵人笑語香。翡翠側身窺綠酒。蜻蜓偷眼避紅粧。葡萄力緩單衣怯。始信湖中五月涼。

春日寓直有懷參寥

觚稜金爵自峇嶢。藏室春深更寂寥。捫蝨幽花欹露葉。岸巾高柳轉風條。文書几上鬚髯變。鞍馬塵中歲月銷。何日一筇江海上。與君徐步看生潮。

顯之禪老許以草菴見處作詩以約之

橡葉岡頭釋馬銜。區中奇觀得窮探。崖空飛鼠聲相應。江靜羣峯影倒涵。居士碧雲栽秀句。道人哀玉扣清譚。偶成二老風流事。不是三乘宿草菴。

和孫莘老遊龍洞

葦蕭傳火度冥冥。乍入清都醉魄醒。草隱月崖垂鳳尾。風生陰穴帶龍腥。壁間泉貯千鍾碧。門外天橫數尺青。更欲仗筇留頃刻。卻疑朝市已千齡。

西城宴集元祐七年三月上巳詔賜館閣官花酒以中澣日遊金明池瓊林院又會於國夫人

園會者二十有六人二首



春溜泱泱初滿池。晨光欲轉萬年枝。樓臺四望煙雲合。簾幕千家錦繡垂。風過忽聞花外笑。日長時奏水中嬉。太平誰謂全無象。寓在羣仙把酒時。次王敏中少監韻。

宜秋門外喜參尋。豪竹哀絲發妙音。金爵日邊棲壯麗。彩虹天際臥清深。已煩逸少書陳迹。更屬相如賦上林。猶恨真人足官府。不如魚鳥自飛沈。次王仲至侍郎韻。

寄新息王令藏春塢

令尹才高寺爲空。歲時行樂與民同。旋開小塢藏春色。更製新聲寫土風。客向罇前忘爾汝。路穿花去失西東。無言嬌女今焉在。桃李相傳恨未窮。

寄題趙侯澄碧軒

風流公子四難并。更引清漪作小亭。潤及玉階春漲雨。光浮藻井夜涵星。捲簾几硯成圖畫。倚檻鬢鬢入鏡屏。何日解衣容借榻。臥聽螭口瀉泠泠。

寄張文潛右史

解手亭臯纔幾月。春風已復動林塘。稍遷右史公何忝。初閱除書國爲狂。日出想驚儒發冢。風行應罷女爭桑。東坡手種千株柳。聞說邦人比召棠。

次韻太守向公登樓眺望二首



茫茫汝水抱城根。野色偷春入燒痕。千點湘妃枝上淚。一聲杜宇水邊魂。遙憐鴻隙陂穿路。尙想元和賊負恩。紛堞女牆都已盡。恍如陶侃夢天門。

庖煙起處認孤村。天色清寒不見痕。車網湖邊梅濺淚。壺公祠畔月銷魂。封疆盡是春秋國。廟食多懷將相恩。試問李斯長嘆後。誰牽黃犬出東門。

寄錢節時節出爲揚州從事。新錄兼簡參寥。

論月柴門不浪開。命車良爲故人來。茫然極目春千里。尙想愁腸日九迴。綠水池邊聊復爾。黃梁枕上信悠哉。何時共約參寥子。自攜青菁作飯材。

贈劉使君景文

落落衣冠八尺雄。魚符新賜大河東。穰苴兵法由司馬。曹植詩原出國風。拈筆古心生篆刻。引觴俠氣上雲空。石渠病客君應笑。手校黃書兩鬢蓬。

答龔深之

深巷芽簷日漸長。臥看花鳥競朝陽。惜無好事攜罇酒。賴有鄰家振燭光。尙友頗存書萬卷。封侯正闕木千章。錯刀錦段相仍至。小子都忘進取狂。

答曾存之



環堵蕭然汝水隈。孤懷炯炯向誰開。青春不覺書邊過。白髮無端鏡上來。祭竈請鄰聊復爾。賣刀買犢豈難哉。故人休說封侯事。歸釣江天有舊臺。

次韻裴仲謨和何先輩

汝南古郡寡參尋。兀兀長如鶴在陰。支枕星河橫醉後。入簾風絮報春深。青山未落詩人手。白髮誰知國士心。多謝名郎傳綠綺。愧無佳句比南金。

次韻劉遜父以寧齋詩二軸作以還之

揚舲偶過海邊州。一見名郎破百憂。荀氏諸龍俱俊偉。河東小鳳最風流。明珠白璧堪投報。細草幽花入獻酬。別駕舊齋何足念。文昌新府待公遊。

次韻宋履中近謁大慶退食館中

翠華初到殿中間。三館諸儒共一班。迎謁曉延清蹕近。退穿春仗綵旛閒。病來怕飲東西玉。老去慚陪大小山。知續春明退朝錄。借觀當奉一鷗還。

與鄧慎思沐於啓聖遇李端叔

羸兵瘦馬犯黃塵。自笑區區夢裏身。不是對花能伏老。自緣無酒可澆春。校書天祿陪羣彥。晞髮陽阿遇故人。三百六旬如此少。更添香火坐逡巡。



會蓬萊閣

冠裳蓋坐灑清風。軒外時聞韻籟龍。人面春生紅玉液。銀盤煙覆紫駝峯。天涵秋色山山共。樹攬鄉思葉葉重。更欲買船江北去。爲懷明德更從容。

與李端叔遊智海用前韻

點目誰能化兩龍。超然相見古人風。紅塵稍與僧家遠。白髮偏於我輩公。休計浮名千載後。且欣湯餅一杯同。何時並築邗溝上。引水澆花半畝宮。

九月八日夜大風雨寄王定國

長年身外事都捐。節物驚心一悵然。正是山川秋入夢。可堪風雨夜連天。桐梢撼撼增悽斷。燈燼飛飛落小圓。湔洗此情須痛飲。明朝試就酒中仙。

寧浦書事六首

揮汗讀書不已。人皆怪我何求。我豈更求榮達。日長聊以銷憂。魚稻有如淮右。溪山宛類江南。自是遷臣多病。非干此地煙嵐。南土四時盡熱。愁人日夜俱長。安得此身如石。一齊忘了家鄉。洛邑太師奄謝。龍川僕射云亡。他日巋然獨在。不知誰似靈光。



身與杖藜爲二。對月和影成三。骨肉未知消息。人生到此何堪。寒暑更拚三十。同歸滅盡無疑。縱復玉關生入。何殊死葬蠻夷。

泗洲東城晚望

渺渺孤城白水環。舳舻人語夕霏間。林梢一抹青如畫。應是淮流轉處山。

次韻參寥見別

爐香冉冉紆寒穗。篝火熒熒擢夜芒。預想江天回首處。雪風橫急雁聲長。

春日五首

幅巾投曉入西園。春動林塘物物鮮。卻憩小亭纔日出。海棠花發麝香眠。一夕輕雷落萬絲。霽光浮瓦碧參差。有情芍藥含春淚。無力薔薇臥曉枝。袂衣新著倦琴書。散策池塘返照初。翠碧黃鸝相續去。荇絲深處見游魚。春禽葉底引圓吭。臨罷黃庭日正長。滿院柳花寒食後。旋鑽新火爇爐香。金屋舊題煩乙子。蜜脾新採賴蜂臣。蜻蜓蛺蝶無情思。隨例顛忙過一春。

秋日三首

霜落邗溝積水清。寒星無數傍船明。菰蒲深處疑無地。忽有人家笑語聲。



月團新碾淪花蕊。飲罷呼兒課楚詞。風定小軒無落葉。青蟲相對吐秋絲。  
連卷雌蜺挂西樓。逐雨追晴意未休。安得萬粧相向舞。酒酣聊把作纏頭。

春日偶題呈錢尚書

三年京國髻如絲。又見新花發故枝。日典春衣非爲酒。家貧食粥已多時。

題郴陽道中古寺壁二絕

門掩荒寒僧未歸。蕭蕭庭菊兩三枝。行人到此無腸斷。問爾黃花知不知。  
哀歌巫女隔祠叢。飢鼠相追壞壁中。北客念家渾不睡。荒山一夜雨吹風。

幽眠

幽眠起常晚。冬晷復不長。中間數十刻。倏如驚燕翔。晨淪粗云畢。申鼓鳴相望。忽忽竟何就。念之動中腸。  
天地一逆旅。死生猶轉商。暫來旋云去。遲速乃所常。較計亦何補。徒然費慨慷。不知聽兩行。一概付酒觴。  
北風吹老槐。白日轉紙窗。布衾一覺睡。身世成渺茫。宿莽冬不衰。蘭茝幽更芳。無庸傷局促。速此鬢髮霜。

隕星石

蕭然古丘上。有石傳隕星。胡爲霄漢間。墜地成此精。雖有堅白姿。塊然誰汝靈。犬眠牛礪角。終日蒙羶腥。  
疇昔同列者。到今司賞刑。森然事芒角。次第羅空青。俛仰一氣中。萬化無常經。安知風雲會。不復歸青冥。



山陽阻淺

一日行一尺。十日行一丈。豈不歎淹留。所幸無波浪。悲風動深夜。原野眇森爽。青天行蟾蜍。枯水轉魍魎。此時蓬荜下。去心劇於癢。棄置勿復論。通塞如反掌。

次韻參寥莘老

迅風薄高林。萬象號虎豹。紛披枳與棘。爾復鼓狂鬧。我垣旣已頽。我棟又以撓。豈無一木支。橫力難與較。黎明忽自罷。晴日射魚罩。死水失狂瀾。衰木回故貌。勞生真夢事。往趨如睡覺。炊黍焚黃鶉。吾其理歸棹。

送洪景之循州參軍

寒梅不自重。輒花桃李先。矯枉有佳菊。最後衆芳妍。各因一時美。難以相嗤憐。物理固若是。士林亦宜然。夫子南國俊。聲猷推妙年。數奇晚方偶。參軍古龍川。龍川雖云遠。風物號清鮮。羅浮不相下。頡頏巉荒天。雲鬢二三子。聊足奉周旋。行矣試老拳。歸歟遠翔鶩。

茶

茶實嘉木英。其香乃天育。芳不愧杜蘅。清堪拚椒菊。上客集堂葵。圓月探奩盞。玉鼎注漫流。金碾響杖竹。侵尋發美鬯。猗狔生乳粟。經時不銷歇。衣袂帶紛郁。幸蒙巾笥藏。苦厭龍蘭續。願君斥異類。使我全芬馥。

贈張潛道



張生何爲者。落魄不自拘。獨攜三尺琴。笑別妻與孥。一來泊吾里。忽已月再虛。朝遊故人館。暮止佛子廬。雖無食羹餘。所樂常晏如。我欲有所進。生聞勿煩紆。君子閒有道。不專塊然居。無道祇深適。鳴戲亦已愚。願生脫塵鞅。從我滄海隅。

秋夜病起懷端叔作詩寄之

寢瘵當老秋。入夜庭軒空。天光脆如洗。月色清無縫。風颺戾戾輕。露氣霏霏重。簷花伴徐步。籠燭窺孤諷。緬惟情所親。佳辰誰與共。夫子淮海英。材大難爲用。秉心旣絕俗。發語自驚衆。塵尾扣球琳。筆端攢蠅螬。雄深迫楊馬。妙麗該沈宋。浮沉任朝野。魚鳥狎鯤鳳。與時真楚越。於我實伯仲。爾來居邑鄰。頗便書札貢。上憑鴻雁傳。下託鯉魚送。二物或愆時。已辱移文訟。人生無根柢。泛若淩波葑。昧者復汲汲。晨暝趨一閤。陰持含沙毒。射影期必中。自匿嫫母容。對客施錦幪。溘然一朝逝。萬事俱成夢。形骸猶汝辭。勢利猶君動。思之可太息。傷之爲長慟。所以古達人。脫身事高縱。我生尤不敏。胸腹常空洞。彊顏入規模。垂耳受羈鞅。行謀買竿棹。名理就折衷。但恐狂接輿。煩君更嘲弄。

送孫誠之尉北海

吾鄉如覆盂。地據揚楚脊。環以萬頃湖。黏天四無壁。蜿蜒戲神珠。正晝飛霹靂。草木無異姿。靈氣殊鬱積。所以生羣材。各抱荆山璧。小爲百夫防。大爲萬人敵。夫子少邁論。喑鳴阻金石。奏賦明光宮。玉座瞻咫尺。



翻身墮雲霄。十載迨窮厄。焚舟更一戰。得尉滄海北。五月乘畫船。簫鼓事遠適。天橫齊山青。雨帶楚水黑。勿云晚方仕。四十乃古昔。勿云名位卑。九萬自此擊。幽求尉朝邑。髻髮森已白。元振尉通泉。律令非所卽。一朝會風雲。顧眄立四極。行矣壯舊圖。闕

秋興擬韓退之

逍遙北窗下。百事遠客慮。無端葉間蟬。催促時節去。愁起如亂絲。營纏不知緒。日月豈得已。還復役朝暮。人生均有得。悲歎我不悟。春秋自天時。感憤亦真趣。

擬孟郊

曉風有暴信。暮蟬無好聲。曉風與暮蟬。自與時節爭。獨客辭故鄉。推車謁梁城。梁城道迢遞。區區役吾生。不如歸舊山。藜藿安性情。

擬韋應物

坐投林下石。秋聲出疎林。林間鳥驚棲。豈獨傷客心。物亦有代謝。此理共古今。鄰父縮新醅。林下邀同斟。癡兒踏吳歌。姪姘足訛音。日落相攜手。涼風快虛襟。

宿金山

山南山北江水流。半空金碧隨雲浮。我來仍值風日好。十月未寒如晚秋。山僧引客尋蒼翠。歷卷參差到



平地萬里風來拂骨清。卻憶人間如夢寐。夜深無風月入扉。相對老人如槁枝。流水與天爭入海。共笑此心誰得知。下山卻向中冷望。番憶當時在屏障。老母思兒且欲歸。回首雲峯已天上。

李端叔見寄次韻

君文豪贍無與儔。使我吟諷忘離憂。浩如沅湘起陽侯。翻星轉日吞數州。華章藻句饒風力。頃刻朱紅迷畛域。一班縱復爲管窺。萬派終難以之測。區區文墨倦高情。解鞅還遊恍惚庭。半槽新水六尺簾。臥視雲物行空青。伊我籃輿抵京縣。溽暑黃埃負初願。君家只在御城東。彌月不能三兩見。求仙未若醉中真。蟻鬪蛾飛愁殺人。清都夢斷理歸棹。回首一樹瓊枝新。歸來草木春風換。世事蠟毛那可算。幸謝故人頻寄書。莫笑元郎自呼漫。

陳令舉妙奴詩

西湖水滑多嬌嬈。妙奴十二正芬芳。肌膚皙白髮脚長。含語未發先有香。溪上夜燕侍簪裳。皎如華月墮滄浪。音聲入雲能斷腸。不許北客辭酒漿。主人藹藹邦之良。少年射策謁未央。俊詞偉氣森開張。玉杓貫斗生怒芒。天欲文采老更昌。故使斂翮窺羣翔。五十僅補尙書郎。浩歌騎牛倚徜徉。東風戲雨花草狂。二溪泱泱青黛光。妙奴勿倦侑羽觴。主人正欲遊醉鄉。

還自湯泉十四韻



歲晚倦城郭。聯驂度嶮峨。天黃雲脚亂。村黑鳥翎訛。潦水侵生路。晴天落漫坡。澄江練不卷。溫井鑑新磨。漁火分星遠。沙鷗散點多。霸祠題玉筍。龍窟受金波。琬琰存吳事。兒童記楚歌。孤龕瘦居士。雙塔老頭陀。飛鼠鳴深穴。胡蜂結巧窠。晚參圓白足。昏梵禮青螺。雲馭沉荒磬。仙春沒淺莎。杖藜從莫逆。談笑入無何。滲澹日連霧。蕭騷風轉阿。華清俄夢斷。回首失煙蘿。

辯才法師嘗以詩見寄。繼聞示寂。追次其韻。

遙聞隻履去。翛然詩翰纔。收數月前。江海盡頭人滅度。亂山深處塔孤圓。憶登夜閣天連雁。同看秋崖月破烟。尚有衆生未成佛。肯超欲界入諸禪。

次韻公關卽席見寄

與君鄰並共煙霞。乘興時時過我家。更漏一新聞曉角。門闌數級看秋花。湖山對值全如買。風月相期不用賒。賴有醉毫吟更苦。他年分作句圖誇。

秋興擬杜牧之

鼓鼙夜戰北窗風。霜葉鋪堦疊亂紅。一段新愁驚枕上。幾聲悲雁落雲中。眼前時節看馳馬。目下生涯寄斷蓬。弟妹別來勞夢寐。杳無消息過江東。

秋興擬白樂天



不因霜葉辭林去。的當山翁未覺秋。北里酒錢煩屢索。南州詩債懶頻酬。欲歌金縷羞紅粉。擬插黃花避白頭。底事登臨好時節。等閒收拾許多愁。

中秋口號并引。一云雲山閣白語。

伏以四難并得。既爲樽俎之佳期。五福具膺。實號縉紳之盛事。矧中秋之屆候。宜公燕之交歡。恭惟判府大資。身遇聖神。家傳將相。時應半千之運。論歸尺五之天。姓名久在於金甌。方面暫分於玉節。浮塔飛閣。引南國之佳人。豪竹哀絲。奏西園之清夜。

雲山簷楯接低空。公晏初開氣鬱葱。照海旌旛秋色裏。激天鼓吹月明中。香槽旋滴珠千顆。歌扇驚圍玉一叢。二十四橋人望處。台星正在廣寒宮。

次韻侍祠南郊

風馬雲車下九天。郊柴初告帝心虔。天如倚蓋臨壇上。星若連珠遶御前。縹緲佩環參雅奏。峇嶢樓閣抱非烟。侍臣舉酒欣相屬。醉看參橫左右肩。

口號

美酒忘憂之物。流光過隙之駒。不稱人心。十事常居八九。得開口笑。一月亦無二三。莫思身外無窮。且賭尊前見在。功名富貴。何異楚人之弓。城郭人民。問取遼東之鶴。付與香鈿。畫鼓盡歡。美景良辰。欲奏



長謠聊陳短韻

平原居士今無影。鸚鵡空洲誰舉杯。猶有漁陽搥搥鼓。為君醉後作輕雷。

早春

黃金蕪蕪滿垂楊。尚有春寒到畫堂。酒力漸銷歌扇怯。入簾飛雪帶梅香。

赴杭倅至汴上作

俯仰觚稜十載間。扁舟江海得身閒。平生孤負僧牀睡。准擬如今處處還。

無題

掃地燒香閉閣眠。簾紋如水帳如煙。客來夢覺知何處。掛起西窗浪接天。

蘇子瞻記江南所題詩本不全余嘗見之記其五絕今以補子瞻之遺

東坡跋并三絕。見正集第十卷。擬織錦詩

注下

紅窗小泣低聲怨。永夕春風斗帳空。中酒落花飛絮亂。曉鶯啼破夢忽忽。  
晞草露如郎倅薄。亂花飛似妾情多。歸鴻見處彈珠淚。語燕聞時斂翠蛾。  
琴絃斷續愁兼恨。嶺水分流西復東。深院小屏紅日落。繡窗閒倚更誰同。  
參橫霽色天沉水。宿鳥寒枝竹瑣煙。衾惹舊香清夜半。淚凝殘燭畫堂前。



寒信霜風柿葉黃。冷燈殘月照空牀。看君記憶傳文錦。字字愁縈惹斷腸。

金山晚眺

西津江口月初弦。水氣昏昏上接天。清渚白沙茫不辨。只應燈火是漁船。

和程給事贈虞道判三首

刀圭雲母具晨飡。門對三層步斗壇。夜考鶴經分七九。曉占歲氣辨齡丹。火棗交梨近可淪。不須地肺及天壇。龜藏坎海毛皆綠。鳳宿離宮色自丹。紫府沉沉揜夜關。竹陰清掃月中壇。歲星偷得桃枝碧。董奉栽成杏子丹。

處州閒題

清酒一杯甜似蜜。美人雙鬢黑如鴉。莫誇春色欺秋色。未信桃花勝菊花。

春詞絕句三首

蒲萄裊暖蕙薰微。紅日窺軒睡覺時。人倦披衣雙燕出。青絲高罽木蘭枝。弱雲亭午弄春嬌。高柳無風妥翠條。懶讀夜書搔短髮。隔垣時聽賣錫簫。都城春富百花披。長憶人歸駐馬時。淺色御黃應好在。爲誰還發去年枝。

秋詞二首



雲惹低空不更飛。班班結葉欲辭枝。秋光未老仍微暖。恰似梅花結子時。  
無數青莎遶玉階。夕陽紅淺過墻來。西風莫道無情思。未放芙蓉取次開。

呈李公擇

青箋擘處銀鈎斷。紅袂分時玉筯懸。雲脚漸收風色緊。半規斜日射歸船。

落日馬上

日落荒阡白霧深。紫騮嘶顧出疎林。回頭已失來時路。杳杳金盤墮翠岑。

賞酴醾有感

春來百物不入眼。唯見此花堪斷腸。借問斷腸緣底事。羅衣曾似此花香。







# 江湖長翁詩鈔

陳造字唐卿。淮之高郵人。自以無補于世。置江湖乃宜。又以物無用曰長物。言無當曰長語。故稱江湖長翁。年二十五始學儒。四十三登乙未科。尉繁昌。改教授平江府。參政范石湖曰。使遇歐蘇。名不在少游下。尋知定海縣。授朝散郎。淮南路安撫司參議官。病卒。陸放翁序其集。謂能居今篤古。卓然傑立于頽波之外。其詩椎鍊不事浮響。故見許如此。

## 寄二孫

憶昔初抱孫。雙鬢颯已秋。眼看與我長。歲月如許遒。我以薄宦西。汝爲守舍留。夢輒來後前。歲律歛再周。想今與迺父。長我更半頭。天姿粹而溫。整整靜不浮。六經如取攜。八面自優游。落筆動萬言。頗能如翁不。如翁何足道。抗志須前脩。良匠有妙斲。惰農無厚收。彼哉碌碌者。不源而計流。吾言不虛往。過是夫何求。

## 右原

阿秦幼儻礪。勢若泛駕馬。暫別已束髮。折節殊曩者。誦書口瀾翻。晝夜曾不捨。課肯犯雪供。筆亦揮汗把。才地校優劣。不在阿儒下。平時於方兄。眇視真土苴。念翁少年日。爲學不餘暇。混俗類疎放。秉心迺儒雅。兒今頗肖吾。解笑時苟且。師匠求有餘。好書不外假。緬懷螢雪邊。力倍功更寡。可用吾季孟。直輩古班賈。



右展

七月附米舟之浙中作

白蟲散如蛆。黑蟲聚如蟻。循緣仍啞齧。欲寐復九起。吾舟玉爲粒。生此果何理。神奇作臭腐。秋暑況如燬。人生託洪爐。一飽蓋分爾。臨流念彫年。胡迺置身此。笑口忽喑惋。曼膚或瘡瘡。隄防費應俗。情僞良不美。短籬護松菊。吾歸殊可喜。錐刀詔朋儕。嗟爾商販子。

召伯停舟辟雨。去年是日之山陽。辟雨繁梁。作菩薩蠻云。

窗度荷芰風。舟艤鴛鴦浦。落帆憩篙師。避此白淙雨。長征取愜快。留滯不云苦。適喜縣麻勢。爲盪鑠石暑。去年舟繫柳。臥看虹飲渚。龍公會事發。尙記跳珠語。崎嶇不諧俗。似爲龍所予。一杯酬新涼。開瓶先酌汝。

過樊村

襄鄂二千里。何啻三百灣。風色九順逆。左往復右還。舟行已三日。沿流不作艱。卽今蒼煙面。猶是泊處山。信次有定期。曲直了不關。聊可供戲事。輕橈與回環。

贈錢郎中

刑方利祿媒。抱道俗不省。詩書工發冢。孰起世儒病。錢侯挺直節。蠻徼復蘭省。劍氣夜星明。鷗翻秋霜耿。上前論世務。萬乘爲首肯。平生中原慮。壯歲左符請。不作黃閣想。擬試白羽秉。孤忠當寧知。宏圖時宰領。



羣兒須圓曲。謂可力勝命。彼此計乘除。得甕喪崇鼎。平生信所得。一鑑照萬境。幕中辭脂韋。客右進嚴冷。主簿聳牙伯。評俗怒生瘦。謂伯永令君強項翁。爭事不藏穎。謂劉山陽但有周舍思。可無衛武警。我亦意行者。泥古志未逞。朝來聽名理。剪燭延落景。寸田殊易荒。有賴剔榛梗。效奇乏良策。汲深慚短綆。惟期佩公言。不墮頽俗窳。

八月晦試院中作

官居課程地。生有文字癖。誠知蟲負山。詎得辭此檄。嘉禾古多士。孰者非巨擘。老眼不待封。舊苦眩花隔。勿云石賈玉。箴失眸亦得。荀子云。失箴者。眸面得之。捧心若爲妍。竊鈇徒自匿。陸海貪窮搜。奇寶多偶獲。巧常昏金注。勇或便大敵。清醪聆鄒琴。款識辨周鬲。頗收半段槍。遐念連城壁。渠應悔羔袖。吾敢厭鷄肋。撫囊舉利穎。體國免素食。明朝羅客拜。定自百夫特。俗無拋博惡。歸舟緩張席。

三月初晚晴寄高縉之三首

東風掃積陰。殘雨不敢漂。壞雲裂裳帛。倒掛墜嶺腰。鳥影不作暝。夕陽明山椒。安得上上頭。風露永清宵。人家繡閨閒。湖上粧面新。湖山簫鼓中。魚鳥安得馴。山靈建飛雨。淨洗綺羅塵。卽今隄邊柳。爲誰管殘春。曲欄倚青冥。萬井入指顧。湖光漾明霞。照我凭欄處。森木倦鳥歸。遙空征鴻度。定知待月人。破竹有奇句。

車堰牛



牛力輕萬鈞。性順異諸畜。有足不解跂。有角不皆觸。課日引耒耜。爲人給穀粟。私家憂闕食。公家要餘蓄。公私雖相須。置汝誰取足。奈何過堰客。行舟動千斛。挽牽亦誘汝。最屬頸脾縮。扣角一勞之。不語對以腹。物生愧無用。懷安或作福。於人儻有益。塵身豈云酷。君看廟前牲。被繡飽芻菽。膏血薦鼎俎。誰定悲穀觫。

舟行卽事

昨日出曹娥。明日指慈谿。待潮舟爲膠。得潮舟若蜚。留滯復一快。計程元不遲。人生意矣得。孰者乘除之。今屈昔已伸。彼贏此或虧。但可自適過。尙用悲喜爲。水伯愚弄人。政如造物兒。丈夫木作腸。渠輩未易知。

餞寄定海交代

縣尹古子男。今不一錢直。低催奉簡書。偵伺常屏息。白簡與按章。歲月供彈劾。當路雖所懼。姦民巧狙擊。吻間售蜂蠆。意外變白黑。防虞莫救過。彌縫或逃譎。政使有卓魯。未容置形迹。云何世難事。君不動聲色。編民翕風移。惡少且心革。田廬有笑歌。魍魅亦竄匿。斯人紀仁愛。幾磨南山石。政聲懿如此。僅免繩治厄。諸公蜚鸚書。犯嚴尙遺力。安得定海民。爲君灑薦墨。蘭臺傳循吏。採訪多失實。安得定海人。爲君秉直筆。嗟我吏隱者。志在山南北。身名萬金重。如博試此擲。賴今遺愛地。一一可矜式。政恐效西子。美譽得嘲劇。江臯一樽酒。聊挽朝天客。妙樂喧江浪。清譚到理窟。盟言底遽寒。舟駛潮水急。西望念風義。感歎徒至骨。

送李象山趨朝象山海邑。古稱象山郎。今聽李明府言。頗亦費支梧。故云。



書肘詎容掣。箠柱不可膠。付事多其防。職業自寂寥。頗思圓機士。細苛舉綱條。宰邑古難之。茹苦耐煎熬。百抑不一揚。推波益驚濤。由來法愈密。祇爲下所操。一饑驅我出。銅墨強折腰。捩翅著籠中。側睨鵬冲霄。平生有知己。持橐貳銓曹。君來定倒屣。道我不自聊。願推變通術。霧雨均枯焦。而況代舍舊。肯惜引手勞。

十二月二十六日趨府

誰謂一舍遠。不辦三泮趨。亭午縣市西。衙鼓府城隅。匹馬驚鳥去。指槌冰在須。北風挾霜氣。萬象付摧枯。想當折琴絃。未怪裂人膚。馳裘被甲如。是日有若無。客首不暇回。顧客少踟蹰。出處不能同。勞逸爲之殊。龐翁馬少游。似非隱者徒。鄉居老躬耕。飽溫得自虞。婆娑銅墨間。盍亦省頭顱。藜藿脫中熟。吾口良易餬。

別俞君任通判

一代石湖翁。韓歐或其儼。當時出門下。如君屈幾指。論定難爲才。我乃輩多士。椎成方未器。正賴君礪砥。師友繫魂夢。栩栩輒千里。驚見得此客。乾鵲預爲喜。一笑破千憂。天幸寧有此。石湖倏眼中。此翁真不死。

邵伯阻風小泊贈送行諸公

長征每愛日。小泊未遑意。陰風自南北。客子聽軒輊。召棠望吾鄉。不作秦越異。船閣鴈鷺洲。人穿魚蝦市。相逢各吳語。知識十三四。水實不自買。海錯有佳饋。餞行餘十客。超俗見友義。笑譚寒谷春。爲我洗羈思。相與臥玉瓶。跋燭得微醉。老懷易作惡。別語毋動喙。



魏帝廟

佛狸歲未卯。志欲吞宇縣。當年江飲馬。腥血浸淮甸。無人飯耕牛。有井巢歸燕。至今閱遺史。爲汝空飲恨。緬想爪步留。殺氣纏吳分。云何此山椒。遺像儼高殿。無乃甘事讐。吳俗昧所見。或復綿歷久。後嗣忘敵怨。冥莫彼有識。福汝吾敢信。君看趙與薛。狗國冒禍釁。魏侯繼前躅。長呼死白刃。胡不尸祝之。香火均遠近。豈但祈神休。抑使頑懦奮。誰今決從違。引手適我願。趙侯立。薛侯慶。魏侯勝。皆淮南死事將也。

長蘆寺

昔年望長蘆。去江逾百步。垣宇呀已缺。浮圖欹欲仆。僧徒噬肯留。日有沉溺懼。重來舒望眼。佛刹非故處。安衆得亢爽。定遷醜夙素。似聞瓶錫侶。復作醯蚋聚。居人禱蠶麥。行客乞泉布。營者肆夸侈。施者不顧慮。百堵煥金碧。奚翅復其故。往往豪雋人。四壁有未具。彼徒創寺意。取鎮湍濤怒。向來梵唄所。倏爲蛟螭據。在己不自保。誘俗說依怙。波流置不省。此理吾未諭。

泊慈湖北岸

坐覺江流平。漶漫裂三股。舟子告風橫。因循宿中浦。慈湖古戍近。猶復小江阻。漁翁家葦間。蝸舍無鄰伍。把酒訊三老。此寧泊舟所。諗我今昔異。解帶無所苦。向來探丸徒。白晝猶旁午。一自尙書來。此輩凜刀俎。江山亘千里。有屋皆外戶。似聞襄江道。衽席過行旅。翳公舊威愛。平寧尙如許。兩地好經行。爲官喜欲舞。



倒牀鼻雷吼。夢破聞船鼓。受欺墮姑息。迂儒彼何取。謂張尙書定叟。

### 上下驛磯

湖陰數里間。山麓屹兩磯。磯麓突江出。禹功不及施。千古妨行舟。死生繫毫釐。我昔步磯上。雨歇暑氣微。驚湍下百尺。怒勢轟千聲。尙憂坤軸動。無怪沙岸欹。蟄龍渠得安。過鳥翅欲垂。頭眩膽爲掉。坐歎舟上兒。壯哉天下險。姦軌容抵巇。如身護風寒。要地此幾希。今來歲華暮。去舟良坦夷。人言水進退。寒暑分盛衰。古來設險守。亦有可易時。函谷與劍閣。秦漢嘗用之。人輕地亡重。正煩折箠笞。恃險無興國。興國須藩籬。帝王所取重。文武各攸司。險易倏變改。卽磯餘可推。

### 蕪湖感舊

下帆同烏棲。掛帆逐鷄起。但見蕪湖月。耿夜清如水。江左此壯縣。我昔舟屢艤。諸公各敬客。欵曲豈今比。酒杯慣邀留。妓圍供燕喜。流連動十日。每過蕪湖。朱丁諸公約以十日爲期。揮掃或千紙。舊游想如昨。故交今餘幾。逝者泉壤隔。存者參辰似。浪憑楚些招。盍寄相思字。可能喚巫陽。且欲託雙鯉。

### 過繁昌

江山互映帶。竹樹渺隱見。居人江山間。安處忘古縣。泊舟穴子初。舊觀儼自荐。嶺山高攬雲。雲際抹深澗。慰我塵埃容。嘉此煙雨面。山脚慣奔走。尉曹分卑賤。縣人應指似。髻改顏狀變。漂零渠未知。憂患嘗欲遍。



俛仰二十年。轉眄閱蜚電。故人半在亡。在者或海甸。明朝理去楫。山影暝江練。安得人如山。來往長相見。

繁昌早發

客行固塵身。留滯如捩翼。及茲祖禮竟。蓐食理帆席。風停浪未蟄。天曙月正白。版磯匯湍殺。荻港煙樹碧。杖策丁家洲。徒倚容少息。無酒問山店。憶鱸聽村笛。鳥鳥啼松竹。鴈鴛下沙磧。回柁投曲澳。又寄糝潭夕。情疏或易合。不作淮楚隔。纍然槁項翁。軟語慰行役。

泊海子口

池口至海口。望望三舍外。辰發莫已到。回首西日在。風師肯憐客。祖道煩一噓。我舟疑淩虛。楚山真歷塊。蜚鳥相讓疾。驚浪乃弗逮。窮途坐局縮。頗嘗得此快。遄邁自本圖。闕供恐貽悔。未辨問村醪。且計具薪菜。

泊小姑娘山

楚山屹兩姑。我見乃其稚。聞名詩卷間。識面客舟次。玉刻極端麗。簪植暝蒼翠。娟月上天角。相與詫嫵媚。怒風將我西。未慙卜晚憩。山足舟可艤。山木纜可繫。山外正風波。獨此佳食寐。斷知有神物。主此勝絕地。明朝捐行橐。可無答神賜。白鵝雪爲肪。綠蟻香馥鼻。舟穩風又熟。無乃契神意。未暇訪彭郎。辭費辨非是。

郭家洲

攜兒上絕岸。微徑步蒙密。人稀鳥鳥樂。老屋幾百室。荒涼郭家洲。籬落映殘日。問俗得周旋。磨門頗蒼卒。



興衰今昔殊。郭姓尚十七。鄰里闕鹽茗。翁姬僅盟櫛。共說頻歲歉。平陸江浪沒。場圃或潭洞。椽棋行蟻蛭。去秋微收爾。樵採取黔突。接耳多樂郊。一去恐兩失。吾邦有杜母。撫我不待乞。蠲租桑柘在。休役孫子佚。意使流殍無。寧後倉廩實。官今潯陽來。吏師那容失。書紳拜此賜。知我佐郡紱。古來裨肉食。多自藟莢出。必若窮吏道。孰先究民疾。剝膚快目前。吾固笑無術。

### 離富池

江流寂無聲。明滅窗月曉。客枕歸夢餘。意先西蜚鳥。雪天信少風。翳面正繚繞。富池忽信次。肯羨鷓鴣矯。向免犯險艱。神惠顧豈少。今晨有佳興。調笑向諸小。波平旗脚直。康莊馳騶馭。鱗鱗到座隅。健鵠啁林杪。人家積蘇間。山影橫練表。未成官縛去。得句吾事了。

### 龍眼磯甚小而巧。漁者聚焉。

誰謂石一拳。不作江流礙。朝來揚帆西。瞥若驥歷塊。龍眼風火磯。培塿視華岱。似聞潢潦時。亦復鼓湍匯。鑿去本不難。奇巧禹所愛。其上嘉樹密。其側魚網曬。居惟羨漁鄉。復欲老犢背。西歸儻得此。庸敵七里瀨。次臧秀才讀蘇集秀才甚文。予未識也。

自我得蘇集。玩閱幾忘年。汲甘乏脩綆。適遠疲短牽。取一九不隨。望若終茫然。子齒始半我。用志超我先。晶瑩出秀句。妙斲遺雕鏤。此翁深堂奧。駢闐誰敢專。潢污置不云。學海須百川。怪子介且方。落筆盤走圓。



子真蘇門徒。豈獨長短篇。平生脩月手。不補衣履穿。秦黃晁張陳。衆星耿霜天。世儒昂其首。指似如登仙。子起斯人後。遊刃牛無全。邢娥望可知。衆女空丹鉛。何時班荆地。解我心懸懸。卽今清夜夢。不止懷昔賢。

雪夜與師是棋次前韻

投醪士或醉。說梅人不渴。窮途餘樂事。不受憂患遏。詩可供呻吟。棋亦識死活。朝來喜雪句。神藥胎可奪。一枰與兒晤。斷無市聲聒。旣免沈舟諼。不作賭墅謁。指冷良易忍。眼花苦爲孽。疏置仍作罫。隨意略細閱。瓜葛勝負間。時亦近屑屑。策幾奇兵鏖。地比弱王割。吾非江左管。舐犢愈愛說。升沈作豐悴。今古無成說。家居鼓吹具。藉以保晚節。掀髯得一笑。爲汝倒蕉葉。袖手聽殘更。紅麟噎晴雪。

再次韻雪應時可喜。晴不遲。尤可喜。雪止恰除夜。因作。

人間十日雪。已潤夸父渴。宿雲忽披靡。羲馭與抑遏。春從九地回。旋放牙甲活。主張披拂是。大塊司予奪。椒栢追時序。鼓吹聽曉聒。詩壇有同盟。辦作銜袖謁。得雪晴更佳。過是或爲孽。羣山半披剝。衆巧獻一閱。懸知兵吏集。不待鋪木屑。令尹活人手。小試牛刀割。廣文甘僻左。不肯事容說。與俗分樂事。盍以韻語說。獨慙長鬚送。不量好時節。六一謂聖俞曰。山婦云。好時好節。要須百篇富。趁此梅未葉。正使領兕觥。快作湯沃雪。

至喜鋪



外朝走馬息。險絕欲無路。駟駿蹙萬蹄。勢若敵場赴。崩騰臨空曠。踣足此小駐。蕭然一驛傍。爲此數家聚。川城南山下。邑屋隨指顧。行人不勝喜。息駕始此處。蹙然愀然意。南北分來去。我解房州印。初試歷險步。胡爲亦自得。不作罷茶慮。鄉心建瓴水。歸夢受風絮。殘年歸來引。他日遂初賦。是役固已勞。端復酬夙素。臨風搔白首。一笑飭徒御。

### 涑口守風

辦舟留襄陽。辟風泊涑口。得行秋甲辰。初到夏癸酉。跛鼈已自慣。束髮至衰朽。坐是冥得喪。況復多病後。絕憐操舟兒。不措脫顛手。顧瞻峴山亭。覲面可攀取。微風吹薄暮。霽景掛高柳。涼月欲略箕。陰氛尙侵斗。明朝起拖計。未敢決可否。身已不藉在。心自無何有。一事萌一意。但見掣君肘。擁書坐蓬窗。醉我不以酒。

### 赤口灘

漢江多惡灘。赤口乃其最。前年將家上。正值江流殺。奔衝震溝畝。狼石森戟鏃。最屢取進寸。一跌尋丈退。聞此尙痛定。躬履況兒輩。今者劈箭去。未覺有湍匯。一雨動三日。遠岸卷澎湃。向者險巖地。了不經眼界。三老笑相語。無復憂滯礙。路可屈指計。歸將平心待。窮塗偶快意。此惠莫謀大。龍公本何心。賤子多感慨。

### 旅館三適

予以病愈不食麵。此所嗜也。以米藥代之。且宜燒猪。客有惠清白堂酒者。同時饗作三詩識之。

厥初木禾種。移殖雲水鄉。粉之且縷之。一縷百尺彊。勻細鹽吐緒。潔潤鵝截肪。吳儂方法殊。楚產可倚牆。



嗟此玉食品。納我蔬蕨腸。七筯動輒空。滑膩仍甘芳。豈惟僕餐餌。政復奴桃榔。卽今弗泊感。頗思奉君王。雋永項上臠。紅嫩劣帶營。彼美大欄君。坐受羣毛朝。鼎涪走真味。正籍松炬燒。芼我銀絲窩。葱豉巧和調。堇塗非所宜。淑郁如蘭椒。腹腴但下隸。氈根合藤條。併填長翁腹。未覺喉牙搖。但訝大嚼餘。無補詩腸枵。佳齊肯見分。春意偕客至。誰將清白名。言代碧香謚。起淪饒磁甌。玩吮色香味。醍醐馥牙頰。沆瀣沃肺胃。桑落古宜城。不足僭品第。我病久不飲。此日欲小醉。快哉羈寓中。乃遣拜嘉惠。一盃先晨飯。歛作淩雲意。米托薦燒豬。佳此三者備。飽足仍酣醺。眇睨人間世。

官務

磨陬爲官多。曉了未更歷。今世從仕者。萬口用一律。文按日從事。鴈鴛竊投隙。自謀脫悔吝。初肯計易劇。追逮有踵接。符牒動山積。豈念南畝民。晷刻校日力。停犁聽上命。質衣供旅食。誰定老我師。黠民幾鬼蜮。締彼刀筆吏。表裏肆狙慝。奈何食肉人。立說與推激。此論儻不破。此弊終未息。揆予閱世熟。敢此諗在職。

命書

命書唐濫觴。委源傳呂後。有倡莫爲遏。波蕩今不救。字育巨數計。八字詎所囿。甲子動垓億。舉一百萬漏。荒唐無稽據。誦言指休咎。奈何聰達人。頗復安此謬。懷刺曳長裾。偃蹇文士右。夸詡走干謁。薦墨不待叩。士有待濡沫。百請不一售。我昔遊江淮。知識間新舊。文士不到眼。此輩日交筮。辭章輕盃水。羨彼行橐富。



鯁鯁問利祿。吾儒所深陋。自笑與世違。迂論取排詬。

財昏

師昏古所辭。財昏今不耻。傳祀合二姓。古者貴由禮。四德五可外。貨賄亦未爾。民風日就頹。捨此爭校彼。媒氏未到眼。聘資問有幾。傾篋指金錢。交券奉租米。東家女未笄。儀矩無可紀。已聞歸有日。資送耀鄰里。西家女三十。閉戶事麻枲。四壁漏風霜。行媒無留趾。坐貧失行期。趣富營貪鄙。流弊例不免。其源實此起。多約或少酬。暫譽甘長毀。坐令親舊歡。詭譎變狐鬼。何況性習間。貧富岐臧否。土俗未易挽。人情大不熾。悠悠何足道。吾以諗君子。

聽政

爲政貴中和。偏徇古無取。無心斯善應。奸譽乃其蠹。奈何聞見間。往往用心誤。扶弱抑其彊。古或垂此譽。世異俗且殊。處今猶徇故。曲直本不昧。彊弱豈所據。君子不此恤。情僞溷丹素。富室被剝腴。日有貧窶慮。士夫受加陵。悔不齒編戶。羸弊取必勝。玉色吞氣去。不知世富室。如母子所怙。不知意定向。未語機已露。傳繼用一律。抱冤莫赴愬。用是致和氣。南首問燕路。

錢弊

爲家重牆垣。爲民須貨殖。楊廬國百戶。東南賴控扼。淮民魚米餘。百貨仰殊域。用銅防外泄。用鐵乃奇畫。



一利伏一弊。救弊要得策。持貨買官券。捨此莫衣食。錢貨天下用。鐵乃限南北。坐令兩淮民。塊處斷貿易。計鐵取券直。十纔取六七。朝賢愛淮民。此困盍矜恤。銅鐵均國寶。通變豈無術。近甸視遠地。未可岐畛域。況今苦倒垂。倚待振焚溺。緣江八郡爾。雜用顧何失。官券朝北來。淮俗暮安宅。卽今私鑄斷。胡尙膠今昔。吾貧復淮人。計勢不容默。

吳節推趙楊子曹器遠趙子野攜具用韻謝之

平日從俊遊。寂寂坐多病。犯床漫飛埃。瑤笙罷重請。犯床置樂器床謂宮調相犯修樂器惟笙白請昔遊喜復到。風物他日盛。坡

恐名燕支樓。亦詫端正新。交間舊友氣。合宮羽應譚。塵冰霜厲筆陣。鵝鶴勁吏隱。分樂地與世。不好徑拔貧。辦一歡。挾貴輕百乘。四豪載酒過。講德珠壁映。歌奏雲近人。舞罷鸞顧鏡。醅醉忘主賓。笑語似紛競。朱樓識阿眇。白酒醉師命。明朝耐殘醒。江聲醒幽聽。此樂謫仙後。同異君試訂。四豪成風手。可但隻字警。我投詩社名。拜手敢貌敬。

記夢示師是

青燈寒夜思吾鄉。合眼便坐吾家堂。阿丁炯然目如水。綵衣翩僂趨我傍。中心喜之謬督過。還爲遨嬉廢書課。指似斜日西窗紅。小賦未破書未供。向渠不敢恩勝義。亦憐忸縮不自容。蝶蜚鹿失忽驚寤。撼撼霜風在庭樹。幾時筆力跨乃父。與汝相忘不關慮。



題胡處士猿麀圖

畫工神品今代無。祁嶽一脈傳醉胡。幾年傲睨不落筆。乘興掃出赤縣圖。今君所寶亦第一。我疑神遇非有筆。青林紅葉晚未暝。遙山遠水秋一色。五猿踞石相因依。兩猿掛樹松枝低。仰睇側顧麀善疑。其二行齒如不知。昔人畫馬師廐馬。畫山直付居山者。野猿不馴麀易驚。邈影渠能寫閒暇。草露空荒遠刀机。卽今放麀誰氏子。山蜂負毒不足憐。盍貸蠪蛸留報喜。

布穀吟

人以布穀爲催耕。其聲曰。脫了潑袴。淮農傳其言云。郭嫂打婆。浙人解云。一百八箇。鳥何與人事。人以意測之。是非皆不同。爲作此。

潑袴不容脫。鳥語徒慙勤。輸租質農器。有袴那解新。官中催科吏如虎。告時趣耕爾能許。卽今春種未入田。安得縣胥知愧汝。卑棲俛啄良易謀。聒聒彊任田家憂。啼時未旦夜不休。班班血痕銜口頭。人將近似測禽語。汝意真解憂農不。或傳悍妻天所怒。姑不可搗渠不顧。罰爲此鳥聲曩愆。警世毋爲郭家婦。南方諛佛古到今。人持數珠家梵音。區區說似一百八。譏訶勸相知何心。浙風淮俗隔江水。意解禽言乃如此。蘇黃妙句誰嗣之。兩地流傳併須紀。世間儒墨紛相攻。巨細彼此臧穀同。爭如痛飲臥長晝。付渠馬耳謝東風。

墾山叟

雜木漫山誰所種。居不臨流多不用。九月霜風捲黃落。羣山一夕皆班駁。遙看拖帔橫祿衣。農家刈粟山



有畦家家墾田日嫌窄。荒林翳蒼惜虛擲。斷荒作熟不掛籍。輸官之餘給衣食。州中之政常近厚。不欲屑屑校升斗。寧其棄之聽民取。實亦藉是作康阜。繼承不皆惠慈寺。汝須彌縫吏胥口。防有後來規稅畝。

竹米行

竹君亢宗擅楚墟。一一脩聳山澤臞。風流秀整與世殊。楚俗食息皆爾須。薪之籬之且籩篠。筭筥箱篚籬籃筴。溝瓦厥祖羹其雛。隨索斯獲掇諸塗。今歲麥秋旱歲餘。得麥僅足償官租。竹君憫農如士夫。著花結實千林俱。密砌玉粒綴旒珠。株株擷取雖錙銖。彌頃巨畝無閒株。磴磨蒸炊勝雕葫。鄰里乞索水火如。坐令饜蹙興歌呼。野叟好事能分吾。香清而冽甘而腴。此君行能不一書。此惠及物旋就枯。摩頂放踵忘其軀。所學無乃墨者徒。老子苟祿天之隅。袖手無策蘇惇孤。投匕三嘆吾慙渠。

田家歎

五月之初四月尾。菖蒲葉長棟花紫。淮鄉農事不勝忙。日落在田見星起。前之不雨甫再旬。秧疇已欲生龜紋。近者連朝雨如注。麥隴橫雲欲殷腐。如今麥枯秧失移。舉手仰天禱其私。秧惡久晴雨害麥。兼收並得寧庶幾。餅托登盤米藏庾。儂家歲寒無重糈。豈知送日戴朝星。凡幾憂晴幾憂雨。吾儕一飽信關天下。筋敢忘田家苦。

春雨寒甚作長句



白龍天飛宜莫測。吳儂解數歸消息。年年青帝發生時。妒妒園林春動色。西山龍母誕彌月。歸覲親顏供子職。壽觴瓊醴俗共傳。玉鱗素鬢誰所覲。酸風鼓寒苦霧塞。行人縮頭欲僵立。蛟鼉凍蟄大木拔。更問嬌紅并眉白。閉門三夜淙簷雨。起視溪流高數尺。去年夏秋走祈崇。雲電收藏日血赤。儂家倚鋤望眼穿。白汗呀流地龜拆。天可問。曷不遣兩龍。此時會生日。

謝韓幹送絲糕

玉顆瑩澈珠就磋。吳鄉早杭莫計過。無乃風露秀結異。移種崑崙之木禾。國家廚婦一百技。三春九浙付重羅。銀絲千尋忽縈積。中疎外潔生搓按。扶桑仙蠶大如盎。線之本供織女梭。悅驚萬啄鬪新巧。習作水茸雪網窠。卽今擬形供食事。纖手幻出千絢多。倒甑入筯第三絕。色香兼味皆可歌。周官賓祭珍饗餌。有此復具理則那。詩翁物色及粃糲。得此來前當見訶。鱠盤漫詫金縷釘。湯餅徒夸銀線窩。瓊酥玉膩信非匹。胡麻崖蜜仍相和。感君汎愛記衰朽。回首一笑分餘波。腐儒口實長作累。饑饉之名定不磨。金山別去每掛夢。老眼復見還雙摩。婪酣得飽問便腹。如汝平生相負何。更從公子乞方法。日當飫之老澗蘗。買田二頃不種秫。未怕酒客來操戈。糕不用糯。金山者。名天下。

識村翁語。勸耕淨居村。翁老而健。問其壽。云山居淡食乃爾。昔一村叟。一野僧。此。厚味非野人所饗也。其言有契予心。作此記之。



山僧一生鑿山藪。溪叟所仰纔魚菽。闔守侯家與相家。珍膳不應填汝腹。百二歲翁清且羸。茵坐鼎食寧其宜。焉知暫飽博長往。穀神震怒脾媪悲。官家顆粒皆民力。此祿食之須此骨。兩翁妄食壽弗延。當念無功暴天物。我雖不偶猶餐錢。車行肉飽隸後先。食功揣已懼不稱。因翁有言呼使前。盤几畢識翁所言。

繁昌縣感舊

繁昌古縣依山麓。縣外峯巒更重複。連山斷處圍平陸。有地可耕無十六。昔我作尉三年留。局促似爲山所囚。野行村宿飯古寺。山路纔悉如吾州。車如鷄栖馬如狗。風袂塵襟博升斗。是時身健髮熟班。頗復興懷爲奔走。遠近人家山影濃。與我周旋圖畫中。山鳥翔集相和應。野花開謝能白紅。薄宦而今更長道。回頭祇覺當時好。筋骸罷憊鬢摧頽。不歎飄零歎吾老。

出郭寒食日送使車。初甚怙悵。郊外春色慰人。戲成。

江縣居人寒食下。少在縣中多在野。哭聲不似笑聲長。麗服新粧盡遊者。長郊芳草接天綠。我亦行行策罷馬。盍簪命醉豈不懷。卑官出入元無假。偶來卻勝特來好。觸處春光可圖畫。幾日陰寒風用壯。今朝霽景天所借。趁人胡蝶作團蜚。逐婦鳴鳩數聲罷。天桃艷杏雖已過。郁李金沙猶未謝。其餘紅白爭姘媿。醉態啼粧各蕭灑。顰風笑露頰欲語。半吐梨花最閑雅。游人幾許健倒去。紅粉誰家短牆亞。良辰獨醒還自惜。捐佩一樽猶可貴。餅盤錫筯已寒盟。故人應問花應訝。對春長作了事癡。不念清權本無價。會當從公



謝不敏。百罰深杯不辭把。魏花有約。待人歸。秉燭酬春期後夜。

### 望夫山

亭亭碧山椒。依約凝黛立。何年蕩子婦。登此望行役。君行斷音信。妾恨無終極。堅誠不磨滅。化作山上石。煙悲復雲慘。髣髴見精魄。野花徒自好。江月爲誰白。亦知江南與江北。紅樓無處無傾國。妾身爲石良不惜。君心爲石那可得。

### 檢旱宿香雲

香雲之山瞰平楚。松篁路窮得僧宇。明窗深室皆嚴靚。白菊紅渠相媚嫵。它日欲來坐忙迫。此行忽忽寧得所。蒲團憩定飯秋蔬。衣袂黃塵尙如許。山僧共話豈須禪。但愛茶甌如潑乳。投牀有夢不能記。忽聽風林如過雨。雞聲不二擁被溫。又恐罷驂陵險阻。出門便覺仙凡隔。猶聞窣堵風鈴語。今年旱暵遂無年。枵腹籲天連保伍。頗能念我困馳驅。兩兩致詞相勞苦。但使秋租毋病汝。吾自卑官慣塵土。

### 謝朱宰借船宰爲蕪湖。予官繁昌。

書生祿邀空自憐。三年官滿囊無錢。身如絆驥心千里。安得一舸西風前。令君磊落濟川手。留滯亦憐窮獨叟。大舟百尺影白虹。借我搬家我何有。函牛之鼎著雞肋。涓滴渠須瓠五石。劣留兩席寘圖書。輦石囊沙壓搖兀。典衣買酒餉三老。槌鼓鳴鑼人看好。相過重讀借船帖。我自盧胡君絕倒。自繁昌歸。先經于湖。



田家謠

麥上場。蠶出筐。此時祇有田家忙。半月天晴一夜雨。前日麥地皆青秧。陰晴隨意古難得。婦後夫先各努力。倏涼驟暖繭易蛾。大婦絡絲中婦織。中婦輟閒事鉛華。不比大婦能憂家。飯熟何曾趁時喫。辛苦僅得蠶事畢。小婦初嫁當少寬。令伴阿姑頑。房謂嬉爲頑。過日。明年願得如今年。剩貯二麥饒絲綿。小婦莫辭擔上肩。卻放大婦當姑前。

徐南卿招飯

徐郎陋巷四立壁。乘間亦戒賓友食。慈親衰鬢不供翦。定賣春衣典書冊。念君治具良騷騷。與渠侵早來得得。小樓十客不餘地。猶勝陶翁劣容膝。江西米鹽絲作窩。吳國香杭玉爲粒。嗣宗阿戎各好士。笑頡羹鄙仍婦德。老子旅寓得此飽。勃鬱詩情喙三尺。出門未妨雨墊巾。萬屐聲中緩歸策。

再次韻

東鄰客來每堅壁。西鄰客來常蓐食。旅中一飽豈細故。偕舉大事書之冊。末路孜孜食眠計。外此敢忘戒在得。蘇端向我顏色好。衝雨不辭泥沒膝。居貧頗禁惡客惱。念子秤薪仍數粒。肺可用論米可餅。併付饑僮飽君德。人謂裁詩等裁錦。拙婦渠能把刀尺。陶翁冥報苦未廣。搜攪肝腸閒倚策。

再次韻



白晝由肱睨東壁。鸚斯空復賊糧食。晚途自笑硯生埃。少日頗常韋串冊。生世恐隨草木腐。忍使功言兩無得。長安寧無翕施者。自宜有鐵關腰膝。樂天任運時近酒。子房逃榮猶卻粒。求窮我者迄未知。夫此誰怨夫誰德。擬訪鶯花豁襟抱。門外雨餘泥一尺。山陰不待興盡回。掠面東風寒策策。

戲作飲食小過不佳。趙帥招飲。淡食止酒。因成古詩。

書生稟賦紙樣薄。平日扶衰惟粥藥。一日飲溼小嚙肥。河魚數日煩醫治。佳辰府公約把酒。嚴斥廚丁預節口。借問王賓醺酢餘。還許公榮袖手無。厚味臘毒古不予。如作病何仍古語。生世例非金石堅。支離如我更可憐。饑噉動使諸病入。冷坐亦復百憂集。彭殤瘠肥本自齊。此理祇許蒙莊知。筭下萬錢無足取。廚薦三韭徒自苦。法士語飲應且憎。何如臥客懷中醉。不應婪酣任人嗤。穀伯何如辟穀高。人師黃石陳遵張竦柄。鑿夫何爲彼此未可相。是非七十老翁誰能促。戚縛此戒。醉死病殂吾命在。

呈趙帥訪帥困于腰鋪。次日帥聞到招飲。

雨行本自貪風便。四十里程真劈箭。長年攤錢夸半仙。一炊黍頃風頭轉。生世快意多所辱。葉舟瓠壺浪如屋。暗椿觸船船版折。船丁籲天船媪哭。塗窮儻有哀王孫。腰鋪人家緊閉門。丁翁祿邀捕魚者。向我顧肯顏色溫。茅屋新成容寄宿。麻茶初熟仍見分。解衣滅燭睡欲死。鄉夢醒時雞喚晨。平時晨鋪下南浦。定向揚州聽更鼓。飛廉生憂吾敢怨。薄命若爲防市弩。今朝河面吹細痕。竹樹不聲人駿奔。掣鈴一笑話疇



昔便有樂事。酬佳辰。鎮淮主人開淥樽。蕙蘭香前簫鼓喧。一盃爲我安驚魂。勝談疊疊清耳根。向來憂虞無足言。

山居四首

山間有好事。時肯問何如。束送筇頭薤。鮮分匙面魚。披襟借我飽。攬髮爲君梳。一笑塵勞外。都無病可祛。忽作斷過訪。經旬閒瘦筇。慵添和詩債。病減灌園功。石鼎裏輕碧。庭柯零碎紅。竹君如見慰。竟日嘯窗風。烏息我亦倦。行行取徑微。石稜妨錯足。藤蔓每鉤衣。森木各天籟。連山同夕暉。推門吟袖冷。滿帶野風歸。涉世慣多還。還欣愜此心。雞孫當歲稔。竹母值秋陰。言配香杭軟。行須綠影深。繼今摩腹去。風日更蕭森。

香雲寺

山月明空隙。庭柯下槁乾。沉沉僧夜淨。漠漠鴈天寒。夢境愁偏隔。詩情老易闌。未容辭水厄。聊復踞蒲團。

圩上

小村山影裏。山腳水明沙。春事初移柳。人家未摘茶。生兒了門戶。饌客有魚鰕。笑我塵埃者。奔馳鬢易華。

丁酉道中暮春

去家如昨日。節物轉頭非。風處綠自舞。雨餘紅頓稀。野橋平水過。村路躡花歸。趁得醪醖在。箏琶拂舊衣。

得姪消息



甚喜年穀熟。仍聞佳食眠。郡人新過此。鄉信得真傳。社酒浮蛆綠。湖魚割玉鮮。平時計安穩。莫靳里胥錢。

金地寺

側徑崎嶇去。飛蘿次第捫。山橫欲無地。路轉卻逢村。竹栢圍荒寺。莓苔上繚垣。殘僧不知客。芋火老雲根。

陪盱眙王使君東遊四首

錦席浮波影。牙檣轉霧霏。飛花窺碧酒。舞蝶傍紅衣。野日歌前淡。雲峯望處微。游魚應與樂。啼鳥莫催歸。  
纜解鷗飛處。船移柳影中。林廬桃李月。浦漱蕙蘭風。酒淺能無醉。歌長惜有終。賦詩聊泚筆。寓意未須工。  
紅旗團皂蓋。離迥碧山隅。水色涵雲樹。賓筵著畫圖。香温金鑿落。花亞錦屠蘇。醉裏銀絲鱸。漁舟不待呼。  
風林山闕處。茅舍兩三家。小駐回鶻隊。重尋粟玉花。疎煙橫暖靄。碧溜漱晴沙。野興未渠盡。數峰明晚霞。

都梁

淮汴朝宗地。孤埤只眼前。譙樓西日淡。戍鼓北風傳。破竹非無計。澆瓜亦自賢。客愁渾幾許。撫劍倚吳天。  
天外纖雲盡。山巔望眼遙。平淮剪綠野。白塔界晴霄。客裏風光異。吟邊物象驕。功名它日事。回首興蕭條。  
關塞淒涼處。青徐指顧邊。如何漢正朔。不盡禹山川。將略輕三捷。天威重萬全。諸公不愒日。老子判留年。  
路惡惟沙磧。山回忽市廛。樓臺明晚照。花竹暝寒煙。生事知無警。懽聲驗有年。猶嫌武陵遇。不載割淮鮮。  
犬吠蔥青裏。人家竹徑深。短籬循石磧。老屋枕煙岑。牛瘠知春事。鳩啼認晏陰。豐年易爲客。盃酒慰幽尋。



年年漢臣節。春鴈與同歸。番俗尊華服。皇家後武威。市中斜髡賤。水外拂廬稀。南北皆生息。和戎果是非。

雨後病起

小臥竹間齋。幽懷得好開。病從涼後減。雨及望時來。兩屨山千疊。諸雛飯一杯。吾生計此耳。無夢到燕臺。

客中

多夜淮瀕夢。言歸未有期。愁禁客舍雨。寒過杏花時。酒廢無何飲。春如不自持。若爲丹九轉。能黑鏡中絲。

次瓜州

雲噎平山塔。煙明老渚城。客行判費日。舟泊細論程。閘水清兼濁。潮天雨復晴。未須歸有夢。午枕愜涼生。

贈趙秀才

袞袞紅塵去。扁舟得挽回。半生障日手。一笑沃愁杯。應俗吾衰矣。論文子壯哉。明年日邊信。滿冀好懷開。

定海

齒髮今如此。東來料一寒。愛民平日事。宰縣昔人難。稍得官租辦。聊容坐席安。渠儂趨負輓。疑未厭兒寬。官廨鹽煙外。居人雜賈胡。聽言須畫字。討海倚輸租。習俗何妨陋。鮮肥頗不無。已廿三載住。疇昔計乘浮。

聞師文過錢塘

九堰三江外。欵帆側柁頻。海鮮常入筯。雨鵲定隨人。椒酒須分歲。江梅巧借春。團欒多樂事。未沫物華新。



官居

官居不惜日。宰縣動三年。忍事腸欲爛。為防頭救燃。不應一飽計。長受眾人憐。俛仰堪供笑。人間海易田。  
送學生歸赴秋試因省別業

年事真無賴。官曹已憚煩。兒堪付門戶。吾粗有田園。遊舊因相問。襟懷為細論。此心歸隱計。日日受風幡。  
食口幾鵝鴈。田收問菜麻。子美力難及黍稷得種菜與麻寧堪再攬減。淮人謂歲飢為年歲攬減又抱兩嘔鴉。越人以嬰兒為嘔鴉投老  
憐漂泊。何時了貸賒。終慙陶靖節。歸不計生涯。

高頭山

小駐緣雲腳。居然睡眼醒。楚田銜樹闊。漢水挾山青。蹠躩初忘倦。巉巖已飽經。川原方啖蔗。不擬嘆漂零。

無題

薄宦受風梗。還家歸岫雲。行人與喬木。老色竟平分。末路慙周朴。窮交有墨君。看渠綬若若。千騎詫鄉枌。

書懷

俛仰人間世。纔為一笑資。百年羊胛熟。萬事虎頭癡。文字聊遮眼。功名浪朵頤。浮生如此爾。況復病餘衰。

次韻楊宰次郎裴時予亦留西鄉因述懷

信次尙村落。食眠隨曉晡。山瓶餘瀟倒。村人以野釀名瀟倒僧宇謁伊蒲。笑挾兔園策。問收魚澳租。前灘起漚鷺。



爲我作前驅。

次韻楊宰葫蘆格

生常信流坎。老不歎漂零。雪後菊未死。雨餘山更青。仍煩析塵語。遠寄打包僧。政績隨詩價。多君日日增。

次韻張守途中逢節向子房州之行。亦舟中作歲節飲。

途中歲逾盡。江影暮澄凝。栢酒惟宗武。河梁似李陵。問津田叟傲。捩柁長年能。繫纜纒沙觜。人家已上燈。

次宿北阿韻

聞道藍輿去。遙岡復近阿。詩應吊孝逸。碑或贊頭陀。靜者官糊口。公朝禮作羅。憐君日阡陌。塵土撲陰何。

北阿李孝逸。破李敬業處。

卽事

側徑苔竹潤。短籬雞鶩喧。小停障日手。聊憩臥雲村。綠影烏皮几。新醅老瓦盆。平生農圃計。重與野人論。

再用韻寄丁知縣

南樓酌酒未分襟。啁鵲啼烏亦好音。晴日倒紅生笑頰。煙梧搖綠漲盃心。可堪歲月供行色。盡把江山博醉吟。不繼蕪湖留十日。焦峰浮玉恣幽尋。

丁爲蕪湖簿。留予必以十日爲約。

念衰



心意彫殘底自娛。每臨清鏡笑頭顱。詩從多病難爲好。官過中年劣勝無。急景驅秋著髭鬢。歸鴻術夢下江湖。更應載酒高陽伴。誤輟歌呼話故吾。

閒適

丁年故紙枉埋頭。老去時名底用求。得句蓋嘗身被謗。屏書姑免眼爲仇。關門工作橐駝坐。閱世已冥鷓鷯遊。槁木山麋真適適。從來里舍議家丘。

次韻蘇監倉二首時蘇兼主邑學

交朋又得一相如。高掩虞郎行祕書。妙論析微驚我倒。諸生到眼可人無。一官幸此分鄰燭。五字渠能攬虎鬚。快讀清篇病如掃。北軒風竹對森疎。長日奔馳傳置如。久妨著論與抄書。逢人爭席有時有。疥壁留詩無處無。禦寇未辭躬楚製。論文常憶攬桓鬚。扁舟再有東遊便。肯向朋從自作疎。

縣西

一徑斜穿犖确行。身閒尤覺馬蹄輕。坡頭嘉樹千幢立。煙際長江匹練橫。茶鼓適敲靈鷲院。夕陽欲壓赭圻城。一春簿領沉迷裏。野鳥山花眼最明。

寄幼度主簿



辭家暑雨濺紅渠。轉首蕎花已雪如。歲月祇隨流水逝。笑談陡與故人疎。簡書我正罷長道。歸棹君行指舊居。他日霜風吹夢破。空從旅鴈覓來書。

七夕

龍旌鳳扇一相迎。知費青禽幾寄聲。天上經年纔舊約。人間轉盼便深更。涼河只向樽前落。微月偏來酒面明。後夜玉琴彈別鶴。獨應乾鵲夢魂驚。

復程平叔

早歲雄文手自編。偶同聞喜聽鈞天。漫爲官去吾何取。肯寄詩來子定賢。潘岳自憐頭易白。士安況苦病相纏。羨君身健須如漆。萬里亨衢穩著鞭。

夏夜飲客

矻矻官曹興易窮。得閒何惜一樽同。傍愁邊到無惡客。從竹間來皆好風。勝日詩狂輸酒聖。轉頭渭北復江東。雕鞍未作扶攜去。更放蘭缸子夜紅。

寄陳居仁

尙記誅茅柳外隄。水光搖霧潤窗扉。桑間曾是僧三宿。海上能忘鶴一歸。野店樽罍醅脚醞。比鄰雞鶩稿頭肥。解顏一醉平生事。更向行藏計是非。



贈仲國美前年春。國美亦留夜飲云。

三閱春光一建餼。依然歸棹泊危亭。烏迎客子各頭白。柳學故人俱眼青。曾是縱譚僵婢僕。又成豪飲臥  
罇瓶。明朝小話前溪別。分付溪風管醉醒。

贈趙秀才

平生心事釣漁舟。解后青衫映白頭。肯爲功名戲雕虎。不留顏面對沙鷗。露溥青蓋高荷曉。風約黃陂小  
麥秋。入眼斜川歸趣好。此身何處不菟裘。

京口呈張閣學

歸懷未用話南園。臥治于今又北門。但息兒啼寬上意。小稽霆擊取中原。虎頭銳視非無種。獺子當觴且  
勿喧。更恐譚公家世事。斷無宜勸定驚魂。時逐北客  
故云。

約二同年遊虎丘

兼旬閉戶耐寒威。起視晴空碧四圍。黃鳥啼邊忽遊子。白龍去後漸單衣。年時尙記尋芳約。老境仍憐得  
醉希。紅影幽香虎丘路。杖藜攜酒莫相違。

次韻張丞二首

夫君腹笥盡奇謀。每叩談鋒聽不休。誦賦久嗟無此作。薦賢端合拔其尤。小遲榮路觀掀越。聊爲同寮蓋



謬悠政恐諸公有推挽。平時果藝仰由求。  
槁梧閒據自沉吟。投老真成負此心。酒沃渴鯨悲事往。官隨跛鼈笑吾今。進爲終愧周人朴。歸去曾無陸子金。尙賴君詩慰牢落。時清聳聳發純音。

卽事

江漾晨光入縣門。樓斜晚影到漁村。海聲不爲無風靜。山色居常帶霧昏。問俗卽今防愒日。來時撫事錯銷魂。浮生寄寓居恩重。未覺天涯異故園。

勞農淨居贈皎啓二僧

勞農今喜復南轅。夾道扶攜亦笑誼。縣尹庶幾無疾病。山人迎送耐頻煩。菘葱湯餅聊堪飽。出瓮春醪半帶渾。惟有爲民真實意。異時陳迹付公言。

九日登樓海上重陽。率多風雨。邑寄罷飲作。

縣曹逢節猶忙迫。陰雨乘秋每接連。九日歡娛異前日。幾年晴霽有今年。湖山入座褰珠箔。萸菊按香薦玉船。帽委西風判一醉。故人應未笑華顛。

再次韻謝張守得新居

得巢歸翼愜卑棲。尙卷風茅落凍泥。病樹緣階旋培植。舊書堆案細籤題。地非新野聊龍臥。人似東屯賸



客迷身世只今供冷笑。百川東注月行西。

對客再次韻

客來一笑同鄉味。便粉秋菰刷藕泥。糟浥子薑仍舊法。籠緘乾笋儼新題。白魚紫蟹空濡沫。窘兔驚麋想碣迷。自揣臞儒合蔬糲。放麈終恐愧巴西。

自適

渺漭湖天入短篷。心期祇許白鷗同。人言火食闋蓬客。自命官身田舍翁。酒可銷閒時得醉。詩憑寫意不求工。更那長日溫書眼。一送蜚鴻下遠空。雲水爲家百累無。意行從昔略方隅。飲忘醒醉狂常爾。夢到無何午未蘇。遺俗可辭翻鞮錯。付渠陰作負舟趨。饒饒禮法工相聒。閉戶仍防大小儒。

登平山堂

平山堂上命琴樽。前輩風流肯見分。戀客嬾斜當檻日。藏山不斷隔江雲。吟牋得意窺天巧。醉面禁涼減纈紋。杖策歸來新月上。落梅如雪點風裙。

春日客中

平時謾說醉爲鄉。對景今如石作腸。老去猶興客中歎。春來剛制酒邊狂。露桃煙柳爲誰好。蜂蜜燕泥徒



自忙紅紫打圍歌笑地。暮年多感怕思量。

山行寄程帥

雨餘支徑濕平沙。恰稱卑官下澤車。雜樹暝煙森立槩。亂峰迎客儼排衙。水禽時弄翩僂影。野草爭開細碎花。久憶山行此如願。不應回首更思家。

次日再次韻

鷗雙鷺隻傍汀沙。卻匯沙汀過客車。清吹解撩叢竹嘯。高山如受衆峰衙。寒生碧澗懸魚網。潤著蒼崖賸土花。所惜隔牆紅紫滿。行行無暇訪山家。

復次韻寄程帥二首

節物匆匆可挽追。直須樂事趁芳時。行春倏喜花園屋。借景何殊月在池。南昌當官借景未妨民。恰以鑿池取明月。對酒不無桃葉女。扣舷卻笑木腸兒。山家有約須重到。定放遊人張水嬉。

人家襖被競攀追。刺史春遊正此時。羯鼓聲中花作錦。壺籌多處酒爲池。絕須絲竹娛安石。賸有篇章付雪兒。聞道續貂容下客。老無佳句坐荒嬉。

騎過山村

煙村面勢枕蒼山。一徑循山作屈蟠。入望高幢羅翠密。掛空匹練噴清寒。吟髭撚白迎風去。粧面駢紅倚



戶看。頗似騎驢后山老。倩誰粉墨灑毫端。

寄鄉中親友

棋酒游從歎離羣。酒牀吟筆漫風塵。潮乎可奈才力老。甫也尙爲南北人。安信不隨秋鴈到。流年倏復野梅新。南岡北阜憑高地。引首吳天幾愴神。

再用前韻贈高司理

吾宗如此況他揚。碌碌諸雛欠肯堂。薄宦幽憂殊未醒。故園歸夢可勝長。盃盤頓頓家雞嫩。翁媪嗚嗚社酒香。猶記比鄰笑行客。夏畦龍斷爲金章。

上巳溪上燕

杜若洲邊卓旆旌。佳晨一醉萬金輕。春光僅有一分在。天氣可能三日晴。解道蘭亭亦陳迹。肯吟楚些愴幽情。人生到處皆兒戲。笑看爭標鬪兩鯨。

再次韻答許節推

新釀開缸綠蟻浮。舊辭仍缺唾壺謳。宦途要處難插手。詩社叢中常引頭。倒載肯陪山簡醉。反關莫厭孟公留。秋田粗可供佳客。不比封君亦素侯。

書懷



人間窮達命污隆。作意功名欲捕風。但見劉班誤車子。何曾鄧禹笑王融。官曹得飽餘何事。書課乘閒亦  
雋功。少待蓴鱸付張翰。一溪風月放船篷。

再次韻謝高幾宜惠詩

小家茨竹卽爲堂。暇訪深林索豫章。平日牀頭但周易。看人筆落便靈光。庠隆賦質嗟多樣。良楛論材要  
當行。莫向黔婁問奇貨。長沙舞袖可能長。

歸歟老秋

已辦求田問舍謀。登臨那復更悲秋。蟹肥與客爭先把。稻熟催兒徹晚收。霜後峰巒添峭措。波間鷗鷺劇  
風流。寰中勝處天應惜。付與癡兒祗暗投。

宿何人家

步尋松篠款谿舂。忽到孤山處士家。十頃蒼鱗漾牆角。一鉤寒玉插簷牙。杯行不乏紅絲餠。飯了仍供白  
露芽。把臂傾舒吾已怯。又分離緒上歸槎。

凌晨張司戶惠詩次韻

小駐江千接雋遊。渭清涇濁可同流。假真笑我陳驚坐。造妙推君趙倚樓。姓字已高時輩上。功名尤忌髣  
毛秋。等閒莫學金華伯。碧水如天擬夢鷗。  
山谷詩。夢作白鷗。去。江南水如天。



仕塗決矣息交遊。姑向林泉訪勝流。短褐直甘乘下澤。異鄉終勝賦登樓。驚心夢境檀槐戰。屈指鄉園秫稻秋。雉翳龜焦緣有用。未聞金彈中沙鷗。

西林訪鈿師師頗能詩。

天將宿雨淨春空。卻著湖山鼓吹中。載酒言辭藉花伴。運斤來看斲泥工。前身師定參寥子。拙宦吾今張長公。俛首人間皆長物。未妨分饗北窗風。

夜宿商卿家復用過字韻。

菑蒲無警南塘靜。歉歲村區鼓罷撾。更喜良宵共譚麈。幾煩親手剪燈花。酌無多酒仍餘味。嬾不吟詩政自嘉。蝶夢蘧蘧纔一霎。鄰鷄啼罷又啼鴉。

晚飯商卿家用前韻。

我似長松久臥沙。迄今諫鼓夢猶撾。倚消愁斛人如玉。欲近書籤眼有花。投老無庸尙強聒。過君每肯具柔嘉。婪酣得飽行摩腹。不省饑號有暮鴉。

重九山陽儀真兩使君送酒

酒會文期興尙濃。佳辰一笑坐天窮。兩州各遣六從事。九日俄成一病翁。詩不受催空急雨。帽無緣落任西風。明朝晴徑通行屐。卻漫枝筇遶菊叢。



次韻高賓王見投

殘年病眼苦眇昏。盡屏甘腴誓綠樽。龍樹難逢刮膜手。孟公願有獨醒孫。頗煩十吏供揮掃。無奈諸峰役夢魂。友義惟公記衰疾。新編肯到雀羅門。病念還家可奈愁。客中日月急梭投。土花暈壁迎梅雨。海燕將雛送麥秋。霑袖正憐珠隕睫。關門能復玉爲舟。搯頭閣膝高春臥。黃妳青奴共此樓。

再次韻自誑簡賓王二首

魚辟清澄烏愛昏。陶翁歸計酒盈樽。山田雨足鳩呼婦。籬援春深竹有孫。百首旋編新賦詠。三生猶憶舊精魂。小摩他日紅塵眼。閒送蜚雲過海門。庾郎胸次枉堆愁。馮衍才名迄不投。歸去來兮歲華晚。末如何矣髣毛秋。令威心事千年鶴。張翰生涯一葉舟。回首月堂金谷夢。卻憐海蜃結飛樓。

次張學錄韻

燒香爲后山。展像拜太虛。誰能作九原。候蟲弔寒墟。臞鴨久欲忘。食蛙近亦稍。人言淮浙殊。得飽不汝較。

再次贈張學錄韻



李蔡下中爾。萬目指騫騰。何蕃頭欲白。秋窗耿青燈。  
張子攜詩來。危坐撥芋火。三問笑不對。政恐非助我。

次韻錢倅諸公睡香花

鈎窗玩孤芳。殘月衣上明。紫囊拆蘭麝。小風弄初晴。

泊上虞驛來日行

梁湖莽蒼外。後去未云遲。縣市容吾戀。江潮不汝期。

早夏

安石榴花猩血鮮。涼荷高葉碧田田。鱗魚入市河豚罷。已破江南打麥天。  
滿地榆錢未掃除。畫簷忽復燕將雛。風窗夢破搔頭坐。重課兒時讀了書。

題趙秀才壁

日日危亭凭曲欄。幾山蒼翠擁煙鬟。連朝策馬衝雲去。盡是亭中望處山。

謝兩知縣送鵝酒羊麵

僧樣齋厨冰樣官。饑憑脫粟食無單。不因同里兼同姓。肯念先生苜蓿盤。

次兩知縣韻



老去棲遲八品官。劍頤深悔誚田單。東鄰未省吟髭斷。笑擲牙牌命肉盤。

寓吳門張監。留居平江。率趙守袁憲。月助桂玉費作。

溪翁園客問何如。可諱浮生百計疎。不憚典衣規得酒。長因乞米銜能書。興闌猛輟凌江棹。重看鶯花茂苑春。歸自乘流留亦好。浙風淮俗總宜人。

紹熙壬子勸耕妙勝

桑條麥隴接比鄰。社酒家炊丐路人。風俗尙如它日否。憑誰細問故園春。

定海甲寅口號七首

長官清苦舊傳聞。檢放禾苗近四分。畢竟不緣胥吏手。旱頭科斂枉紛紜。田租有約不相違。比着豐年數已虧。一飽分明郎首賜。幾曾刺口問抽卑。已抄口數報隅官。歲後朝舖定不難。且願眼前彊健在。趁坊討海過冬寒。水泛溝塍意欲饜。凌晨還復雨廉纖。早秧未領其感切猶須插。晚穀無多不更埤。直廉切

父子分頭上海船。今年海熟勝常年。官中可但追呼少。不質田輸折米錢。人家兩兩捉春歸。笑語相過復歎咨。共說颶頭前夜作。幾人莆網罟流尸。連宵飛雨喜滂流。已入梅天過麥秋。二十年前如此晚。金城地抱卻全收。



謝張德恭送糟蚶德恭師文友也。

壓倒淤泥白蓮藕。半捐介甲露穠纖。玉川水厄那知此。急具薑葱喚阿添。

慶元冬再到盱眙

虎頭山下參天柳。親見栽時共我長。柳自摧殘人自老。半生不抵熟黃梁。日行犖确面孱顏。舊慣山居意易闌。見說煙雲暝嶮嶮。北人爭指畫圖看。

閒居營隙地。頗事栽種。隨遇作一詩。前後不同。故無倫次。

雪雲脫壞漏朝陽。風物橫前引興長。紅糝紫蕤今次第。遷鶯來燕費商量。種桃接李不辭勤。旋作花前把酒人。羨殺文禽映花語。飛來趁得見成春。春來敢自貸衰慵。正要檀欒間白紅。愛竹少留枝策徑。灌花分破著書功。步履歸來未覺勞。迎門喧笑問兒曹。笑翁渾似魚千里。小圃周圍日幾遭。

客夜不寐

陣鴻輻輳上雲衢。夢欲成時每破除。少睡更堪寒夜永。新來熟遍少時書。

江行

帆桅飛去劃空明。人倚東風兩翼生。世事快人如此否。日斜三百不留行。



到房交代

簷外浮嵐暎翠堆。道人親眼為渠開。淪錢官簿何須計。直為南山亦合來。

復次韻

昔上瞿塘灩預堆。盤渦如井放船開。山行歡喜今非錯。備見梢瀆撇漩來。地有錯歡喜山

十里髻鬟誰綰結。半天蒼翠自嶙峋。教兒莫憚依山住。闊領裁衣盡土人。

題驛舍

客到淮鄉話楚鄉。長將天末指襄陽。如今漂泊君休問。又過襄陽十舍彊。

房陵十首

似聞僊伯厭乘龍。常混紅塵市井中。覲面未須趨避我。褰衣無計跋尋公。房人謂巧避云起避跋音敦為

陰晴未敢捲簾看。苦霧濛濛鼻為酸。政使病餘剛制酒。一盃要敵滂朝寒。晨起霧久乃開

祠壇歌舞雜嗟吁。下酉猶濡上酉枯。誰謂朝來一拆雨。歡聲已覺沸通衢。水漑曰會朝得

竹屋高低正復斜。蔚藍影裏著人家。底消山峽三分瘴。爭課盧仝七椀茶。土人晨飲茶云勝山嵐

夏田少雨富來牟。多雨何妨穡事秋。已戒日供皮子麵。更教晚稻飽霜收。麵皆塲不塲者曰飽霜米

跨牛待得夕陽回。在處諸嫵笑口開。已借蠟錢輸麥稅。免教緝捕闖門來。弓以手緝捕



杯酒清濃肉更肥。感言趁社極歡嬉。丁寧向去坐年日。要似如今斂脯時。年日飲食斂脯。坐年  
農閒閭里有逢迎。白飲傍邊骨在羹。老稚不妨頑過日。邊頭難得是升平。俗謂戲曰頑。斂脯。坐年  
刈罷秋禾未敢慵。更須趁逐過殘冬。城中竹筴今年貴。鹽茗新來免闕供。斂。枯竹供饗。曰竹  
翁媪同園老瓦盆。倒芻新酒雜清渾。視南視北皆春社。且放烏犍臥晏溫。村視。所聚。反。曰竹

春寒

掃雪堦頭曉未乾。東風作惡鼻仍酸。西園點檢江梅後。祇有櫻桃不避寒。  
稍稍春光到眼中。衝寒試與小稽筇。杏花已尾櫻花拆。正要深紅間淡紅。  
清明寒食經旬是。笑問枝寒更幾餘。小杏惜香春恰恰。新楊弄影午疎疎。  
平明欲斂雲復厚。薄晚未休風更顛。老怯春寒不宜出。下帷添火擁書眠。

不寐二首

改變年來所著書。依然幽夢隔華胥。寒更何與衰翁事。數到瑤縱殺點餘。  
追思可樂是丁年。日力孳孳有食眠。頭觸屏風燈後。慈親笑勸掩陳編。

寄張守仲思

一思交好一悲悽。楚嶠吳山夢到迷。怕說萬山天樣遠。房陵更在萬山西。




四月望再遊西湖

春光陸續委東流。看到湖邊安石榴。更與蘇堤漚鷺約。辦舟來賞牡丹秋。俗目芙蓉秋牡丹。

吟詩自笑

文字光騰萬丈長。錦官老杜豫章黃。投荒忍死經人鮓。討飯充腸上岳陽。南昌詩云。我雖窮至岳陽。猶飯從人討。





# 雲巢詩鈔

沈遼字睿達。以兄遴任入官。爲審官西院主簿。出監明州市舶司。遷太常。奏禮郎。改杭州軍資庫。攝華亭縣事。奪官。徙永州。元豐八年二月卒於池州。遼畜聲伎。几研間陶瓦金銅物。皆數閱數百年。遠者溢出。周秦王介甫贈以詩云。風流謝安石。瀟洒陶淵明。其子雱亦有詩云。前日覽佳作。淵明知不如。及徙秋浦。築室齊山。名之曰雲巢。一洗年少之習。從事禪悅。蘇子瞻嘗語人曰。睿達末路蹭蹬。使人耿耿。求此才韻。豈易得哉。余閱其詩。間出入俗調。佳者亦生硬排奡。不知何以諸公見賞之如是也。悉爲汰去。庶諸公不爲失言耳。

## 寄陸九

賀老湖邊春水生。野陽浮動北風輕。天邊重鬪歌筦響。鑑裏綵舟金翠明。大抵盛時須着意。要知吾輩未忘情。君如彥道能懷帽。便逐輕帆作此行。

## 寄才仲

陶令在彭澤。放懷天壤間。橫江三百里。往往向廬山。多尋簡寂醉。時訪遠公閒。不復顧吏迹。世人指爲頑。公子負文華。少年成青綸。風流不屑俗。爲邑得星灣。節節香爐峰。據案見蒼顏。何勞事舟楫。緩步可躋攀。



形骸付物外。勿使人事關。巖壑高世人。有誰偕往還。新篇定盈軸。佳句不可刪。南風儻垂寄。誠尺慰衰孱。

贈礪翁龍尾硯

龍尾山盤八十里。龍尾有潭下無底。秋月亭亭潭氣黑。其中有石色如墨。山川秀氣散不爲。風雲頑不爲。砂礪融結至寶有物主。水上經營無處所。經年始獲不敢賈。我昔游江南。有客遺我誇龍子。吾知龍能變化是或不可制。追琢爲巨硯。大筆揮離騷。中圓體天形。外方作地象。精光熠熠角生浪。熟視乃有紺羅文。瑩潤無與比。玩愛何可論。我今樗散無所事。特贈華陽鴻筆麗藻人。吾聞蜀都多學士。真諸文府爲戰具。君如窮經遂絕筆。請與大軸傳後嗣。

春日行

宮梅撲地白氈班。細柳結煙金縷繁。春華年年來不已。人生七十半衰殘。少時豪放猶不敵。何況羈棲落荆蠻。囊中琵琶金鳳閒。古曲情深屬誰彈。病目矇矇對荒山。東風有意爲掩關。棄置萬事一夢還。江湖水生愁夜寒。

甲辰年五月十五日夜灃陽觀月

少年悵不樂。明月何爲哉。揚眉一遐賞。寂寂更傷懷。念昔吾州樂。泛舟湖上來。佳賓適所好。歡計成金罍。妖歌有送響。度曲清且哀。留連夕陽下。夜色起山隈。光明水晶域。素彩中天開。龍香弄微風。四顧絕纖埃。



澄波照上下。倒景出瑤臺。紅燭漸向微。始知夜漏催。美人屢更衣。含笑玉山墮。歡樂殊未央。鼓柁中洲迴。人生無憂患。遇樂且銜杯。悵余失交臂。萬里來天涯。羈愁那無感。情慮長如灰。神遊忽自笑。安知顧形駭。

贈大中鎮國長老

昔從東南來。稅駕依金地。迎風步峻閣。始眺灃陽市。蒼茫煙霧下。一水縈如袂。夷落雜連峰。精廬遙相峙。宅土信羈客。杜門忽彌歲。風雲一蕭散。身世兩無累。懷歸悵有感。史遷念留滯。引脰企昔游。野馬埋蒼翠。何時籃輿去。復將老師住。請掃巖下石。爲述空王偈。

遊瑞巖

已恨初年不學僊。老來何處更參禪。西風搖落歲事晚。臥對高巖看落泉。

寄四明神智師

甬水樓頭看盡山。南城寺裏扣禪關。老師多事猶相記。千里馳書慰病孱。

次韻酬明發華宗

長卿倦游欲東還。幸與諸公俱出關。世事轉頭都委夢。人生何計得長閒。殘花爛熳飄村塢。細雨廉纖隔碣山。誰寫熙甯十才子。老夫亦入畫圖間。出有正元十才子出關圖。至今多有傳本。

奉陪穎叔賦欽院牡丹



昔年曾到洛城中。玉椀金盤深淺紅。行上荆溪溪畔寺。愧將白髮對東風。

龜茲舞

龜茲舞。龜茲舞。始自漢時入樂府。世上誰傳此樂名。不知此樂猶傳否。黃扉朱邸晝無事。美人親尋教坊譜。衣冠盡得畫圖看。樂器多因西域取。紅綠結綉坐後部。長笛短簫形製古。雞婁揩鼓舊所識。饒貝流蘇分白羽。玉顏二女高髻花。孔雀羅衫金畫縷。紅靴玉帶踏筵出。初驚翔鸞下玄圃。中有一人奏羯鼓。頭如山兮手如雨。其間曲調雜晉楚。歌詞至今傳晉語。須臾曲罷立前廡。歎息平生未嘗睹。清都閬苑昔有夢。寂寞如今在何所。我家家住江海涯。上國樂事殊未知。玉顏邀我索題詩。它時有夢與誰期。

寄文翁

白兔觀邊僊路長。華林修竹到南莊。比鄰雞犬易過屋。適意琴書動滿牀。目斷鵲鴿分漢節。心隨鴻雁極天潢。欲移畫舸遙相訪。正恐田家五月忙。

奉酬舜文卽次原韻

我生無庸如斷絡。已分老死填溝壑。不能掉舌強附會。何暇論經更穿鑿。萊蕪甑飯欲生塵。玉川婢籠常赤腳。世間要途不易驟。身外名韁誰可縛。本無道義輕王公。亦不悲傷念流落。水鄉夏半不厭熱。繞舍新篁尙含籜。訟庭勾釘非吾事。吏按煩苛都可卻。農民漸使安畊畝。和氣終須蠲疹瘼。子羽不肯過我室。懸



榻何妨臥西閣。年來多病亦廢飲。牆下度泥委杯酌。舊學迂疎不適時。譬如石田何可穫。欲捕大鵬逐方嶠。終不勞心事弋繳。行當歸掃烏峰下。試煉金鼎長生藥。

題楊師壁

年來病倦厭尋山。且寄清冷白水間。最愛楊師舊茅舍。頻來借榻伴高閒。

寄慶復允中

木葉飄蕭已半殷。試臨高處望君山。野田繚繞來時路。畫舸逍遙數日間。坐想故人應見憶。如今禿髮不勝斑。兩州相望無千里。莫惜新篇斷往還。

贈清道

少年好書老彌篤。牙籤錦囊數百軸。江左墨妙世不矚。有唐諸公粗可錄。諸公草法無可稱。中葉始有張顛名。張顛下筆有神會。其妙不似點畫成。後來沙門有藏真。措意瀟洒尤更精。當時二子最名盛。至今學者皆伏膺。本期蘇公名弟兄。汝南蒲陽亦有聲。比來諸公已老死。其餘卑俗類可憎。我昔乘興游都城。列子示我新素屏。始知無擇得此道。長沙道人今復生。歸來窮巷揜柴荆。惠然相訪得忘形。贈我數行豈無意。勢如九河注滄溟。中間龍蜃降沒升。歎伏不暇獨可驚。自欲何能謝言情。欲贈金玉還愧輕。慙勤之揖喜不勝。使我區霧老後明。



池陽

池南柳色未全黃。池北萱芽尚帶霜。老去尋春不嫌早。春深留與少年郎。  
寒煙寂寂鎖青谿。圓月亭亭上曲堤。小杜風情遙可想。閒調絲竹舞金泥。

林平

河邊柳眼澹煙浮。臘破春歸一歲休。不復昔時羈旅恨。離明還泊北城頭。

次韻和宋平

憶昔銜杯折梅處。孤山寺前千丈塘。橫遮青林鬪殘雪。暗入紅袖留清香。往遊都城雖屢賞。縱有素艷終殊芳。莫辭遶林行百匝。更嚼嫩蘂薰愁腸。

和張寶臣卽元韻

始余倦遊念還家。一身泛然寄天涯。頭上白髮日益加。朱顏不駐爐中砂。飄飄逸氣凌紫霞。猶着黃綬趨泥沙。烈日護憑烏帽遮。窮巷歸來夕煙斜。閉門正欲謝喧譁。何憚屋室多痺窳。楊柳欲落鳴飢鴉。八月秋風想乘槎。市中有金誰攫拏。自欲歸耕老菑畬。嗜好已背梨與橙。那復開口增訛訛。眼昏白晝生黑花。老悲獨向兒女夸。枯轍不能活鱗鱗。騏驥垂耳伏鹽車。一官欣得飽魚蝦。頓首致謁辭當衙。愚拙不遇何復嗟。川陸舊遊殊不遐。才渡楊子已聞哇。吳女蓬鬢多髦髻。西湖信美謝若耶。松竹夾道繁根芽。勢利屈曲



如盤蝸。衛青變化乃龍蛇。深閨召客舞雙鬢。撫手相勸競呀呀。西庵老師自煮茶。太守陳樂奏渝巴。湖水洗面去塵痂。故山白怕留文沙。田裏小兒放猪猡。爲樂往往鳴簫笳。亦有狐兔怛怛置。令人指手徒爲椰。賤職馳使告及瓜。聿來甬東絕紛華。箝口不復露頰牙。聯曹相係瓊與葭。上官庇覆不汝瑕。優游重見林中葩。四時風露換物華。新詩迭致思無邪。吾子俊拔誠可嘉。豈獨鄙言數矜誇。高吟大字耀紙麻。時雖未亨道不汙。屢出珠玉能愧奢。麻姑手爪幸見爬。長篇垂況理不差。正如矛戟相磨叉。

走筆奉酬正夫卽次元韻

樂府古有行路難。但悲白髮憐朱顏。時命多向賢才慳。詰屈不平萬世間。壯心欲馳步輒跚。試出鋒穎官已瘵。中心忽忽倦且煩。不如歸去江海閒。要懸大刀數撫鑲。何陋九夷與八蠻。自顧鄙性疎且頑。誰能隨時事黠姦。從來多病筋力孱。正當落魄臥深山。敝廬數椽粗可跽。安居里巷鍵重關。終日無人踐茆菅。冠帶不修衣袂黶。高歌一曲舞雲鬢。比鄰有酒時見頽。春風秋月與我閒。夜靜佩玉鳴珊珊。高人逸士或往還。蓬舟自訪來前彎。行歌紅藥與香蘭。已增俗物近塵寰。一身蕭然念早鰥。髭鬚憔悴半已斑。誰能更問禿與鬮。且聽溪水聲潺潺。強來爲吏腰少彎。幸讀君詩錦繡篇。相望鬱鬱何可刪。君豈久居五兩綸。

次韻酬李正甫對雪

苦寒冽冽日夜增。朔風軒軒勢相凌。遙山頑碧空峻嶒。高堂閒坐擁敝縉。欲醕一杯意已仍。結歌黃竹但



伏膺愁雲漫漫方四騰。海氣上薄初不勝。雪霰雜下風作稜。漸著弱柳頭鬢鬢。半積軒砌發幽層。枯樹兀兀愁飢鷹。紛然不已失溝塍。一飲一斗心易矜。試步薄冰猶戰兢。圓圭方壁降復登。憶昔前年正嚴凝。攝事大蜡清晨興。平生看雪實未曾。健僕駿馬半醉乘。或前或後望交朋。不辨明河與玉澗。烈火萬炬氣不蒸。被面唯有凍與冰。歸來心目如水澄。喜看道傍剝作燈。豐年爲瑞古有稱。凍死何暇談鄒滕。欲邀君飲恨不能。相酬莫問準與繩。

詒隱者

訪我維摩室。不值香積飯。開囊出黃粟。爲汝林中爨。軟語少稽留。青蔬亦易辦。勿言方外趣。我汝真如幻。

樂神

夷人事神正自醺。山頭水邊與神樂。大巫龐衣手搖鐸。羣兒伐鼓更鳴角。青山歷歷神欲歸。湘水灘灘日脚西。小大酣歌向山棲。神羹滿盎均汝釐。

日落

日落沙頭山已昏。飢鳥投暝下前村。誰云野客無多事。步出林間自揜門。

棗花寒

山禽哺鷓半欲搏。坐想葛帔臨風湍。數日陰霖復未暢。不知更作棗花寒。



復作過商翁墓

當年不佩封侯印。後世誰尋墮淚碑。定遠將軍豈夸勇。關南常侍最能詩。故人不解傳遺事。五嶺猶能識信旗。墓下寂寥無鼓角。秋風獨向白楊悲。蒼頭已作歸來曲。不信全生庾氏碑。疑有史官爭立傳。終無嗣子與聞詩。後房已閉千金妓。私廟空收五采旗。聞說詔書優贈典。孤魂應結九泉悲。

鈞母潭

余讀子厚書。始聞鈞母潭。榜舟西江下。振步愚溪南。高下凌山阿。松篁蔽秋嵐。土人識其地。古木森榲楠。水深日波瀾。此理亦易探。古木爲鈞姆。土音正相參。所記或不然。信書殊未甘。此公廢已久。山水窮年耽。造化毫楮間。浮實微相銖。幽心有默識。西歸助清談。

贈廣祐上人

不入四明路。侵尋已十年。葛藤論往事。蟬蛻想蒼煙。松下數株石。巖前千丈泉。何爲不肯住。芒屨更參禪。奉簡莘叟

紅葉飄蕭秋後山。相望止在一嶼間。老夫無用方安命。夫子何爲早閉關。世事不隨歌吹樂。此身略與水雲閒。經年不見寧相外。安在區區事往還。



火星巖

火星巖下石峻嶒。殿閣相望止一僧。莫問人間興廢事。門前流水几前燈。

侯灘

江流激激過侯灘。更上山頭看打盤。百歲老人親擊鼓。城中憂樂不相干。

踏盤曲

湘水東西踏盤去。青煙白霧將軍樹。社中飲酒不要錢。樂神打起長翳鼓。女兒帶環着縵布。歡笑捉郎神作主。明年二月近社時。載酒牽牛看父母。

過商翁墓

征南名地蚤相知。老向瀟湘看立碑。壯節獨馳南嶠事。古風不括故山詩。愁煙半鎖黃茅壠。部曲誰尋舊將旗。遙矚蕪江想靈氣。孤雲落日不勝悲。

湘中宿臺步寺

湘源初甚微。屢挹不滿缸。比至臺步虛。泛泛爲長江。虛頭市初集。魚豆皆成椿。夷獠不識人。笑鬻麩與龐。綠荷竭苞苴。人散誰復撞。鷗鳥亦來下。酒旆停空杠。我來憩桑門。竹戶映蓬窗。夜寢那可寐。江流正淙淙。

泛舟上湘口館



瀟水漫南來。湘川趣東下。二水始相會。清豪不相藉。山迴石瀨出。木老脩煙嫁。泛泛白蘋洲。林風媚如畫。宿昔感騷憤。幽興遙相借。不謂垂老年。羈孤窮山舍。潮來刺舟去。孤月臨清夜。安得騰鯨魚。不復人間化。

禪僧巖

瀟湘山水窮欲徧。最後乃得禪僧巖。禪僧成道久已化。獨有崖嶠青巉巖。降身入洞不甚險。突兀三室誰彫劓。東西有道若蛇竇。白雲羃羃門無緘。持火旁行不知際。七穿八竅遙相銜。涓涓乳泉白如雪。由來此地殊仙凡。主人引我復深入。行指嶼穴尤嵌崑。中間石鼓有異響。擊拊想可參韶咸。吾身久病苦下溼。復畏神怪來邀機。直趣出洞上南巘。豁若巨海張雲帆。山花爛斑出竹梢。亦有禽鳥聲誦誦。欲還未可復小駐。日腳已過東岡杉。

贈別子瞻

平生雅游眉陽客。五年不見鬚已白。借田東坡在江北。芟夷蓬蒿自種麥。相逢不盡一樽酒。故態那復論歡戚。手抱阿武勸餘瀝。維摩老夫失定力。老夫寂寂出三湘。更欲卜居池水陽。薄田止須數十畝。田上更樹麻與桑。老來正苦迫生事。清明雖近猶可秧。罷亞若可博乾麩。以無易有遙相望。我舟卽行不可駐。欲卜後會誠茫茫。他時有信若可寄。不用辛苦爲詩章。

德相送荆公三詩用元韻戲爲之



幽居臥山間。不與世相接。餘生委蒲柳。滯想遺空劫。德相蚤相親。顧我情未厭。數枉南堤步。更引青谿牒。相見亦何事。坐對羣峰疊。陽春始萌動。煙嵐生劍鋏。廉纖數日雨。萬里浮塵浥。赤白未殘花。修穠半敷葉。行招老僧語。遙矚東田饁。窮崖歷可造。峻流誰敢涉。衰齡易生倦。幽巖就調攝。德相知我憊。雙眸困垂睫。高詠楚公作。欲引維摩箴。初聞未甚解。靜聽疑可獵。有如太華峰。跛躄豈易躡。不知泛滄海。何力施舟楫。遙窺土山勝。昔乃文靖業。二公雖異時。名德遠相躡。山川若有待。風物增悲慄。未知蔡侯履。孰與支郎蹠。勝游可概見。筆力方峨嶭。更紆別後情。琅琅鋪簡牒。倡高必和寡。排比安且帖。簫竽合古律。宮羽自諧協。世人所欽慕。有口空嚅噉。東牀坦腹士。左右參經笈。爲賦弈碁句。瑤琳吐胸脅。鏘然不可閉。由來知捷捷。謂如伯升勇。揚兵開宛葉。豈比文信君。無謀喪張靨。致死在必勝。甘言方示怯。尾章示戒訓。足以傳芳諫。後生知自勵。何必捶楚挾。正如嚼冰雪。清冷快牙頰。我昔造公室。公方任調燮。辱枉淵明贈。今猶祕巾篋。當時墮官去。終身欣廢跼。冠帶遂已捐。頭腦深埋壓。肯羨冥冥鴻。安知栩栩蝶。心清久無夢。神固安知蹶。少小銳文史。老大心更懾。是古豈余心。非今寧我愜。況復論翰墨。爾來那可輒。不識渾脫舞。何愧張顛帖。所居養鵝雁。菰蒲觀唼喋。亦有藜藿畦。粗充匕與挾。孰知名可貴。安用祿爲糴。無求豈有沮。不動誰能嚼。汝堅百萬衆。淮潰空雉堞。陵陽丈五坟。朱雲本輕俠。百年竟何往。終當封馬鬣。何必悵霜毛。更向窗前鑷。

德相所示論書聊復戲酬



野舍老餘生。雅尙今已愜。不逃世憂患。餘事寄巾蹠。行尋青山轉。坐對青山疊。欲隨白雲去。儻與幽人接。盤桓太清洞。悵望長江艤。昔時古錦囊。今還白羽箠。不復叔夜煨。真得孫登攝。九華一枯藜。青溪一孤楫。得喪苟自達。死生安足懌。朱顏久不駐。白髮何爲鑷。羣物自流轉。吾生寄天燮。德相屢相過。老夫寧足躡。由來廢井水。不如長劍缺。往往論書法。軒軒兩目睫。中郎石經在。元常表軍捷。漢魏多傳人。至宋有遺帖。唐室初最盛。漸衰自中葉。歐虞緬誰嗣。顏柳何足躡。篆籀昔難工。草聖誰敢輒。巨山作散隸。雄古掀龍鬣。貞觀喜飛白。凌厲騰春蝶。豈特豁神觀。直可祛鬼魘。古人有所寓。天性難必協。所志有大小。其材有勇怯。或憚懦文雅。或軒昂豪俠。或轉戰鞍馬。或驅馳弋獵。或發於止諫。或得於訟牒。或奮奪牀陛。或造成械櫜。或爲神所迫。或自勢所劫。或醉以賈禍。或詐以行謀。或習於娛樂。或勞於呿嗜。有燦如文錦。有勁如金椳。有倚如戈鋒。有點如山嶽。有駛或如波。有媚或如靨。或騰如烟霏。或落如鳥跼。淵妙欲飛動。拙惡愧偏擊。當寢或不寐。當晝亦忘饑。有譽終甚微。或毀則羣囁。爲功有不至。考古安能厭。十年幸能就。萬金毫豈浥。金玉敷卷軸。龍蛇闕箱笈。是惟小夫技。寧當丈夫業。譬如論唐虞。何曾道郇葉。如君負高識。於此何足挾。一戰雖未霸。遐心豈卽怙。朝廷方洽熙。四夷皆遠懾。坐復洮河地。直擣幽燕脅。朝夕奏奇功。羣儒爭鼓篋。太平任文治。虜血何煩喋。道德以爲宇。威武以爲堞。豈比叔孫生。雜用隨何頰。吾衰何可道。不死同原涉。

德相惠新茶復次前韻奉謝



暑雨闌窮山道滑不可躡。隱几念投老。葛衣坐搖箠。林端使者至。乃得德相帖。佳惠致新茗。遠來自閩笈。吾聞北苑勝。不與羣山接。山下幾千家。以此爲生業。新陽一日至。東風方獵獵。百草尙勾甲。靈芽已先捷。所採僅毛髮。厥工巧烹爨。甘泉列盎釜。熾炭浩旁疊。修竹爲之規。黃金爲之挾。形摹各臻妙。製作易妥帖。至尊所虛佇。守臣方惕懾。其上爲虬龍。蜿蜒奮鱗鬣。稍降乃交鳳。文翼相盤跼。函封趣北道。驛使互防挾。四方老金玉。擬議誰敢輒。屹屹健士檐。飄飄迅溪艤。穀雨不及潤。權門已盈篋。帶鞞體正方。葵華角仍擊。始傳盛王鄭。後來止游葉。大爲權勢迫。小或盜賊劫。其間起鬪奪。亦數冒刑櫟。南夷出重購。不憚浮海楫。北虜比尤好。喜笑開胡睫。豈不產叩蜀。豈不生楚葉。厥品乃大戾。固難一理攝。朱門厭酒肉。辯士厲舌頰。儒生備夜誦。農夫困朝餼。禪翁過江煮。老獲空腹喋。綺席夢騰騰。玉山頭樂樂。無魚乃尙可。非此意不厭。一泛舌已潤。載啜心更愜。不唯豁神觀。亦足暢煩懣。清冷生肺肝。爽快勝抓鑷。孰不恃薏苡。伏波煩謗囁。孰不飲醇酎。伯仁憂腐脅。祖逖敦雅尙。鴻漸未博涉。君謨號精鑿。才翁亦相躡。玉川七椀興。令人解頤鑿。奇章兩串賜。遺芳在圖謀。余昔喜賓客。爲世困書牒。輕重必酬酢。往來煩躑躅。自從竄夷裔。所藏多敗涸。亦幸衰老年。數病脾氣怯。棄置在高閣。魂夢昏多壓。拘病出湘漢。餘生若蟬蝶。希夷有幽臥。刀劍銷銛缺。一榻就空曠。百骸得和協。久已廢翰墨。況復道游俠。有味養元和。無物累吾嚼。臨風欲占謝。遙企山西懣。



左山叢古木。縈帶多美竹。右山少平地。硃磴斷蒼玉。於此豈無竹。蕭疎倚巖谷。上參九頂道。俯浸清谿澳。於彼豈無石。嵌崖大如屋。景業讀書處。基構有遺躅。始吾購二山。何爲不相屬。中間古蘭若。臺觀當山腹。巖洞九十七。龍蛇所潛伏。昔人作軒榭。高深奇秋麓。我乃巢西崦。手自親鉏斲。青溪漫無際。島嶼相重復。雨餘山更佳。春流漲平峪。下瞰池陽市。修煙弄芬馥。大江天上來。淮山點眉綠。老夫豈無意。落日傲鴻鵠。東嶺亦誅茆。小菴粗容足。六峰引南睇。九華勢相續。白雲與誰期。千載媚平陸。清曠無俗韻。脩明資遠目。去秋已種麥。今春復栽粟。野老豈余欺。東坡幸膏沐。二山誰與適。最與枯藤熟。相見詎無人。顧我真麋鹿。一年一瞬事。何暇知委曲。得此化餘年。不問君平卜。

初泊磁湖時子瞻在齊安。

歸舟不解洞庭帆。舟上騷人雪滿簪。小駐武昌江北岸。春風今夜泊江南。

清冷臺

山前繚繞白雲飛。山下溪流那復迴。不向此間休歇去。甯將白髮汗塵埃。

左史洞在北山。

萬古齊山石。誰開左史洞。左史今何在。蒼崖本不動。履嶮下重壑。幽深鬼神總。石門絕世路。久爲塵泥擁。青天十畝地。巘岼如覆瓿。琬琰鑿屋壁。煙霞列梁棟。崖間不死藥。必非近時種。人去境長在。境與人爲重。



欲觀疇昔意。幽禽發清唳。吾方寄淵寂。無礙亦無縱。手自翦荆棘。結茆當石空。長與麋鹿遊。不復人間夢。  
送曾處善赴寶應尉

我初隱身治蓬藟。餘生不復人間世。左山右山白雲上。一動一靜浮塵外。齊山山上老夫庵。青谿谿南侍中第。朱顏公子不易識。短衣款段來相際。長堤相望雖甚遠。有意卽行終不計。東鄰竹閣長夏熱。我構雲巢方自蔽。爛斑石臺始一眺。寂靜庵基猶未薙。隨雲步訪胡矮老。放懷止得殊師利。石橋寺前夜月冷。金雞峰下秋霖霽。君恃馬足不憚遠。我駕藍輿隨處稅。六峰老師氣軒豁。九華雌山苦陰晦。庵前菜茹常不厭。城裏羊肩難數置。漫天風雪一暢目。滿榻春陽欣炙背。裴休自參黃檗禪。院福豈是一昌尉。相見終年已解空。分襟一別那成滯。拍江春水浮鷁首。萬里青天運鵬翅。順風莫寄南來書。老夫柴門多自閉。

臺下

石梅落落欲黃時。細雨濛濛暗不開。數日不行臺下路。不知江水過山來。

清冷臺初夏一首寄上翟舅

清冷竹樹暗成陰。漸有溪流過此岑。草草作巢方寄老。愔愔設榻本無心。松門不隔紅塵路。月疊初無俗物侵。欲向人間訪消息。渭陽應有遠遊吟。

齊山偶題二首



杜子風情春水波。至今詩句使人夸。不知朽骨猶存否。山上年年黃菊花。  
朝雲未散白笥陂。落日已過銅陵西。不向人間生皓髮。直尋仙客上青谿。









# 西溪集鈔

沈邁字文通錢塘人以郊齋郎舉進士廷唱第一謂其已官改第二通判江寧府除集賢校理知制誥出知越杭二州遷龍圖閣直學士知開封府拜翰林學士丁母憂卒於墓廬有西溪集十卷詩非其能事而唱和者爲王介甫蘇子美何故而止於是也

## 七言送僧思齊歸吳

西風送霜河水落東都歸客不可留囊衣卷詩載輕舸飄然獨下東南州吳山木落衆峯出越湖潦散孤嶼浮橘丹萼紫新薦俎若下醪美不計售十年塵埃一日去猿初脫檻鷹下韝幽潛遠颺肯回首送之卻顧令人愁鱸魚正肥張翰老田園將蕪陶潛憂子歸應有問予者爲解區區茲有由

## 五言天台山送僧象微歸山

吾聞天台久嘗讀興公賦茲爲東南鎮神靈之所據奇挺究萬狀嵩岱不足語頗疑說過夸特爲辭之嫖象微迺州民能識山之故從容試爲問聊得一二疏赤城建霞標上與斗牛附萬有八千丈矗若天一柱瀑布發高原飛流翻四注雪霜浮虛空晦明亂朝暮巖足多丹石光華燦寶璐稽溪百餘仞欲濟毛骨怖九折凌峻梁五界窮幽路芝蘭散奇艸松桂羅嘉樹祥風吹白雲飄然若可御幽闕足瓌怪纖悉難畢具



凡迹古不到。神物陰自護。傳聞昔人說。中有洞天處。是名不死墟。衆真所游聚。玉堂敞金庭。碧林列瑤圃。有能從而求。得之迺仙去。斯言寧可信。良非吾所慕。吾志本丘壑。久已失厥趣。誰言石渠客。乃甚轍中鮒。秋風日已高。歸心浩欲鶩。茲山宿所愛。送爾緬東顧。吾廬因爾卜。俾來審繪素。

七言景德寺考試院壁和王介甫所題詩

石藍開盡紅着地。瓜蔓半枯黃倒垂。坐看一夜芳意歇。風霜卽是蚤寒時。

五言蓬萊山送徐仲微赴蓬萊令

渤海三神山。蓬萊隱嵯峨。仙人桂葉舟。浮矣明月波。驚塵不可到。飛鳥不能過。世人但傳聞。欲往爲奈何。胡然古荒王。甘心事欺訛。於今禱祠迹。往往存山阿。當時燕齊間。方士肩相摩。遺俗頗淪胥。官不嚴禁訶。子去爲邑尹。施舍各有科。茲實繫教化。無宜反媠嬰。平生學詩書。仁術嘗切瑳。毋曰百里小。民人豈不多。誰當之武城。敢復聞絃歌。

七言和君倚景靈行

東城大道何逶迤。中直清廟表六扉。右臨景靈祕館之翼翼。衣帶相國浮圖之巍巍。道旁他舍多絕赫。車無停輪馬交策。風塵勃鬱千丈高。素衣化緇雙眦塞。南阡窮巷我所居。上下省戶兩歲餘。病軀羸乘實厭畏。每趨徑路宮城隅。宮牆倚空背環極。隱嶙樓臺露金碧。朝霞夕照天半明。牆下行人徒眩惑。我嘗入謁



得縱觀威容物采嚴且完。鸞車歲歲躬獻享。孝思盼饗通神歡。重門設衛日常闔。靈境那令世人雜。但見長松怪石列若屏。突兀陰森兩遮匝。我家東南滄海涯。乘時偶來觀德輝。歸飛故隱自有期。何必於此空歎歎。

七言和吳仲庶延菴閣後牡丹花時後殿考進士。

承明待詔盡名儒。一願當君奏六符。獨笑開元供奉客。惟將歌句奉歡娛。

### 南漪堂

山遶湖堂寺遶山。平生願向此中閑。青雲白水相浮蕩。野客高僧獨往還。年少無嫌軒冕累。因循將恐鬢鬢斑。南漪最是逍遙地。且挹清波濯愧顏。

### 次韻和少述秋興

浩蕩西風動客裾。飄然歸思滿田廬。少時豈省爲名誤。老去真知與世疎。勝事祇隨詩句盡。壯懷猶向酒杯舒。南山已有來年約。三徑何年得自除。

### 次韻和李審言上元寄王巖夫

此都豪麗歲仍豐。此夕都人凱樂中。車馬笙簫千里至。樓臺燈火九衢通。香輿軋軋凌風駛。粉袂翩翩照地紅。病守行春真勉強。更堪攀倚少年叢。



次韻和王巖夫見寄

前日移舟就近村。送君西望大梁門。九重宮闕天光遠。千里江湖水氣昏。壯士遨遊應自適。少年離別枉傷魂。北州爲政須當厲。卽上青雲款帝闈。

次韻和孫少述潤州望海樓

北固峨峨鐵甕完。京口浩浩海門連。鵬搏羊角來天外。鰲戴方壺獻几前。西府旌旗猶壯曙。南朝宮殿盡蒼煙。登臨不用成悲感。自得開懷一曠然。

和少述春日

風流自古吳王國。一一湖山盡勝遊。上巳清明最佳節。萬家臨禊錦維舟。初晴池閣暖無塵。花落絲飛不避人。祇愛年年好景光。須知華髮一番新。臥病江東又見春。高齋長日坐生塵。看花飲酒應難強。猶有詩情謝故人。

將至京口先寄孫少述并呈晏子俞

爲郡無聞困米鹽。先生有道獨幽潛。豫章因甚尊徐孺。益部何能詘蜀嚴。已脫簿書身自放。肆尋山水意寧厭。京江最欲方洋處。願從屏星卷畫幘。

奉酬潤州余少卿見寄



兩鎮旌旗對撫邦。老成循政獨難雙。賜環已許歸西省。擁棹方來絕大江。後乘願陪幽賞盡。詩新頓使勇心降。主人意厚春潮小。且卷孤帆偃畫杠。

戲盧中甫錢才翁

晴日春風花氣浮。少年嬉逐滿揚州。誰憐居士身常病。獨坐空船理白頭。居士身常病。一作終歲惛惛病。

和中甫新開湖

渺渺清波百里浮。昔遊曾是一扁舟。十年人事都如夢。猶識湖邊舊客郵。

過冀州。聞介甫送虜使。當相遇。繼得移文。以故事請避諸路。又以詩見寄。次韻和答。

風沙敝盡舊狐裘。走馬歸來過冀州。聞報故人當邂逅。便臨近館爲遲留。不容傾蓋論時事。空寄新詩寫客愁。卻望後車塵已合。簫聲清斷去如流。

還家自戲

憶昨邊城初見春。纖纖垂柳正矜新。不如遠客貪歸意。欲把狂絲繫畫輪。

依韻和李審言見贈敍舊

日與公家三世舊。坐看高閤壓亨衢。榱桷屢構明堂廈。麟鳳更參聖代符。結友固應皆以義。論詩何獨取於愚。歸舟早晚乘潮度。猶得西湖一笑無。



依韻和施正臣遊聖果寺

盤崖絕巘與天通。汗漫烟霞謝世籠。聳起浮圖山突兀。自然衙石玉青葱。古人興廢千年上。遊客登臨一  
嘯中。誰爲燕然愧班寶。弧城羈據亦銘功。排衙石有錢鏐刻詩

贈郟縣桃源宮王道士

我昔剡谿遊。道人亦相遇。重來十歲餘。顏色宛如故。顧我病衰早。鬚毛已蒼然。乃知世上榮。詎若山中閒。  
道人家東都。問胡不歸北。北方多風塵。素衣化爲黑。斯言吾所信。吾志亦江湖。瀟洒會稽守。平生欣莫如。  
君恩容苟安。願奉三年計。幸爾數到城。間談北方事。

次韻和不疑借書鄰幾遇其寢

嗟我江湖人。野性實疎簡。况從衰病侵。事事益以懶。豈不思自強。所思乃有限。但愛江夫子。平生事高散。  
維於讀書勤。晝夜不去眼。每勞從事賢。獨使簿書綰。揮署曾不勞。兼人信無赧。有時倦欲休。就席初不煖。  
鄰友更借書。丁丁叩門版。尤厭吏舍喧。牛羊閔棚棧。不如歸吾廬。靜對日碗碗。詩成還示我。足以驚幽孱。



# 龜谿集鈔

沈與求字必先。湖州德清人。登政和五年進士。累遷至明州通判。召對除監察御史。歷兵部員外郎。殿中侍御史。請都建康。上不悅。出知台州。召還。再除御史中丞。前後幾四百奏。其言切直。自敵已。已下有不能堪者。高宗時有所訓勅。每日汝不識沈中丞耶。移吏部尚書。出知潭州。召除參知政事。出知明州。遷知樞密院事。卒。諡忠敏。其詩喜論體製格律源流所自。不貴苟作。有龜谿集十二卷。

## 次韻曾守懷玲瓏山

泉石有膏肓。料理費和緩。風埃客子遊。夢想略相半。端如鑿羊酪。投匕念鄉饌。懷哉小玲瓏。舊賞記酣宴。玉女下雲牕。輕我年未冠。誅茆老三間。此意已懸斷。少須草堂資。兩足那可絆。謝公愛東山。自結尋幽伴。詩筒忽相先。紙價豈容賤。流傳從使君。感此歸思亂。擷蘭躡危根。漱石俯長澗。野性等麋鹿。百嗜寧食薦。攬衣中夜興。測漏疾流晒。局步愧鶩筋。卑飛傷短翰。正使屐齒折。未救斧柯爛。時節脫復徂。遲莫空浩歎。何當脂下澤。去路鬱交貫。

## 錢塘賦水母

疾風吹雨回江城。艣牙嘔啞潮欲平。客居喜無人事擾。相與環坐臨前楹。眼中水怪狀莫名。出沒沙觜如



浮罌復如緇笠絕兩纓。渾沌七竅俱未形。塊然背負羣鰕行。嗟其巧以怪自呈。凝目慢視相將迎。老漁旁  
睨笑發聲。曰此水母官何驚。江流如奔絕滄瀛。潮汐往來月爲程。藏納衆污無滿盈。浮埃沉滓溷九清。結  
成此物宜昏盲。使鰕導迷作雙睛。乃能接迹蚌與蛭。亦猶巨蛭二體并。離則無目爲光精。江天八月霜葉  
鳴。罌師得鰕供水征。水母弃擲羅縱橫。試令收拾輸庖丁。絳礬收涎體紆縈。飛刀鏤切武火烹。花瓷釘餽  
粲白英。不殊冰盤堆水晶。稻醯齏寒茱香橙。入齒已復能解醒。遣漁止矣勿復評。嗟哉此性愚不更。定矜  
故態招三彭。且摩枵腹甘藜羹。

泛舟村落阻風不能少進而菱稍芡芣繚舷上下篙人病之。

艇子掠岸行。水瘦不濡尾。狂飈振疎蓬。獵獵鳴兩耳。十篙八九褪。逆勢何乃爾。野芡伺吾間。回梢哆利觜。  
亦有芰浮角。一一肆輕鄙。初欲事幽尋。解纜出疎葦。乘流覓清淺。濯纓助深喜。事有大不然。移頃未離咫。  
安得望蓬萊。巨艦破潮起。征帆駕長風。一日三萬里。

夜坐感事

沉沉夜氣歸。虛堂閉深寂。孤燈爇餘花。寒露韻殘滴。醞釀萬斛愁。感慨一人敵。何當棄短檠。陰山叱鳴鏑。

戊申初寒偶作

去年十月冬猶溫。單衣曉出錢塘門。攜挈僅脫餓虎口。更吟楚些招驚魂。兒女爭從亂離苦。咿啞遶膝多



語言舟行畏塗侵夜泊。孤燈明滅何處村。簫簫細雨疎葦響。風力漸搖枯柳根。失聲號寒泣龍具。促糶傍險爭前奔。還家依然四壁立。故衾敗絮那忍論。無衣豈暇具裘褐。海圖坼裂波濤翻。天公戲人亦太虐。雪花徑尺連上元。今年十月事羈官。兩腳如舊身大存。紙窗寂歷風竹嘯。古木中夜號空園。旅人不眠毛骨冷。撫事念往多煩冤。吾儕小人不論數。豺狼滿目哀王孫。似聞易水寒墮指。北望大漠烟雲昏。安得壯士馭八駿。沙蟲猿鶴俱騰騫。歸歟莫如中土樂。天子孝友朝廷尊。坐令鐵衣掃蟣蝨。四海挾纊懷君恩。

夜宿千秋嶺下田家

陰壑來悲風。薄莫吹急雨。冥冥攬寒色。咫尺暗山路。茅簷兩三家。曲澗縈竹塢。停車遣問訊。欲止此何許。老翁行步弱。扶杖倚門戶。問我官何忙。野宿今無所。向夜號狐狸。深林嘯豺虎。甘心在擇肉。闖首輒憑怒。駕言往何之。一榻翁敢拒。延我傍中堂。慙懃慰良苦。解衣土鏗旁。支枕憩行旅。昏然飽安眠。境寂絕猜怖。雞聲報明發。征車犯寒去。呼燈別老翁。鼻息方栩栩。

增愧。維心方刊正三國史。某以精筆遺之。蒙餉大篇爲謝。氣格渾然。三復感歎。謾依元韻奉和。蕪陋

諸豪雄。誇劍芒銛。毛錐斂。避收餘尖。櫝間黯黮。渴銅雀。案上爬沙。枯玉蟾。學堂山人有遺裔。筆力大可千人兼。掉頭不肯書柿葉。酒酣起舞怒奮髯。十年歸坐溪口屋。傲視冠冕猶髧箝。草玄草聖聊戲耳。如醫識



藥信手拈。邇來直筆到三國。去取法度何森嚴。眼中青白世矜異。皮裏陽秋誰顧瞻。更憐中書今日老。雞毛葦管爭出奩。懸知入手便獐劣。那復助子窮幽潛。我持妙穎急送似。標題珍重存華籤。勢如執法貴心正。俗病要以此語砭。揮掃定見龍蛇走。紬繹何憚歲月淹。須知筆意似人意。柔順未必非凶愾。

清明日晚晴

正好園林藉落英。細風吹雨濕清明。牆陰旱渴休無賴。自有鳴鳩解喚晴。

舟過荻塘

野航春入荻芽塘。遠意相傳接渺茫。落日一篙桃葉浪。薰風十里藕花香。河回遽失青山曲。菱老難容碧草芳。村北村南歌自答。懸知歲事到金穰。

從劉殿院借書

骨寒宜伴列仙臞。欲喜依劉計未疎。自昔暗中人易記。到今名下士非虛。欲從給事論奇字。擬向中郎得異書。願借牙籤三萬軸。爲公一一辨蟬魚。

過徐氏莊居

只着南冠不着纓。掉頭防我問功名。數椽茆屋有時漏。一壥野田無具耕。酒地定能容勝踐。墨畦終擬過平生。扣舷歸去蒹葭闊。後夜相思看月明。



過徐氏郊居

林梢眇眇墮斜暉。剝啄還來扣隱扉。門巷劣容居士屨。塵埃不到野人衣。恰當夜飢黃粱熟。盛供春山紫蕨肥。侍坐無人只山月。兩翁相對自忘機。

次韻盧憲春意

少陵花惱便顛狂。天與多情付此郎。宿露園林鶯舌亂。暖風庭院蜜脾香。閒愁幾欲縈春事。幽怨還能入醉鄉。應斷玉樓雙望眼。便須催促理歸檣。

次韻宏父喜雨

黃醵初看卷麥禾。老農還復厭晴多。四郊屛尾開新瀆。一雨苗根長舊科。已發政聲歸召杜。更驚詩律鬪陰何。王孫欲識田家樂。水亂溝塍涉可過。

行簡以曾守韻見貽復和一篇

續經無復補嘉禾。老去忘懷及見多。摘尾簿書寧問署。點頭章句僅成科。求田下澤吾行且。招隱空山子謂何。行簡有早晚故山歸種秫之句。千萬買鄰真左計。一丘端約老相過。

曾宏父將往雪川見內相葉公以詩爲別次其韻以自見

客裏思家且罷休。無聊懷抱不禁愁。時魚苦筍過百六。又到一年春盡頭。



牆根啁啾百鳥鬧。最愛乳鳩來喚晴。日永春閒深院落。渠能便當管絃聲。  
揚舲送子下苕霅。繫纜沙頭多柳株。十載風埃老行客。不知鷗鳥記人無。  
前溪溪頭玉色魚。羊酪豈可比鮮腴。江黃會中有勝處。健步走置煩長鬚。  
野店山茶亦可口。試敲松火煮石泉。相逢故人如問訊。但道老去多煩煎。

還憇湖光亭復次江元壽韻

羊酪葍羹本異區。江湖隨俗語。蜺隅紫鱗撥刺衝。文苻翠羽翩翾過。綠蒲舴艋興。饒青絡馬。笞箠自當紫。  
微壺叢書校罷頻搔首。天末孤帆去欲無。

僕大白燕山來云有次律兄書被盜失去

投曉平安使。倉皇扣倚廬。修塗幸及此。細語問何如。云自三關道。曾持一紙書。崎嶇經寇難。隻影到鄉閭。  
杜季習遊恆山謁府帥劉公輒次劉彥常韻作詩送之

勇往都忘去路難。胸吞螭虎氣桓桓。吳頭楚尾三年夢。塞北江南五月寒。瘦馬繫門留我別。明珠攜袖許誰看。書生自有西江量。何止能濡舌本乾。

董梁大有詩紀吳江豁然閣舊遊索僕繼和

湖陰舊雨記重來。小閣深明傍水開。蟬竦橫空橋倒影。琉璃拍岸浪成堆。勝遊君復羹魚婢。幽屏予方飯。



芋魁遙想經行斷堤曲。野花漂盡雪玫瑰。

石壁寺山房卽事

望斷南岡遠水通。客橋來往酒旗風。畫橋依約垂楊外。映帶殘霞一抹紅。

石壁寺

山縈細路走修蛇。峭壁連雲只薜花。木末忽看幡影亂。馬頭初見殿陰斜。迴廊迤迤穿危嶠。側澗涓涓露淺沙。秀色可餐吾事辦。粥魚茶板莫相夸。

秋日閒居

茆屋秋風斗破除。蕭騷渾似浣溪居。青山侍坐從吾好。黃帽籠頭與俗疎。賴有園官能送菜。可無溪友解留魚。從今輒莫慚枵腹。一飽須煩插架書。

野外罕人事

野外罕人事。雖貧心自寬。霜蔬供綠節。社酒泛黃團。日落歸牛近。風微宿鳥安。展書遮老眼。燈火砌儒酸。

次子虛韻

誰能延月倚危樓。細履相將偶當游。倦聽山歌懷舊俗。閒看水戲濺寒流。土人以水戲然燈。燈光競作千門曉。酒力微寬一掬愁。明日八分疲阿買。詩饑元只在清眸。



次夕雨作用子虛韻奉懷次顏知魚軒小集

夾道繒山聳蜃樓。小軒終憶數條游。月將人意十分滿。雨入溪光一派流。靜聽屐聲喧夜市。旋挑燈炮醞  
春愁。閉關不問陰晴事。時怪玄花掠病眸。

卽事

造物勞人亦惜哉。又驅疲馬上崔嵬。經從野店初嘗筍。行盡江村始見梅。千里短書先夢寐。半生多難足  
風埃。桔槔俯仰成何事。已念漁蓑歸去來。

次吳江

小邑蕭條兵火餘。狐狸入市自相呼。茆牆竹戶斜陽裏。十室生涯久已無。

允迪招行簡卜居鷓鴣谷。僕意羨之。作詩送行。兼以自見。

嚴陵灘下鷓鴣谷。聞道元英舊隱廬。鼻祖名高詩格在。耳孫才傑宦情疎。漫山松桂雁行立。入鄔茆茨星  
散居。知爲劉郎賦招隱。莫教化落到通渠。

子虛航重湖之險。遠過山中。輒次維心韻以謝。

小窗眠蠨虎。敗壁上蝸牛。老樹陰垂合。前山翠欲流。狂言違世用。彊飯了身謀。不謂輕千里。能迂訪戴舟。

次韻學士兄見一亭



塵土敗名如敗敵。雲山招隱似招降。謾傾魯酒醒猶獨。聊發吳謳調本雙。誰念佳人在空谷。自同漁父老清江。它年對榻分餘地。風雨蕭蕭夜打窗。

次律兄餉魚。魚不至而詩至。頗類南海使君送酒。輒成絕句。

憑虛公子騎鯨後。烏有先生控鯉初。可是凡魚亦仙去。空餘一紙腹中書。

劉希顏提覺見過。出自卞山居二詩。次其韻。

偃仄風塵際。分攜歲月賒。向來聞避地。勝處偶爲家。對客談鋒銳。憂時酒量加。中觴莫辭醉。回首又天涯。次韻呈維心。拙澀不工。當爲抵掌。

粲粲疎梅短短牆。騷人長恨失遺芳。低徊草棘精神透。彷彿關山魂夢香。月淡乍看清影亂。春深終恐綠陰藏。歲寒爲爾添愁絕。倚樹微吟亦自傷。

戲酬嘗草茶

慣看留客費瓜茶。政羨多藏不示夸。要使睡魔能偃草。肯慚權伯解迷花。一旗但覺烹殊品。雙鳳何須覓瑞芽。待摘家山供茗飲。與君盟約去驕奢。







# 節孝詩鈔

徐積字仲車。楚州山陽人。少孤。從安定學。門下踰千人。獨以別室處之。遣婢視飲食澣濯。盛寒一衲裘。以米飯投漿甕中。日食數塊而已。事母至孝。以父名石。平生不用石器。遇石輒避。母死。廬墓哀號。三年如一日。每以五字教學者。公卿部使者交薦。除楚州教授。改防禦推官。又特改宣德郎。崇寧間。又特除西京嵩山中嶽。皆非常制。七十八卒于家。謚節孝處士。先是枕書臥冊間。大書曰。五月榴花不肯開。直待徐郎來。筆蹤不類人世書。卒時適五月一日。人皆異之。詩文用腹藁。嘗曰。文字在胸中。未暇出者甚多也。晚年耳疾。不發遠書。率以小詩報之。

## 和楊掾月蝕篇并序

楊子常掾。爲月蝕篇示予。辭義甚偉。某不敢虛辱其貺。迺吟哦而和之。詩曰。彼月而蝕。則維其常。春秋月蝕不書。其非大變也可和矣。形而爲詩歌。若無不可者。遂卒賦之云爾。

元豐之元歲戊午。斗柄斜指萬南維。月行赤道日南陸。營丘分野星虛危。昨夕旣望復今夕。盛若不損盈不虧。安知變起在頃刻。突如有物侵其肌。其始色變甚倉黃。須臾赤黑相合離。良久煙焰極薰燎。一團白玉燒爲灰。黃琮蒼壁不可辨。枯株死兔將安歸。孰烏其吻吞巨皿。孰丹其汗流墨池。如食非食始爲薄。有



物無物不可知。蝦蟆何物敢張口。麒麟何故敢爭鬪。是何星曜敢侵犯。自是其形不可久。君不見對月數  
眉毛。須臾引臂不見手。嗟噓天上之神物。乃有如此事。所蔽至甚不可解。凶而家室亡。而身不然。借使幸  
而免。後世譏笑遭惡名。君不見漢朝賈生文有餘。其心大勇其才疎。當時如必用其術。紛紛不免危其軀。  
鼃錯堂堂蔽於刻。公孫規規蔽於諛。谷永之才蔽權勢。有若鷹犬供指呼。霍光雖賢亦有蔽。何不早去顯  
與馮子都。劉歆致位爲國師。豈若楊雄久以爲大夫。蔽於太高李膺輩。蔽於已甚陳蕃徒。竇武不斷蔽可  
痛。束之不忍蔽可吁。王允所蔽在無權。荀彧所蔽不早圖。蕭禹之蔽入於佞。王衍之蔽失之虛。牛李雖奇  
蔽朋黨。機雲雖俊蔽附趨。王導蔽怨殺周顛。遂良蔽誣殺劉洎。崔浩蔽強殺其身。所蔽若此甚可畏。我愛  
安世真朴忠。匿名遠世歸至公。有私見求堅不許。以私求謝絕不通。諸葛武侯爲將相。心迹皎然無所枉。  
有罪至親而必誅。有功雖讎而必賞。謝安知壻王國寶。不以身蔽能辨早。人心自是悅而服。不顧四肢與  
肝腦。符堅之師號百萬。一戰而北若摧槁。我吟此篇不足錄。卻憶唐衢忠義哭。古人今人何擇焉。大抵人  
心蔽多慾。月之所蔽惟須臾。須臾蔽來明如初。人之所蔽何太甚。至於終身不悟不可除。月乎月乎。明哉  
明哉。善去其蔽。何速之如。君子法之所以改過。賢者法之所以知非。勇決之徒所以奮發。感槩之徒所以  
嘯歎。我雖老且病。齷齪無所爲。猶能對月吟歌詩。安得慷慨之士如桓伊。把笛爲予吹。

大河上天章公顧子敦



萬物皆有性。順其性爲大。順之則無變。反之則有害。禹之治河也。浚川而掘地。水行乎地中。其性安而遂。因地爲之防。猶恐不足制。故附之山足。使循山而行。山不可必得。或原阜丘陵。水行乎兩間。旣固而旣寧。及將近下流。山遠而地平。渠裂爲二道。河分爲九形。雖暴不得怒。雖盛不得盈。所以順而制。歸之於滄溟。後代蒙其業。歷世六七十。凡千有餘年。而無所決溢。國君與世主。豈皆盡有德。蓋繇河未徙。一皆循禹迹。河道旣一徙。下涉乎戰國。水行平地上。迺堤防湮塞。其時兩堤間。實容五十里。水旣有游息。堤亦無所毀。後世迫而壞。河設始煩促。伐盡魏國薪。下盡淇園竹。羣官皆負薪。天子自臨篤。其牲用白馬。其璧用白玉。歌辭劇辛酸。姑不至號哭。瓠子口雖塞。宜房宮雖築。其後復北快。分爲屯氏河。遂不復堤塞。塞亦無如何。兩河旣分流。害少而利多。久之屯氏絕。遂獨任一渠。凡再決再塞。用延世之徒。有天時人事。可圖不可圖。有幸與不幸。數說不可誣。其後復大決。大壞其田廬。灌三十一縣。言事者紛如。將欲塞之耶。凡役百萬夫。費累百巨萬。亦未知何如。如此是重困。是重民歎吁。言事者不已。亦不復塞諸。李尋解光輩。其言不至迂。遂任水所之。渠道自割除。當時募水工。無一人應書。學雖有專攻。術亦有窮歟。諸所說河者。桓譚實主之。但聚而爲書。實無以處之。班孟堅作志。亦無所出取。事有甚難者。雖知無所補。今之爲河堤。與漢無甚殊。遠者無數里。近無百步餘。兩堤束其勢。如縛吞舟魚。適足激其怒。使之逃囚拘。又水性隱伏。有容而必居。浸淫而灌注。日往而月徂。埽材有腐敗。土壤有浮虛。水進而不止。正如人病軀。病已在骨髓。醫方治皮膚。



下不漏足脛。上突爲背疽。或水如雷聲。或埽如人喘。或決如山傾。或去如席卷。如蛟龍引陣。如虎豹逃圈。如地戶開闢。如誰何生變。如神物主之。不可得而辨。嗟乎有如此。堤防豈能禁。蓋緣平地上。失水之本性。而又無二渠。分九河所任。以九合爲一。所以如此甚。今之爲邑居。多在古堤內。以諸埽準之。高於屋數倍。以水面準之。亦高數尺外。諸埽正如城。而土有輕脆。民正如魚鼈。處破湟。吠澮。被溺者常事。不溺者幸大。又河水重濁。澱淤日以積。又夏秋霖雨。諸水湊以入。故有必決勢。不決者蓋鮮。或決彼決此。或決近決遠。或決不可塞。或塞而復決。或決於旦暮。或決於歲月。或新埽苟完。或舊埽潰裂。譬如千萬鈞。用一繩持挈。必有時而敗。必有處而絕。而自決大吳。凡害幾郡縣。河旣北浸邊。諸塘皆受患。亡胡與逸馬。孰爲之隔限。今雖甚盛時。亦防不虞變。所以議論者。復故道爲便。故道雖已高。可復亦可爲。但恐旣復後。其變不可知。我兵學雖陋。公兵學雖奇。我說兵之難。公亦莫我違。河事異於兵。其難堪歔歎。智有不可及。力有不可施。汲黯非不偉。所塞輒復墮。王遵無奈何。誓死而執圭。若與唐衢說。號哭垂涕洟。未說穿故道。未說治故堤。且說塞河口。所費不可推。諸所調發者。委積與山齊。卷埽者如雲。進埽者如飛。下掃名入川。其誓憂流移。上掃名爭高。少動卽勢危。萬人梯急赴。兩大鼓急椎。作號聲號令。用轉光指麾。其救護危急。爭須與毫釐。又聞被災郡。數路方薦飢。官私無畜聚。民力俱困疲。朝廷謀已勞。兩宮食不怡。生民仰首望。使者忘寢飢。爲之奈何乎。勿計速與遲。事雖有堅定。議論在所持。如一身所疾。必以先後醫。假如移所費。用以業貧民。



償其所亡失。救其所苦辛。或貸其田租。或享其終身。獨孤有常餼。使同室相親。露屍與暴骸。收殮歸諸墳。精選強明吏。處之使平均。鄉官與胥徒。欺者以重論。如此庶幾乎可無愁怨人。下酬更生望。上慰再造仁。然而論議者。至今猶紛紛。或復其故道。或因其自然。公如決於一。勿使衆議牽。在已者有義。在命者以天。而况行職分。而况本誠忱。聖朝無不察。知子之赤心。嗟余何爲者。草莽且賤微。與公本無素。一見卽弗遺。以伯兄處我。以古人相期。小設猶致說。大事寧無辭。年且六十一。未作溝中屍。常恐公禮義。如投諸污泥。豈欲爲迂闊。不得已爲詩。瀝吾之肝膽。但恐同兒嬉。又恐誤公事。公千萬慎思。如將從近功。卽深圖便宜。如必謀久利。唯古人是希。是詢而是度。是訪而是咨。或博物君子。或宿儒老師。或濱河野叟。或市井年耆。或愚直夫婦。所言無蔽欺。或老胥退兵。耳聞而目窺。或世爲水學。可與講是非。或博募水工。按地形高卑。從便道穿渠。稍引河勢披海。旣爲大壑。汴旣分一支。如關竅疏通。臟腑病可治。此說如何哉。但恐出於狂。如何完障塞。如何復諸塘。觀變而待時。亦恐謀不臧。爲復有說者。且須嚴邊防。如魏尙守邊。見稱於馮唐。如祭同久任。使匈奴伏藏。以車制衝突。如衛青武剛。多置強弩手。如李廣大黃。選募如馬隆。練卒如高王。如漢置奔命。使我軍勢張。短兵斫馬脛。衝車亂其行。嘗不以首級。所以嚴部分。大陷刀如牆。可以堅吾陣。羊叔子以德。郭子儀以信。光弼戰河陽。揮旗令直進。其時諸軍勢。如決水千仞。楊素不用車。可汗下馬拜。僅以其身免。號哭而大敗。將帥在方略。勝卻百萬兵。安邊在良將。勝卻築長城。願子治水功。有以酬明時。



便領鐵林兵。盡衣犀牛皮。連營環繡帽。大纛隨牙旗。分金賜勇敢。藏書付偏裨。先聲義信遠。下令霜風馳。出塞有豐草。近關無馬蹄。穹廬大漢外。別部黑山西。代謀爲上策。何用長纓羈。本朝正明盛。以德服外夷。使來不受獻。南越回山梯。西閉玉門關。東卻高句麗。四夷無一事。各安巢穴棲。名將更無功。優詔勒鼎彝。師旋作鼓吹。軍容除虎貔。銀鐙致郊勞。翰林嚴鑱扉。除書紙用麻。省吏身着緋。公方有所念。山足江之湄。無心入黃閣。有表辭赤墀。乞得老來身。浩歌還會稽。白雲與綠波。無所不可之。春風桃花塢。秋色黃菊籬。茶籃與酒榼。壺矢兼琴棋。烹鷄炊黍飯。可倩龐公妻。豈無會稽老。雪夜同泛溪。亦有二三子。棹歌相追隨。散盡橐中金。留得身上衣。有宅是官借。無田可扶犁。閒吟題寺觀。長嘯入雲霓。公得我詩後。一夢須先歸。

李太白雜言

噫嘻。歎奇哉。自開闢以來。不知幾千萬餘年。至於開元間。忽生李詩仙。是時五星中。一星不在天。不知何物爲形容。何物爲心胸。何物爲五臟。何物爲喉嚨。開口動舌生雲風。當時大醉騎遊龍。開口向天吞玉虹。玉虹不死蟠胸中。然後吐出光焰萬丈凌虛空。蓋自有詩人以來。我未嘗見。大澤深山。雪霜冰霰。晨霞夕霏。萬化千變。雷轟電掣。花葩玉潔。青天白雲。秋江曉月。有如此之人。有如此之詩。屈生何悴。宋玉何悲。賈生何戚。相如何疲。人生胡用自縲紲。當須犖犖不可羈。乃知公是真英物。萬疊秋山聳清骨。當時杜甫亦能詩。恰如老驥追霜鶻。戴烏紗。着宮錦。不是高歌卽酣飲。飲時獨對月明中。醉來還抱清風寢。嗟君逸氣。



何飄飄。枉教謫下青雲霄。大抵人生有用有不用。豈可戚戚反效兒女曹。採蟠桃於海上。尋紫芝於山腰。吞漢武之金莖沆瀣。吹弄玉之秦樓鳳簫。

## 答李端叔

有人頗似長沙傅。得官亦望長沙去。去時好賦楚江謠。還使風騷滿江路。便須酌酒弔三閭。正是忠魂冤憤處。縣令如今未去時。蘭亭故事猶可爲。莫惜千筒萬筒往。諸君方壯我已疲。登科學究文章豪。數奇老將詩能高。長沙縣令號才吏。方將睥睨謝與曹。涼萸卽是八九月。紅萸黃菊花將發。正是詩家得意時。莫學古人悲暮節。東南美者有吳姬。紅襦繡袂無所施。把酒一卮輕皓腕。得詩一句勝娥眉。山夫野叟只如此。諸君達者應相嗤。有酒且慢飲。有歌且慢謳。共君說懷抱。未語先搔頭。良久欲說說不得。胸中有物如山丘。君不聞東家女子花見羞。十六未嫁便悲憂。牆頭樓上到日晚。馬驟車奔如水流。西家亦有閨中女。月壁龍珠求未許。有心自比蟠桃花。無言竊笑陽臺雨。謝鯤便是妾家鄰。敗唇折齒猶相語。何況五陵輕俠兒。拋金擲玉教人非。一夫奔處千夫馳。不論榮辱與刺譏。羶中之蟻醢中鷄。攫金逐獸兩眼迷。主人下馬客已齊。拜起俯仰容正俾。有如六月賣蒲葵。唯恐不售霜風淒。言至於此良可悲。所以慷慨見於詩。誰能起舞誰能歌。甕中有物如秋波。古來多少無奈何。要須一醉都銷磨。茫茫人間岐路多。不如海水通天河。



俊老行送林次中赴都司并序

客有張文潛與之夜坐論事良久及林公之義於是兩人者名公爲俊老因公之去作俊老行送諸御者爲公一笑也

熙寧察院一開口誰人膽落御史手其時面墜黑髭鬚力欲回天氣衝斗一從蹭蹬作外官所居不苟心迹安剛不可回堅不變頭如霜雪心如丹所以論者悅而服所養有義其質端東西南北二十載一朝有勅卻召還皂囊封上曉班肅繡衣步入秋霜寒義有所狗乞得身白日降下天上人黃金龍節青囊印赤帷熊乘朱斑輪以其餘才修職分以其餘力娛精神望淮樓上對秋色玉女花前泣晚春時時共帳過南郭來就陶潛漉酒巾與人論事不必合直無所苟氣色真持此以往無不可古人所以爲正臣淮南一路事如草嘉苗惡莠俱分了中心皎皎如斯乎外計區區何足道兩宮日月方齊明羣公戮力營太平公議急須招俊老清風先已過南京

莫飲吳江水寄陳瑩中

莫飲吳江水胸中恐有波濤起莫食湘江魚令人冤憤成悲乎湘江之竹可爲箭吳江之水好淬劍箭射讒夫心劍斫讒夫面讒夫心雖破胸中膽猶大讒夫面雖破口中舌猶在生能爲人患死能爲鬼害患兮害兮將奈何兩卮薄酒一長歌灑向風煙付水波遣弔胥山共汨羅



瓊花歌

春皇自厭花多紅。欲得花顏如玉容。春皇青女深相得。先教斂與秋霜色。乃有雪月供光。星榆獻白。斗量銀漢琉璃濕。人間美玉搗作灰。荆山岷山鬼神泣。天上有人名玉女。投壺之外能爲素。姑射神人解種花。先須此物爲根芽。天罅地竅掬精粹。蟾身驪頰偷光華。其時正是天地交二氣。上下陰陽調此花。孕育得其正。其間邪氣無纖毫。所以其色爲正色。出乎其類拔乎萃。一如君子有諸內。粹然其色見於外。三月將盡四月前。百花開盡春蕭然。揚州日暖花開未。春香不動花房閉。仙掌秋高玉露濃。蛟人泣下珠璣碎。黃鸝本是花中客。啼盡好聲求不得。春皇費盡養花心。春風使盡開花力。春歸鶯去花始開。誰人放出深閨來。唐家天子太平時。太真浴罷華清池。紅裳繡袂厭君眼。更作地仙披羽衣。麻姑睡起蓬萊島。風吹玉面秋天曉。洛川女子能長生。冰生肌骨成瑤瓊。褒姒不見諸侯兵。盡日不笑如無情。宋玉移家安在哉。東隣不畫燕脂腮。卓文君去成都速。錦衣金翠慵裝束。吹簫容貌果何如。見說其人名弄玉。若比此花俱不足。淫妖怪艷文之累。一如婦人有賢德。不爲邪色辭正色。媼居之女能自持。終身唯着大練衣。又如正色立朝者。不以柔媚爲奸欺。以此論之乃可量。人之不正將胡爲。論德乃是花之傑。論色乃是花之絕。洛陽花名古云好。看花須向揚州道。君不見去年花下吹黑風。霹靂閃電搜玉龍。此時半夜花光中。不覺屈曲蟠長虹。又不聞天上琳琅樹。種在煙霞最深處。白雲枝葉白玉英。此花莫是琳琅精。此花愛圓不愛缺。一樹



花開似明月。襄王半夜指爲雲。謝女黃昏吟作雪。杏花俗豔梨花粗。柳花細碎梅花疎。桃花不正其容冶。牡丹不謹其體舒。如此之類無足奇。此花之外更有誰。世非紅紫不入眼。此花何用求人知。詩人自與花相期。長告年年乞一枝。

姚黃并序

紫霄漫翁李道源見約分吟姚黃。余畏其才不敢措筆。不得已而後塞命。因爲之序曰。天下牡丹九十餘種。而姚黃居第一。其名雖千葉。而實不可數。或累計萬有餘英。不然不足高一尺也。花肉旣重。其梢下屈如一器敲側之狀。此亦花之巨美而精傑者乎。是宜見於詩。而不可泯然使寂寂也。

黃河南畔伊川北。姚家宅是真花窟。古來多少豪奢兒。埋卻千鶯萬鶯骨。中央精粹得之多。西方秀氣來相和。天與明光常借日。水宮暗脉正通河。春風如酒半酣時。誰教穀雨報花期。司馬坂前嬌半啓。洛陽城內人俱知。姚家門巷車馬填。牆頭牆下人羞肩。花上紅綃都蔽日。花傍翠幕恰如煙。玉面兒來爭供帳。錦袍郎去鬪拋錢。無人不說姚花好。費卻春功亦不少。日長風暖綠梢低。坐上金仙困將倒。鞠塵餅劑和香檀。何以貯之承露槃。爛錦脫來嫌太豔。鮮衣染就欲驂鸞。君看此花肌肉豐。一尺餘高千萬重。粧面深藏青步障。寶冠斜墮碧霞叢。步搖好稱釵鳳凰。玉環犀佩珠鳴璫。帝女何緣心好道。阿嬌安用金爲房。紺窠累棲舒雁雛。沉煙噴出狻猊爐。一種養成餘意態。千花瘦盡春肌膚。峨峨一器敲且傾。覆杯難辨鍾與觥。



染以蛟綃求正色。叩之玉挺希宮聲。魏家紅共牛家碧。迭霸花中聳高格。如今俛首甘下風。九十種中爲第一。此花莫似武昭儀。出得宮來不畫眉。情貌欲爲狐媚態。衣裳卻是比丘尼。楊妃本是傾國身。脫卻紅襦號太真。河水欲濡頭上髻。馬嵬猶着舊時裙。物色一定猶可疑。人心作變宜難知。容易莫評真與欺。貌或如是心或非。君不見老莊有深意。萬物之中最防僞。

管春風

我是蓬萊山上客。爲管春風歸不得。今年更是春來遲。江南未寄梅花枝。探春童子青霞衣。時時去上青雲梯。春風消息苦不遠。瑤臺瑤水冰霜淺。蟠桃花在海東邊。此花不煩春一點。東風日夜來人間。到時先催草根軟。大都紅紫心先動。小桃先覺枝頭重。更有纖纖楊柳枝。路傍先得行人弄。詩翁自愛蟠桃花。鸞鶴不在無雲車。城南夜半無酒家。和冰和雪吞月華。有客笑中攜劍去。偷得銀瓶與肥豨。詩公兩眼看浮雲。爲管春風不回顧。

花下飲

我向桃花下。立飲一杯酒。杯酒先濡鬚。花香隨入口。花爲酒家媪。春作詩翁友。此時酒量開。酒量添一斗。君看陌上春。令人笑拍手。半青籬畔草。半綠畦中韭。閑鳥下牛背。奔豚穿狗竇。潛身貓相雀。引喙禽呼偶。包麻隣乞火。穿桑兒餉糗。物類雖各殊。所樂亦同有。誰知花下情。猶能憶楊柳。中心卒無累。外物任相揉。



余方寓之樂。自號閑人叟。

謝周裕之

樂不須絲竹。花不須桃李。舞不須輕軀。歌不須皓齒。人生各有樂。願我如何爾。我是兩柳翁。家在南郭裏。詩酒以爲樂。賓客至卽喜。酒味酸或淡。瓷碗粗而偉。或無一釘菜。但費幾張紙。客所言用紙筆人情慕富貴。公何眎賤鄙。寒冷載肴酒。暮夜煩屐履。孚誠非猝然。釘餽亦勞止。不用卞郎瓠。但坐杜侯椅。兩卓合八尺。一爐暖雙趾。不以藥隨時。而用繒掩耳。或啖魚菹盡。或愛藏蔬美。或取鱸與腊。或約酒以指。人皆悅真厚。誰敢停箸七。一客癯而清。偶坐爲六子。吟聲尙鼓吹。懽情勝羅綺。俗物無所用。高會有如此。

富貴篇答李令

我有一筒詩。寫出千年意。將令後世觀。不是前言戲。感君再唱洞庭謠。我亦重歌酬子惠。古人達者嘗有異姓王。一門五侯三將軍。弟兄同入中書堂。對開大第連幾坊。私門列戟森鋒鏑。十二簾捲珠熒煌。雙姬扶起坐牙床。綠鬟紅袖花成行。左盼右顧生春陽。高車食客佩劍鏘。堂上已滿坐兩廊。巨鑊大鼎烹牛羊。玉壺挹酒金船長。美人拜客求盡觴。歌姬一誤已絕肮。纏頭彩幣堆如岡。酬歌買笑金鴛鴦。奴袍火浣直兩箱。三千廐馬紅錦障。廁幃文繡爐薰香。更衣侍妾如閨房。主人意氣秋鷹揚。其心端如彩鳳凰。一言合意青雲翔。須臾睚眦磨刀鎗。門前膈月可烘裳。一日失勢成冰隍。小者腰領屍道旁。大者連頸宗族亡。犬



鷄散盡空遺牆。野鳥入室山魍藏。嗚呼哀哉可歎傷。至死不悟猶陸梁。古來如此有多少。豈似洞庭湖上老。無租無稅一生閑。有飯有魚一杯飽。日落波間烟正昏。雲開湖口山光曉。棹翁適自巴陵迴。掛帆直指瀟湘道。有言不問俗窮通。何憂可入翁懷抱。脩竿短棹已自足。更有前村一茅屋。賣魚沽酒任醉醒。繡戶朱門自歌哭。嗟余未往心先慕。更謝棹翁詢去住。風前月下。有誰知。醉魄吟魂自來去。堂前畫作荆南圖。夢中記得巴陵路。

寄范掾

昨日沽酒典布襖。今朝所典未可保。最好綿衾剩典錢。又恐夜寒妻懊惱。兩務酒官俱見怜。沽我好酒如甘泉。爲報孟光莫惡發。待將黃卷換青錢。

贈張敏叔

張子生平最多難。未老頭毛白一半。頭雖更白詩更清。正作詩時人莫喚。頭不肯轉身不移。口中聲調霜風淒。太清宮殿月明時。第一莫吹松竹詩。

寄張文潛

不知今之人。誰識張縣尉。勿問胸中事。但看面上氣。所謂人英者。正是斯人輩。前年南郭中。文酒日夜會。一從舍我去。忽忽再逾歲。今茲歲且盡。爲子吟不睡。起坐卻就枕。伸頭出紙被。約是三四更。老老抱雙腳。



此時吟正酣。聲調不可卻。春風起淮東。須臾到嵩洛。往往入子家。但子眠不覺。子覺將奈何。聲盡情思多。上東門外路。洛水生春波。還我大松來。不用寄詩歌。

送端叔二首并序

夜漏將盡。枕上再送端叔也。洛水之陽。馬上爲我誦此詩。卽此詩用木葉書投之水中。便爲將來故事也。延安塞上。見羣鴈能爲我誦此詩。東南望否。夜中枕上聞孤鴈聲。尤數數誦此詩也。紙窮意未盡。端叔上馬去。巷口馬頭轉。我喚端叔時。端叔急回面。記取此時意。莫使落風埃。上東門外水。正望楚州來。此水一來不復見。不及黃沙塞頭鴈。是物可寄情。是物可寄聲。不須使黃犬。延州岐路遠。莫怪不登淮上樓。只爲淮水不西流。直待啣蘆鴈。卻迴。其時隨到天盡頭。

送張宜父赴南從幕府正彥

江南秋色芙蓉香。滿江秋水傾銀潢。泛水依花人姓張。濤翻浪湧揮文章。突然出者何蒼蒼。巨鼇爆背來中央。鼇鼉仰首仗四旁。登臨談笑得庾郎。安得霜鷗腰胯長。騎上秋空追鷓鴣。北望海門形勢強。美哉壯觀吳封疆。若將前代論興亡。直談孫氏到陳梁。凡爲佐命可哀傷。其諸姦孽如豺狼。傾讒正直誣忠良。以國販賣爲賈商。歌姬舞女金滿堂。不須爲盜持刀鎗。身雖幸免遺其殃。子孫戮辱甚犬羊。所以不欲讀史。



書鼻洩目汁沾髭鬚。潤州支使相如無。山陽老子如唐衢。

贈陳留逸人

有人持一管。不用蘆葉卷。能作隴頭聲。其女操六板。吹者寓其聲。拍者會其情。情聲與氣貌。內外俱和平。時時入酒家。便插幾枝花。歸來無一事。醉臥日西斜。人或問所得。答云無憂嗟。或問其所欲。何物可相累。我愛斯人者。富貴所不如。有如此娛樂。作如何稱呼。呼爲無憂人。畫作無憂圖。更畫幾枝花。酒瓢與酒壺。

送呂清叔

慘慘黃昏天欲雪。蕭蕭淮浦人聲絕。風擊寒雲鴈正鳴。客眠孤棹燈將滅。

和張文潛晚春四首

昨日枝頭紅鮮鮮。染人指。今朝尋不見。已在汙泥底。麥穎未黃乾。桑實半紅濕。恰得一犁雨。田事正火急。人事無如何。多於道傍草。但問酒有無。莫管老不老。風暖鶯窠牢。雲晴鳥翅健。物生自有樂。亦各適其願。

示諸生

子莫爲文學纖麗。須是渾渾有古氣。本源要在養諸中。不然恐汝爲時輩。



答何楚才

有客能操耒。而捨其良田。有客善攻玉。而探珠於淵。二者之是非。子以謂何如。子乃捨所急。若是其渠渠。然余有二說。可爲不可爲。所爲不可者。子家無寒飢。所謂可爲者。奉養之所資。余此二說者。子當慎擇之。余嘗奇子貌。亦嘗憐子文。不能爲子謀。嗟哉空云云。

還崔秀才唱和詩

元白有餘勢。孟韓無困辭。子美骨格老。太白文采奇。當時大道久破碎。人人文字萎。茶而支離。天生數子。將卓卓。鷗鴉正成羣。一鷗磨天飛。嗟君不與數子共。使君逸氣填塞無所施。我來雖無知。黃金白玉看如泥。自從詩卷一入手。掣然直上青雲梯。十宵不睡亦不困。厭賓日日關柴扉。秋風獵獵吹橫河。蒼天萬里生銀波。起來半夜吸一口。睡魂酒病都消磨。

贈慎叔良

昨日故人來。慰此白領叟。兩叟忽相見。面色如飲酒。將此酒色面。抵卻春風寒。飲酒豈易比。懽好良所難。我已五十八。君已五十七。人生勿草草。兩公須努力。

和李自明

自明多奇辭。更爲奇怪歌。好共盧仝騎綠耳。吟哦直上崑崙坡。更令張旭輩。醉中揮筆書嵯峨。安用呼老



子兩腳踏橐駝。有命得堅疾。無術除沉痾。一從水木迭用事。肺爲廢物囚網羅。而況小暑之後有初伏。與大暑更添熱厲兼昏魔。骨間赫赤炭丸走。皮上烘炙鐵手摩。有時一屋之內但覺湯火近。不辨鑊與鍋。手持匕箸腹先脹。酒到喉嚨顏已醜。青黏漆葉無所用。烏伸熊顧其奈何。五臟孰云可湔洗。百骸終恐生蟲窠。脫身難上赤霄路。夢魂忽泛滄溟波。滄溟盡處是星漢。有人常弄機與梭。枯槎去後更無客。歷歷赤桂來經過。取得良書掛牛角。持將斗柄吞明河。但把明河吞滿腹。不去龍田拾瑤玉。便控鼈頭出海來。霞點震痕在眉目。起穿兩柳行青莎。怪歌使我須吟哦。吟哦作文非小事。要爲法度後世無譏訶。大抵文章本諸內。歸之無憾斯平和。擬之於經輔之友。精講明辨相切磋。君雖病肝其心可用。教我雖病肺心亦不自阿。日夜思索已矣老矣所學亡失多。

和倪敦復

一別北軒君。參商與胡越。先聲從西來。塵榻爲君拂。吟行時引頭。吟坐卽搖筆。未見問行人。旣見惜短日。緩頰相問勞。劇談盡忠切。耳竅雖塞豆。口角自流沫。崔子祥而論。祝令閱且說。籬間菊參差。樽中酒澄澈。把酒自相勸。投菊兩不絕。客主莫分辨。僮僕亦娛悅。若比龐公家。妻子不羅列。悔令唱驪歌。惜不醉寒月。念子爲令尹。行義高突兀。當官志不回。斂版腰可折。與俗皆背馳。而慕古遺烈。竹節生便堅。劍氣久已發。其時東野外。頻煩大夫謁。篇章日相尋。氣勢誰可遏。仍攜大軸來。使我兩目閱。人事有合離。歲月成恍惚。



逸翮騰方高。駿馬足不蹶。子實不我忘。我亦不子忽。與之氣類同。見之心欲豁。金城不可破。鐵壁不可奪。擇交蓋已定。言志亦已合。布陣詩甚詳。揮灑手不歇。更約臨行時。斯言可贈別。

答范君錫

報漫翁。無錢可沽酒。青衫典不得。黃卷賣不售。借問公田中。秬米種幾斗。休管將來旱與水。莫爲妻兒種粳米。兄來留下二萬錢。送與酒家主人未。不然何計見春風。空將花插白頭翁。簿書營營幾時了。何如載酒訪楊雄。

誰何哭

誰何哭。哀且危。白頭母。朱顏兒。兒忽捨母去。母何用生爲。架上有兒書。篋中有兒衣。兒聲不復聞。兒貌不復窺。誰何哭。哀復哀。腸未絕。心先摧。母恃兒爲命。兒去不復來。朝看他人兒。暮看他人子。一日一夜間。十生九復死。君不見昨夜人靜黃昏時。含心抱痛無人知。其時忽不記兒死。倚門引頸望兒歸。

鴈從何處來

鴈從何處來。正望東南飛。毛間認白露。肚下看殘暉。浮雲共煙水。日夜爲所依。衡陽是故山。但恐故人稀。

哭狗狗

東門園上春風微。醇醇塚上花成圍。醇醇一去不復返。食一盂兮酒一卮。悲莫悲乎今日。傷莫傷乎舊衣。



思其言而想其貌。吁嗟乎天喪吾兒。

哀哀詞

哀哀復哀哀。哀哀至此極。孤兒與慈母。中路忽相失。恍惚須臾間。終日不復得。誰復坐我堂。誰復入我室。誰復飲兒酒。復誰哺兒食。兒飢復誰念。兒寒復誰恤。耳不聞慈語。目不見慈色。譬如行路人。日遠如一日。行人猶可期。遠道猶可追。天窮地盡處。一日猶可歸。哀哀復哀哀。此去無盡時。誰言生離別。不如死別離。君不見人已閉門。烏已棲。黃昏塚畔孤兒啼。

送倪敦復

手持報簡人歸後。足步迴廊角住聲。但恐舟行隨早晚。此時秋色半陰晴。明朝路向雲邊望。今夜詩須枕上成。四壁無燈窗有月。直無老夢到三更。

寄張景修

東南未回客。行樂又經年。吳市花朝酒。松江月夜船。窮閭無屋住。廣殿有詩傳。若論平生事。無如任自然。

和孫元規資政游園

紅作簾帷翠作裯。隨軒歌舞一時新。未知醒者何如醉。且向樽前莫負春。煙重柳梢寒蘸水。日高花徑暖生塵。自從三月芳菲後。誤入桃源又幾人。



謝蔡子驤

好客重來直上廳。龐家妻女合炊秬。名言一坐令誰聽。老病雙瞳爲子明。有道長官方就祿。無能司戶欲歸耕。如斯出處俱平易。義理難時卽共評。

夜賞春寄敦復

莫道山陽官辛苦。大夫未是不閑人。晝來琴上披尋曲。夜入花間點檢春。拖袂帶歸香滿袖。迴燈引去蝶隨身。高才自有風流格。吟作吳謠事最新。

示汝弼

十載交情義有餘。離羣還歎索然居。一番思我須成夢。每度人來定寄書。此日相從尤歎密。他時何處覓迂疎。回來徑哭青塋墓。莫向南城問舊居。

送至機

閉門有幸藏衰病。策杖無因奉俊游。繩纏筋骸方就枕。火燒皮骨正思秋。覽君健句如逢藥。慰我孤懷勝凭樓。見說束裝行未得。夢魂先到楚江頭。

寄路倅洪澤阻水

莫教容易過龜山。多少人心願復還。更有南城黃綬客。但吟西戶綠楊間。纔經濁汴無沉浪。且趁清淮洗



醉顏安得就公歌一曲。緩吟遲步夕陽灣。

和路朝奉新居十五首

世俗紛紛事總虛。詩翁今作逸人居。勤穿凍地緣栽竹。喜占明窗爲著書。近市好賒春肆酒。就淮仍買晚  
罾魚。忽撐小艇來西郭。不問皆知訪仲車。

詩翁愛酒典衣沽。六子將孫侍燕居。正要白家醇釀法。不須劉德僞金書。廚經雪後炊無黍。門近淮瀕食  
有魚。何以獻公尋故物。庾郎三韭載盈車。

昔也聞名誦子虛。今來白領隔城居。新詩解道論頭句。舊客仍移把臂書。北郭風高真隱豹。南州循政喻  
烹魚。歸時見說臨川路。父老爭留太守車。

陳傅門前客姓徐。有何智術佐閒居。接簷俛仰令遮雨。縛竹縱橫爲架書。趁露斲田移草木。和灣汲水貯  
龜魚。上元已過清明近。更約尋花不用車。

誰家住處近田廬。朝奉抽簪就退居。竹葉已成新歲酒。梅花未領故人書。呼童解袂捫飢蝨。趁日開箱曝  
蠹魚。一似散仙閑到夜。臥屏仍看五雲車。

坐想堂前弄白鬚。蒲茵筍席正高居。綵衣六子傍供饌。錦髻諸孫自教書。愛士主人新置榻。清身太守舊  
懸魚。更吟整斗論頭句。勝卻西庵詩一車。



不辨時人直與迂。濯纓且喜近淮居。朝衣脫後常耽睡。野史修時或借書。恨乏青山供採藥。愛看白鳥伺吞魚。東園賣酒花開近。待看詩翁倒載車。

簿領脫來如一夢。身名全後喜寧居。生來自信無非義。世上何緣作謗書。所養有源如大水。其賢可樂比當魚。願公八十爲更老。玉幣三徵乃就車。

自是平時大隱徒。何須水宿與山居。都無長物垂空橐。卻有閑房聚逸書。近見雪消思野蕨。遙呼船問憶江魚。卸帆便去尋村酒。醉使兒孫推鹿車。

身着練袍履用蒲。鷓冠鳩杖稱郊居。家中但乏青囊印。坐處便看黃卷書。賃屋爲無楊子宅。休官非爲武昌魚。長年不出何妨事。况是門懸致仕車。

夷白先生好對廬。醉吟處士作鄰居。幅巾自去呼樵父。蠟屐何時訪竹書。坐想高談搖麈尾。情知相諍跨鯨魚。更憐同姓陪罇酒。勝卻荀生得御車。

路家巷口是何渠。半似城中半野居。已退白仙常按曲。未歸陸俊謾傳書。雪消墻外逢挑菜。日暖門前見捕魚。更有花間行處樂。舊時歌舞願隨車。

好養玄猿共鶴雛。茆茨蓋屋竹間居。家無越使千金橐。腹有齊臣四部書。一自臨川登畫鷁。便煩別駕掌銅魚。吟哦還作詩仙退。恰似驂鸞鳳駕車。



世間詩淡鄭雲叟。壽且安寧陶隱居。愛酒自開浮蟻甕。耽詩如好換鵝書。籀冠戴後搯筇竹。鶴氅披來控鯉魚。學作蓬萊吟醉客。何須駟馬駕安車。

西庵翁上北城隅。爲望臨川舊守居。所恨足無雙翅鳥。但將詩代一函書。甥教洗榼多沽酒。妻使磨刀細切魚。灑掃待公來獻壽。親扶杖履醉升車。

和石宣德五柳亭安正

五柳神君氣貌端。所希所向靜而安。每思往行投閑地。肯逐時情慕熱官。秫酒易醒風戶猛。葛巾難臥月窗寒。也應種得東籬菊。好置藍輿自在觀。

戲呈魏評事三事

我向燈前置酒盃。南軒北戶一時開。如今正是花時節。且放春風數路來。

寄蔡子驥

爲報廬陵客。逢人且寄聲。不知無恙否。何日到南城。

和張文潛晚春

易貯千尋水。難藏一點春。也須幾杯酒。還似送行人。  
渡水衣須扱。穿林手自披。經春腳力軟。但恐上山遲。



二老寄朱廣微二首

二老相思又隔年。僧窗閑坐復何緣。吟翁最好鹽城住。時把歌詩付酒船。寄聲切問朱監利。對面勤詢劉貴池。或見廣東程使者。爲言收得寄來詩。

吳舒信道

淮干風起木枝搖。頷下甕甌一尺高。我是折薪扶耒手。中丞且莫笑籠豪。

上林殿院次公九首

衰翁太半白髭鬚。活到明年六十餘。未死須爲治河說。此生難就賑飢書。西庵共坐諸僧榻。南郭親逢大使車。記得偶同詩韻否。淮東使者亦嗟歎。林氏家藏萬帙書。五船便可當五車。別顧客舟施坐榻。更謀官舫作行廚。寫時教子烘青竹。讀處呼童捉蠹魚。悔不早知都借取。終身挾策灌園蔬。

贈黃魯直

不見故人彌有情。一見故人心眼明。忘卻問君船住處。夜來清夢繞西城。

華陽山和查教授

玉井溫溫浸月華。幢幢松檜聳高牙。半峰已斷人間路。絕頂自開天上花。可恨白雲吟處起。何堪行路望



中賒。怪來得似希夷子。借問如今有幾家。

宿山館

煙蘿斷處初逢舍。雲竹疎時忽見燈。嶮磴未歸樵塢叟。破庵已去誦經僧。暗龍吟罷庭無月。寒狖啼來谷有冰。君看牀頭鐵鱗甲。雨痕苔暈幾千層。  
倦客待沽山下酒。飢童先上竈頭燈。行經怪穴思防虎。坐聽疎鍾欲訪僧。手弄一張琴似鐵。匣藏三尺劍如冰。調高器古無人伴。身上煙霞空幾層。  
龍歸潭面千尋黑。虎視林隈兩炬燈。執爨正燃炊飯火。乞滄恰值寄眠僧。倦聽雨後諸巖溜。渴憶春前一片冰。臥看滿山紅日曉。碧瑤城闕鬱千層。  
廚頭火滅童偷飯。梁上巢空鳥避燈。入夜更無同舍客。今朝唯有放猿僧。樵庵已貯霜前果。竹院猶存臆後冰。誰道煙霄花上處。一梯雲級萬餘層。

送李守

莫說眞州南畔路。楚望亭南路已遙。只可寄聲來見問。更難折簡去相招。船頭何處逢秋水。山下誰家把酒瓢。且趁潮行急搖艣。到江州後更無潮。

癸亥六月十三日。與朱至機坐間得此。到江州後更無潮一句。其夕枕上成篇也。

哭張六并序



張六子莊死矣。十一月十三日夜四更時。積用素服。望其所居。哭之。哭且爲詩。明且涕泣。以書。使孤甥  
老老致於柩前。嗚呼哀哉。

欲視目已瞑。欲語口已噤。欲動肉已寒。欲書手已硬。惟有心上熱。惟存心中悲。此熱須臾間。此悲無休時。  
所悲孤兒寒。所悲孤兒飢。苦苦復苦苦。此悲遂入土。



# 簡齋詩鈔

陳與義字去非。號簡齋。汝州葉縣人。登上舍甲科。歷太學博士。擢符寶郎。尋謫監陳留酒稅。南渡後。避亂襄漢。轉湖湘。踰嶺嶠。召爲兵部員外郎。紹興中。累官翰林學士。知制誥。至參知政事。卒年四十九。少學詩於崔德符。問作詩之要。崔曰。工拙所未論。大要忌俗而已。嘗賦墨梅。受知徽宗。遂登冊府。高宗尤喜其客子光陰詩卷裏。杏花消息雨聲中之句。天分旣高。用心亦苦。意不拔俗。語不驚人。不輕出也。晚年益工。旗亭傳舍。摘句題寫。殆徧。號稱新體。物寓興清。邃紆徐高。舉橫厲上。下陶謝韋柳之間。劉後村謂元祐後詩人迭起。不出蘇黃二體。及簡齋始以老杜爲師。建炎間。避地湖嶠。行萬里路。詩益奇壯。造次不忘憂愛。以簡嚴掃繁縟。以雄渾代尖巧。第其品格。當在諸家之上。劉須溪序其詩。亦謂較勝黃陳。比東坡云。如論花高品。則色不如香。逼真則香不如色。其推尊如此。簡齋自言曰。詩至老杜極矣。蘇黃復振之。而正統不墜。東坡賦才大。故解縱繩墨之外。而用之不窮。山谷措意深。故游泳玩味之餘。而索之益遠。要必識蘇黃之所不爲。然後可以涉老杜之涯涘。味此足以定其品格矣。簡齋晚年讀書吾邑之原缺鄉。有遺蹟云。

次韻謝文驥主簿見寄兼示劉宣教



斷蓬隨天風。飄蕩去何許。寒草不自振。生死衣牆堵。兩塗俱寂寞。衆手劇雲雨。坐令習主簿。下與雞鶩伍。遙知竹林交。未肯一時數。翩翩三語掾。智與慢相補。髯劉吾所畏。道屈空去魯。子才亦落落。傾蓋極許予。四夔照河濱。一笑寬逆旅。堂堂吾景方。張儀掾字去作泉下土。未知我露電。能復幾寒暑。思尊久未決。食薺轉覺苦。我不逮諸子。要先諸子去。不種楊惲田。但灌呂安圃。未知誰善釀。可作孔文舉。十年亦晚矣。請便事斯語。來詩有十年之約

次韻周教授秋懷

一官不辦作生涯。幾見秋風捲岸沙。宋玉有文悲落木。陶潛無酒對黃花。天機袞袞山新瘦。世事悠悠日自斜。誤矣載書三十乘。東門何地不宜瓜。

次韻張矩臣迪功見示建除體

建德我故國。歸哉遄我驅。除道得歡伯。荆棘無復餘。滿懷秋月色。未覺饑腸虛。平林過西風。爲我起笙竽。定知張公子。能共寂寞娛。執此以贈君。意重貂襜褕。破帽與青鞋。耐久心亦舒。危處要進步。安處勿停車。成虧在道德。不在功利區。收視以爲期。問君此何如。開尊且復飲。辭費道已迂。閉口味更長。香斷窗櫺疎。

題牧牛圖

千里煙草綠。連山雨新足。老牛抱朝饑。向山影覓棘。犢兒狂走先過浦。卻立長鳴待其母。母子爲人實倉



廩。汝飽不慚人愧汝。牧童生來日日娛。只憂身大當把鋤。日斜睡足牛背上。不信人間有黃輿。

江南春

雨後江上綠。客悲隨眼新。桃花十里影。搖蕩一江春。朝風逆船波浪惡。暮風送船無處泊。江南雖好不如歸。老薺遶牆人得肥。

蠟梅

智瓊額黃且勿誇。回眼視此風前葩。家家融蠟作杏帶。歲歲逢梅是蠟花。世間真偽非兩法。映日細看真是蠟。我今嚼蠟已甘腴。況此有韻蠟不如。只愁繁香欺定力。薰我欲醉須人扶。不辭花前醉倒臥。經月是酒是香君試別。

次韻張元方春雪

雲黃天爲低。窗白雪初作。幽人睡方覺。簾外舞萬鶴。斜斜既可人。整整亦不惡。不知來何暮。遂失梅花約。東風桃杏暖。不受珠璣絡。聊迴萬斛潤。點點付藜藿。幽人無酒飲。一笑供酬酢。歲晚會復來。相期在丘壑。

雜書示陳國佐胡元茂四首

一官專爲口。俯仰汗我顏。願將千日饑。換此三歲閒。冥冥雲表雁。時節自往還。不憂稻粱絕。憂在羅網間。絕勝杜拾遺。一飽常間關。晚知儒冠誤。猶戀終南山。



杜門十日疾。因得觀妄身。勿云千金軀。今視如埃塵。平生老赤腳。每見生怒嗔。揮汗煮我藥。見此媿其勤。巨源邦之棟。急士如拾珍。定知柳下鍛。遠勝崔史陳。絕交雖已隘。益見叔夜真。士要雖衣食。求仁今得仁。釋之與王生。盛美俱絕倫。吾評竹林詠。未可少居人。吾昔同年友。壯志各南溟。十年風雨過。見此落落星。秀者吾元茂。衆器見鼎錮。許身稷高間。不但醉六經。時逢下車揖。慰我兩眼青。勿憂事不理。伯始在朝廷。

書懷示友十首

俗子令我病。紛然來座隅。賢士費懷思。不受折簡呼。城東陳孟公。久闊今何如。明月照天下。此夕與君俱。不難十里勤。畏借東家驢。似聞有老眼。能作薦鶡書。功名勿念我。此心已掃除。陳孟公謂國佐。張子霜後鷹。眉骨非凡曹。不肯兄事錢。但欲僕命騷。胡爲隨我輩。碌碌著青袍。相逢車馬邊。技癢不得搔。平生詩作祟。腸肚困藿食。使我忘隱憂。亦自得詩力。絕知是餘蔽。且復永今日。不知付盃酒。一笑萬事畢。毛穎僅升堂。麴生真入室。

我夢鍾鼎食。或作山林遊。當其適意時。略與人間侔。覺來跡便掃。我已不悲憂。人間安可比。夢中無悔尤。我策三十六。第一當歸田。柴門種雜樹。婆娑樂餘年。是中三益友。不減二仲賢。柏樹解說法。桑葉能通禪。有錢可使鬼。無錢鬼擲撇。百年堂前燕。萬事屋上烏。微官不救饑。出處違壯圖。相牛豈無經。種樹亦有書。



如何求二頃。歸臥淵明廬。曝背對青山。鳥鳴人意舒。試數門前客。終歲幾覆車。  
仲舒老一經。策世非所長。瓦鼎薦蔬食。但取充饑腸。偉哉賈生書。開闔有耿光。既珍亦可飽。舉俗不見嘗。  
楊雄平生學。肝腎困雕鐫。晚於玄有得。始悔賦甘泉。使雄早大悟。亦何事於玄。賴有一言善。酒箴真可傳。  
蕭蕭十月菊。耿耿照白草。開窗逢一笑。未覺徐娘老。風霜要飽更。獨立晚更好。韓公真躁人。願用憂懷抱。  
青青堂西竹。歲寒不緇磷。蓬蒿衆小中。拭眼見長身。澹然冬日影。此處極可人。子猷幸見過。一洗聲色塵。

北風

北風掠野悲歲暮。黃塵漲街人不度。孤鴻抱饑客千里。性命么微不當怒。梅花欲動天作難。蓬飛上天得盤桓。千里臥木枝葉盡。獨自人間不受寒。

送張仲宗押戟歸閩中

翩然鴻鵠本不羣。亦復爲口長紛紛。去年弄影河北月。今年迎面江南雲。還家不比陶令冷。持節正效相如勤。青天白日映徒御。玄髮絳旆明江濱。舟前落花慰野老。浦口杜若愁湘君。遙知詩成值驛使。萬里春色當見分。贈人以言予豈敢。不忍負子聊云云。舊山雖好慎勿過。恐有德璋能勤文。

襄邑道中

飛花兩岸照船紅。百里榆堤半日風。臥看滿天雲不動。不知雲與我俱東。



寄新息家叔

風雨淮西夢。危魂費九升。一官遮日手。兩地讀書燈。見客深藏舌。吟詩不負丞。竹林雖有約。門戶要人興。

年華

去國頻更歲。爲官不救饑。春生殘雪外。酒盡落梅時。白日山川映。青天草木宜。年華不負客。一一入吾詩。

茅屋

茅屋年年破。春風歲歲來。寒從草根退。花值客愁開。時序添詩卷。乾坤進酒盃。片雲無思極。日暮卻空回。

醑醺

雨過無桃李。唯餘雪覆牆。青天映妙質。白日照繁香。影動春微透。花寒韻更長。風流到尊酒。猶足助詩狂。

秋雨

蕭蕭十日雨。穩送祝融歸。燕子經年夢。梧桐昨暮非。一涼恩到骨。四壁事多違。袞袞繁華地。西風吹客衣。

西風

木末西風起。中含萬里涼。浮雲不愁思。盡日只飛揚。夢斷頭將白。詩成葉自黃。不關明主棄。本出涸陰鄉。

題許道寧畫

滿眼長江水。蒼然何郡山。向來萬里意。今在一窗間。衆木俱含晚。孤雲遂不還。此中有佳句。吟斷不相關。



和張矩臣水墨梅五絕

巧畫無鹽醜不除。此花風韻更清姝。從教變白能爲黑。桃李依然是僕奴。  
病見昏花已數年。只應梅蕊故依然。誰教也作陳玄面。眼亂初逢未敢憐。  
粲粲江南萬玉妃。別來幾度見春歸。相逢京洛渾依舊。唯恨緇塵染素衣。  
含章簷下春風面。造化功成秋兔毫。意足不求顏色似。前身相馬九方皋。  
自讀西湖處士詩。年年臨水看幽姿。晴窗畫出橫斜影。絕勝前村夜雪時。

夜雨

經歲柴門百事乖。此身只合臥蒼苔。蟬聲未足秋風起。木葉俱鳴夜雨來。  
碁局可觀浮世理。燈花應爲好詩開。獨無宋玉悲歌念。但喜新涼入酒盃。

以事走郊外示友

二十九年知己非。今年依舊壯心違。黃塵滿面人猶去。紅葉無言秋又歸。  
萬里天寒鴻雁瘦。千村歲暮鳥烏微。往來屑屑君應笑。要就南池照客衣。

十月

十月北風催歲闌。九衢黃土汗儒冠。歸鴉落日天機熟。老雁長雲行路難。  
欲詣熱官憂冷語。且求濁酒寄



清歡孤吟坐到三更月。枯木無枝不受寒。

題小室

暫脫朝衣不當閒。澶州夢斷已多年。諸公自致青雲上。病客長齋繡佛前。隨意時爲獅子臥。安心懶作野狐禪。爐煙忽散無蹤跡。屋上寒雲自黯然。

次韻張迪功春日

年年春日寒欺客。今日春無一半寒。不覺轉頭逢歲換。便須揩眼待花看。爭新遊女幡垂鬢。依舊先生日照盤。從此不憂風雪厄。杖藜時可過蘇端。

又和歲除感懷用前韻

宦情吾與歲俱闌。只有詩盟偶未寒。鬢色定從今夜改。梅花已判隔年看。高門召客車稠疊。下里燒香篆屈盤。我亦三盃聊復爾。夢回鷓鴣出朝端。

卽席重賦且約再遊

詩情不與歲情闌。春風猶兼水氣寒。怪我問花終不語。須公走馬更來看。共知浮世悲駒隙。卽見平波散芡盤。得一老兵雖可飲。從今取友要須端。

次韻家叔



袞袞諸公車馬塵。先生孤唱發陽春。黃花不負秋風意。白髮空隨世事新。閉戶讀書真得計。載肴從學豈無人。只應又被支郎笑。從者依然困在陳。

次韻答張迪功坐上見貽張將赴南都任二首

足錢便可不須侯。免對妻兒賦百憂。一笑相逢亦奇事。平生所得是清流。談天安用如鄒子。掃地還應學趙州。南北東西底非夢。心閑隨處有真遊。千首能輕萬戶侯。誦君佳句解人愁。夢闌塵裏功名晚。笑罷尊前歲月流。世事無窮悲客子。梅花欲動憶吾州。明年又作河梁別。莫負平生馬少游。

題畫兔

碎身鷹犬慙何忍。埋骨詩書事亦微。霜落深林可終歲。雄雌暖日莫忘機。

寄若拙弟兼呈二十家叔

退之送窮窮不去。樂天待富富不來。政須青山映黑髮。願著皂蓋爭黃埃。何如父子共一壑。龐家活計良不惡。阿奴況自不碌碌。白鷗之盟可同諾。三間瓦屋亦易求。著子東頭我西頭。中間共作老萊戲。世上樂復有此不。問夢膏肓應已瘳。歸來歸來無久留。竹林步兵非俗流。爲道此意思同遊。

次韻謝表兄張元東見寄



平生張翰極風流。好事工文妙九州。燈裏偶然同一笑。書來已似隔三秋。林泉入夢吾當隱。花鳥催詩歲不留。安得清談一陶寫。令人絕憶許文休。

若拙弟說汝州可居已約卜一丘用韻寄元東

四歲冷官居濮地。三年羸馬帝王州。陶潛迷路已良遠。張翰思歸那待秋。病鶴欲飛還躑躅。孤雲將去更遲留。盍簪共結雞豚社。一笑相從萬事休。

次韻家弟碧線泉

九孔穿針可得過。冰蠶映日吐寒波。練飛究詠徐凝水。帶斷疑分漢帝河。川后不愁微步襪。鮫人暗動卷綃梭。才高下視玄虛賦。對此區區轉患多。

同家弟賦蠟梅詩得四絕句

朱朱與白白。著意待春開。那知洞房裏。已傍額黃來。韻勝誰能舍。色莊那得親。朝陽一映樹。到骨不留塵。黃羅作廣袂。絳帳作中單。人間誰敢著。留得護春寒。一花香十里。更值滿枝開。承恩不在貌。誰敢鬪香來。

連雨賦書事四首



九月逢連雨。瀟瀟穩送秋。龍公無乃倦。客子不勝愁。雲氣昏城壁。鐘聲咽寺樓。年年授衣節。牢落向他州。  
風伯方安臥。雲師亦少饜。氣連河漢潤。聲到竹窗高。老鶴尤貪去。寒蟬遂不號。相悲更相識。滿眼楚人騷。  
寒入薪芻價。連天兩眼愁。生涯赤藤杖。契公黑貂裘。烏鵲無言暮。蓬蒿滿意秋。同時不同味。世事劇悠悠。  
白菊生新紫。黃蕪失舊青。俱含歲晚恨。併入夜深聽。夢寐連蕭索。更籌亂晦冥。雲移過吳越。應爲洗餘腥。

趙虛中有石名小華山以詩借之

君家蒼石三峰樣。磅礴乾坤氣象橫。賤子與山曾半面。小窗如夢慰平生。爐煙巧作公超霧。書冊尙避秦  
王城。病眼朝來欲開懶。借君岩岫障新晴。

次韻樂文卿北園

故園歸計墮虛空。啼鳥驚心處處同。四壁一身長客夢。百憂雙鬢更春風。梅花不是人間白。日色爭如酒  
面紅。且復高吟置餘事。此生能費幾詩筒。

汝州吳學士觀我齋分韻得真字

狂夫縛軒冕。自許稷契身。靜者樂山林。謂是羲皇人。不如兩忘快。內保一色醇。偉哉道山傑。滯此汝水濱。  
大來會闊步。小憩得幽欣。一齋有琴酒。萬事無緇磷。不作子公書。肯受元規塵。人言君侯癡。我知丈人真。  
月明泉聲細。雨過竹色新。是間有真我。宴坐方申申。



古別離

東門柳。年年歲歲征人手。千人萬人於此別。柳亦能堪幾人折。願君遄歸與君期。要及此柳未衰時。

蠟梅四絕

花房小如許。銅切黃金塗。中有萬斛香。與君細細輸。  
來從底處所。黃露滿衣溼。緣慙翻得憐。亭亭倚風立。  
奕奕金仙面。排行立曉晴。殷勤夜來雪。少住作珠璣。  
亭亭金步搖。朝日明漢宮。當時好光景。一似此園中。

錢東之教授惠澤州呂道人硯爲賦長句

君不見。銅雀臺邊多事士。走上觚稜蔭歌舞。餘香分盡垢不除。卻寄書林汗縑楮。豈如此瓦凝青膏。冷面不識姦雄曹。呂翁已去泫餘泣。通譜未許弘農陶。暮年得君真耐久。摩挲玉質雲生手。未知南越石虛中。亦有文章似君否。西家樸滿本弟昆。趣清尙濁何年分。一朝墮地真瓦礫。莫望韓公無瘞文。

述懷呈十七家叔

兒時學道逃悲歡。只今未免憂饑寒。浮生萬事蟻旋磨。冷官十年魚上竿。竹林步兵亦忍辱。長安閉門出無僕。門前故人擁廬兒。政坐向來甘碌碌。君不見。古人有待良不多。利名溺人甚風波。垂露成幃仲長統。



明月爲燭張志和。塵中別多會日少。世事歡談何可了。曾中萬卷已無用。勸公留眼送飛鳥。兩翁觀光今幾時。賦歸有約時已稽。未暇藏身北山北。且須覓地西枝西。願從我翁歸洗耳。不用妓女汙山水。肩輿亦莫要僕夫。自有門生與兒子。

觀我齋再分韻得下字

一慵縛兩腳。閉戶了晨夜。夢攀城西樹。起造君子舍。紫髯出堂堂。見客披衣謝。平生功名手。嗜靜如食蔗。小齋劇冰壺。中明外無罅。要知日用事。跌坐看鳥下。主人心了了。竹石亦閒暇。兒童慣看客。我車當日駕。平分齋中閒。風月不待借。要須酒屢費。不用牛心炙。

歸洛道中

洛陽城邊風起沙。征衫歲歲負年華。歸途忽踐楊柳影。春事已到蕪菁花。道路無窮幾傾轂。牛羊旣飽各知家。人生擾擾成底事。馬上哦詩日又斜。

道中寒食

斗粟淹吾駕。浮雲笑此生。有詩酬歲月。無夢到功名。客裏逢歸雁。愁邊有亂鶯。楊花不解事。更作倚風輕。

龍門

不到龍門十載強。斷崖依舊掛斜陽。金銀佛寺浮佳氣。花木禪房接上方。羸馬乍來還徑去。流鶯多處最



難忘。老僧不作留人意。看水看山白髮長。

秋夜

中庭淡月照三更。白露洗空河漢明。莫遣西風吹葉盡。卻愁無處著秋聲。

中牟道中二首

雨意欲成還未成。歸雲卻作伴人行。依然壞郭中牟縣。千尺浮屠管送迎。  
楊柳招人。不待媒。蜻蜓近馬。忽相猜。如何得與涼風約。不共塵沙一併來。

秋雨

塵起一月憂無禾。瓦鳴三日憂雨多。書生重口輕肝腎。不如牆角蚯蚓方長哦。少昊行秋龍灑道。風作萬木皆商歌。病夫強起開戶立。萬箇銀竹驚森羅。人間偉觀如此少。倚杖不覺泥及鞞。菊叢欹倒未足道。老景知奈梧桐何。是事且置當務本。菜圃已添三萬科。

遊葆真池上

牆厚不盈咫。人間隔蓬萊。高柳喚客遊。我輩御風來。坐久落日盡。澹澹池光開。白雲行水中。一笑三徘徊。鳴兒輕歲月。不受急景催。試作弄篙驚。徐去首不迴。無心與境接。偶遇信悠哉。再來知何似。有句端難裁。

次韻王堯明郊祀顯相之作



奏書初不待衡譚。奠璧都來萬玉參。黃屋倚霄明半夜。紫壇承月眩諸龕。聲喧大呂初終六。影動元圭陟降三。可是天公須羯鼓。已迴寒玉作春酣。

路歸馬上再賦

偶然思玉仙。便到玉仙遊。興盡未及郭。玉仙失回頭。成毀俱一念。今昔浪百憂。未知橫笛子。亦解此意不。春風所經過。水色如潑油。垂鞭看落日。世事劇悠悠。

來禽花

來禽花高不受折。滿意清明好時節。人間風日不貸春。昨夜胭脂今日雪。舍東蕪菁滿眼黃。胡蝶飛去專斜陽。妍嗤都無十日事。付與梧桐一夏涼。

清明二首

街頭女兒雙髻鴉。隨蜂趁蝶學天邪。東風也作清明節。開遍來禽一樹花。卷地風拋市井聲。病扶危坐了清明。一簾晚日看收盡。楊柳微風百媚生。

春日二首

朝來庭樹有鳴禽。紅綠扶春上遠林。忽有好詩生眼底。安排句法已難尋。憶看梅雪縞中庭。轉眼桃稍無數青。萬事一身雙鬢髮。竹牀欹臥數窗櫺。



夏日集葆真池上以綠陰生晝靜賦詩得靜字

清池不受暑。幽討起予病。長安車轍邊。有此荷萬柄。是身唯可懶。共寄無盡興。魚遊水底涼。鳥語林間靜。談餘日亭午。樹影一時正。清風不負客。意重百金贈。聊將兩鬢蓬。起照千丈鏡。微波喜搖人。小立待其定。梁王今何許。柳色幾衰盛。人生行樂耳。詩律已其贖。邂逅一尊酒。他年五君詠。重期踏月來。夜半嘯煙艇。

道山宿直

離離樹子鵲驚飛。獨倚枯筇無限時。千丈虛廊貯明月。十分奇事更新詩。人間路絕窗扉語。天上雲空閣影移。遙想王戎燭下算。百年辛苦一生癡。

雨晴

天缺西南江面清。纖雲不動小灘橫。牆頭語鵲衣猶溼。樓外殘雷氣未平。盡取微涼供穩睡。急搜奇句報新晴。今宵勝絕無人共。臥看星河盡意明。

十月

十月天公作許悲。負霜鴻雁不停飛。莽連萬里雲山去。紅盡千林秋徑歸。病夫搜句了節序。小齋焚香無是非。睡過三冬莫開戶。北風不貸芰荷衣。

漫郎



漫郎功業太悠然。柱笏看山了十年。黑白半頭明鏡裏。丹青千樹惡風前。星霜屢費驚人句。天地元須使鬼錢。踏破九州無一事。只今分付結跏禪。

柳絮

柳送腰肢日幾迴。更教飛絮舞樓臺。顛狂忽作高千丈。風力微時穩下來。

登天清寺塔

爲眼不計腳。攀梯受微辛。半天拍闌干。驚倒地上人。風從萬里來。老夫方岸巾。荒荒春浮水。浩浩空納塵。夕陽差萬瓦。赤鯉欲動鱗。須臾暮煙合。青魴隱瀟淪。萬化本日馳。高處覺眼新。借問龕中仙。坐穩今幾晨。俗子書滿壁。澹然不生嗔。唯有太行山。修供獨殷勤。

浴室觀雨以催詩走羣龍爲韻得走字

微雲生屋脊。欹枕看培塿。崔嵬亂一瞬。秦華入搔首。須臾萬銀竹。壯觀驚戶牖。摧擊竟自碎。映空白煙走。餘飄送未了。日色在井口。去冬三寸雪。寒日澹相守。商量細細融。未覺經旬久。誰能料天公。辦此脫穎手。一涼滿天地。平分到庭柳。葉端嘯餘風。送我一杯酒。畫屏題細字。盡記同來友。俗眼之所遺。此事當不朽。

夏至日與太學同舍會葆真二首

微官有閱閱。三賦池上詩。林密知夏深。仰看天離離。官忙負遠興。觴至及良時。荷氣夜來雨。百鳥青晝遲。



微風不動蘋。坐看水色移。門前爭奪場。取歡不償悲。欲歸未得去。日暮多黃鸝。  
明波影千柳。紺屋朝萬荷。物新感節移。意定覺景多。遊魚聚亭影。鏡面散微渦。江湖豈在遠。所欠雨一簑。  
忽看帶箭禽。三歎無奈何。

秋試院將出書所寓窗

門前柿葉已堪書。弄鏡燒香聊自娛。百世窗明窗暗裏。題詩不用著工夫。

夏日

赤日可中庭。樹影斂不開。燭龍未肯忙。一步九徘徊。夢中驚耳鳴。忽覺聞遠雷。屋上奇峯起。欹枕看雲來。  
變化信難料。轉頭失崔嵬。雖然不成雨。風起亦快哉。槐葉萬背白。少振十日埃。白團豈辨此。擲去羞薄才。  
蜻蜓泊牆陰。近人故多猜。牆西豈更熱。已去復飛廻。

送王周士赴發運司屬官

寧食三斗塵。有手不揖無詩人。寧飲三斗醋。有耳不聽無味句。牆東草深蘭發薰。君先夢我我夢君。小窗  
誦詩燈花喜。窗外北風怒未已。書生得句勝得官。風其少止盡人歡。五更月暈一千丈。明日君當泛淮浪。  
去去三十六策中。第一買酒鑿北風。

試院書懷



細讀平安字。愁邊失歲華。疎疎一簾雨。淡淡滿枝花。投老詩成癖。經春夢到家。茫然十年事。倚杖數栖鴉。

寄題兗州孫大夫絕塵亭

境空納浩蕩。日暮生沈寥。竹聲池邊起。欲斷還蕭蕭。丈人方微吟。萬象各動搖。林間光景異。月出東山椒。門前誰剝啄。已逝不須邀。

休日早起

隴隴窗影來。稍稍禽聲集。開門知有雨。老樹半身溼。劇讀了無味。遠遊非所急。蒲團著身寬。安取萬戶邑。開鏡白雲度。捲簾秋光入。飽受今日閒。明朝復羈紲。

碁

長日無公事。閒圍李遠碁。傍觀真一笑。互勝不移時。幸未逢重霸。何妨著獻之。晴天散飛雹。驚動隔牆兒。

冬至二首

少年多意氣。老去一分無。閉戶了冬至。日長添數珠。北風不待節。鴻雁天南驅。烏帽獨何幸。七日守屋廬。石爐深炷火。撩亂一榻書。只可自怡悅。不堪寄張扶。人生本是客。杜叟顧未知。今年我聞道。悲樂兩脫遺。日色如昨日。未覺墉陰遲。不須行年記。異代尋吾詩。東家窈窕娘。融蠟幻梅枝。但恐負時節。那知有愁時。



西省醱醺架上殘雪可愛戲同王元忠席大光賦詩

醱醺花底當年事。夜雪模糊照酒闌。北省今朝枝上雪。還揩病眼作花看。

對酒

新詩滿眼不能裁。鳥度雲移落酒杯。官裏簿書無日了。樓頭風雨見秋來。是非袞袞書生老。歲月忽忽燕子回。笑撫江南竹根枕。一尊呼起鼻中雷。

後三日再賦

天生瘦木不須裁。說與兒童是酒杯。落日留霞知我醉。長風吹月送詩來。一官擾擾身增病。萬事悠悠首獨回。不奈長安小車得。睡鄉深處作奔雷。

赴陳留二首

草草一夢闌。行止本難期。歲晚陳留路。老馬三振鬣。自看鞭袖影。曠野日落遲。柳林行不盡。想見春風時。點點羊散村。陳陳鴻投陂。城中那有此。觸處皆新詩。舉手謝路人。醉語勿瑕疵。我行有官事。去作三年痴。遙聞辟穀仙。閱世河水湄。時從玩木影。政爾不憂飢。

馬上摩挲眼。出門光景新。鴉鳴半陂雪。路轉一林春。舊歲有三日。全家無十人。平生鸚鵡蓋。今夕最關身。

至陳留



煙際停停塢。招人可得回。等閒爲夢了。聞徙出關來。日落河冰壯。天長鴻雁哀。平安遠遊意。隨處一徘徊。

客裏

客裏東風起。逢人只四愁。悠悠雜唯唯。莫莫更休休。窗影鳥雙度。水聲船逆流。一官成一集。盡付古河頭。

對酒

陳留春色撩詩思。一日搜腸一百廻。燕子初歸風不定。桃花欲動雨頻來。人間多待須微祿。夢裏相逢記此杯。白竹扉前容醉舞。煙村渺渺欠高臺。

寒食

草草隨時事。蕭蕭傍水門。濃陰花照野。寒食柳圍村。客袂空佳節。鶯聲忽故園。不知何處笛。吹恨滿清尊。

感懷

少日爭名翰墨場。只今扶杖送斜陽。青青草木浮元氣。渺渺山河接故鄉。作吏不妨三折臂。搜詩空費九迴腸。子房與我同羈旅。世事千般酒一觴。

寶園醉中前後五絕句

東風吹雨小寒生。楊柳飛花亂晚晴。客子從今無可恨。寶家園裏有鶯聲。  
海棠脈脈要詩催。日暮紫綿無數開。欲識此花奇絕處。明朝有雨試重來。



不見海棠相似人。空題詩句滿花身。酒闌卻度荒陂去。馳使風光又一春。  
三月碧桃驚動人。滿園光景一時新。賸傾老子尊中玉。折盡繁枝不要春。  
一尊相屬莫辭空。報答今朝吹面風。自唱新詩與明月。碧桃開盡雨聲中。

雨

沙岸殘春雨。茅簷古鎮官。一時花帶淚。萬里客憑欄。日晚薔薇重。樓高燕子寒。惜無陶謝手。盡力破憂端。

題酒務壁

野馬本不羈。無奈卯與申。當時彭澤令。定是英雄人。客來兩繩牀。客去一欠伸。市聲自雜杏。鑪煙自輪囷。  
鶯聲時節改。杏葉雨氣新。佳句忽墮前。追摹已難真。自題西軒壁。不雜徐庾塵。

秋夜詠月

庭樹日日疎。稍覺夜月添。推愁了此段。卷我三間簾。黃花牆陰遠。白髮露氣嚴。平生六尺影。隨我送涼炎。  
踏破千憂地。投老乃自嫌。尙想采石江。宮錦映霜蟾。夜半賦詩成。起舞魚龍兼。辦此詎難事。取快端宜廉。

入城

竹輿聲伊鴉。路轉登古原。孟冬郊澤曠。細水鳴蘆根。霧收浮屠立。天闊鴻雁奔。平生厭喧鬧。快意一家村。  
思生長林內。故園歸不存。欲爲唐衢哭。聲出且復吞。



夜步隄上三首

世故生白髮。意行無與期。平生木上座。臨老始相知。月中沙岸永。歲暮河流遲。留侯廟前柳。葉盡空離離。百年信難料。賸賦奇絕詩。人間睡聲起。幽子方獨步。倚杖看白雲。亭亭水中度。十月雁背高。三更河流去。物生各擾擾。念此煎百慮。聊將憂世心。數遍橋西樹。旋買青芒鞋。去踏沙頭月。爭教冠蓋地。著此影突兀。樹寒栖鳥動。風轉孤管發。月色夜夜佳。人生事如髮。夢中續清遊。濃露溼銀闕。

晚步

手把古人書。閒讀下廣庭。荒村無車馬。日落雙檜青。曠然神慮靜。濁俗非所寧。逍遙出荆扉。竚立瞻郊坰。須臾暮色至。野水皆晶熒。卻步面空林。遠意更杳冥。停雲甚可愛。重疊如沙汀。

同楊運幹黃秀才村西買山藥

潦縮田路寬。委蛇散腰腳。勝日三枝杖。村西買山藥。岡巒相吞吐。遠木互前卻。天陰野水明。歲暮竹離薄。田翁領客意。發筐堆磊落。玉質細色裘。用世乃見縛。屠門幾許快。夜語尋幽約。石鼎看雲翻。門前北風惡。

招張仲宗



北風日日吹茅屋。幽子朝朝只地爐。客裏賴詩增意氣。老來唯懶是工夫。空庭喬木無時事。殘雪疎籬當畫圖。亦有張侯能共此。焚香相待莫徐驅。

寓居劉倉廩中晚步過鄭倉臺上

紗巾竹杖過荒陂。滿面春風二月時。世事紛紛人易老。春陰漠漠絮飛遲。士衡去國三間屋。子美登臺七字詩。草遶天西青不盡。故園歸計入支頤。

八閩僧房遇雨

脫履坐明窗。偶至情更適。池上風忽來。斜雨滿高壁。探松含歲暮。幽鳥立晝寂。世故方未闌。焚香破今夕。

贈黃家阿莘

君家阿莘如白玉。呼出燈前語陸續。可憐郎罷窮一生。只今有汝照茅屋。猪生十子豚復豚。阿莘明年可當門。階庭一笑不外索。萬事紛紛何足論。

發商水道中

商水西門語。東風動柳枝。年華入危涕。世事本前期。草草檀公策。茫茫杜老詩。山川馬前闊。不敢計歸時。

西軒寓居

牢落西軒客。巡簷費獨吟。桃花明薄暮。燕子鬧微陰。辛苦元吾事。淹留更此心。小窗隨意寫。蛇蚓起相尋。



鄧州西軒書事十首

小儒避賊南征日。皇帝行天第一春。走到鄧州無腳力。桃花初動雨留人。  
千里空攜一影來。白頭更著亂蟬催。書生身世今如此。倚遍周家十二槐。  
瓦屋三間寬有餘。可憐小陸不同居。易求蘇子六國印。難得河橋一字書。  
莫嫌啖蔗佳景遠。橄欖甜苦亦相并。都將壯節共辛苦。準擬殘年看太平。  
皇家卜年過周曆。變故未必非天仁。東南鬼火成何事。終朝胡蜂作爭臣。  
楊劉相傾建中亂。不待白首今同歸。只今將相須廉蔭。五月并門未解圍。  
不須夜夜看太白。天地景氣今如斯。始行鷓蚌相攻策。可惜中原見事遲。  
詔書憂民十六事。父老祝君一萬年。白髮書生喜無寐。從今不仕可歸田。  
范公深憂天下日。仁祖愛民全盛年。遺廟只今香火冷。時時風葉一騷然。  
諸葛經行有夕風。千秋天地幾英雄。弔古不須多感慨。人生半夢半醒中。

晚步順陽門外

六尺枯藜了此生。順陽門外看新晴。樹連翠篠圍春晝。水泛青天入古城。夢裏偶來那計日。人間多事更  
聞兵。只應十載溪橋路。欠我婆娑勃窣行。



縱步至董氏園亭二首

槐葉層層新綠生。客懷依舊不能平。自移一榻西窗下。要近叢篁聽雨聲。  
客子今年飴褐寬。鄧州三月始春寒。簾鉤挂盡蒲團穩。十丈虛庭借雨看。

題簡齋

我窗三尺餘。可以閱晦明。北省雖巨麗。無此風竹聲。不著散花女。而况使鬼兄。世間多岐路。居士繩牀平。未知阮遙集。幾履了平生。領軍一屋鞋。千載笑絕纓。槐陰自入戶。知我喜新晴。覓句方未了。簡齋真虛名。

春雨

花盡春猶冷。羈心只自驚。孤鶯啼永晝。細雨溼高城。擾擾成何事。悠悠送此生。蛛絲閃夕霽。隨處有詩情。

登城樓

去年夢陳留。今年夢鄧州。幾夢卽了我。一笑城西樓。新晴草木麗。落日淡欲收。遠川如動搖。景氣明田疇。百年幾憑欄。亦有似我不。城陰坐來失。白水光不流。丈夫貴快意。少住寬千憂。歸嫌簡齋陋。局促生白頭。

雨

忽忽忘年老。悠悠負日長。小詩妨學道。微雨好燒香。簷鵲移時立。庭梧滿意涼。此身南復北。彷彿是他鄉。

夏夜



閒弄玉如意。天河白練橫。時無李供奉。誰識謝宣城。兩鵲翻明月。孤松立快晴。南陽半年客。復此滿懷清。  
鄧州城樓  
鄧州城樓高百尺。楚岫秦雲不相隔。傍城積水晚更明。照見綸巾倚樓客。李白上天不可呼。陰晴變化還須臾。獨撫危欄詠奇句。滿樓風月不枝梧。

秋日客思

南北東西俱我鄉。聊從地主借胡牀。諸公共得何侯力。遠客新抄陸氏方。老去事多藜杖在。夜來秋到葉聲長。蓬萊可託無因至。試覓人間千仞岡。

道中書事

臨老傷行役。籃輿歲月奔。客愁無處避。世事不堪論。白道含秋色。青山帶雨痕。壞梁斜鬪水。喬木密藏村。易破還家夢。難招去國魂。一身從白首。隨意答乾坤。

美哉亭

西出城臯關。土谷僅容駝。天掛一疋練。雙崖鬪嵯峨。忽然五丈闕。亭構如危窠。青山麗中原。白日照大河。下視萬里川。草木何其多。臨高一吐氣。卻奈雄風何。辛苦生一快。造化巧揣摩。險易終不償。翻身下殘坡。與季申信道。自光化復入鄧書事四首。



孫子白木杖。富子黑油笠。我獨白竹籃。差池復相及。夕陽橋邊盡。岸幘歸雲急。勿語城中人。從渠慎出入。賣舟作歸計。竹籃穩如舟。霧收青皋溼。行路當春遊。老馬不自知。意欲踏九州。依然還故壘。寂寞壯心休。再來生白髮。重見鄧州春。依舊城西路。桃花不記人。卜居得窮巷。日色滿窗新。微吟驚市卒。獨鶴語城闌。城西望城南。十日九相隔。何如三枝杖。共踏江上石。門前流水過。春意滿渠碧。遙知千頃江。如今好顏色。

寄季申

雨歇城南泥未乾。遙知獨立整衣冠。舊知鄴下劉公幹。今日遼東管幼安。綠陰展盡身猶遠。黃鳥飛來節已闌。安得一尊生耳熱。暫時相對說悲歡。

重陽

去歲重陽已百憂。今年依舊歎羈遊。籬底菊花唯解笑。鏡中頭髮不禁秋。涼風又落宮南木。老雁孤鳴漢北州。如許行年那可記。謾排詩句寫新愁。

有感再賦

憶得甲辰重九日。天恩曾預宴城東。龍沙此日西風冷。誰折黃花壽兩宮。

感事

喪亂那堪說。干戈竟未休。公卿危左袵。江漢故東流。風斷黃龍府。雲移白鷺洲。云何舒國步。持底副君憂。



世事非難料。吾生本自浮。菊花紛四野。作意爲誰秋。

送客出城西

鄧州誰亦解丹青。畫我羸驂曉出城。殘年政爾供愁了。末路那堪送客行。寒日滿川分衆色。暮林無葉寄秋聲。垂鞭歸去重回首。意落西南計未成。

得席大光書因以詩迓之

十月風高客子悲。故人書到暫開眉。也知廊廟當推轂。無奈江山好賦詩。萬事莫論兵動後。一盃當及菊殘時。喜心翻到相迎地。不怕荒林十里陂。

無題

六經在天如日月。萬事隨時更故新。江南丞相浮雲壞。洛下先生宰木春。孟嘉何妨改師法。京房底處有門人。舊喜讀書今懶讀。焚香閱世了閑身。

正月十二日自房州城遇金兵至奔入南山十五日抵回谷張家

久謂事當爾。豈意身及之。避兵連三年。行半天四維。我非洛豪士。不畏窮谷飢。但恨平生意。輕了少陵詩。今年奔房州。鐵馬背後馳。造物亦惡劇。脫命真毫釐。南山四程雲。布襪傲險巇。籬間老炙背。無意管安危。知我是朝士。亦復顰其眉。呼酒軟客腳。菜本濯玉肌。窮途士易德。歡喜不復辭。向來貪讀書。閉戶生白髭。



豈知九州內。有山如此奇。自寬實不情。老人亦解頤。投宿恍世外。青燈耿茅茨。夜半不能眠。澗水鳴聲悲。  
十七夜詠月

月輪隱東峯。奇彩在南嶺。北崖草木多。蒼茫映光景。玉盤忽微露。銀浪瀉千頃。巖谷散陸離。萬象雜形影。  
不辭三更露。冒此白髮頂。老筇無前遊。危處有新警。澗光如翻鶴。髮態發遙境。回首房州城。山中夜何永。

與信道遊澗邊

斜陽照亂石。顛崖下雙筇。試從絕壑底。仰視最奇峯。迴碕發澗怒。高靄生樹容。半巖菖蒲根。翠葆森伏龍。  
豈無避世士。於此儻相逢。客心忽悄悄。歸路迷行蹤。

遊南嶂同孫信道

遙瞻南嶂深復深。雙崖與天藏太陰。青鞋濟勝不能嬾。踏破積雪窮崎嶇。空中朽樹抱孤篠。無竅蒼壁生  
橫林。孤禽三叫危石裂。欲返未返神蕭森。磴迴忽然何處所。當面煙如翠蛟舞。石門泄風無晝夜。古木截  
道藏雷雨。丹丘赤城去幾許。下視人間足塵土。放身天地不自知。導以龍蛇翼熊虎。山中異事記今晨。杖  
藜得道孫與陳。

同信道晚登古原

幽懷忽牢落。起望登古原。微吹度脩竹。半林白翻翻。日暮紛物態。山空銷客魂。惜無一尊酒。與子醉中言。



岸幘

岸幘立清曉。山頭生薄陰。亂雲交翠壁。細雨溼青林。時改客心動。鳥鳴春意深。窮鄉百不理。時得一閒吟。

雨

雲起谷全曙。雨晴山復明。青春望中色。白澗晚來聲。遠樹鳥羣集。高原人獨耕。老夫逃世久。堅坐聽陰晴。

出山二首

陰巖不知晴。路轉見朝日。獨行脩竹盡。石崖千丈碧。山空樵斧響。隔嶺有人家。日落潭照樹。川明風動花。

入山二首

出山復入山。路隨溪水轉。東風不惜花。一暮都開遍。都迷去時路。策杖煙漫漫。微雨洗春色。諸峯生晚寒。

寒食

竹籬寒食節。微雨澹春意。誼譁少所便。寂寞今有味。空山花動搖。亂石水經緯。倚杖忽已晚。人生本何冀。

清明

雨晴閒步澗邊沙。行入荒林聞亂鴉。寒食清明驚客意。暖風遲日醉梨花。書生投老王官谷。壯士偷生漂



母家不用鞦韆與蹴鞠。只將詩句答年華。

出山道中

雨歇澹春曉。雲氣山腰流。高崖落絳葉。恍如人世秋。避地時忽忽。出山意悠悠。溪急竹影動。谷虛禽響幽。同行得快士。勝處頻淹留。乘除了身世。未恨落房州。

詠青溪石壁

青溪宜曉日。曲處千丈晦。天開蒼石屏。影落西村外。虛無元氣立。明滅河漢對。人行崢嶸下。鳥急浩蕩內。向來千萬峯。瑣細等蓬塊。老夫倚杖久。三歎造化大。惜哉太史公。意短遺此快。更欲訪野人。窮探視其背。

和王東鄉絕句四首

少時走馬洛陽城。今作江邊餅錫僧。說與虎頭須畫我。三更月裏影崢嶸。來日安榴花尙稀。壓牆丹實已垂垂。何時著我扁舟尾。滿袖西風信所之。只今當代功名手。不數平生粥飯僧。獨立江風吹短髮。暮雲千里倚崢嶸。平生不得吟詩力。空使秋霜入鬢垂。太岳峯前滿樽月。爲君聊復一中之。

觀江漲

漲江臨眺足消憂。倚杖江邊地欲浮。疊浪併翻孤日去。兩津橫卷半天流。鼉鼉雜怒爭新穴。鷗鷺驚飛失



故洲可爲一官妨快意。眼中唯覺欠扁舟。

同左通老用陶潛還舊居韻

故園非無路。今已不念歸。秋入漢水白。葉脫行人悲。東西與南北。欲往還覺非。勿云去年事。兵火偶脫遺。可憐蛤蜊影。殘歲聊相依。天涯一尊酒。細酌君勿催。持觴望江山。路永悲身衰。百感醉中起。清淚對君揮。同通老用淵明獨酌韻

紛紛吏民散。遺我以兀然。悄悄今夕意。鳥影馳隙間。向來房州谷。採藥危得仙。忽駕太守車。出處寧非天。何妨暫閱世。謀行要當先。西齋一壺酒。微雨新秋還。蛛網閃明晦。葉聲餞歲年。呼兒具紙筆。錄我醉中言。欲離均陽而雨不止書八句寄何子應

江城八月楓葉彫。城頭俄詩江動搖。秋雨留人意戀戀。水光泛樹風蕭蕭。綸巾老子無遠策。長作東西南北客。不如何遜在揚州。坐待梅花映妝額。

均陽舟中夜賦

遊子不能寐。船頭語輕波。開窗望兩津。煙樹何其多。晴江涵萬象。夜半光蕩摩。客愁彌世路。秋氣入天河。汝洛塵未銷。幾人不負戈。長吟宇宙內。激烈悲蹉跎。

舟次高舍書事



漲水東流滿眼黃。泊舟高舍更情傷。一川木葉明秋序。兩岸人家共夕陽。亂後江山元歷歷。世間岐路極茫茫。遙指長沙非謫去。古今出處兩淒涼。

登岳陽樓二首

洞庭之東江水西。簾旌不動夕陽遲。登臨吳蜀橫分地。徙倚湖山欲暮時。萬里來遊還望遠。三年多難更凭危。白頭弔古霜風裏。老木蒼波無限悲。

天入平湖晴不風。夕帆和鴈正浮空。樓頭客子抄秋後。日落君山元氣中。北看可堪回白首。南遊聊得看丹楓。翰林物色分留少。詩到巴陵還未工。

巴丘書事

三分書裏識巴丘。臨老避兵初一遊。晚水聲酣洞庭野。晴天影抱岳陽樓。四年風露侵遊子。十月江湖吐亂洲。未必上流須魯肅。腐儒空白九分頭。

晚步湖邊

客間無勝日。世故可暫逃。杖藜迎落照。寒彩徧平臯。夕湖光景麗。晴鶴聲音豪。天長蒹葭響。水落城堞高。萬象各搖動。慰此老不遭。楚纍經行地。處處餘離騷。幸無大夫貴。得伴諸子遨。終然動懷抱。白髮風中搔。

再登岳陽樓感賦詩



岳陽壯觀天下傳。樓陰背日堤綿綿。草木相連南服內。江湖異態闌干前。乾坤萬事集雙鬢。臣子一謫今五年。欲題文字弔古昔。風壯浪湧心茫然。

居夷行

遭亂始知承平樂。居夷更覺中原好。巴陵十月江不平。萬里北風吹客倒。洞庭葉稀秋聲歇。黃帝樂罷川杲杲。君山偃蹇橫歲暮。天映湖南白如埽。人世多違壯士悲。干戈未定書生老。揚州雲氣鬱不動。白首頻回費私禱。后勝誤齊已莫追。范蠡圖越當若爲。皇天豈無悔過意。君子慎惜經綸時。願聞羣公張王室。臣也安眠送餘日。

除夜

城中爆竹已殘更。朔吹翻江意未平。多事髣毛隨節換。盡情燈火向人明。比量舊歲聊堪喜。流轉殊方又可驚。明日岳陽樓上去。島煙湖霧看春生。

曉登燕公樓

闌干納清曉。拄杖追黃鵠。燕公不相待。使我立於獨。霧收天落川。日動春浮木。舉手謝時人。微風吹野服。

詠水仙花五韻

仙人緋色裘。縞衣以裼之。青幌紛委地。獨立東風時。吹香洞庭暖。弄影清晝遲。寂寂籬落陰。亭亭與予期。



誰知園中客。能賦會真詩。

望燕公樓下李花

燕公樓下繁華樹。一日遙看一百迴。羽蓋夢餘當晝立。縞衣風急過墻來。洛陽路不容春到。南國花應爲客開。今日豈堪簪短髮。感時傷舊意難裁。

陪粹翁舉酒於君子亭下海棠方開

世故驅人殊未央。聊從地主借繩牀。春風浩浩吹遊子。暮雨霏霏溼海棠。去國衣冠無態度。隔簾花葉有輝光。使君禮數能寬否。酒味撩人我欲狂。

春夜感懷寄席大光

管寧白帽且蹢躅。孤鶴歸期難計年。倚杖東南觀百變。傷心雲霧隔三川。江湖氣動春還冷。鴻雁聲迴人不眠。苦意西州老太守。何時相伴一燈前。

夜賦寄友

賣藥韓康伯。談經管幼安。向來甘寂寞。不是爲艱難。明月扶疎樹。空園浩蕩寒。細題今夕景。持與故人看。

陰風

陰風三日吹南極。二月巴陵寒裂石。長林巨木受軒輊。洞庭倒流瀟湘黑。君不見古廬竹扉聲策策。中有



蛤蜊落南曾經破膽向炎官敢不修容待風伯

雨

霏霏三日雨。靄靄一園春。霧澤含元氣。風花過洞庭。地偏寒浩蕩。春半客蛤蜊。多少人間事。天涯醉又醒。

春寒

二月巴陵日日風。春寒未了怯園公。海棠不惜胭脂色。獨立濛濛細雨中。

次韻傅子文絕句

風雨門前十日泥。荒階相伴只筇枝。從今老子都無事。落盡園花不賦詩。

城上晚思

獨凭危堞望蒼梧。落日君山如畫圖。無數柳花飛滿岸。晚風吹過洞庭湖。

雨中對酒庭下海棠經雨不謝

巴陵二月客添衣。草草杯觴恨醉遲。燕子不禁連夜雨。海棠猶待老夫詩。天翻地覆傷春色。齒豁頭童祝

聖時。白竹籬前湖海闊。茫茫身世兩堪悲。

尋詩兩絕句

楚酒困人三日醉。園花經雨百般紅。無人畫出陳居士。亭角尋詩滿袖風。



愛把山瓢莫笑儂。愁時引睡有奇功。醒來推戶尋詩去。喬木崢嶸明月中。

寒食日遊百花亭

晴氣已復濁。虛館可淹留。微花耿寒食。始覺在它州。自聞鞀鼓聒。不恨歲月流。亂代有今夕。茲園况堪遊。雲移樹陰失。風定川華收。曳杖新城下。日暮禽語幽。羣行意易分。獨賞興難周。永嘯以自暢。片月生城頭。

周尹潛以僕有郢州之命作詩見贈有橫梁之句次韻謝之

一歲憂兵四閱時。偷生不恨隙駒馳。如何南紀持竿手。卻把西州破賊旗。儻有青油盛快士。何妨畫戟入新詩。因君調我還增氣。男子平生竟要奇。

次韻尹潛感懷

干戈又看繞淮春。歎息猶爲國有人。可使翠華周寓縣。誰持白羽靜風塵。五年天地無窮事。萬里江湖見在身。共說金陵龍虎氣。放臣迷路感煙津。

泊宋田遇厲風作

逐隊避狂寇。湖中可盤嬉。泊舟宋田港。俯仰看雲移。造物猶不惜。顛風忽橫吹。洞庭何其大。浪挾雲車馳。可憐岸上竹。翻倒不自持。老夫元耐事。淹速本無期。會有大風定。見汝亭亭時。五月念貂裘。竟生薄暮悲。蕭蕭不自暢。耿耿獨題詩。



贈傅子文

漁子牧兒談笑新。先生勝日步湖漣。沙邊忽見長身士。頭上仍欹折角巾。豺虎不能寬遠俗。山川終要識詩人。蘆叢如畫斜陽裏。柱杖相尋無雜賓。

晚晴野望

洞庭微雨後。涼氣入綸巾。水底歸雲亂。蘆叢返照新。遙汀橫薄暮。獨鳥度長津。兵甲無歸日。江湖送老身。悠悠只倚杖。悄悄自傷神。天意蒼茫裏。村醪亦醉人。

舟抵華容縣

篙舟入華容。白水繞城堞。夾津列茂樹。倒影青相接。遠色分村塢。微涼動蘆葉。天地困腐儒。江湖託孤楫。

夜賦

泊舟華容縣。湖水終夜明。淒然不能寐。左右菰蒲聲。窮途事多違。勝處亦心驚。三更螢火鬧。萬里天河橫。阿瞞狼狽地。山澤空崢嶸。強弱與興衰。今古莽難平。腐儒憂平世。况復值甲兵。終然無寸策。白髮滿頭生。

晚晴

幽臥不知晴。檣梢見斜日。披衣起四望。天際山爭出。光輝渚蒲淨。意氣沙鷗逸。避盜半九圍。兩腳不遺力。川陵各異態。艱險常一律。胡爲作弧矢。前聖意莫詰。豈知百代後。反使奸宄密。腐儒徒嘆嗟。救弊知無術。



人生如歸雲。空行雜徐疾。薄糜俱到山。各不見踪跡。念此百年內。可復受憂戚。林木方翳然。放懷陶茲夕。九月八日登高作重九奇父賦三十韻與義拾餘意亦賦十二韻

九日風景好。節意滿天涯。書生尊所聞。登高亂城鴉。雖無後乘麗。前驅載黃花。兩樓壓波壯。衆澤分天斜。居夷驚有苗。訪古悲章華。蕭條湖海事。勝日一笑譁。興移三里亭。木影雜蛟蛇。二士醉藜杖。兩禪風袈裟。奇哉古無有。未覺欠孟嘉。天公亦喜我。催詩出微霞。賦罷迹已陳。憂樂如轉車。卻後五百歲。遠俗增雄誇。

粹翁用奇父韻賦九日與義同賦兼呈奇父

安穩輕節序。艱難惜歡娛。先生守苜蓿。朝士誇茱萸。前年鄧州城。風雨傾客居。何嘗疎麴生。麴生自我疎。豈無登高地。送目與雲俱。門生及兒子。勸我升籃輿。出門復入門。戈旆填街衢。去年郢州岸。孤檝對壞郭。莫招大夫魂。誰攬使君鬚。獨題懷古句。枯硯生明珠。亦復躋荒戍。日暮野踟躕。白衣終不至。渺渺空愁予。今年洞庭上。九折餘崎嶇。時憑岳陽樓。山川看縈紆。孫兄語蟬連。王丈色敷腴。不用踏筵舞。秋風搖菊株。樂哉未曾有。是夢其非歟。丈夫各堂堂。坐受世故驅。會須明年節。醉倒還相扶。此花期復對。勿令墮空虛。明日風景佳。南翔先一鳧。何言知幾早。政爾因鱸魚。分襟肺肝熱。撫事歲月迂。歸家問餅錫。生理何必餘。相期衡山南。追步凌忽區。回首望堯雲。中原莽榛蕪。臣豈專愛死。有懷竟不舒。老謀與壯士。二者慙俱無。

送王因叔赴試



楓落南紀明。秋高洞庭白。自是天涯人。更送湖上客。人生險易乘除裏。富貴功名從此起。不須惜別作酸然。滿路新詩付吾子。

別岳州

朝食三斗葱。暮飲三斗醋。寧受此酸辛。莫行歲晚路。丈夫少壯日。忍窮不自恕。乘除翼晚泰。乃復逢變故。經年岳陽樓。不見南宮樹。辭巢已萬里。兩腳未遑住。水落君山高。洞庭秋已素。浮雲易歸岫。遠客難回顧。飄然一餅錫。未知所掛處。寂寞短歌行。蕭條遠遊賦。學道始恨晚。爲儒孰非腐。乾坤杳茫茫。三歎出門去。

初識茶花

伊軋籃輿不受催。湖南秋色更佳哉。青裙玉面初相識。九月茶花滿路開。

別伯共

尊酒相逢地。江楓欲盡時。猶能十日客。共出數年詩。供世無筋力。驚心有別離。好爲南極柱。深慰旅人悲。

再別

多難還分手。江邊白髮新。公爲九州督。我是半途人。政爾傾全節。終然卻要身。平生第溫嶠。未必下張巡。

別孫信道

萬里鷗仍去。千年鶴未歸。極知身有幾。不奈世相違。歲暮蒹葭響。天長鴻雁微。如君那可別。老淚欲沾衣。



江行野宿寄大光

檣鳥送我入蠻鄉。天地無情白髮長。萬里回頭看北斗。三更不睡聽鳴榔。平生正出元子下。此去還經思曠傍。投老相逢難袞袞。共恢詩律撼瀟湘。

寄信道

衡山未見意如飛。浩蕩風帆不可期。卻憶府中三語掾。空吟江上四愁詩。高灘落日光零亂。遠岸叢梅雪陸離。賸欲平分持寄子。白頭才盡只成悲。

衡嶽道中四首

野客元耕嵩嶽田。得遊衡嶽是前緣。避兵徑度吾豈忍。欲雨還休神所憐。世亂不妨松偃蹇。村空更覺水潺湲。非無柱杖終傷老。負此名山四十年。

客子山行不覺風。龍吟虎嘯滿山松。綸巾一幅無人識。勝業門前聽午鐘。城中望衡山。浮雲作飛蓋。竭來巖谷遊。卻在浮雲外。危亭見上方。林壑帶殘陽。今日豈無恨。重遊卻味長。

除夜次大光韻大光是夕婚

一杯節酒莫留殘。坐看新年上鬢端。只恐梅花明日老。夜餅相對不知寒。



除夜不寐飲酒一盃明日示大光

萬里鄉山路不通。年年佳節百憂中。催成客睡須春酒。老卻梅花是曉風。

元日

五年元日只流離。楚俗今年事事非。後飲屠蘇今已老。長乘舴艋竟安歸。攜家作客真無策。學道刳心卻自違。汀草岸花知節序。一身千恨獨沾衣。

別大光

堂堂一年長。渺渺三秋闊。恍然衡山前。相遇各白髮。歲窮窗欲霰。人老情難竭。君有杯中物。我有肝肺熱。飲盡不能起。交深忘事拙。乾坤日多虞。遊子屢驚骨。衡陽非不遙。雁意猶超忽。一生能幾回。百計易相奪。滔滔江受風。耿耿客孤發。他夕懷君子。巖間望明月。

道中

雨子收還急。溪流直又斜。迢迢傍山路。漠漠滿林花。破水雙鷗影。掀泥百草芽。川原有高下。隨處著人家。將至杉木鋪。望野人居。

春風漠漠野入居。若使能詩我不如。數株蒼檜遮官道。一樹桃花映草廬。曉發杉木



古澤春光淡。高林露氣清。紛紛世上事。寂寂水邊行。客子凋雙鬢。田家自一生。有詩還忘記。無酒卻思傾。  
先寄邢子友

作客經年樂有餘。邵陽歧路不崎嶇。山川好處欵紗帽。桃李香中度笳輿。欲見舊交驚歲月。剩排幽語說艱虞。人間書疏非吾事。一首新詩未可無。

立春日雨

衡陽縣下春日雨。遠映青山絲樣斜。容易江邊欺客袂。分明沙際溼年華。竹林路隔生新水。古渡船空集亂鴉。未暇獨憂巾一角。西溪當有續開花。

初至邵陽逢入桂林使作書問其地之安危

湖北彌年所。長沙費月餘。初爲邵陽夢。又作桂林書。老矣身安用。飄然計本疎。管寧遼海上。何得更端居。  
過孔雀灘贈周靜之

江行晚興

海內無堅壘。天涯有近親。不辭供笑語。未慣得殷勤。舟楫深宜客。溪山各放春。高眠過灘浪。已寄百年身。  
曾聽石樓水。今過邵州灘。一笑供舟子。五年行路難。雲間落日淡。山下東風寒。煙嶺叢花照。夕灣羣鷺盤。  
生身後聖哲。隨俗了悲歡。淹旅非吾病。悠悠良足歎。



夜抵貞牟

野暝猶聞遠。川明不恨遲。焚山隔岸火。及我繫船時。夜半青燈屋。籬前白水陂。殷勤謝地主。小築欲深期。

雨

雲物澹清曉。無風溪自閑。柴門對急雨。壯觀滿空山。春發蒼茫內。鳥鳴篁竹間。兒童笑老子。衣溼不知還。

今夕

今夕定何夕。對此山蒼然。偷生經五載。幽意獨已堅。微陰拱衆木。靜夜聞孤泉。唯應寂寞事。可以送餘年。

暝色

殘輝度平野。列岫圍青春。柴門一枝筇。日暮棲心神。暝色著川嶺。高低鬱輪囷。水光忽到樹。山勢欲傍人。萬化元相尋。幽子意自新。肅肅夜將久。空明動邊垠。田鶴吟相應。我獨無荒鄰。短篇不可就。所寄聊一伸。

貞牟書事

留侯辟穀年。漢鼎無餘功。子真策不售。脫迹市門中。神仙非異人。由來本英雄。撫世獨餘事。用舍何必同。眷茲貞牟野。息駕吾其終。蒼山雨中高。綠草溪上豐。仲春水木麗。禽鳴清晝風。禍福兩合繩。既解一身空。榮華信非貴。寂寞亦非窮。

山中



當復入州寬作期。人間踏地有安危。風流丘壑真吾事。籌策廟堂非所知。白水春陂天澹澹。蒼峯晴雪錦離離。恰逢居士身輕日。正是山中多景時。

謝主人

春禽勸我歸。主人留我住。一笑謝主人。我自無歸處。擬借溪邊三畝春。結茅依樹不依鄰。伐薪正可煩名士。分米何須待故人。

羅江二絕

荒村終日水車鳴。陂北陂南共一聲。灑面風吹作飛雨。老夫詩到此間成。  
山翁見客亦欣然。好語重重意不傳。行過竹籬逢細雨。眼明雙鷺立青田。

三月二十日聞德音寄李德升席大光新有召命皆寓永州

塵隔斗牛三月餘。德音再與萬方初。又蒙天地寬今歲。且埽軒窗讀我書。自古安危關政事。隨時憂喜到樵漁。零陵併起扶顛手。九廟無歸計莫疎。

題東家壁

斜陽步履過東家。便置清尊不煮茶。高柳光陰初罷絮。嫩鳧毛羽欲成花。羣公天上分時棟。閑客江邊管物華。醉裏吟詩空跌宕。借君素壁落栖鴉。



曳杖

柳條一何長。我髮一何短。餘日會有幾。經春臥荒曠。曳杖陂西去。悠然寄蕭散。田壟粲高低。白水一時滿。農夫暮猶作。媿我讀書嬾。且復棄今茲。前峯青蹇蹇。

開壁置窗命曰遠軒

鍾妖鳴吾旁。楊獠舞吾側。東西俱有礙。羣盜何時息。丈夫堂堂軀。坐受世褊迫。仙人千仞岡。下視笑予厄。誰能久鬱鬱。持斧破南壁。窗開三尺明。空納萬里碧。巖霏雜川靄。奇變供几席。誰見老書生。軒中岸玄幘。蕩漾浮世裏。超遙送茲夕。倚楹發孤嘯。呼月出荒澤。天公亦粲然。林壑受珠璧。會有鶴賀賓。經過來見客。

再賦

清曉坐南軒。望山頭屢側。居士亦豈癡。飛雲方未息。樂哉此遠俗。亂世免怵迫。那知百戰禍。豈識三空厄。閉門美熟睡。開門瞻翠壁。遠客謝主人。分此一窗碧。新晴鳥鳴簷。微暑風入席。蕭然此白首。豈更冒朝幘。誓將老茲地。不復數晨夕。但恨食無肉。臞仙出山澤。蟄雷轉空腸。吐句作圭璧。一笑示鄰家。向來無此客。

又賦

我昨在衡山。傷心衢路側。豈知得此地。一坐數千息。易安生痛定。過美出飢迫。誓言如齊侯。常戒在莒厄。要將萬里身。獨面九年壁。如何不已奈。開窗翫霏碧。招呼面前山。浮翠落衾席。一笑等兒戲。都忘雪侵幘。



人生何不娛。今夕定何夕。向來萬頃胸。餘地吞七澤。念此亦細事。未遽瑕生璧。聊使山中人。永記山下客。

傷春

廟堂無策可平戎。坐使甘泉照夕烽。初怪上都聞戰馬。豈知窮海看飛龍。孤臣霜髮三千丈。每歲煙花一萬重。稍喜長沙向延閣。疲兵敢犯犬羊鋒。

題水西周三十三壁二首

下管先生巾欲摧。雨中艇子便撐開。青山隔岸迎人去。白鷺衝煙送酒來。周子籜中早得春。喚人同度一溪雲。貪看雨歇前峯變。不覺斟時已十分。

山齋

雖愧荷鋤叟。朝來亦不閒。自剪墻角樹。盡納溪西山。經行天下半。送老此窗間。日暮煙生嶺。離離飛鳥還。

散髮

百年如寄亦何爲。散髮清狂未足非。南澗題詩風滿面。東橋行藥露霑衣。松花照夏山無暑。桂樹留人吾豈歸。藜杖不當軒蓋用。穩扶居士莫相違。

觀雨

山客龍鐘不解耕。開軒危坐看陰晴。前江後嶺通雲氣。萬壑千林送雨聲。海壓竹枝低復舉。風吹山角晦。



還明不嫌屋漏無乾處。正要羣龍洗甲兵。

寄大光二絕句

心折零陵霜入鬢。更修短札問何如。江湖不是無來雁。只慣平生作報書。  
芭蕉急雨三更鬧。客子殊方五月寒。近得會稽消息否。稍傳荆渚路岐寬。

村景

黃昏吹角聞呼鬼。清曉持竿看牧鵝。蠶上樓時桑葉少。水鳴車處稻苗多。

寄德升大光

君王憂詔起羣公。也寘樵夫尺一中。易著青衫隨世事。難將白髮犯秋風。共談太極非無意。能繫蒼生本不同。卻倚紫陽千丈嶺。遙瞻黃鵠九霄東。

次韻邢九思

百年鼎鼎雜悲歡。老去初依六祖壇。玄晏不堪長抱病。子真那復更爲官。山林未必容身得。顏面何宜與世看。白帝高尋最奇事。共君盟了不應寒。

遙碧軒作呈使君少隱時欲赴召

我本山中人。尺一喚起趨埃塵。君爲邊城守。作意邀山入窗牖。朝來爽氣如有期。送我憑軒一杯酒。丈夫



已忍猿鶴羞。欲去且復斯須留。西峯木脫亂鬢擁。東嶺煙破脩眉浮。主人愛客山更好。醉裏一笑驚蠻州。丁寧雲雨莫作厄。明日青山當逐客。

石限病起

幽人病起山深處。小院鴉鳴日午時。六尺屏風遮宴坐。一簾細雨獨題詩。

愚溪

小閣當喬木。清溪抱竹林。寒聲日暮起。客思雨中深。行李妨幽事。欄干試獨臨。終然遊子意。非復昔人心。已酉中秋之夕。與任才仲醉於岳陽樓上。明年十一月二十日。南遊過道謁姜光彥。出才仲畫軸。則寫是夕事也。剪燭觀之。恍然一笑。書八句。以當畫記。

去年中秋洞庭野。寒瑤萬頃兼天瀉。岳陽樓上兩幅巾。月入欄干影瀟灑。世間此影誰能孤。狂如我友人。所無。一夢經年無續處。道州還見倚樓圖。

度嶺

年律將窮天地溫。兩州風氣此橫分。已吟子美湖南句。更擬東坡嶺外文。隔水叢梅疑是雪。近人孤嶂欲生雲。不愁去路三千里。少住林間看夕曛。

次韻謝呂居仁居仁時寓賀州



別君不覺歲時荒。豈意相逢魍魅鄉。篋裏詩書總寥落。天涯形貌各昂藏。江南今歲無征戰。嶺表窮冬有雪霜。儻可卜鄰吾欲住。草茅爲蓋竹爲梁。

舟行遣興

會稽尙隔三千里。臨賀初盤一百灘。殊俗問津言語異。長年爲客路岐難。背人山嶺重重去。照鷁梅花樹樹殘。酌酒柁樓今日意。題詩船壁後來看。

康州小舫與耿伯順李德升席大光鄭德象夜語以更長愛燭紅爲韻得更字

萬里衣冠京國舊。一船風雨晉康城。燈前顏面重相識。海內艱難各飽更。天闊路長吾欲老。夜闌酒盡意難傾。明朝古峽蒼煙道。都送新愁入櫓聲。

與大光同登封州小閣

去程欲數莽難知。三日封州更作遲。青嶂足稽天下士。錦囊今有矯南詩。共登小閣春風裏。回望中原夕靄時。萬本梅花爲我壽。一杯相屬未全癡。

登海山樓

萬航如鳥鷺。一水如虛空。此地接元氣。壓以樓觀雄。我來自中州。登臨眩冲融。白波動南極。蒼鬣承東風。人間路浩浩。海上春濛濛。遠遊爲兩眸。豈惜勞我躬。仙人欲吾語。薄暮山葱瓏。海清無蜃氣。彼固蓬萊宮。



雨中再賦海山樓詩

百尺闌干橫海立。一生襟抱與山開。岸邊天影隨潮入。樓上春容帶雨來。慷慨賦詩還自恨。徘徊舒嘯卻生哀。世間猛士今安有。非復當年單父臺。

題長樂亭

遠山雲迷顛。近山淨如沐。客子曳竹輿。伊啞過山麓。我行一何遲。時序一何速。東風所經過。林水一時綠。疎雨忽飛墜。聲在道邊木。淑氣自遠歸。光景變川陸。遙知存存子。明亦戒征軸。霽色雖宜詩。不見此清穆。題長岡亭呈德升大光

久客不忘歸。如頭垢思沐。身行江海濱。夢繞嵩山麓。馬何預得失。鵬何了淹速。匣中三尺冰。瘴雨生新綠。胡爲古驛中。坐聽風吟木。旣非還吳張。亦異赴洛陸。兩公茂名實。自是宜鼎軸。發發不可遲。帝言頻郁穆。贈漳州守綦叔厚

過盡蠻荒興復新。漳州畫戟擁詩人。十年去國九行旅。萬里逢公一欠伸。王粲登樓還感慨。紀瞻赴召欲逡巡。繩牀相對有今日。賸醉齋中軟腳春。

宿資聖院閣

暮投山崦寺。高處絕人羣。遠岫林間見。微泉舍後聞。閣虛雲亂入。江闊野橫分。欲與僧爲記。今年懶作文。



自黃巖縣舟行入台州

宴坐峰前衝雨急。黃巖縣裏借舟遲。百年癡黠不相補。萬事悲歡豈可期。莽莽蒼波兼宿霧。紛紛白鷺落山坡。只應江海淒涼地。欠我臨風一賦詩。

過下杯渡

夜宿下杯館。朝鳴一棹東。湖平天盡落。峽斷海橫通。冉冉雲隨舸。茫茫鳥遡風。仙人蓬島上。遙見我乘空。泛舟入前倉。

曾鼓鹽田棹。前倉不足言。盡行江左路。初過浙東村。春去花無迹。潮歸岸有痕。百年都幾日。聊復信乾坤。送熊博士赴瑞安令

衣冠袞袞相逢處。草木蕭蕭未變時。聚散同驚一枕夢。悲歡各誦十年詩。山林有約吾當去。天地無情子亦飢。笑領銅章非失計。歲寒心事欲深期。

病中夜賦

抱病喜清夜。形羸心獨開。不知藥鼎沸。錯認雨聲來。歲晚燈燭麗。天長鴻雁哀。書生惜日月。欹枕意茫哉。

喜雨

秦望山頭雲。昨日鸞鳳舉。冥冥萬里風。淅淅三更雨。小臣知君憂。起坐聽簷語。風力有去來。龍工離文武。



燈花識我意。一笑相媚嫵。泥翻早朝路。灑灑光欲吐。鬱然蒼龍闕。佳氣接南畝。千官次第來。豫色各眉宇。記事以短篇。不工還自許。

醉中

醉中今古興衰事。詩裏江湖搖落時。兩手尙堪盃酒用。寸心唯是髻毛知。稽山擁郭東西去。禹穴生雲朝暮奇。萬里南征無賦筆。茫茫遠望不勝悲。

不見梅花六言

荆楚歲時經盡。今年不見梅花。想得蒼煙玉立。都藏江上人家。

梅花

鐵面蒼髯洛陽客。玉顏紅領會稽仙。街頭相見如相識。恨滿東風意不傳。

雨

聽雨披夜襟。衝雨踏晨鼓。萬珠絡筍輿。詩中有新語。老龍經秋臥。歲暮始一舉。成功亦何遲。光彩變蔬圃。道邊聞井溢。可笑遽如許。舊山百尺泉。不知旱與雨。

除夜

疇昔追歡事。如今病不能。等閒生白髮。耐久是青燈。海內春還滿。江南硯不冰。題詩餞殘歲。鐘鼓報晨興。



雨中

北客霜侵鬢。南州雨送年。未聞兵革定。從使歲時遷。古澤生春靄。高空落暮鳶。山川含萬古。鬱鬱在尊前。

渡江

江南非不好。楚客自生哀。搖櫂天平渡。迎人樹欲來。雨餘吳岫立。日照海門開。雖異中原險。方隅亦壯哉。

夙興

美哉木枕與菅席。無禁當興戴朝幘。巷南巷北聞鍛聲。舍後舍前唯月色。事國無功端未去。竹輿伊軋猶昨日。不見武林城裏事。繁華夢覺生荆棘。成敗由來幾古今。乾坤但可著山澤。西湖已無金碧麗。雨抹晴妝尙娛客。會當休日一訪之。摩挲蒼蘚慰崖石。只恐冷泉亭下水。發明白髮增歎息。

幽窗

貧士工用短。壯夫弱於詩。破壁爲幽窗。我筆還得持。高鳥度遺影。風扉語移時。迨我休暇日。與物聊同嬉。古來賢哲人。吠畝策安危。一行或大謬。半隱良亦癡。寄言山中友。卽歲以爲期。

休日馬上

休日不自休。騎馬踏荒徑。卻扇受景風。今朝我無病。春雲闕晨耀。羣綠澹相映。山川與朝市。一動自一靜。九衢行萬人。誰抱此懷勝。不得與之語。蕭蕭寄孤詠。



題畫

分明樓閣是龍門。亦有溪流曲抱村。萬里家山無路入。十年心事與誰論。

題崇蘭圖二首

兩公得我色敷腴。藜杖相將入畫圖。我已夢中多識路。秋風舉袂不踟蹰。  
奕奕天風吹角巾。松聲水色一時新。山林從此不牢落。照影溪頭共六人。

秋夜獨酌

涼秋佳夕天氣廓。河漢之涯秋漠漠。月出未出林彩變。幽人露坐方獨酌。自歌新調酒如空。天星下飲觥  
船中。忽思李白不可見。夜半喬木搖西風。百年佳月幾今夕。憂樂相尋老來疾。瓊瑤滿地我影橫。添酒賦  
詩何可失。

九日示大圓洪智

自得休心法。悠然不賦詩。忽逢重九日。無耐菊花枝。

劉大資挽詞二首

天柱欹傾日。堂堂墮急圍。遂聞王蠋死。不見華元歸。一代名超古。千年淚染衣。當時如有繼。猶足變危機。  
一死公餘事。由來彼亦人。使知臨難日。猶有不欺臣。河洛傾遺憤。英雄歎後塵。煌煌中興業。公合冠麒麟。



觀雪

無住菴前境界新。瓊樓玉宇總無塵。開門倚杖移時立。我是人間富貴人。

小閣晨起

紙帳不知曉。鴉鳴吾當興。開窗面老松。相對寒峻嶒。幸無公家責。欲懶還不能。汲井頽我面。銅盆旋敲冰。梳頭風入檻。散髮霜滿膺。四瞻郊澤間。蒼煙慘朝凝。卻望塔顛日。光景舒層層。乾坤有奇事。變化忽相乘。客來無可語。語此不見譬。今晨胡牀冷。愧我無髭髥。

小閣晚望

澤國候易變。孟冬乃微和。解襟凭小閣。日暮歸雲多。蒼蒼散草木。莽莽雜山河。荒野蟲亂鳴。長空鳥時過。萬象各無待。唯人願紛羅。備物以養已。更用干與戈。天風吹我來。衣袂生微波。幽懷渺無寄。蕭瑟起悲歌。得張正字書

小閣

送老茅屋低。天寒人跡稀。一觴尤有味。萬事已無機。歲暮塔孤立。風生鴉亂飛。此時張正字。書札到郊扉。闌干橫歲暮。徙倚度陰晴。木落太湖近。梅開南紀明。病餘仍愛酒。身後更須名。鶴鶴忽雙起。吾詩還欲成。懷天經智老因訪之



今年二月凍初融。睡起茗溪綠向東。客子光陰詩卷裏。杏花消息雨聲中。西菴禪伯還多病。北柵儒先只固窮。忽憶輕舟尋二子。綸巾鶴氅試春風。

牡丹

一自邊塵入漢關。十年伊洛路漫漫。青墩溪畔龍鍾客。獨立東風看牡丹。

盆池

三尺清池窗外開。茨菰葉底戲魚回。雨聲轉入浙江去。雲影還從震澤來。

西軒

平生江海志。歲暮僧廬中。虛齋時獨步。遡此西窗風。初夏氣未變。幽居念方冲。三日無客來。門外生蒿蓬。

晨起

寂寂東軒晨起時。朦朧草木暗疎籬。風來衆綠一時動。正是先生睡足時。

登閣

今日天氣佳。登臨散腰腳。南方宜草木。九月未黃落。秋郊乃明麗。夕雲更蕭索。遠遊吾未能。歲暮依樓閣。

歲華

歲華日已彫。飛葉鳴古瓦。白頭倚危檻。高旻覆平野。遙瞻疎柳林。下有清溪瀉。三春旣繁麗。九秋亦瀟灑。



平生萬事過。所欠茅一把。山川鬱日夕。有抱無與寫。賦詩老不工。開篇詠風雅。

得長春兩株植之窗前

鄉邑已無路。僧廬今是家。聊乘數點雨。自種兩叢花。籬落失秋序。風煙添歲華。衰翁病不飲。獨立到棲鴉。

九月八日戲作兩絕句示妻子

今夕知何夕。都如未病時。重陽莫草草。剩作幾篇詩。  
小甕今朝熟。無勞問酒家。重陽明日是。何處有黃花。

拒霜

拒霜花已吐。吾宇不淒涼。天地雖肅殺。草木有芬芳。道人宴坐處。侍女古時妝。濃露溼丹臉。西風吹綠裳。

微雨中賞月桂獨酌

人間跌宕簡齋老。天下風流月桂花。一壺不覺叢邊盡。暮雨霏霏欲溼鴉。

心老久許爲作畫未果以詩督之

布衲王摩詰。禪餘寄筆端。試將能事迫。肯作畫工難。秋入無聲句。山連欲雨寒。平生夢想處。奉乞小巔岬。

再用迹字韻成一首呈判府

風雨一葉過。黃花已陳迹。人貧交舊疎。歲暮日月疾。貪人積胡椒。智不到鬼錄。那知庾郎菜。地瘦飽金玉。



不如學服氣。清坐了晨夕。尙餘煙月債。驅使入吟筆。晚逢葛先生。憐我出無僕。借車得時詣。謬窺文字籙。談詩不知疲。或作夜半客。揮毫寫珠玉。治郡蓋餘力。不羨江千萬。不慕李八百。願傳公句法。容我附風翼。城東劉子政。著書方滿屋。昨示一篇詩。三日歎未足。仍聞供筆硯。家有樊通德。但恐裴公門。從此近捨湜。  
元忠有侍妾。嘗謂某曰。若人有可愛處。吾嘗記書中事不審。使之尋輒能知其處。詩成。或使之寫。亦往往如人意。陳學士願聞斯語。

蒙示涉汝詩次韻

城南天倒影。綠浪搖十里。使君雲夢曾。猶復錄此水。舟行及雨霽。秋色在葭葦。煙涵翠縠潤。月照金波委。知公已忘機。鷗鷺宛停峙。向來趨熱士。說似顙應泚。俗子與清游。自古劇函矢。如何有雙腳。受垢不受洗。異哉公殊嗜。記此兩苦李。詩成墮衡門。名字污紙尾。  
公詩賜某及家弟也。明當躡公迹。佳處不待指。會逢白沙渚。我舍真可徙。鳴騶儻重來。舫傾我耳。

遊峴山次韻

夜度一程雲。平明踏山址。山神豈妒我。飛雨亂眸子。重岳袞袞去。前傑後俊偉。晦明更百態。始望那及此。路窮得精廬。稅駕諮祖始。老僧千金意。佳處相指似。先生一笑領。得句易翻水。安石未歸山。卻要山料理。奇哉此一段。驚世無前軌。酬山以快飲。春蕨正滋旨。一丘儻許予。高臥飽松髓。城中謾拄笏。那知有茲事。高人買山隱。百萬猶恨少。客見最省事。有屐一生了。東莊良不遙。十里望縹緲。縈紆並麥壠。翠浪四山繞。



先生滯鹿車。去程通鳳沼。暫來山泉上。思與飛雲杳。雲北接雲南。一逕絕紛擾。竹林懷風雨。目斷極窈窕。從來無世塵。相對真不撓。龍兒爭地出。頭角已表表。先生囑支郎。勿使斤斧天。終當乞一杖。險路扶吾老。

和孫升之

姬國餘芳代有人。于今公子秀溪濱。處心如水尚書市。能賦臨流靜節君。花鳥紅雲春句麗。月梅疎影夜香聞。囊開古錦湖山出。何意一星窺妙文。此和升之。詠周堅仲。十二年前。到周子壁間。有詩曾見之。故有一星窺妙文之句。

寺居

招提遠占一牛鳴。阻絕干戈得暫經。夢境了知非有實。醉鄉不入自常醒。樓臺近水涵明鑑。草樹連空寫素屏。物象自堪供客眼。未須覓句戶長扃。

又用韻春雪

急雪催詩興未闌。東風肯奈鳥烏寒。最憐度牖勤勤意。更接飛花細細看。連夜拋回三白瑞。及時驚動五辛盤。袁安久絕千人望。春破還思綺一端。

次韻邢子友

壯士如今爛莫收。尙思抽矢射旄頭。不堪苦霧侵衰鬢。稍喜和煙入戍樓。萬里中原空費夢。三春勝日偶成遊。青松遠嶺偏驚眼。薄晚闌干更少留。



梅

愛敬纖影上窗紗。無限輕香夜遶家。一陣東風溼殘雪。強將嬌淚學梨花。

蒙知府寵示秋日郡圃佳製。遂侍杖履。逍遙林水間。輒次韻四篇。上瀆臺覽。

歲月移文外。乾坤杖履中。鏗然五字律。一作健在百夫雄。秋入池深碧。寒欺葉遞紅。此間兼吏隱。端不減

遊嵩。客有遊嵩山者。歸以語公。以不得遊爲恨。

鳥語知公樂。晴山及我遊。盡排物外事。拚作酒中浮。菊蕊離雙鬢。林聲隱四愁。騷人例喜賦。政自不關秋。竹際笙簧起。回聽衆籟微。時陪物外賞。肯念日斜歸。草色違秋意。池光淨客衣。吟公清絕句。政爾不能肥。一笑聊開口。千憂不上眉。林深受風得。柏老到霜知。小憩逢筠洞。幽尋及枳籬。願公勤秉燭。裁詠棗離離。

送人歸京師

門外子規啼未休。山村日落夢悠悠。故園便是無兵馬。猶有歸時一段愁。

賦康平老銅雀硯

鄴城臺殿已荒涼。依舊山河滿夕陽。瓦礫卻鐫今日硯。似教人世寫興亡。

和顏持約

半篙寒碧秋垂釣。一笛西風夜倚樓。多少巫山舊家事。老來分付水東流。



早行

露侵駝褐曉寒輕。星斗闌干分外明。寂寞小橋和夢過。稻田深處草蟲鳴。

次韻景純道中寄大成

聞道歌行伏李紳。古來賢守是詩人。久欽廣樂懷披霧。一見周瑜勝飲醇。海內期公黃閣老。尊前容我白綸巾。佳篇咀嚼真堪飽。此日何憂甑有塵。

同家弟用前韻謝判府惠酒

嚼杯樂聖便稱賢。無酒猶堪臥甕間。使者在門催僕僕。麴車入夢正班班。不煩白水真人力。來自青城道士山。千載王弘全並美。未應杞菊賦寒慳。

日飲知非貧士宜。要逃語穽稅心鞮。

楚辭心鞮羈而不亂

所須唯酒非虛語。以醉爲鄉可徑歸。鸚鵡鷓鴣俱得道。

螟蛉螺贏共忘機。狂言戲作麻姑送。無奈閨人與我違。







# 吁江集鈔

李觀字泰伯。南城人。舉茂才異等。不中。以教授養親。從學日衆。范仲淹薦試太學助教。嘉祐中。召爲海門主簿。太學說書。卒。門人鄧潤甫上其所著書。尤長于經制。朱子謂李泰伯文字不軟帖。氣象大段好。實得之經中。雖淺。然皆自大處起。議論若老蘇父子。得之史中。戰國策。故皆自小處起。議論真知言也。詩雄勁有氣。燄用意出人。有云。格如平易。人多愛。意到幽深。鬼未知。見其得處矣。

## 魯公碑

他人工字書。美好若婦女。猗嗟顏太師。赳赳丈夫武。麻姑有遺碑。歲月亦已古。硬筆可破石。鑿者疑虛語。驚龍索雷鬪。口唾天下雨。怒虎突圍出。不畏千強弩。有海珠易求。有山玉易取。唯恐此碑壞。此書難再覩。安得同寶鎮。收藏在天府。自非大祭時。莫教凡眼覩。

## 玳瑁石

前有縣大夫。取此石爲器。囂然夸謂予。材與工俱美。如何爾鄉人。器用曾莫備。無乃居荒陬。俗鄙不喜事。答云此石堅。攻磨動時歲。官用錢出民。民用錢出己。出民官不知。喜一作事誠可貴。出己乃傷財。誰能一作其不惜費。大夫聞此言。如有所忿戾。今君倡是詩。敢以報嘉惠。



秦人峯

秦法雖甚苛。秦吏若猶拙。山林不數里。俾爾逃得脫。予觀後世事。政役火烈烈。苟非爲鬼神。何計避羈縲。聖皇今在御。百事咸均節。常披詔書意。苦念生財竭。誰能將順者。所望在賢哲。無使峰中人。笑我民屠裂。

虎跑泉

虎跑本何爲。彼將對以臆。有如大丈夫。卓爾抱剛直。盜泉既不飲。譖人亦不食。山中小禽獸。何足勞捉搦。勇氣無所泄。爪地成遺跡。地神嘉乃誠。水源如開闢。尋常竊六畜。夜傍人牆壁。是與豺狼同。聞此宜慚色。

哀老婦

里中一老婦。行行啼路隅。自悼未亡人。暮年從二夫。寡時十八九。嫁時六十餘。昔日遺腹兒。今茲垂白鬚。子豈不欲養。母豈不懷居。繇役及下戶。財盡無所輸。異籍幸可免。嫁母乃良圖。牽車送出門。急若盜賊驅。兒孫孫有婦。小大攀且呼。回顧與永訣。欲死無刑誅。我時聞此言。爲之長歎嗚。天民固有窮。鰥寡實其徒。仁政先四者。著在孟軻書。吾君務復古。旦旦師黃虞。赦書求節婦。許與旌門閭。繫爾愚婦人。豈曰禮所拘。蓬茨四十年。不知形影孤。州縣莫能察。詔旨成徒虛。而況賦役間。羣小所同趨。姦欺至骨髓。公利未錙銖。良田歲歲賣。存者唯萊汙。兄弟欲離散。母子因變渝。天地豈非大。曾不容爾軀。嗟嗟孝治王。早晚能聞諸。吾言又無位。反袂空漣如。



寄懷三首

鳥獸死有用。羽角筋革齒。輦輓入工師。飾作軍國器。玉食白如瓠。瞑目已腐穢。生者不敢留。埋藏與螻蟻。百年富貴身。孰若禽獸類。唯有令名人。終古如不死。根生但爲松。翼飛但爲鳳。王侯尙可輕。道義本來重。癡兒似婢妾。寸步矜恩寵。傍人忍笑時。佯把衣袂弄。齷齪復齷齪。淺謀同燕雀。不思明日憂。但取今日樂。俗儒抱書卷。未去眼中膜。誰將古人淚。更爲今人落。

喜雨

人皆喜膏澤。我獨憂豐年。歲凶已賤糶。年豐安得錢。賦役忽驚駭。倉廩甘棄捐。銖銅苟可換。富貴寧我憐。歸來官事了。相弔柴門邊。農夫未盡死。穀價應常然。王心幸仁聖。分職當忠賢。謂穀賤爲美。咄咄無欺天。

寄祖祕丞

我本山田人。好尙與衆異。平生重交遊。所得固無幾。昨者應茂才。西行覲朝美。時當慶曆初。選舉實多士。茫茫帝王州。栖栖遠行子。攜錢賃破屋。乞火蒸陳米。鞍馬到卽賣。僮僕癡難使。有時造公卿。努力向塵市。數步則一歇。長吁乃能起。衣冠信質野。言語欠婉媚。闔人顧之笑。將命見而避。往往得所請。蹒跚向前跪。何能剖懷抱。浪自慕尊貴。貴人如天神。喘息生雲氣。野夫等麋鹿。芻豢非所冀。歸來坐空窗。惆悵夕不睡。塵埃滿鬚髻。臭惡入口鼻。業已辭吾親。中道豈可廢。僂俛待報聞。愁憂遂經歲。二年正月晦。閒房適假寐。



有奴來啄門。手披擇之刺。承命驚下牀。赤腳誤穿履。從來未識面。只是聞高第。名顯宦且達。見我當何爲。再拜請就席。熟視知可畏。昂昂貌甚古。崖石掀氛翳。渾渾氣甚和。璞玉無芒銳。高談貫先哲。雅意在茲世。昔人相遇間。一言猶合契。今吾於擇之。寧假再三計。自此習往還。中心蔑疑貳。如熱息廣廈。如飢享盛饋。君授南康守。舟維蔡河涘。我館汴之陰。前去路則邇。時時結帽帶。踽踽尋英軌。衆人嬌綺羅。相對紉蘭芷。朱絃自三歎。笑殺彼鄭衛。王命有期日。都開一反袂。君行劇鴻軒。我處近匏繫。曠日及孟秋。皇慈始收試。崇崇九門開。窈窕三館祕。主司隔簾帷。欲望不可跂。中貴當棖闌。蒐索徧靴底。呼名授之坐。敗席鋪冷地。健兒直我前。武怒足防備。少小學賢能。謂可當賓禮。一朝在檻穽。兩目但睥睨。捉筆析所問。移時數千字。讀書取大者。纖悉或靡記。炙背雖自奇。寧當至尊意。龍馬騰天衢。駑駘合羞死。量才與揣命。坦蕩更何事。振衣託歸舟。河流迅弧矢。淮清江且平。踰月在枕几。及過廬山南。聞君初布治。船檣旣入岸。馬首已來暨。迎我到府署。相見共欣喜。嫩橘摘千苞。肥魚斫千尾。蕭晨徹骨清。佳境邀人醉。高會雖暫歡。故園當速至。草草成別愁。悠悠渡湖水。是時東方曙。俄然北風厲。陽烏畏威逃。江神以儒戲。氣象斗不同。波濤大可悸。長帆張欲裂。孤舟蕩無倚。或從玉井出。或自銀山墜。篙工斂手立。脉脉無窮淚。從者閉目坐。嗟嗟不敢視。我時撫牀歌。分作長江鬼。所恨生劬勞。不孝而已矣。禍福果無妄。險難行可弭。脫身得平康。引領望鄉里。厥後過挾日。幸得見維梓。入門何怡怡。饌具有甘旨。稚女能紉針。驕兒徧生齒。芟除閑草萊。疏通舊沼沚。



君廬可終焉。生計由此始。郡守方仁賢。學宮盛修理。踵門致勤恪。命我論經藝。麻衣何紛紛。鄉人子若弟。不唯務章句。所欲興禮義。施爲有本末。動靜有綱紀。蚤與雞同覺。夜與月相值。孳孳忘飲食。齷齪在文史。時附南康書。或逢北來使。尺素雖滿前。話言難到耳。殆及三年冬。聞君受朝寄。名稱按刑獄。勢可平冤滯。故人漸大任。賤子差自慰。軒車日已遠。翰墨益難致。薄命良可傷。降災渾未已。是年之季冬。舉家纏疫癘。老母尙委頓。微軀蓋螻蝻。形骸非我有。魂魄與心離。權柄在鬼物。功力非服餌。曉突誰能炊。午關猶未啓。荏苒再週月。幸會天不棄。春風動枯槁。甘雨澆根柢。行行夏交秋。吉微凶不替。高堂何戚戚。疾病日攢萃。一夕脾臟間。發泄不復止。詰朝問無言。目瞑口齒閉。號呶諸兒孫。雜沓大鼎沸。嗟哉當彼時。誠恐弗可諱。醫師相急熱。巫覡兩經緯。藥草極酸辛。法術殫怪詭。薄暮乃復蘇。踰旬僅知味。方茲戀庭闈。旋已對獄吏。試言其所由。內省亦無媿。有人同州閩。發迹自徒隸。竊被儒衣裳。曾亡小材技。突如游京邑。欲以干明叡。朝家焉可欺。羈旅謀自濟。乃造黃紙書。便取青袍衣。乘舩歸南方。斂板謁當位。自言章奏奇。因籍宦官勢。詔文降自中。宰府不預議。旣云能占天。且曰善興利。江淮一經過。郡府十不啻。到處爭逢迎。莫能思處置。轉運苦愛奇。得之如國器。故使按坑冶。庶可展才智。小人靡忖度。假寵愈放肆。行符索吏卒。圈印發傳遞。閭閻望塵拜。州縣從風靡。遮道結繒綵。鋪筵塞珠翠。車騎前後呵。給使數百指。何者爲典刑。獨自誇爪觜。在昔秦無人。繞朝贈之箠。繫我非聾瞽。碌碌寧不恥。作書貽諫官。姦詐患不細。有詔令逮捕。按驗取真僞。



是夫知計窮。誣我以罪戾。上官猶眩惑。準例皆拘繫。幽幽園犴中。憤憤爭競裏。周旋二十日。乃克見巧敝。畫地尙不入。叢棘曷可寘。惟茲謝吾母。幾不全髮體。教道亦難行。凡庸豈同志。吁哉養英才。徒以釣積毀。篋書歸敝廬。庠門任蕪穢。去年仲夏後。盛暑若火熾。郊園有餘爽。蔬果聊可嗜。時復觀田疇。畢力奉耘耔。人生但飽暖。此外皆淫侈。思君非一日。欲去無雙翅。俄聞遷黃州。又說丁喪制。古來聖與賢。誰不遭醜詆。蜀日駭狗犬。夏鼎愁魍魅。人壽有短長。孝子謾憂思。滅性經所貶。節哀禮爲是。矧夫王佐才。簡在唐虞際。揚名以顯親。報德豈不韙。加飯苟如願。蒼生猶有恃。適時匪我長。不朽乃所擬。道義果弗充。富貴反爲累。回憲本無官。桀紂焉得此。俗子但相非。吾心已居易。近者游葛陂。念君在衰臬。作詩布幽懷。讀之勿嗤鄙。

女色無定美贈卿材

女色無定美。寵至美則多。士才無定稱。用顯稱已過。長安小家子。粲粲秋池荷。性慧不覺恥。母憐不加訶。出戶一囊麝。見人雙眼波。情動笑難止。語嬌音屢訛。都人口如沸。觀者踵相摩。因緣幸充選。恩澤成偏頗。少費萬金珠。一呼千綺羅。佯愁慘白日。猛唾傾天河。東鄰有賢女。春綠涵修蛾。花艷不裁翦。玉光無切磋。自小固聞禮。藏頭豈知他。親戚尙未見。媒官當奈何。過時誰訪問。生世就蹉跎。豈不有配偶。市里或山阿。豈不有奉養。春簪與機梭。列女不得傳。樂府無人歌。容華日衰落。涕泣坐滂沱。富貴易修飾。貧賤多笑呵。柳下無仲尼。小官終滅磨。進退在勇決。遲疑兩皆蹉。退當事奇偉。夙駕追雄軻。進當取勢位。健筆爲干戈。



胡然守一節。獨自埋隨和。

江亭醉後

平生尙倜儻。壯大苦摧折。主人能結納。佳境爲鋪設。渺瀰東江來。綈綈暮雲裂。倡女稍多藝。市酒且供啜。俠氣復何聊。心朋幸相悅。解冠從放蕩。大呼誰輓掣。咄哉千里足。嗟呼三寸舌。悔物喚龍取。天葩令鬼折。豔唱聲非雅。戲談理當譎。帷房笑私昵。閭巷嘲瑣屑。更鼓莫催睡。夜風纔去熱。俗士鮮大志。于今重小節。內行豕在泥。外貌犬伏紐。吾儕古豪傑。方寸浴日月。被謗肯自疑。爲歡顧猶拙。放飯彼不慚。使我無齒決。弋陽縣學北堂見夾竹桃花有感而書

暖碧覆晴殷。依依近朱欄。異類偶相合。勁節何能安。同時盡妖豔。無地容檀欒。移根旣不可。潔心誠爲難。外貌任春色。中心期歲寒。正聲尙可聽。誰是伶倫官。

讀韓文公駑驥篇因廣其說

主人渴良馬。僕夫念駑駘。行遲追易及。力少牽易來。時聞千里足。百箭攢其懷。主人雖欲買。衆口大悠哉。

蝦蟇

蝦蟇爾奚爲。閤閤攪人耳。在官不爲官。在私無私事。徒將一寸口。日夜相鳴吠。豈能剗語言。且欲噪夢寐。何者孔稚珪。愛之如鼓吹。誰論正與淫。各自有知己。



惜鷄詩

曩予家居見鷄有異者爲之動心嘗欲作而不果戊寅夏五月學於山中乃追賦之曰  
吾家有鷄母乘春數子生生來踰六旬互覺羽翼成其母且再卵逐之使離散衆雛既不來一子獨戀戀  
戀戀不肯離逐之終不移母行無險易唧唧相追隨卵生亦云足母伏窠中宿厥子苦無依攀背如悲哭  
窠中毋所安忍渴復忘餐子於背上臥不捨須臾間我時見之喜異類能如此因欲觀其終其終諒何似  
一朝大長成乃知牝牡情膨脝娠在腹漸見東西行行行求飲食欲以助生息卵出子還多養子何勞役  
朝啄荆草林暮爪汗泥深昔時隨母意今作愛雛心雛生誠可愛母老寧忍背物性乃不常使人心歎慨  
物類本無知無知孰責之斯雞與衆異酷似有天資天資以仁孝變更何太早況彼本無知血毛安足道  
萬物靈者人孰不念其親少艾與妻子所以奪吾真五十慕父母虞舜稱稽古埋子得黃金邇來唯郭巨  
古人往莫追言之淚沾衣斯言足自警題作惜鷄詩

聞女子瘡疾偶書二十四韻寄示

昨日家人來言汝苦寒熱想由卑濕地頗失飲食節脾官驕不治氣馬癡如絛乃致四體煩故當雙日發  
江南此疾多理不憂顛越顧汝僅毀齒何力禁喘噎寄書詰醫師有藥且嚼啜方經固靈應病根終翦滅  
但恐祟所爲嘗聞里中說茲地有罔兩乘時相冒結嗟哉鬼無知何於我爲孽我本重修飾胸中掬冰雪



禍淫雖甚苛。無所可挑挾。疑是饕餮魂。私求盤碗設。盡室唯琴書。何路致葷血。無錢願越巫。刀劍百斬決。徒恣彼昏邪。公然敢抄撮。吾聞上帝靈。網目匪疎缺。行當悉追捕。汝苦旦夕歇。慈愛早有加。憶念今逾切。塵勞差可畏。歸計又云輟。所生能劬勞。祖母矧聰哲。羸臥縱未蘇。撫視諒非拙。勉勉多自安。風來信勿絕。

讀史

子長漢良史。筆鋒頗雄剛。惜哉聞道寡。氣志苦不常。心如蟲絲輕。隨風東西揚。一事若可喜。不顧道所長。公言紂原憲。俠賊乃爲良。仁義謂足羞。貨殖比君王。黃老先六經。斯言固猖狂。吁嗟夫子沒。兩觀無刑章。予懷班孟堅。駁議何洋洋。傳與後世人。慎思其否臧。

竹齋題事

低齋結空野。小竹移孤林。齋閒竹淨好。日媚幽人心。南方夏厭暑。獨此留殘陰。夏雨挫促夢。穿風搜涼襟。長茵展麗蘚。亂歌奏歡禽。待奴裹村服。語客拋塵簪。志高成利讎。思爽生詩淫。值聖喜盈卷。感古悲入琴。山迎穩履遠。月勸澄杯深。榮名雖未染。幸亦非堙沈。

雨中作

羣陰侮陽德。雨陣春嘈嘈。白曉慘成夜。瓦口生飛濤。凝雲列山鞘。冷氣攢衣刀。徑鬧有松竹。庭臥唯蓬蒿。花淫得罪隕。鶯辯知時逃。隰苗出水短。木菌隨日高。微吟雅於樂。快飲甘如膏。朱曦待未見。天蓋空牢牢。



閱雨詩

吳江之南。是曰豐國。五種之生。天下食。一歲不登。吾民菜色。如何天不仁。縱彼旱孽。稱其神。矯矯赤龍。推火軒。來自東南山。咸池慳水。不敢沃。陽侯失色。愁烹煎。況茲畎畝。流涓涓。何足吸之。脣齒間。但見禾與黍。蓬勃紅塵起。土伯勅其屬。埽路迎飢鬼。哀哉氓蚩蚩。託身釜鬲。惟蒸炊。小人怨咨。君子知。天生天殺。今其時。我聞皇穹大德。在生育。愛養萬物。同嬰兒。產民之身。賦民食。中道絕之。何所爲。當時冥冥間。委任非其宜。山川之神。各守土。羣龍受位。司天池。上帝當軒。親戒勅。十日一雨。無愆期。帝心仁且信。臨下固不疑。謂言庶事。有分職。屏去視聽。思無爲。安知愚下鬼。負德孤恩。難制指。弄天之權。侮人命。貪嗜牛羊。邀祭祀。忽焉一物。不稱情。因教此旱災。生靈雷霆之官。畏罪莫敢諫。頭枕天鼓。眠不醒。帝在紫微垣。下隔千里雲。徒勞銜血向空哭。帝心雖聖。安得聞。北斗侍帝側。幹運氣。毋均四時。五星暨衆宿。照曜亡偏私。夫何容此鬼。恣行胸臆。輕天威。定是機務繁。耳目有所遺。小臣亦何者。草莽負奇節。欲係神頸。無長繩。欲斬龍頭。劍鋒缺。皇穹如未察。凶邪空使小臣心鬱結。

甘露亭詩

乾坤父母。莫匪慈。胚胎億兆。成角羈。其間哺乳。不及處。有時泣殺呱呱兒。南川上游。號沃野。景祐丙子。嘗凶飢。新田始苗。舊穀罄。十室八九。無晨炊。伏陰何者。不仁甚。釀作水災。來助之。煙煤刷天。雨汁黑。嘔山泄。



谷爭奔馳。橫流一夜打城郭。萬弩竊發穿毛皮。東隅有洲尸揖揖。如蟻欲走遭水圍。屋根無力樹腰折。蛟  
蜃食人猶擇肥。濤波一望萬山阻。六親不得相扶持。國子劉公好仁者。惟時假守茲軍麾。民生在我不在  
命。告舟往救無敢違。童兒赤立婦女困。載之刳木何纍纍。泥沙外冷內飢渴。口噤不語如狂癡。牽攀坐臥  
滿府舍。賦以酒飲加餽糜。隨流往往亦不死。遠在百里無人知。捐金購得問氏姓。召使親族攜之歸。司農  
倉廩盡發出。不待奏報先施爲。有餘況可補不足。大賈蓄家如響隨。來瞻去察夜繼晷。赤熱不忍蔭華棖。  
由斯一郡十萬戶。餓膚日月生膏脂。存者相保沒者葬。唐虞仁壽重毆躋。聖主養賢賢養物。氣和郁郁通  
高卑。城西老宮古松徑。一朝墜露甘如飴。千柯萬葉結不解。玉階瓊樹光離離。忙俗奔走競觀覩。手攀口  
吮同齋咨。學老之人周氏子。好善不類黃冠師。欲令事迹絢久遠。築亭其地高巍巍。公之歸朝不可借。松  
樹至今猶未衰。我作此詩揭亭上。他年墮淚如羊碑。

答緣概師見示草書千字文并名公所贈詩序

佛繇西域漸中土。欲使羣心皆鼓舞。若顯梵語及胡書。昧者雖存明孰與。其徒往往多材能。暗結時賢爲  
外助。遠公自昔來廬山。誇逞蓮花邀社侶。吁嗟君子遭亂邦。舍此未知何處去。邇來一行善記覽。齧破乾  
坤尋曆數。或攻文苑掠芬香。辭則貫休筆懷素。其餘曲藝與小詩。布在人間難悉數。賢豪大抵多憐才。引  
致門牆無齟齬。其人既重法亦尊。羽翼大成根本固。我緣山谷見不遠。緇褐憧憧盡愚魯。坐量此去朋黨



衰。織縞焉能拒強弩。去年有使自番陽。手藉一函來我所。發函乃是緣槩書。千字滿前雲縷縷。衆人飽食已用心。欲噍伯英肥美處。當時名士嘉其能。長序短篇聯繡組。因思幅員千萬里。如師之能更幾許。以儒輔釋日益多。何恤區區一韓愈。

春社詞并序

寶元二年。嘗夢大雨震所居室。驚而仆地。既已。有一人甚長大。紫衣而冠。意謂雷之神也。呼覲使前。授之題曰春社詞。詞或作篇字不能審。覲懼栗栗。援筆得八句與之。及覺尙記其首三句。頗怪麗。今七年矣。值暇日以五句足之。

吳臺翫春鎖春色。雨刷花光入龍國。田邊大樹啼老鴉。野雲癡醉寒查牙。年華欲住風雷惡。蘭臉知秋淚先落。時榮時謝無了時。扶起混沌須神醫。

聞喜鵲

翩翩者鵲何品流。羽毛白黑林之幽。生平智力可料度。有巢往往輸鳴鳩。天然卻會報人喜。愚兒幼婦唯爾求。萬聲千噪幾曾驗。聞者終是軒眉頭。從來烏烏愛反哺。孝慈情性誰可儔。其間於事最先見。告人凶禍令人憂。憂時不肯自修飾。禱請神鬼爭啾啾。告之愈驗愈見惡。共云災患鵲之由。彈丸瓦石相驅逐。名園佳樹難依投。忠言逆耳世罕用。屬鏤曾剖伍員喉。莫笑後來司馬公。事事稱好真良謀。



閒夜

披衣坐小亭。夜氣拂人清。月暗先成暈。蟲吟不識名。舉杯期混沌。開卷賞莖英。此興知誰會。松風鶴睡驚。

睡思

俗語不入耳。旅愁還對心。坐多渾易厭。夢好欲重尋。暴雨撩篷響。殘陽過嶺陰。迴看犇競苦。此興貴南金。

鑑湖夜泛以明月到樽前爲發句

明月到樽前。拏舟古岸邊。亂山斜入霧。遠水倒垂天。酒氣薰龍戲。歌聲弄鶴眠。迴頭嗤李郭。此外更無仙。

池亭小酌得和字

客思都無著。臨池一醉歌。喚春呈物象。移性入天和。月影碎荆玉。波紋緯蜀羅。相看盡仙骨。俗態已無多。

感事

太平無武備。一動未能安。廟算何時勝。人生到處難。役頻農力耗。賦重女工寒。祇有盱江守。憐民不愛官。

閒居

無物可勞情。空郊日閉扃。雨吟春破碎。貧飲客凋零。世事重江險。才名一夢醒。同心祇松柏。見我尙青青。

萍

盡日看流萍。誰原造化情。可憐無用物。偏解及時生。泥滓根萌淺。風波性質輕。晚來堆岸曲。猶得護蛙鳴。



送張巖嘏

人意皆懷土。嗟君無故園。欲行須盡室。此去又他門。靜裏文章好。貧來節行存。振淹知有日。倚伏豈虛言。

寄題廖說蒙亭

聖人雖在上。君子有窮時。自得山居樂。何須世俗知。夜多松月分。涼與水風期。只恐亨通去。清閒卻付誰。

養疾

少小唯貪酒。病來總信醫。問方逋客許。尋藥野人疑。夜擣全聽慣。寒煎覺沸遲。古賢曾愛死。此意亦誰知。

遠山

最能牽病眼。天際一山橫。盡日是秋色。無人知地名。暗時雲自合。缺處路應平。才子霑衣淚。千秋共此情。

早歸

病馬不妨騎。出門常便歸。見人無事說。是物與心違。通塞元關命。驅馳轉覺非。莫教塵裏汗。壞卻篋中衣。

晚聞角

傾耳斜陽裏。無聊拭淚頻。平生慣聞處。今日自愁人。夜近歇不久。風來聽得真。胡笳更何物。只此已傷神。

哭女二首

妻死女已病。踰年成二喪。此生誰骨肉。未識好衣裳。看面雖猶小。聞言盡可傷。最知憐祖母。句句刮人腸。



老樹枝葉薄。先秋風雨過。人間不善事。身外想無多。理遣誠如幻。悲來豈奈何。從前短髻髮。爲爾漸雙皤。

小女

恃汝今何恃。言來淚滿襟。死生雖分定。襁褓累人心。飢買鄰家乳。寒勞祖母針。豈知泉路隔。時撥蕙帷尋。

龜峯精舍

去縣二十里。路平時正春。四山唯有石。一寺更無塵。融結疑天意。經營憶古人。但知安樂處。何必是金身。

鳴蝟

雨餘雲漏日。蟲思已喧喧。時節驚初夏。聲音似故園。爲誰吟綠野。相共送黃昏。便是秋來信。霜髯更幾根。

送春

送爾歸天去。天應解禍淫。物生誰得所。我見獨傷心。楚詞有日極千里傷春心之句好景吟來徧。芳樽醉不禁。東風別無

用。百草已成林。

次韻閩判官除夜

密雪穿窗入。孤燈向壁光。老來人不覺。夢斷酒猶香。世事休思慮。年華任短長。朽株難長育。空此見春傷。

寄黃晞

長憶黃夫子。才高行亦淳。世情輕近事。見慣卽常人。何力康時務。將身役路塵。七閩山水國。是處好安貧。



迴明上人詩卷

學佛有餘力，吟詩過一生。情閒氣燄少，句好琢磨成。柏竹門庭古，冰霜筆硯清。輸他飽食者，終日自無營。

送任大中

真偽少分別，吁嗟此世情。西施作老婢，南郭逞新聲。命合生來困，詩應沒後名。旅游何所得，赤日又徒行。

送何祕丞

吳人作蜀官，萬里泝驚湍。地俗雖云異，民情想一般。智明終戒察，政惠不須寬。前史多循吏，乘閒更熟看。

鄉思

人言落日是天涯，望極天涯不見家。已恨碧山相阻隔，碧山還被暮雲遮。

少年

新翻曲調恐人傳，不試高聲唱玳筵。金獸也嫌春態淺，向風噴作綠楊煙。

自勉

月欲東生日又西，莫隨兒女醉明時。黃泉一向埋愚鬼，不與人間史筆知。

戲題玉臺集

江右君臣筆力雄，一言宮體便移風。始知姬旦無才思，祇把豳詩詠女功。



雪中贈柳枝

暖氣來時柳眼新。一場冰雪更愁人。要知真宰無誠信。取次東風未是春。

柳枝答

春早寒餘豈足哀。平生多難媿非材。去年二月都城裏。曾共花房帶雪來。慶曆二年二月五日。京師大雪。

讀長恨辭二首

玉輦迢迢別紫臺。繫環衣畔忽興哀。臨邛謾道蓬山好。爭奈人間有馬嵬。蜀道如天夜雨淫。亂鈴聲裏倍霑襟。當時更有軍中死。自是君王不動心。

戚夫人

百子池頭一曲春。君恩和淚落埃塵。當時應恨秦皇帝。不殺南山皓首人。

有感

官家的的要寬征。古時什一今更輕。州縣酷嫌民漸富。幾多率斂是無名。白刃劫君君勿言。人生禍難俱由天。君家歲計能多少。未了官軍一飯錢。庭下繯囚何忍爭。刀筆少年初醉醒。黃金滿把未迴眼。笑殺迂儒欲措刑。

遊寺醉歸卻寄同坐



江村古寺偶閒行。一飲全疑酒有靈。水底屈原應大笑。我今獨醉衆人醒。

索酒

不醉多愁醉多病。幾迴愛酒又停杯。死生若是有天命。莫放愁來任病來。

憶錢塘江

昔年乘醉舉歸帆。隱隱前山日半銜。好是滿江涵返照。水仙齊著淡紅衫。

謝傅神平土人

最陋徒煩妙筆傳。呼兒看了獨淒然。丹青不解隨人老。相似都來得幾年。

閏正月三日偶書二首

一步寒郊一慘眉。望春春色若來遲。東君未必私桃李。只恐梅花謝有時。無賴年年逐酒徒。今年不飲興何如。醉鄉若有人名籍。但願春風點檢疎。

論文二首

今人往往號能文。意熟辭陳未足云。若見江魚須慟哭。腹中曾有屈原墳。天寶年中事事新。長安還有謫仙人。騎鯨去後無尋處。輸與勾芒自管春。

漢宮



哀平外立國權分。只爲當時乏嗣君。試問莽新誰佐命。最應飛燕是元勳。  
燕雀二首

燕子從來巧語聲。主人相愛是常情。黃頭老雀何能解。飽食官倉過一生。  
繡戶珠簾見最頻。暖來寒去但安身。翟公門下時飛入。全勝交情斗頓人。

送春

宜春臺上送春歸。淚滴金杯不自知。懊惱黃鸝解言語。飛來唯見落花枝。

曉角

腸斷城頭畫角聲。燈青月黑酒微醒。濃香夢裏誰曾管。只有離人夜夜聽。

登越山

臘後梅花破碎香。望中情地轉淒涼。遊山只道尋高處。高處何曾見故鄉。

送古山人

喜聞吉事怕聞凶。天下人心處處同。乍出山來言語拙。莫將刺字謁王公。

送毗師西遊

望望王城十二門。青山行盡入紅塵。近來富貴皆天與。到處應多問命人。



送春寄呈祖袁州

去年春盡任宜春，醉送東風淚滿巾。今日春歸倍惆悵，相逢不是去年人。

酬陳屯田途中所寄

封豕長蛇戰嶺南，何人肉食不懷慚。只今惟有高眠好，風弄松聲水澗菴。

正月二十日俗號天穿日，以煎餅置屋上謂之補天，感而爲詩。

媧皇沒後幾多年，夏伏冬愆任自然。只有人間閒婦女，一枚煎餅補天穿。

苦雨初霽

積陰爲患恐沈綿，革去方驚造化權。天放舊光還日月，地將濃秀與山川。泥途漸少車聲活，林薄初乾果味全。寄語殘雲好知足，莫依河漢更油然。

野人

村落蒼茫半草茅，路無車轍水無橋。婚姻取足唯春繭，鹽酪歸來待晚樵。一樣寬衣疑效古，幾人華髮未經徭。相逢不會寒溫語，借問官家合是堯。

書麻姑廟

流俗好仙方學道，至人樂道自成仙。飛昇若也由貪欲，紫府還應用詐權。塵裏笙歌千古夢，洞中星斗幾



家天無心便是歸真日。姹女河車總謾傳。

客有話故丁祕監京師舊宅因而傷之

等閒榮謝已愁聞。況話三公極寵身。青史尙爲今世事。朱門不是舊時人。文章散入諸蕃口。花藥留添上國春。生死交情渾易見。有誰過此爲霑巾。

五龍塘

世傳鱗物有蟠時。分得寒泉住翠微。天命雖教爲潤澤。神心終是索虔祈。一圍石岸刊無迹。幾族陰雲禁不飛。風腳斗回波面黑。向人渾似逞嚴威。

寄小兒

兩世熒熒各一人。予無兄弟才生此兒三歲矣。生來且喜富精神。欲教齟齬從師學。祇恐文章誤爾身。但有犁鋤終得飽。莫看紈綺便嫌貧。不知別後啼多少。苦問家僮說未真。

秋懷

褚冠斜頂對清秋。病骨支撐懶上樓。輔世功夫何日是。少年滋味此生休。山含紅樹隨時老。天帶黃昏一例愁。自笑酒腸空半在。前村無處典鷓裘。

書松陵唱和



天命相逢陸與皮。當年才調兩權奇。朝端未有輸忠處。詩外應無用力時。意古直摩軒昊頂。言微都洩鬼神私。近來此道中興也。泉下英魂知不知。

早起有懷

草草西風動葛衣。呼僮前啓竹間扉。山僧好睡鐘聲晏。社戶多貧酒氣微。豈是客愁渾較可。祇因書卷解忘歸。盱江百里清無滓。枉屬閒人坐釣磯。

清明日作

遲遲日景坐成曛。聞說清明在此晨。花卉不宜愁眼看。勾芒能爲幾人春。銷磨志氣多因老。點檢交遊半作塵。欲向醉鄉聊自適。病來還厭舉杯頻。

晚思

一檻東風小箔開。亂山明暗水縈迴。流年漸共春華去。暴熱還隨霽色來。天氣濁多人欲睡。地形卑甚物先梅。因知楚客迷魂處。不是江東不足哀。

暮春始遊城西

病多無力逐紛華。三月衡門未見花。長恐後期成索寞。果逢殘景獨咨嗟。欄干倚望山空在。杯酒遲留日易斜。謾說明年更春色。不知園囿屬誰家。



寄傅代言

交遊散盡客來稀。門掩城隅晝漏遲。春地更無嫌草處。雨天還有詐晴時。輕量世事世不罪。冷笑人言人豈知。猶喜道途收拾早。將閒對病最相宜。

丙子冬至夜酒醒

盡道一陽初復時。不期風雨更淒淒。凌晨出去逢人飲。沉醉歸來滿馬泥。多恨恐成干斗氣。欲言那得上天梯。韓文公月蝕詩。有無梯可上天之句。有燈青火冷睡半醒。殘葉打窗烏夜啼。

南齋詠風

懊惱南窗一道風。只應天配與貧窮。不歸羅綺飄飄處。故入松篁冷淡中。久座披襟塵榻穩。半醒吹面月帷空。城邊菡萏知多少。偷得清香是爾功。

小雨

已是蛟龍未肯忙。誰教蠨蛸更相妨。來時槁葉疎疎響。過後浮雲片片光。徑草微滋垂粉汗。砌沙圓滴簇蜂房。嗟予不及高飛鳥。先得天邊幾點涼。

題淨居院

寺門幽獨傍江城。江水清含地氣清。隔岸樓臺人醉死。遶堦松竹夏寒生。路經橋遠塵難過。僧占閒多俗



不爭。唯有行吟憔悴客。這迴須去濯長纓。

往山舍道中作

截竹成輿不用輪。東行盡日穩宜身。前看疊嶂如無路。每到平田始見人。下戶半曾差作後。朽株多已祀爲神。生涯一撮誠何有。且免庸兒共拜塵。

秋晚悲懷

漸老多憂百事忙。天寒日短更心傷。數分紅色上黃葉。一瞬曙光成夕陽。春水別來應到海。小松生命合禁霜。壺中若逐仙翁去。待看年華幾許長。

殘葉

一樹摧殘幾片存。欄邊爲汝最傷神。休翻雨滴寒鳴夜。曾抱花枝暖過春。與影有情唯日月。遇紅無禮是泥塵。上陽宮女多詩思。莫寄人間取次人。

哭十姪

到官六月一作日寄書迴。未病封題死後開。一命至卑人盡得。九泉何事獨相催。唯憂旅櫬還鄉遠。况是親喪繼踵來。數世學文終若此。可憐門戶轉隳頽。

秋陰



一夜風聲曉更狂。起來庭戶頓淒涼。不知紅日在何處。時見黑雲微有光。天落水。中兼鴈影。露啼林罅帶。楓香愁人莫苦登高閣。說著江山已斷腸。

寄介夫

天恨吾儕各一方。夕陽千度到西窗。因循流俗今皆是。磊落如君信少雙。書未隔年難得報。心從薄宦始應降。可憐漢水無拘係。長與盱江會九江。

書懷寄介夫

棄材幸免雜輿薪。收拾緇衣出洛塵。漸老得閒纔是性。謾言成諛且隨人。能傳身後須文字。要識胷中只鬼神。俗子不勞輕毀譽。問天長乞醉鄉春。

俞秀才山風亭小飲

炎炎千室熱如烘。亭壓山頭獨有風。雨意生獰雲彩黑。秋容細碎樹枝紅。半天斜日歸心動。一面平川醉眼空。卻是夢魂無所得。人間豈少翠微宮。

閩中歲暮

休道南人暖過冬。苦寒今與北方同。霜嚴欲裂地到底。日短不行天正中。誰使智愚相伴老。便將榮辱斷還空。鄉愁莫更欺閒客。薄酒從來亦有功。白樂天有酒功贊



偶題饒秀才谿光亭

北出城來駐馬蹄。君家別館幸臨谿。雄虹見雨遏不斷。潦水到秋痕漸低。萬事熱心成浩歎。一樽撩眼怕長迷。俗人誰會儒生意。是處醉吟還日西。

早夏偶作

閒愁不覺過年光。強半精神似醉鄉。幾度雨來成惡熱。有時雲斷見斜陽。古人事業塵空滿。故國園林草自長。賴得南華憐我病。一篇齊物勝醫方。

自解

人生何苦要多才。百慮攢心摘不開。夜月幾曾無夢處。春風只管送愁來。禿毫強會悠悠事。浮世無過滿滿盃。看取秦坑煙焰裏。是非同作一坏灰。

不寐

四壁空空絕語聲。困來終是睡難成。孤燈要與人相背。寒漏苦教天不明。累月故園無信息。幾般閒事惱心情。別愁若解生華髮。一夕應添一萬莖。

韓偓集有自撫州往南城縣舟行見拂水薔薇之詩南城吾鄉也因題八句

韓偓當年赴七閩。舟行過此倍凝神。江邊石上知誰處。綠戰紅酣別是春。往事幾多書不記。仙源依舊地



無塵。花光柳色今何限。更有才人勝古人。

送王都曹

古木亭邊夜嚮晨。餞壺重疊擁雙輪。高文健筆科場手。白髮青衫宦路人。十月霜風還劈面。六街塵土會欺貧。麻源碧澗神仙地。早晚歸來伴隱淪。

蓬屋

長簷數尺庇堂東。疎漏從來只有蓬。日影碎如秋樹下。雨聲初似夜船中。竹經蠹了多垂地。箬到乾時半捲空。此處想非人所競。衆言千萬莫相攻。

塔基

堂前一級似塔墀。無石無甃只舊基。泥飭頃因年節近。蹋崩唯是客行時。誰曾羅襪雙來上。多謝蒼苔久不離。從此便成貧景致。竹簾垂處敢相宜。

宜春臺

謫官誰住小蓬萊。唯有宜春有古臺。千里待看毫末去。萬家攢作畫圖來。雲中羅綺香風落。月底笙歌醉夢回。莫怪江山苦相助。騷人沒後得真才。

東湖



古郡城池已瞰江。重湖更在郡東方。水仙坐下魚鱗赤。龍女門前橘樹香。路絕塵埃非灑埽。地無風雨亦清涼。使君待客多娛樂。只有醒時覺異鄉。

野意亭

福唐城郭掌中窺。旭日登臨到落暉。誰在畫簾沾酒處。幾多鳴櫓趁潮歸。晴來海色依稀辨。醉後鄉愁積漸微。山鳥不知紅粉好。纔聞歌板便驚飛。

靈源洞

纔出塵來尙未知。漸攀藤竹漸臨危。伏流似是龍藏處。古樹應無春到時。誰把石厓齊剗削。直教雲氣當簾帷。良工畫得猶宜祕。莫與凡夫肉眼窺。

送黃承伯

君來別我向番陽。時節初春曉尙霜。茶褐園林新柳色。鹿胎天地落梅香。此行硯席多知己。是處樓臺可舉觴。只恐詔書非久下。槐花又在眼前黃。

清話堂詩

至和元年秋九月。與周伯達宿景德寺義明上人房。予喜誦李涉詩云。無限心中不平事。一宵清話又成空。其意與今夕相似。因目其處爲清話堂。且題八句。



釋子相延暫解冠。一宵清話到更闌。漆盤香燼死蚯蚓。紙瓦雨聲鳴彈丸。往事莫將閒口笑。勞生誰在定中看。明朝類面還歸去。依舊塗泥濺馬鞍。

次韻酬屯田陳丈見寄

老年纔到病還催。老病成叢撥不開。腹冷有時如咽雪。耳虛終日獨聞雷。半生辛苦歸三徑。萬恨銷磨向一椀。賴得竹窗無事處。清風頻共故人來。



新加坡





# 雙溪詩鈔

王炎字晦叔。新安婺源人。所居武水之曲。雙溪合流。因以爲號矣。登乾道進士。始令臨湘。受學於南軒先生。入中都官博士。慶元四年。爲實錄簡討。尋轉著作佐郎。出守湖州。年八十餘。著有雙溪集。炎詩頗爲世所稱許。然亦多庸調。今擇其刊落者入鈔。

## 遊硯山壬辰

他山石徒多。器寶匿幽僻。產璞芙蓉坑。金聲而玉德。岡巒外鈎聯。地勢中斷隔。曲塢八九家。路入羊豕迹。澗水抱石根。石骨多紺碧。北山上攙天。南山勢蟠伏。硯工二百指。日鑿崔嵬腹。篝燈礪斧斤。深入逾百尺。我行冒風雨。周覽不知夕。夜宿茅茨下。青燈照岑寂。酒闌呼匠氏。訪之語纖悉。冰蠶吐銀絲。蛟人織霧縠。巧手琢磨之。價直黃金鎰。斷崑半傾欹。舊穴久湮塞。旁求得他材。飲水不受墨。堅滑已支庶。麤燥乃臧獲。信知天壤間。尤物神所惜。罕見固爲貴。有亦未易識。璿玉混一區。語盡三歎息。摩挲蒼蘚崖。此言可深刻。

## 春日遣懷

感懷細數十年事。養拙略無終日閒。景物自新春稍稍。吾親漸老髮斑斑。豈曾有夢到天上。且任此生浮世間。願約漁樵同一隱。謂予不信有南山。



麥苗已有生意掘烏稜者未止

兒童飯糲女採桑。水滿東皋耕事忙。稻秧半綠麥半黃。天許食新饘粥香。田父咨嗟仍笑語。赤地一年今得雨。紫蘘有根妻子喜。免填溝壑棄閭里。

元日書懷

年光除日又元日。心事今吾非故吾。兩板不須書鬱壘。一杯亦強飲屠蘇。添丁解事尋王母。內子傷時念老姑。欲報情深恩罔極。不終反哺愧林烏。

送游大治歸建陽

西風來鴈歲欲晚。衰柳鳴蟬人語離。市道交游何足數。君家父子總相知。讀書要見古人意。立事正須年少時。話舊班荆尙無日。莫忘苦語有箴規。

生朝無以自慰作留貧薦一杯

私居飯半菽。官舍食無肉。何乃太清生。囊無一錢蓄。人言骨相寒。有智不如福。貧者輕於葉。富者重如玉。輕重信然否。世情手翻覆。相彼守錢虜。無厭溪壑欲。口不談古今。枵然瓠壺腹。渠固笑我癯。我亦笑渠俗。珊瑚數十株。胡椒八百斛。冥冥鬼瞰室。一跌赤其族。未若貧而安。高枕睡常熟。我家雲溪陽。欹側數椽屋。屋後蒔菘韭。屋前種梅竹。室中四立壁。但有書可讀。世故驅我來。營此升斗粟。仕不上青雲。何如返耕牧。



頗怪草玄翁。乃謂貧可逐。卒歲一布裘。終朝一饘粥。此外何所求。吾生無不足。

用前韻答黃一翁二首

緇袍敵狐裘。晚飯可當肉。諱窮竟未免。豈不愛儲蓄。利嗜類有泚。恐愧王承福。財固禍之媒。越鄉忌懷玉。君看座右器。已滿卽傾覆。聖賢用功處。清心而寡欲。於世淡無求。乃能實其腹。誰令入青衫。失策混流俗。黃子振鷺姿。筆力扛百斛。笑人龜手藥。欲售先聚族。知余頗清苦。應物未圓熟。游宦不能巧。俯首立矮屋。鍛鍊知精金。祁寒見松竹。自立不堅定。庸行徒聖讀。誰謂漆園高。俯首欲丐粟。窮作扣角歌。老厭淄川牧。古道寢斲喪。時人方逐逐。有田南山南。可辦一盂粥。請廢歸去來。世路早收足。豆羹采藜藿。鼎食厭梁肉。士欲齊得喪。胸次要涵蓄。我晚頗聞道。寧有慧無福。外物皆浮雲。此道等珠玉。閱事如閱碁。已過安用覆。回光照諸妄。稍稍淡無欲。與君共玄談。一笑時捧腹。吾作詩留貧。此語頗驚俗。細看苜蓿盤。豈減檳榔斛。見金不見人。渠輩非吾族。君獨臭味同。吾固知之熟。平生求益友。今日並牆屋。不肯兄事錢。寧以君呼竹。力學追古人。經史費抄讀。我方病少瘳。擁衲膚有粟。百念漸灰冷。有牛不須牧。君如汗血駒。墮地必馳逐。甘爲走踐踐。耻作雌粥粥。有玉未嘗獻。豈憂終刖足。

泂檄如蒲圻訊民之食菜事魔者作詩憫之

三代日方中。爲民破重昏。旣蝕復光融。孔孟道益尊。古禮今則亡。陳編意猶存。飲燕用觥籌。薦享羞羔豚。



瞿曇何爲者。髡首徒實繁。不飲非畏義。不殺非知仁。舉世昏不悟。跣足行荆榛。胎禍產妖幻。與佛岐又分。俗愚有罣誤。吏議多深文。怒言必溢惡。疑似恐不根。黔首亦何罪。可憫不可嗔。大道若返古。怪說難眩民。帝居虎豹守。此語誰扣關。

和游堯臣勸農韻

傳呼穩凭笱輿行。喜見漫山麥浪平。道上老農皆好語。年來瘦地有新耕。草深黃犢陽坡暖。雨過青蒲野水生。桃李陰中春事好。田家鷄犬亦歡聲。

到胡道士草菴

清風颼颼竹萬箇。白日寂寂茅三間。春深只有鳥呼夢。地僻略無人叩關。豈但壺中堪避世。也勝圖上可遊山。出門回首不能住。輸與道人閒復閒。

出郊雜詠四絕

閉戶不知春色佳。柳稍欲暗可藏鴉。鴨頭新綠齊腰水。女頰輕紅刺眼花。道上東風掠面輕。一犁雨足得新晴。草頭蛺蝶自由舞。林下鷓鴣相對鳴。孤煙近見數椽屋。急水時行獨木橋。入眼異鄉風景別。脩眉一秣暮山遙。雲昏山色收圖畫。雨過泉聲雜管絃。馬上得晴春滿眼。好花迎客亦嫣然。



旅中想家

野田既雨水皆滿。山路無風花自香。且復將身供世事。也能隨處對春光。絕嫌俗物眼多白。未辦生涯鬢已蒼。待看榷梨粗可教。老夫耕釣卽韜藏。

晚憩田家二絕

家書未到鵲先喜。春事無多鶯又啼。偶對好山留客坐。綠陰遮屋日將西。  
山間一徑牛羊迹。林下數家鷄犬聲。底事居人苦爭畔。閒田官正募民耕。

上巳

莫春被禊好天氣。不到水邊流一杯。旋擘紅泥嘗煮酒。自循綠樹摘青梅。淹留異縣客多病。迢遞故鄉書不來。歷歷舊時行樂處。凭欄小立首空迴。

過涪溪讀中興碑

日光玉潔元子辭。銀鈎鐵畫顏公書。百金不憚買墨本。摩挲石刻今見之。猗那清廟久不作。其末變爲王黍離。春秋一經事多貶。魯頌四篇文無譏。漁陽鼙鼓入潼華。公卿徒步從六飛。朔方天子扶九廟。京師父老迎千麾。紫袍再拜謁道左。上皇萬里旋鑾輿。牝味鳴晨有悍婦。孽狐噪夜有老奴。扶桑杲杲未翳蝕。但歌大業吾何疵。首章義正語未婉。前輩不辨來者疑。正須細讀史克頌。未用苦說涪翁詩。許張勁節震金



石李郭壯武如虎貔。斷崖蒼石有時泐。諸公萬古聲烈垂。天憐倦客有所恨。雨溼江寒催解維。神州北望三歎息。翰墨是非何議爲。

湘中雜詠三絕

有懷冉水柳司馬。更憶浯溪元道州。仕宦兩公俱落莫。斯文千古共傳流。順流鳴櫓不論程。上水開帆取次行。逆順自從人意轉。風生波湧本無情。中流四顧浪花平。雙櫓夾船鵝鸛鳴。款乃聲中山水綠。不妨緩緩計歸程。

豐年謠五首

滿箔春蠶得繭絲。家家機杼換新衣。五風十雨天時好。又見西郊稻秫肥。縱橫南陌接東阡。婦餉夫耕望有年。前此丁黃饑欲死。今年米賤不論錢。洞丁徭戶盡歸耕。篁竹無人弄寸兵。要識二天恩德廣。黃雲千里見秋成。睡鴨陂塘水慢流。離離禾稼滿平疇。共言官府催科緩。飽飯渾家百不憂。稻如馬尾覆溝塍。桑柘陰中雞犬鳴。收穫登場便無事。輸租人不入州城。

再用元韻因簡縣庠諸先輩

書生卯飯動及午。薑糝菜絲煩自煮。異時甘脆屋渠渠。出自空腸千卷書。竹間杵臼相敲擊。茶不療飢何



苦吃泉新火。活費裁排呼。奴更挈銅餅來。蜀客見之心逐逐。暫借紙窗休繭足。歸歟家在淮湖邊。芋魁可買無青錢。不辦雲腴供粥飲。空有束詩如束筭。青箬小分鷹爪香。江上拏舟當遠引。

江上爲韓毅伯訪得便舟

銅墨纏腰雪上頭。人生一飽亦難謀。天明忽暗釀梅雨。風暖又寒催麥秋。老矣不堪時節換。粲然方幸故人留。白雲呼去淮山住。強爲江邊問買舟。

解官到郡諸丈置酒岳陽樓招炎爲客鄧巴陵索詩

重上危樓覽洞庭。故人一笑對飛觥。君山只似扁山綠。江水不如湘水清。一日勝遊成樂事。三年俗狀奪詩情。天涯解后還離別。莫惜尊前底裏傾。

和程丞遊清水巖黃龍山韻

嵐光野色共扶輿。見說壺天氣象殊。疊巘吞雲圭角露。寒泉觸石篆文紆。荒涼佛屋存遺像。窈窕仙巖有別區。何日青鞋親扣歷。細評佳致染松腴。

和陸簿九日二首

西風拂面飲微酣。小摘茱萸手自簪。極羨酒兼詩共好。正緣人與景相參。杜門不復貪游賞。落帽無由際劇談。嘆息登高兄弟遠。日隨鴻雁過天南。



風露蕭蕭木半黃。老來淡薄似秋陽。一樽冷落思佳客。九日淒涼在異鄉。採菊何心追靖節。哦詩無語答仇香。危臺戲馬今安在。休惹清愁攪石腸。

題童壽卿博雅堂

會道莫如約。要識胸中真。講學亦貴博。不廢紙上陳。王充與李邕。世豈無若人。中祕未許見。市肆何所聞。童君家多書。乃爲我輩慮。安用蓬萊山。萬卷皆此聚。又復附益之。秦碑及周鼓。剡溪來楮生。歛穴會石友。持此分雅俗。清渭映濁涇。不賄屋自潤。無爵身亦榮。好事時相過。不憚倒屣迎。揮塵言有味。寂如無市聲。孰如漢中郎。孰似楚左史。孰能誦亡書。孰解作奇字。是中猶淵海。隨取卽隨有。或問賈幾何。還可商度否。掀髯笑謝客。吾非鬻書叟。

題遠山平林圖

山色微茫疑有無。木葉半脫殊蕭疎。雲根更着數椽屋。此屋當有幽人居。墨妙逼真乃如此。畢竟非真惟近似。何如履齒飽經行。是處溪山皆畫筍。還君圖書吾且歸。家在江南依翠微。

用元韻答劉判官

解后章江上。知從五馬車。君才猶未用。吾老更焉如。間闊思眉宇。殷勤得手書。喜聞衣綵樂。入饌有江魚。

冬雪行并序



甲寅歲雖小稔。縣官和糴。米價遂增。兩日雨雪。市中貧民有無炊煙者。艱糴反甚於去年之凶歉。父老輩遂具公牘。赴訴于庭。因成冬雪行一篇。其辭如古樂府。其義則主文譎諫。言之可以無罪者也。

擁衾展轉夜不眠。細數更籌知苦寒。角聲未動紙窗白。兒曹報我雪滿簷。玉妃翦水出天巧。飛花萬點爭清妍。朱門貴人對之笑。初見一白來豐年。金罍玉爵扶春筍。飲罷敲冰煮新茗。綉幃中有紅麒麟。輕暖勝春尙嫌冷。窮巷小家真可憐。典衣糴米無炊煙。江頭津吏日來報。往往上流無米船。縣官要糴十萬斛。天上符移星火速。去年秋旱糴陳腐。今年秋熟米如玉。且願扶桑枝上紅。日轂東來卻勝六。今年冬雪民已懼。明年春雪民更饑。九關有路虎豹守。欲語不敢空長吁。

次韻答簡薄

少日牛衣嘗熟眠。老來駝褐不護寒。欲呵龜毛拈秃筆。怯看冰柱懸疎簷。東風不解着梅柳。翻作六出欺春妍。春回臘盡亦何好。但爲浮生添一年。負郭有人如石笋。雪裏哦詩自烹茗。胸中盎盎有天和。戶外蕭蕭尙冰冷。日炊脫粟不自憐。卻念野廬無爨烟。此憂未知可解否。準擬爲君浮酒船。酒酣傾瀉珠百斛。定覺揮毫轉神速。聞道諸公雙眼青。豈終遺此豐年玉。倦游別駕老更貧。自謀慚似龜藏六。詩來謂我清而懼。我方忍慾將忍饑。短蓑歸釣寒江雪。紛紛世事休嗟吁。

題徐參議所藏唐人浴兒圖



右相嘗慚呼畫師。技癢仍復拈毛錐。逼真誰作此贗本。亦有妙意生妍姿。中庭燕坐必主婦。綠雲高髻香羅衣。嫣然嬪妾左右侍。前浴能言丹鳳雛。娉婷及笄女公子。素腕擁項相攜扶。兩兩爲朋四髻亂。乳盧隨逐相諧嬉。掌中看珠二少艾。捧顙卻立鴉鬟奴。屏間擁膝袖玉筍。疑是夢闌顰翠眉。側身背面按箏者。冰肌綽約不自持。牀前跪起各姝麗。爲兒理髮拭涕淚。有犬爛斑受摩撫。與人習熟無猜疑。梳裝淡薄服製古。如見永徽貞觀時。若非侯家及主第。人物無此美且都。荆釵布襦小家婦。生子不如山下麇。

題徐商叟所藏李伯時四天王圖

龍眠有巧手。幻出汗血駒。老衲或戒之。回向心地初。遂盡白衣仙。斬與梵釋俱。北方四天王。亦附瞿曇居。雜以馬龍像。宿習終未除。四王名字異。且復形狀殊。信者謂其有。疑者意其無。蕩蕩天門高。誰能凌空虛。何以信不疑。取諸貝葉書。子不語怪神。從釋恐畔儒。語之且不可。筆之其可乎。因畫議及此。於公意何如。

卽事時寓清化

久輟囊中句。時看肘後方。有家如旅舍。無事似僧房。梅白牆頭笑。榴紅甕面香。杖藜如何出。溪上探春光。

勸農道場山

練日遵詔條。行春勸耕事。擁旆有傳呼。據鞍小馳騫。兒童喜聚觀。父老歡來詣。松徑度坡陀。蓮宮得清閤。此行非遨遊。所職在撫字。示之淺易語。諭以丁寧意。扶杖旣言歸。解衣聊少憩。山中無俗情。物外有幽趣。



僧閒衆所羨。農困吾甚愧。不敢飽登臨。肩輿下山去。

夜半聞雨再用前韻

轆轤百尺汲無水。映日四山雲不起。朱轡浪說勸農桑。衣食何從可甘美。禱而得雨不苦旱。竊疑此殆偶然爾。夜半潺潺簷溜鳴。孤枕夢回心失喜。兒童挽犢婦餉饁。襪襖耕夫亦勤止。鼠跡印我榻上書。蛛絲罥我壁間塵。抖擻胸中三斗塵。強欲哦吟無好語。請公酌酒更揮毫。快寫珠璣歌喜雨。

雙溪種花

雙溪漸有雜花開。每日扶筇到一回。勝似名園空鎖閉。主人至老不歸來。蒼頭爲我斲西山。扶病移花強自寬。縱不爲花長作主。何妨留與後人看。

舟行過白石見將使夜宿毛家林翌日到莘莪卻回和清老

蒼頭倦晨炊。卯飯幾及午。泝流赤日中。舟子亦良苦。魚躍戀芳餌。鷗飛避鳴櫓。仙翁所退藏。好境自呈露。溪水清可鑑。山雲橫不度。坐斷泉石幽。不受塵土污。問之何所得。妙處難悉數。初非練玉泉。亦不鳴天鼓。人癯道方肥。心遠貌亦古。老衲同我來。得句時一吐。物色盡詩材。筆底隨指呼。行行更前之。繫纜日未暮。轉柂涉奔湍。支筇入幽塢。倦甚宿茅茨。睡熟不能寤。遲明又蓐食。凌風上前浦。重露雨點疎。晴嵐雲氣布。蝗蝻尙飛揚。禾稼難愛護。村落有狗偷。耄倪且狼顧。念此一悄然。回舟雙港渡。空羨皎然師。詩成有神助。



病中書懷丙子

鶴骨雞膚不耐寒。那堪癬疥更斑斕。開年慘淡陰兼雨。終日抓搔寢不安。未可給扶親几杖。豈能見客攝衣冠。人言剝復相更代。頻把韋編反對觀。





# 眉山詩鈔

唐庚字子西眉州丹稜人年十四能詩文賦明妃曲題醉仙崖諸作老師匠手皆畏之中紹聖進士爲州縣官至大觀始入爲博士張商英薦其才除提舉京畿常平商英罷相庚坐貶安置惠州會赦復官承議郎提舉上清太平宮歸蜀道病卒年五十一自南遷海表詩格益進曲盡南州景物略無憔悴悲酸之態劉潛夫爲其出稍晚使及坡門當不在秦晁下今觀其結束精悍體正出奇芒燄在簡淡之中神韻寄聲律之外雖云後出固當勝爾

## 憶昔行

憶昔方東來亭傳荒荆棘風庭紅葉乾雨砌蒼苔溼飢虎撥門開哀禽向人泣十載卻西還亭傳已完葺青鎖揖江山朱欄趁階級行旅糧不賚大路遺敢拾蜀道無難易人心自寬急寄信守亭者勿使狐狸入

## 張求

張求一老兵著帽如破斗賣卜益昌市性命寄杯酒騎馬好事人金錢投甕牖一語不假借意自有臧否雞肋乃安拳未省怕嗔毆坐此益寒酸餓理將入口未死且強項那暇顧炙手士節久凋喪舐痔甜不嘔求豈知道者議論無所苟吾寧從之遊聊以激衰朽



黎城酒

黎城酒貴如金汁。解盡寒衣纔一吸。獄曹參軍到骨窮。簿書吻燥何由溼。夜來細雨落簷花。對客惟有嘗春茶。明朝踏月趁早衙。免使路中逢麴車。

晝寢效魯直

雨餘熱喘殊喊呀。坐翻故紙腰足麻。鋪陳枕簟翠青紗。倒牀不復知橫斜。夢魂飛揚遠還家。故人見我一笑譁。須臾睡覺衙鼓撾。牆頭暝雀聲槎槎。

城上怨

雨似懸河風似箭。風號雨馳寒刮面。何處巡城老健兒。城上謳吟自哀怨。不知底事偏苦傷。聲高聲低哀思長。戍邊役重畏酷法。去國年多思故鄉。城上歌時夜方半。正是孤齋醉魂斷。和風和雨兩三聲。推枕投衾坐長歎。傳聞黠虜動熙河。戰士連年不解戈。今夜風號雨馳處。城上哀怨知幾何。

客至

山頭竹萬箇。風來玉相夏。下有屋數間。蕭然如佛刹。門無車馬喧。幽徑芳草茁。隔窗識君聲。遽起投筆札。黃雞未啄黍。環堵無可殺。園蔬煮淡泊。山泉啜甘滑。何以樂嘉賓。春禽日嘲哂。

聞東坡貶惠州



元氣脫形數。運回天地內。東坡未離人。豈比元氣大。天地不能容。伸舒輒有礙。低頭不得仰。閉口焉敢頽。東坡坦率老。局促固難耐。何當與道俱。逍遙天地外。

寄郭潛夫

我等游瀘江。泛舟奔楚宮。黔江自南來。胥會涪之東。黔江清且碧。瀘江濁而紅。紅碧不相入。分流如臥虹。羣瀦激湍濤。洶湧成戰攻。須臾盡變濁。混混顏色同。清固不勝濁。此理天下通。君視開成間。牛李爭長雄。要之贊皇子。不勝太牢公。物理自古然。徘徊歎無窮。

送趙元思司法

誰不從王事。夙夜獨匪懈。休沐猶坐曹。伏日不歸廨。平生熟大法。餘事止小楷。自稱霹靂手。作縣真癡疥。董宣雖強項。臨事中實駭。從君學吏禮。稍稍識起拜。今當告別去。何以贈行邁。二十罰自親。此理須少戒。到任後寄家兄

君子所就三。爲食最爲下。起家仰寸祿。此實下焉者。南山無敵廬。千里就館舍。但使食有魚。敢言曹乏馬。同寮皆故人。每事相假借。況復官長賢。醉歸應不罵。

送趙安道下第

大官危。小官卑。君不得官君勿悲。君不見前日宰相今海涯。胡椒八百斛。流落知爲誰。又不見州縣官。折



腰事細兒常憂一語不中治。敢對西山笏拄頤。大官危。小官卑。君不得官君勿悲。願君酒量如鴟夷。勿作瓶罌居井眉。與君賭取醉爲期。明日烏帽風披披。

中秋遇雨感懷呈世澤彥直

初遊東都年二十。清歡趁得中秋及。南陽會中酒徒集。惠和坊裏綉鞍入。蟹螯嘗新左手執。鷄頭未老掬玉粒。杯行到手不待揖。明月清風供一吸。纏頭不惜傾箱給。倚賴決科如俯拾。誰知得官反拘繫。此景此歡那復緝。今歲中秋雨如泣。窮山牢落秋光溼。孤燈熒熒照書笈。屈指流年如箭急。

讀邸報

當今求多聞。取士到蓬華。時時得新語。誰謂山縣僻。昨日拜御史。今日除諫官。立朝無負漢恩厚。論事不妨晁氏安。臺省諸公登袞袞。閉門熟睡黃紬穩。

訊囚

參軍坐廳事。據案嚼齒牙。引囚到庭下。囚口爭喧譁。參軍氣益振。聲厲語更切。自古官中財。一一民膏血。爲吏掌管鑰。反竊以自私。人不汝誰何。如摘頷下髭。事老惡自張。證佐日月明。推窮見毛脈。那可口舌爭。有囚奮然出。請與參軍辨。參軍心如眼。有睫不自見。參軍在場屋。薄薄有聲稱。只今作參軍。幾時得鴛鴦。無功食國祿。去竊能幾何。上官乃容隱。曾不加譴訶。囚今信有罪。參軍宜揣分。等是爲貧計。何苦獨相困。



參軍噤無語。反顧吏卒羞。包裹琴與書。明日吾歸休。

喜雨呈趙世澤

去年雨多憂水潦。今年雨少憂枯稿。都緣縣政失中和。水旱年年勤父老。前時雲起雨欲落。夜半風來還一掃。明朝引首望雲漢。屋上晨暎仍杲杲。賦輸百萬未破白。簿腳何緣得勾倒。上書自劾欲歸去。老婦挽衣傍奪藁。技窮往訴北山神。是夕沛然償所禱。稻畦穰稔勢已活。竹裏蕭疎聲更好。故應神意閔孤拙。苟免歲終書下考。便安杵臼伺秋成。雲子滿田行可擣。

蓬州杜使君洪道屢稱我于諸公聞之愧甚爲詩謝之

去天一尺古蓬州。年來除守得勝流。渠家本是城南杜。詩律賢我三千籌。如此才高卻解事。入眼人才皆可意。他邑猶分刺史天。片言每爲將軍地。故應憐我退無田。力相推挽令向前。傍人聞說皆撫掌。竹竿那使鮎魚緣。

嘲陸羽

陸子作茶經。竟爲茶所困。其中無所主。復著毀茶論。簡賢傲長者。彼自愚不遜。茶好固自若。於我有何恨。便當脫野服。浣琰爲一獻。飲罷挈茶去。譬彼澆畦碗。君看禰正平。意氣真能健。達與不達人。何啻相千萬。

戊子大水



踏歌喧喧雜鐃鼓。潭邊呼龍今作雨。龍噴揮水十丈餘。千村萬落幾爲魚。寄謝龍神且安處。熟睡深潭不驚汝。

夜半傳呼河入室。攬衣下牀深沒膝。舊來水不到譙門。老巫歸咎西門君。西門君去老巫舞。明年卻娶河伯婦。

除鳳州教授非所欲也。因作此以自寬。

人生纔食頃。何處分好弱。刑獄卽道場。筦庫有真樂。故紙終日翻。毛錐幾年閣。百函無力致。諸公誰說著。今承學授乏。頗訝名字錯。宿業豈無戀。得治不敢躍。骨肉遠難俱。囊裝貧易縛。師儒要好手。老大良非腳。夏盡識羹空。抽窮知繭薄。後生端所畏。人材若爲作。豈惟嘲孝先。便恐困有若。行路固知難。得地幸不惡。柳拖千丈絲。山集五色雀。絳紗諒無有。苜蓿聊可嚼。況聞豆積嶺。中有不死藥。

將家遊治平院

蓋老杜所謂東津也

年來官職如水樣。只有登臨作酌賞。好山一一如佳士。令人欲作傾家釀。昨日西樓弔王孫。今日東津悲逐臣。江邊勝事略尋徧。不見海棕高入雲。

受代有日呈談勉翁謝與權



老來忽忽流年緊。三見涪江秋葉隕。祗緣二子日相從。便覺一瓢窮可忍。東津曉作招隱賦。西樓莫得思歸引。文字能令酒盞寬。江山未放詩才窘。分題踴躍誰避席。得句歡呼同破準。泉名三逸本戲語。野史千年傳不泯。醉歸半路飛蝙蝠。餘興中宵伴蚯蚓。那知須鬢秃于筆。但見兒童長如筍。留滯甘爲西域胡。衰遲更結束遊鞞。故山咫尺未成歸。坐使蒼顏厚如脰。

與舍弟飲

溫酒澆枯腸。戢戢生小詩。詩中何等語。酒後那得知。黃菊遂行邁。徑去不復辭。拒霜猶屈強。其勢何能爲。但問酒有無。勿計官高卑。江邊捕魚郎。教我當啜醢。

劍州道中見桃李盛開而梅花猶有存者

桃花能紅李能白。春深何處無顏色。不應尙有數枝梅。可是東君苦留客。向來開處當嚴冬。桃李未在交遊中。卽今已是丈人行。肯與年少爭春風。

武興歌

去年山中無黍稷。只有蔞根併橡實。蔞根作麪如食蜜。橡實炊飯如剝栗。東家有錢食橡實。西家無錢惟食蔞。今年蔞盡橡實貴。山中人作寒蟬枯。

旣以前韻贈勉翁復懷庭玉因爲次韻



千金駿骨買虛名。驥老通衢價未平。逐去定知窮不死。向來元以句爲生。東風又見鶯朋友。北信難憑雁弟兄。欲寄此懷惟有月。天涯分與故人明。

游仙雲宮

出郭三竿日。橫江一葦航。雀飛田有麥。蠶罷野無桑。下馬危梯滑。開門古殿香。雨餘丹井溢。苔入醮壇荒。畫老星辰動。碑殘歲月亡。鐘聲落城市。符祝走村鄉。埜鳥啼巴蜀。山崖刻漢唐。臨歸更回首。惜此一襟涼。

直舍書懷

寸枉非吾志。休論尺與尋。黃披終日卷。青對十年衿。風眩藥囊減。雨昏茶碗深。楊雄名宦思。都向草玄沉。個處本來冷。此時仍更清。擁爐成久坐。曳杖卻徐行。暝色侵書帙。秋陰入鼓聲。悠然索馬去。祇此是功程。

夜坐感懷

聲斷鐘樓月。文書對坐時。破窗燈燄走。凍研筆鋒遲。名利髮將鶴。風霜手欲龜。何當一簑雨。披曉翦蓴絲。

述懷

名字雖云繫列曹。儒風門戶只蕭騷。頭顱自揣宜藏拙。指目何妨笑養高。本以食貧來仰祿。豈于王事更辭勞。老來精力堪驚歎。一紙文書輒數遭。

秋夕書懷



疊疊歲華侵。垂垂老境臨。時光自風雨。寒色到衣衾。萬竅號秋杪。孤燈照夜深。蛩聲亦清苦。唧唧伴人吟。

過田橫墓

成則爲王敗則亡。英雄成敗本尋常。滄溟無際何妨死。卻死東郊未耿光。九江梁楚竟誅夷。自古才高必見疑。脫使酈生猶未死。將軍來此亦何爲。

和程大夫荔枝

家在岷峩飽荔枝。十年遊宦但神馳。側生流落今千載。入貢稱珍彼一時。定自不將凡果比。如何偏與瘴烟宜。白頭莫作江南客。辜負山中故友期。

寓精道齋有感懷家山

論兵作賦兩忽忽。人事光陰轉首空。半夜夢飛山色裏。一年秋在雨聲中。揚州騎鶴非無意。上蔡牽黃信此窮。幸有林泉未歸去。欲將清興問征鴻。悠悠功業老堪憐。舊事憑誰可共論。直欲酒中賒快樂。尙能花裏覓寒溫。詩書誤我成何事。歲月侵人不見痕。汾水年年秋雁到。庾郎何處不銷魂。

晚春寄友人

眼底春愁惱殺儂。揚州往事旋成空。風流只合稱狂客。衰颯何堪作病翁。水國春深梅子雨。江天日暮鯉



魚風何時執手同尊酒。收拾清歡笑語中。  
滿眼蕪菁斷送春。多情饒病兩關身。只知老去人心改。不覺愁來酒盞頻。霜鷗空拳知有命。溟魚竭水恐傷神。丈夫出處端無據。猶欲辭家再入秦。

春日雜興

愛梅長恐着花遲。日禱東風莫後期。及得見梅還淡冷。東風全在小桃枝。  
茸茸小雨弄春晴。已有狂花未見鶯。便使一年惆悵在。曉窗寒夢別輕盈。  
短帽輕衫信馬行。郊原春色太牽情。兔葵燕麥混閒事。最有蕪菁到處生。  
月團新碾破春醒。賴有歸鴻寄好音。人在天涯莫回首。恐偷華髮上瑤簪。

別閩中許秀才

臨岐長歡息。此歡意深微。浮世年年別。初心事事違。捫參蜀道遠。犯斗海槎歸。故國有餘樂。黃雞秋正肥。

灌息軒

仙家林館碧雲圍。掃卻浮塵晝掩扉。萬事年來俱是幻。一瓶朝汲已忘機。花深曲徑春無盡。人在閒庭鳥不飛。見說漢陰今復有。欲凌霄漢挹清輝。

書新堂



登茅重葦一堂新。設榻聊安簿領身。落枕不知鶯樹曉。污書長苦燕泥春。嶽官何預青苗事。野意新便白葛巾。能向此間時得趣。何須分外拜車塵。

除夕感懷

永漏侵春已數籌。地爐猶擁木棉裘。無心豈畏三屍詆。愛日還驚一歲休。故國二千空醉眼。新年三十恰平頭。光陰未用相敦迫。領取衰翁兩鬢秋。

春日郊外

城中未省有春光。城外榆槐已半黃。山好更宜餘積雪。水生看欲倒垂楊。鶯邊日暖如人語。草際風來作藥香。疑此江頭有佳句。爲君尋取卻茫茫。

自笑

已白窮經首。仍丹許國心。那能天補綻。更欲海填深。兒餒嗔郎罷。妻寒望藁砧。世間南北路。何用爾沾襟。直舍夜坐

強仕似幼學。細書仍短檠。月來吟處白。風及醉時清。坐久露微濕。更深秋有聲。不知愁底事。終日自悲鳴。

內前行以後係惠州詩

內前車馬撥不開。文德殿下宜麻回。紫薇侍郎拜右相。中使押赴文昌臺。旄頭昨夜光照牖。是夕收芒如



禿筓明日化爲甘雨來。官家喚作調元手。右相視事明日始得雨之喜甚。書商霖二大字賜之。周公禮樂未要作。致身姚宋也不惡。向來兩翁當國年。民間斗米纔四錢。

長沙示甥郭聖俞

我昔官闕中。子時趨長安。相過日夜飲。肯使笑語乾。但知醒復醉。誰問甜與酸。攬衣步中庭。仰首羨飛翰。誓言早歸休。慎勿貪高官。時未有添丁。眼前惟木蘭。甥舅一分背。日月雙跳丸。那知十年外。相見西江干。拜起未寒溫。悲來各沈瀾。我鬢已禿翁。子顏非渥丹。相從海上志。茲事人所難。阪行白漭漭。山宿青攢攢。人烟小歲後。草木深冬完。昨日次長沙。扁舟掠湘灘。中流遭惡風。滿衣潑驚湍。船如箕尾點。天作車輪團。怖畏目敢側。禱祈指頻彈。向非鬼神助。幾作蛟龍飡。忠信時可憑。聖賢豈吾謾。勿畏嶠南熱。我清物自寒。勿憂海邦陋。心廣身亦寬。磨刀砍鯨鱠。隱几看鵬搏。努力近藥物。明年理歸鞍。得之兩鴻鵠。龜筒不須鑽。

張曲江鐵像詩

像在韶州。韶人相傳。明皇悔時所鑄云。

開元太平久。錯處非一拍。就令乏賢人。何至相仙客。直道旣凋喪。曲江遂疎斥。汲黯困後薪。賈生罷前席。金鑑束高閣。鐵胎空數尺。妙處難形容。英表良髣髴。摩挲許國姿。尙想立朝色。同時反棄置。異代長歎息。

湖上

佳月明作哲。好風聖之清。湖邊得二友。夜語投三更。煙露兩相濕。水天參互明。散衣芭蕉涼。曳杖桄榔輕。



星走拋餘光。山空答虛聲。歸矣不可留。過幽恐神驚。

雙榕

冰東雙榕間。有叟時出遊。清風衣履古。白雪鬚髯虬。吟哦明月夕。簸弄寒江秋。驚傳里中兒。不泊岸下舟。君看鬼趣中。有此風味不。安知非黃石。但恨無留侯。此生鉏犁手。誤入簪紳流。無功折毫髮。負罪平山丘。政爾求澡濯。聞之歎綢繆。振衣倘可親。跪履安敢羞。得聞半偈語。一解終身憂。性不喜伐國。兵書非所求。

大熟行

去年大雪埋尺筮。水北荔枝遭凍死。共嗔北客帶寒來。我欲分疏誰受理。今年諸峒十分熟。東江不下龍川米。南翁北客兩欣然。孰與忍飢滄荔子。

蜜果

臣聞矢旦雞。已曉猶強鳴。書生坐口窮。抵死輸血誠。嶺南貢蜜果。海道趨彤庭。黃蜂樂受職。紫鳳助揚舲。忠勤雖云至。思慮良未精。由來瘴癘鄉。不識霜雪情。土風不待講。氣象昏如醒。秔稻秔稻熟。水泉水泉腥。而況野果實。豈足奉聖明。未論體性殊。已覺面目生。食之倘有補。勞者甘如飴。政恐無裨益。所出非和平。上林寧少此。下箸安可輕。軒轅嘗百毒。上古雜神靈。武王嗜鮑魚。幾諫仗老成。葛藟復何有。葵藿但自傾。

圓蛤



黃犢鳴水中。相顧皆愕然。探之亡所得。有蛙僅如錢。持問傍舍翁。云此號圓蛤。夏潦漲溝渠。喧呼自酬答。卒然聞其聲。謂當可專車。既見一撫掌。寸莛量有餘。物生元氣中。小大各異趨。蛙質黃牛鳴。持此欲誰附。我居固已陋。爾鳴良亦村。綿蠻轉黃鸝。我今思故園。

白小

二年遵海濱。開眼即浩渺。謂當飽長鯨。餬口但白小。百尾不滿釜。烹煮等芹蓼。咀嚼何所得。鱗鬣空紛擾。向來巨魚戲。海面橫孤嶠。噉喙噴飛沫。白雨散晴曉。終然不省錄。從事此微眇。短長本相形。南北無定表。泰山不為多。毫末夫豈少。詞雄兩月讀。理足三語妙。人生一漚發。誰作千歲調。安能蹲會稽。坐待葦年釣。

瘡疾寄示聖俞

體中初微温。未勢如湯鑊。忽然毛髮起。冷撼如振鐸。良久交戰罷。項背如釋縛。尙覺頭涔涔。眉額如鑷鑿。空日一寒暑。有準如契約。伏枕兩晦朔。枵然如空橐。平生十圍腰。病起如飢鶴。衰髮本無幾。脫去如秋籜。到今僅能步。出沒如尺蠖。舊聞五嶺法。有此萬戶瘡。而我自僑寓。了不蒙闊略。況子又持養。何至亦例著。此身自空虛。客疾安所托。請作如是觀。無病亦無藥。

示蜚

先君捐年館。六十畸三算。我今四十三。始得幼子蜚。餘齡繼前躅。蜚也纔及冠。況復未可知。孝章積憂歎。



祿養豈不欲。茲事覺已緩。但愛眉目秀。體質淨如盥。顧瞻既精神。懷抱亦氣岸。今者新剔髮。瑩若珠未貫。見之令人清。面擁疲手腕。輒然攬吾鬚。霜雪落几案。豈惟不肯噴。更對一笑粲。骨肉今已矣。持汝慰奔竄。行當從諸兄。誦書喧里閭。而我于經術。粗能分句斷。發蒙要師資。心孔爲關鍵。許慎專偏傍。張華休史漢。吾家業儒久。捨此無別段。不應緣一噎。便欲廢炊爨。及親三釜足。未用萬戶鄼。人生百年期。我今特未半。

夢泉井引

潮陽尉鄭太玉夢至泉側飲之甚甘明日得之東山上因作夢泉記示余命作此詩

入道肯着相。出神得佳泉。起尋定中境。謾意山之巔。四人蹋蹴戲。數里聞潺湲。循聲到巉絕。滿意流甘鮮。雖深石可數。太察魚難筌。分爲縞練去。濺作珠璣圓。一窺宿醒解。三嚙沉痾痊。恍惚尙疑夢。歡呼欲成顛。山間知子井。海飲鹹生涎。那知道在邇。幾作野遺賢。事故由人興。物爲知己妍。誰陪濠上游。詠攜室中天。雖無十丈花。中有一滴禪。名酒覺殊勝。宜茶定常煎。蘭亭羽觴冷。魚復青筒連。新文來遠矣。開卷猶潒然。徑欲抱琴去。臨流聽未全。不但受以耳。庶幾神者先。寫爲夢泉操。第入樂府篇。卻將輒復卻。萬事付有緣。

鳴鵲行

簷前羣鵲鳴相呼。法當有客或遠書。吾今何處得書尺。而況賓客乘軒車。平生眼中抹泥塗。泛愛了不分賢愚。卒爲所賣罪滿軀。放逐南越烹蟾蜍。百口寄食西南隅。三年莫知安穩無。家書已自不可必。更望故



人雙鯉魚。故人頃來絕能疎。況復萬嶺千江湖。雞肋曾是安拳餘。至今畏客如於菟。豈惟避謗謝還往。此日誰肯窺吾廬。杜門卻掃也不惡。何但忘客兼忘吾。喧喧鳴鵲汝過矣。曷不往噪權門朱。

採藤曲効王建體

魯人酒薄邯鄲圍。西河渡橋南越悲。歲調紅藤百萬計。此貢一作無窮時。去年採藤藤已乏。今年採藤藤轉竭。入山十日脫身歸。新藤出土拳如蕨。淇園取竹況有年。越山採藤輸不前。今年輸藤指黃犢。明年輸藤波及屋。吾皇養民如養兒。鑿空爲此謀者誰。

冬雷行

百蟲蟄處安如家。阿香夜起推雷車。一時技癢不忍爬。撼動尺蠖掀龍蛇。龍蛇尺蠖踞已久。亦欲奮迅舒頑麻。夢中一震忽驚躍。發破堦戶排泥沙。泥沙已出雷遽止。錯愕欲去難藏遮。蟲蛇狼狽莫知數。間有伏龍吁可嗟。

贈譚微之

去年絃歌程水濱。甌中生塵范史雲。今年講學鵝城裏。關西孔子楊伯起。昔人論士觀心期。時人論士看肉皮。只知黃鷄矜觜爪。不識騶虞避生草。

北歸至廣州寄惠州故人



歸心如躍馬。奮迅不可駐。別情如放猿。已去猶返顧。三年孺子社。數借柱史書。好在五噫孫。善保千金軀。舊來談天口。老去盡地力。萬里不相忘。寄聲問眠食。

南遷

去去寬鄉托此蹤。鬧中無地頓衰翁。未誅綺語猶輕典。更賜羅浮有底功。蝦菜賤時皆丙穴。茅柴美處卽鄆筒。着鞭要及春前到。趁賦梅花庾嶺東。

渡沔

鶴歸遼海悲人世。獵入巴山叫月明。惟有沙蟲今好在。往來休並水邊行。

武陵道中

朝持漢使節。暮作楚囚奔。路入離騷國。江通款乃村。垣墻知地濕。草木驗冬溫。寂寞桃源路。行人祗斷魂。長沙道中

古古今今路。朝朝莫莫行。橘林香處飯。杉木翠邊程。山帶湘靈慘。川含楚些清。江湖無限句。遷客要才情。

次泊頭

何處不堪老。浮山傾蓋親。潮田無惡歲。酒國有長春。草木疑靈藥。漁樵或異人。近前端有得。丞相未宜嗔。

初到惠州



盧橘楊梅乃爾甜。肯容遷謫到眉尖。因行採藥非無得。取足看山未害廉。辯謗若爲家一喙。著書不直字三緘。老師補處吾何敢。政爲宗風不敢謙。

謝人送酒

世情不到海邊村。載酒時來餉子雲。便欲醉中藏潦倒。已將度外置紛紜。細思擾擾膠膠事。政坐奇奇怪怪文。喚取鄰翁傳杓飲。漸令安習故將軍。

水東感懷

往事孤峯在。流年細草頻。但知其室邇。誰識所存神。碑壞詩無敵。堂空德有鄰。吾今稍好黠。終日酒邊身。

登栖禪山

海雨山煙撥不開。眼前遮定<sub>一作盡</sub>望鄉臺。如何借得維摩手。斷取西南故國來。

收景初書并示藥物

乾坤心腹友。江海鬢毛班。藥補他鄉闕。書開故<sub>一作去</sub>國顏。何時乘下澤。此日仰高山。會是歸耕耦。由來有

賜環。

九日懷舍弟

重陽陶令節。單闕賈生年。秋色蒼梧外。衰顏紫菊前。登高知地盡。引滿覺天旋。去歲京城雨。茱萸對惠連。



收家書

西州消息到南州。骨肉無它歲有秋。驥子解吟青玉案。木蘭堪戰黑山頭。即時旅思春冰拆。昨夜燈花黍穗抽。從此歸田應坐享。故山已為理菟裘。

瀘人何邦直者為安溪把截將有功不賞反得罪來惠州貧甚吾呼與飲為作此詩

楚人季布以勇顯。魯國朱家用俠聞。馳馬彎弓臣好武。吹毛洗垢吏深文。王孫此日誰漂母。卿子前時號

冠軍。滿引一杯齊物論。白衣蒼狗任浮雲。余在惠州。作酒二種。其和者名養生主。其稍勁者名齊物論。後禁主字。遂志其一。

除夕

患難思年改。龍鍾惜歲徂。關河先壘遠。天地小臣孤。吾道憑溫酒。時情付擁爐。南荒足妖怪。此日謾桃符。

人日

人日傷心極。天時觸目新。殘梅詩興晚。細草夢魂春。挑菜年年俗。飛蓬處處身。墓頤頻語及。髣髴到東津。

栖禪暮歸書所見二首

雨在時時黑。春歸處處青。山深失小寺。湖盡得孤亭。

春着湖煙膩。晴搖野水光。草青仍過雨。山紫更斜陽。

白鷺



說與門前白鷺羣。也知從此斷知聞。諸君有意除鈞黨。甲乙推求恐到君。

有所歎

林中宴坐老沙門。豈願臨年觸垢氛。正恐先生不得飽。欲令後死與斯文。近逃台鼎居東洛。聞道衣冠滿北軍。須信此塗天一握。人間謾說有孤雲。耕田佩印兩徒然。憶想平津只去年。怪底功名稱地獄。誰將官府到天仙。是非已付漁樵判。疑信難憑黨與傳。杯酌豈能通大道。床頭當得酒如泉。

舍弟書約今秋到此

此日方收信。前時已具舟。開頭今幾月。軟腳定中秋。涼德爲兄忝。炎荒爲爾憂。從今西望眼。應到見時休。夜坐懷舍弟

無雲仍露坐。有月更江臯。沉陸傷吾道。浮生憶爾曹。扁舟應夏口。此夕數秋毫。不見今三載。當時已二毛。送外甥之廣州

由也久從我。牢之真有甥。時情爲客老。秋色進泉清。撥刺朝朝味。鈞轉處處聲。越臺休弔古。旅魄向來驚。九日獨酌

登高無老伴。引滿自高歌。歡意天邊少。重陽野外多。黃花空歲月。白首尙關河。他日龍山興。吾今在網羅。



壬辰九月二十三日天氣始寒以詩記之

朝來怪底冷。前此已重陽。漸逼袴襦節。稍聞灰火香。煙嵐向冬淨。橘柚得霜黃。嶺表雖多暑。天時亦有常。

寄潮陽尉鄭太玉

又種羅浮一熟田。江陽未得返耕廛。書來似見眉間印。別後新增鬢上年。下澤有車人誤矣。上林無報雁徒然。去歲引自陳無報越巫雞卜聞之久。爲問行藏若箇邊。

次鄭太玉見寄韻

度外歸期未要論。故山石笋自高蹲。他時名譽牛心炙。晚歲窮空犢鼻褌。君有詩書並畫絕。我無德爵但年尊。音塵不繼應相悉。萬事而今付默存。

壬辰九月不雨至巳年三月穡事去矣今夕輒復沛然喜甚臥作

老去生涯白木鑱。脫逢艱食更何堪。春深野色憂年惡。夜半簷聲覺雨甘。睡外莫聽泥活活。想中已睹麥含含。明朝竹徑添幽事。玉板堂頭作小參。

舍弟既到有作

武陵倉卒記他時。我獨南翔子北飛。覩過幾多歸後事。相看仍是別時衣。匪躬老矣惟心在。便腹依然但髮稀。尚有苦吟三十載。與君同飽蜀山薇。



收景初貶所寄

信斷常懷信斷憂。得書還有得書愁。未應宿業都相似。總爲譏聲不肯休。見說胸中卷雲夢。莫將皮裏貯陽秋。而翁有道知興廢。不患無詞詣播州。

次勾景山見寄韻

此生正坐不知天。豈有豨苓解引年。但覺轉喉都是諱。就令搖尾有誰憐。腰金已付兒曹佩。心印還當我輩傳。他日乘車來問道。葦間相顧共延緣。

夜聞蜚戶叩船作長江礪欣然樂之殊覺有起予之興因念涪上所作招漁父詞非是更作此

詩反之示舍弟端孺

當年無奈氣狂何。醉檄涪翁棄短蓑。晚落炎州磨歲月。欲從諸蜚丐煙波。與君共作長江礪。況我能爲南海歌。身世卽今良可見。不應老子尙婆娑。

北風累日不止寒甚寄鄭潮陽

山前臘雪想紛紛。風到南訛盡處村。衾面不容存酒子。牀頭幾欲爨桐孫。園林呼舞知衰怯。窓戶奔馳覺眩昏。咫尺潮陽五袴國。可能分我一襦溫。

卽事



歸心急似瀧頭水。華髮多于嶺上梅。正是堯朝猶落此。當時湘浦亦宜哉。  
還家久近書難寫。破屋陰晴榻屢移。吾道非邪來曠野。人生樂爾復何時。  
案頭行掃塵隨起。窓眼纔封雨又稍。更力窮空沽白餅。莫將疲蘼鬪黃茅。

遣興

僧寺借經便大字。鄰墻喚酒及新菖。三年于此得其理。一飽已還非所求。  
酒經自得非多學。詩律傷嚴近寡恩。田里歌呼無籍在。朝廷議論有司存。

春日謫居書事

四十緇成素。清明綠勝紅。形容千慮後。門館一貧中。白日時時別。青燕處處同。此生脣舌裏。啼鳥莫春風。  
大觀四年春。吾與友人任景初。舍弟端孺。自蜀來京師。至長安。時方寒食。吾三人相與戎服遊。  
九龍池。飲酒賦詩。樂甚。是歲吾遷嶺表。明年景初亦謫江左。忽忽數歲。皆未得去。寒食無幾。  
念之悽然。詩作寄任。因命舍弟同賦。

居今行古任定祖。底事遷延亦未歸。我坐力田傷地脈。君緣搜句漏天機。故都回首三寒食。新歲經心兩  
褐衣。學道一生凡幾化。不因到此始知非。

乙未正月丁丑。與舍弟棹小舟窮西溪。至愁絕處。度不可進。乃歸。溪側有兩榕。甚奇。清陰可庇。



數十榻。水東老人常飲酒。其下云。

楊梅溪上柳初黃。荆竹岡頭日正長。獨木小舟輕似紙。一尊促席穩于床。樹從坡去無人識。水出山來帶藥香。應有居民解秦語。爲言昭代好還鄉。

有感示舍弟端孺

一出潼關五見梅。愚忠幾欲伴黃埃。弟兄手足窮孤竹。母子肝腸泣老萊。好語忽從天上落。行人直向海邊回。此生報國無他事。力穡供輸莫待催。

長沙竹笋聞于天下。大者可十餘斤。食之甚甘。而不冰脾。昔渡湘。欲作詩。未暇也。今日復過之。乃酬以此篇。

地入長沙莫歎卑。竹萌徑尺舊相知。九重纔復金門籍。萬里先參玉版師。契闊累年真負口。徘徊彌月未妨脾。渭川風味那能對。中有離騷九辯辭。

雜詩

屏跡舍人巷。灌園居士橋。花開不旋踵。草薶復齊腰。蛤哭明朝雨。雞鳴闇夜潮。未能全獨樂。鄰里去還邀。已絕經年筆。仍開盡日門。身謀嗟翠羽。人事嘆榕根。蔬食風掀市。樓居水破村。嶺南霜日薄。何得髻邊繁。便歸良不惡。未去且隨緣。戶口知無瘴。謳歌覺有年。藤牋得句後。桂酒抱愁邊。經術吾衰矣。猶堪舉力田。



不死良難學。全生或可幾。茶隨東客到。藥附廣船歸。碁倦收成敗。書慵卷是非。關心無雜慮。魂夢入精微。兀坐且如此。出門安所之。手香柑熟後。髮脫草枯時。精力看書覺。情懷舉盞知。炎州無過雁。二子在天涯。飽食爲茶地。深耕覓酒材。翻泥逢暗笋。汲井得飛梅。湖盡船頭轉。山窮屐齒回。田間良自苦。清興亦悠哉。壯歲日千里。晚途天一方。花縵聊傲世。白衿亦隨鄉。團扇侵時令。方書遣晝長。此間吾所樂。便擬卜林塘。

雜興

白日消諸妄。青山對屢空。著書防惡客。學圃問鄰翁。織貝流肌滑。檳榔入頰紅。丹砂落吾手。秋至任飄蓬。多事定何補。寡言聊自溫。蟹黃噴止酒。雞白勸加飧。濯足樓船岸。高歌抱朴村。愧無臈可禦。只益負君恩。鬧窄良難入。閒寬足見容。竹根收白疊。謂竹布木杪得黃封。謂椰酒問學兼儒釋。交遊半士農。行歌村落晚。落日滿攜筇。

爲農沙子步。附保水西鄉。隱几江天遠。開門佛土香。時情荒徑草。埜色淡一作淨漁梁。欲縱高秋日。東偏短作墻。

舊物杯中酒。新銜海上翁。百非無一是。顯過豈微功。引水江分碧。烹丹井爲紅。幽居亦多事。度日不全空。小市江分破。連萍水卷翻。到今佛跡在。千古鶴峯尊。浮嶠來何處。豐湖入數村。登臨有何好。秋至數消魂。已分詩驅使。寧辭酒過差。南烹人釣蛤。北信客占鴉。年事侵膚理。憂端宿肺家。向來功業興。到晚詠餘霞。



覆載宜然等。寒暄乃爾殊。雪曾前歲有。地過此邦無。煮海鯨鯢動。烹山虎豹呼。南來何所得。詩語帶陬隅。  
夜語不覺久。晨興良獨難。加之得卯酒。晚矣恰朝飧。笋蕨春生箸。魚蝦海入盤。南方禁太飽。茗椀直須寬。  
海氣東南上。野煙申酉間。草平連別洞。雨轉入他山。道路魚鹽去。樵蘇竹木還。西江并北客。相對各蒼顏。  
水過魚村濕。沙寬牧地平。片雲明外暗。斜日雨邊晴。山轉秋光曲。川長暝色橫。瘴鄉人自樂。耕釣各浮生。  
浪迹蒼梧外。放懷黃木東。人情雙鬢雪。天色屢頭風。國計中宵切。家書隔歲通。爲儒得愁思。一笑賴兒童。  
萬里非吾土。三年失我常。只愁鳶跼跼。敢作鶴昂昂。白竹連閩越。黃雲入夜郎。何時返栖息。誰爲問桃娘。

閒居

未許幽人曉夢長。朝朝親炷佛前香。有詩爲愛袁家酒。無病緣抄陸氏方。身雜蠻中誰是我。食除蜿外總  
隨鄉。白沙翠竹門前路。疑出西郊向草堂。  
細細敲門細細應。老翁方曲晝眠肱。魚陂舊種千頭鱸。桑徑新窠十畝繒。菜足尙堪分地主。米餘翻欲供  
鄰僧。平生雖有乘桴興。咫尺滄溟去未能。

聞勾景山補蓋屋丞仍聞學道有得以詩調之發萬里一笑

人言蓋屋似江湖。莫對丞哉歎負余。別後耳根無正始。向來紙尾得黃初。可憐鬼谷縱橫口。今讀神溪縹  
緲書。臣朔許長錢許少。何當天子念公車。



遣興

八千岐路愁何補。四十光陰老亦宜。此去只堪犀首飲。向來都是虎頭痴。逢時有道其如命。得意無言所恨遲。詩債卽今渾倚閣。新篇惟有莫相疑。

春歸

東風定何物。所至輒蒼然。小市花間合。孤城柳外圓。禽聲犯寒食。江色帶新年。無計駢愁得。還推到酒邊。

鄭太玉送子魚

便當權閣太常齋。藥竈于傍手自煨。須信子魚藏妙理。坐令母蟹媿凡才。刀頭定向何時得。劍脊頻將好意來。老去少陵雖病肺。尙堪持此薦寒醅。

江漲

秋來雨似澆。雨罷水如潮。市改依高岸。津喧救斷橋。雲陰哭鳩婦。池溢走魚苗。天意良難測。前時旱欲焦。

代書寄鄭二

別後定何似。此中難具陳。倦憎秋氣濕。老怯曉煙辛。沸議今方爾。歸期覺愈伸。須煩三絕手。時復餉清新。

夜久睡覺不復能寐淒然有感

無復更殘暑。夜深清欲飢。葉飛魂夢數。露重語音知。月色到秋苦。更聲臨曉遲。平生憎墨翟。老去亦悲絲。



立冬後作

啗蔗入佳境。冬來幽興長。瘴鄉得好語。昨夜有飛霜。籬下重陽在。醅中小至香。西鄰蕉向熟。時致一梳黃。

端孺糴米龍川得粳糯數十斛以歸作詩調之

倒拔孤舟入瘴煙。歸來百斛瀉豐年。炊香未數神江白。名米釀滑偏宜佛跡泉。飽去定知頻夢與。醉中何至便妨禪。憑君爲比長安米。看直公車牘幾千。

謾成

雲暗便窓破。山寒賴屋低。往還天外少。早晏雨中迷。書冊開仍闔。履聲東復西。何常有所賦。得句旋安題。

聞鄭二對吏五羊

舊友年來略散亡。新收鄭子亦遑遑。歲云暮矣無雙雁。我所思兮在五羊。獄吏事權先自貴。書生蹤跡況能狂。風流人物今餘幾。何忍羣兒復謗傷。

東麓

經旬不見小羌廬。忽爾相逢喜欲呼。自入秋來更韶潤。卻從瘦裏帶敷腴。人間信有傷心碧。坐上那無滿眼沽。可是清暉解娛客。能令腸斷到愚儒。

野望



賴有澄江在。專供倚杖清。水裁偏岸直。雲截亂山平。鞞鼓知農隙。雞豚覺歲成。卻緣搖落後。木杪得孤城。

獨遊

是日游子獨。幽情知者誰。時光新舊歲。節物淺深枝。鴉攬春祠敏。鳶窺野燒痴。田園有妙理。吾悔得之遲。

醉眠

山靜似大古。日長如小年。餘花猶可醉。好鳥不妨眠。世味門常掩。時光簞已便。夢中頻得句。拈筆又忘筌。

重陽後二日從無盡泛舟游處士臺故詩人秦龜從所居

阜河經雨水。微妙船帖臺。根日未斜。三徑就荒悲。白土一樽相屬對。黃花已將遠眺收。平楚更遣清言到。永嘉要見仙翁頭。似漆請看醉後落烏紗。

生還至宜都逢李六

更把餘年着酒澆。莫談前事費燈挑。地緣有語封還止。印爲無功鑄復銷。賴是詩書能卻瘴。到今魂夢亦聞潮。頭西歸去君休怪。尾段無多不奈焦。

將赴闕有感示聃

老畏高門地。慵便下澤車。終然嬰世網。難作愛吾廬。白首趨行在。青袍奉起居。平生誇好手。到此不如疏。

次韻幼安留別



白頭重踏軟紅塵。獨立鵝行覺異倫。往事已空誰故舊。好詩乍見且嘗新。細思寂寂門羅雀。猶勝纍纍塚  
臥麟。力請宮祠如意否。漸謀歸老錦江濱。





# 鴻慶集鈔

孫覲字仲益。嘗提舉鴻慶宮。故自號鴻慶居士。五歲時卽爲東坡所器。第政和間進士。靖康俶擾。爲執法。爲詞臣。旋由瑣闥歷吏戶。長貳連守大邦。紹興而後。遭值口語。斥居象郡。久之。歸隱太湖二十餘年。孝宗朝。命編類蔡京王黼等事實。上之史官。年九十餘卒。由其居閑久。故問學深誠。有宋之作家也。獨以其誌。萬俟卨之墓。嘉靖間。常州欲刻鴻慶集。邑人徐問曰。覲有罪名教。其集不當行世。遂止。嗚呼。斯言固秋霜也。今不廢其詩者。以見有詩如此。而不得列於作者。欲立言者。知所自重耳。

## 湖州天寧寺飲王生二首

莫鬪蝸兩角。且共貉一丘。夷踞坐我旁。汝豈河南騶。割肉一噉之。徐以大白浮。噲伍君勿譙。笑談起封侯。諸家迹便掃。得此一老兵。江東醉司馬。酒中尙求名。哀哉南山箕。不平自號鳴。慎勿歌烏烏。作此老婢聲。

## 富陽道中二首

渺渺行雲幔。溶溶曳水衣。雷翻巢墮乳。風落網粘飛。獨拄青藜杖。來推白板扉。平生丘壑趣。漂泊寸心違。白帽炎州客。青裙酒姥家。微風搖扇浪。細雨落簷花。客舍休占鵬。蠻村欲饌蛇。會令醒復醉。高枕送生涯。

## 蘭溪津亭病起



風波湧地千漚發。創瘡鑽皮百箭攻。藥裹關心防二豎。謗書盈篋忤三蟲。剖瓜女隸方祈巧。結柳奴星也送窮。笑我平生持螯手。未應咄咄左書空。

三衢聞都督兵潰常潤間懷舍弟而下

紫荊有信欲開花。黃犬無情不到家。偶坐厭聞烏嚶嚶。杯行喜聽鵲查查。同看明月人千里。相望孤雲海一涯。驥子熊兒無恙否。風雲慘澹鬪龍蛇。

疎山寺次白文林韻二首

藜杖忽忽集晚林。長廊破壁撼鐘音。天涯流落相逢地。杯酒殷勤莫厭深。萬里功名飛燕領。千金博飲鬻牛心。更聞好句驚人倒。一洗蠻煙瘴露侵。黃花翠竹小叢林。臥聽南山白石音。蠲鬪已空遺塚在。蝸跬終戀故廬深。掀髯一笑追前謬。禮足同參看此心。且向疎山結香火。人生莫受二毛侵。

明水寺五代末危全諷據臨川時所建畫像至今存焉寺旁最高峯有祠屋一區道士居之

臺殿何年有。千巖紫翠間。金僊佛世界。羽客道家山。骨朽餘三窟。皮存尙一班。傷心千古淚。相伴雨潺潺。

崇仁縣

萬山攢擁天一笠。北風吹雨兩鬢濕。飢鳥絕叫護巢飛。老蛟怒起擎雲立。孤城短日砧杵急。騎驢渺渺衝



泥入桑枝倒折機杆空。道傍廢井無人汲。遺民到今傳舊邑。擊水華鯨浪三級。故物漂流首戰餘。客子起坐萬感集。小驛香醪如雪汁。一杯快作長虹吸。酒醒寂歷照短檠。幽咽數聲鄰婦泣。縣人喜競渡。亂後如故。

遣興

亂後煎百慮。老去無一欣。故人尺書至。好語中夜聞。坐久百蟲絕。開簾月紛紛。長歌侑一醉。酒醒擊空尊。

山行憩田舍老父出迎以黃甘白酒爲餉

藜杖扶來雪滿簪。諄諄語好意深深。酒傾白墮杯行玉。橘破黃苞坐釘金。醉起莫辭田父肘。甘餘須識野人心。匆匆不盡扳留意。挽袖丁寧更一臨。

兩日復往次前韻

寒蔬離離銀線亂。臨川出蔬號銀條。凍醴濼濼玉井深。坐蔭庭松翹翠蓋。行穿野菊布黃金。犬迎客入喜見尾。鵲

隨人語欣會心。俗裏淹留怕轅釜。驅兒招喚得重臨。

明水達老以黃甘荔子土芋爲餉小詩答謝

客居莽牢落。幽絕無四鄰。歲窮有衣結。日晏猶甑塵。偪仄戎馬間。敢厭薪水勤。故人情義重。采采青泥芹。小摘持寄遠。分餘爲情親。丹荔擘輕圓。黃甘破芳辛。蹲鴟勸加餐。風味亦可人。渺渺山澗曲。浩浩水雲晨。踞爐有前諾。兩翁對然薪。眼纈眩紅綠。共此無邊春。



次韻王子欽立春

歲晚驚呼身已老。天涯流落首空回。便將酒力推愁去。且放春光入眼來。人語嘻嘻爭鬪草。宮花閃閃豔粧梅。雪消水暖春江動。綠漲蒲萄萬斛醅。

遊東塔雨中夜歸

山色凌寒春尙瘦。潭影涵空清可漱。漠漠雲行紫翠間。斑斑雨濕黃昏後。火炬穿林鳥出巢。人語闐門狗窺竇。杖藜有興會重來。更待黃鸝哢晴晝。

清明日與范季實諸人過胥澤民別墅小集

水滿雙飛白鷺。花深百轉黃鸝。寒食清明過了。一川煙草離離。兀兀三杯卯困。昏昏一枕春融。酒醒落花風裏。夢回啼鳥聲中。

曹山絕句

毀瓦區區爲食謀。半生炊黍在刀頭。一塵會入扶犁手。不上陳登百尺樓。

題妙覺寺壁

葉底紅稀不見花。枝頭綠暗可藏鴉。春歸古殿蒼苔滿。一點籠燈隱絳紗。

再至



老眼逢春病有花。淋浪醉墨字如鴉。懸知不是唐王播。慙愧高僧護碧紗。

宿妙覺竹菴贈靜老

青山暎落日。澹澹煙中明。出門無所投。曳杖隨意行。破衲僧兩三。喜笑爭邀迎。曾巢俯修行。飛星動高甍。老人如宿昔。真契同三生。遇人無戚疎。出語惡不情。寥寥風馬牛。肝膽欲盡傾。怪我胸中山。硤兀尙不平。邯鄲樂無度。短夢一餉榮。蠻觸怒不休。暴骨千里橫。微言起我病。內愧面汗駢。蚤知天宇大。豈有世網嬰。舉扇障西風。浣此滄浪纓。

別如老

同舟無胡越。四海皆弟兄。吾人雖晚接。一笑蓋已傾。世亂識真態。塗窮見真情。曳杖扣禪扃。撞鐘聽鞀鳴。小窗風雨夜。對此二榻橫。吾身如木偶。春至不復榮。豈無三宿戀。天雨方流行。去去得首丘。歸田克踐更。徙寓妙覺佛舍。胥又民襍被。相過賦夜坐。

客居厭窮獨。蓬艾翳環堵。莊鳥尙越吟。鍾儀猶楚語。吾人有奇操。空洞見城府。相逢逆旅中。霧豹初一睹。拘囹賦囚山。避謗憎市虎。褰裳肯過我。崖嶠走風雨。微吟對清夜。破此五月暑。墜露浥金莖。空花墮犀塵。孤燈映籠紗。冷豔翳復吐。耿耿遂不眠。逢逢聽晨鼓。

次韻王子欽



二年客塵土。獨夜憂悄悄。遇酒一破顏。歌呼醉連曉。寸心爲誰明。伴此孤月皎。枯柟鬱崢嶸。老幹空自表。蟻穿萬孔萃。蛛挂千絲擾。白鵠逝不來。豈敢更擇鳥。

熊夫人遣介欲壻澤民小詩戲之

墻頭鄰女三年望。戶外文君一笑窺。欲得賢夫嫁張耳。此真佳壻是羲之。定知不折飛梭齒。似說先齊舉案眉。不信侯門深似海。水流紅葉謾題詩。

靜老通幽軒

諸峰倚崔嵬。衆壑隱犇峭。寓目欣有擊。會心領其要。開廬結茆竹。代翳斬蓬蒿。此君亦可人。玉立盡娟妙。風酣翠相倚。月吐清自照。窈眇非世音。鸞鵠中夜嘯。煙塵闔北關。烽火被南徼。便欲老三閭。終焉隱屠釣。

秋夜二首

山寒藹暝姿。楓老帶漲痕。蘭摧桂亦折。往往歸其根。萬籟各收聲。一氣中自存。鼻斤無可斲。尻駕不復犇。孤光照獨夜。月落低金盆。

寥寥犬吠村。微月耿黃昏。鷄豚市井空。虎豹窟宅尊。元龍百尺樓。獨帥誰與論。酒聖且復中。愁魔自驚犇。彈鋏歸去來。稚子候柴門。

自崇仁趨新淦。凡四夕。迺至。一寓道觀。三止僧舍。皆留一夕而去。賦小詩記之。



奴原寺

稚子警門立。老僧迎客入。湛湛玉甃寒。唧唧銅餅泣。小軒風雨過。窗戶青紅溼。晚花發秋妍。黃蜂正衙集。

化度寺

失路迷千嶂。投林借一枝。扣門竹西寺。立馬日斜時。矍鑠僧窺戶。睢盱犬透籬。定知嫌不速。明日與君辭。

栖霞觀觀在麻嶺之下

雲表朝飛屐。松殘晚駐鞍。破扉聯白板。稿項繫黃冠。徑雨喧風籟。汀沙立露翰。小窗床坐好。對此百憂寬。

三山寺二首

斜日半窗明。無人獨掩扃。風鈴時自語。雪柏老終青。立鵲參差見。微泉斷續聽。老僧渾不語。危坐卷殘經。

再和何襲明

沙平雪漫水涵空。路入千巖紫翠中。村遠微明漁舍火。樓高斜矗酒旗風。可憐方外狂司馬。來伴田中一  
秃翁。南北相望三十載。心期不改斷金同。

何嘉會寺丞嫁遣侍兒襲明有詩次韻

魯陽之戈倚半空。誰能一卻日再中。驚回十二巫山雨。永隔三千弱水風。瘦語尙傳黃絹婦。嘉會侍兒多



情好在紫髯翁。謫仙尙有杯中月。獨舞婆娑醉影同。

迎薰堂小集襲明用前韻再和

飲痛瓊艘百柁空。參橫斗挂月當中。不愁馬上衣沾露。且看樽前幘墮風。未辨清歌娛醉客。莫將強韻壓衰翁。悲飲冷淡君應笑。注瓦傾銀一體同。

長樂寺嘉會常置酒餞歌姬於此

萬瓦冠松壁。千嶂鎖雲莊。故人置酒地。清夜燈燭張。破壁挂月闕。遺笙嘯風廊。妖歌傾四座。醉臥錦瑟傍。寂寂花絮亂。忽忽鷺燕忙。雍門已陳迹。餘音空繞梁。我來久徘徊。驚呼首一昂。老僧獨依然。坐對柏子香。

志新遣兩介致書餽以巴源紙黃甘珠攬大栗鵝鮮胎蝦爲餉戲作長句

巴江新擣萬穀皮。褚生粉面膚凝脂。故人千里特寄我。落筆宛宛天投霓。綈囊丹果十襲包。爆栗飛燼石火敲。紅鹽著樹落青子。香霧噴手披黃苞。蒼鵝無罪見菹醢。苦酒濯之光五采。蝦蚶久已成枯腊。只尺波濤渺江海。客舍爭席紛滿前。饋羹不復五漿先。殷勤重餉有吾子。兩夫荷檐頽其肩。

蜀婦新寡從何純中讀左氏戲呈純中

麟經束高閣。掩卷有三嘆。朱絃久零落。鸞膠續其斷。英英左阿君。獨唱音節緩。故是我輩人。吹簫得幽伴。先生擁絳紗。弟子褰素幔。一揮斲鼻斤。便舉齊眉案。



宜黃尉李集義遣書問安否小詩爲謝

三年著南冠。兩見芳歲新。朝爲蟲蛇侶。暮與魍魅鄰。行隨木上坐。臥對竹夫人。獨有金石交。不廢風雨晨。書來一弔屈。我已屢厄陳。嘖嘖爨下桐。嗷嗷轍中鱗。絙以朱絲繩。放之碧海津。窮途得重惠。肝膽大輪囷。

題硤江蕭氏菴二首

雪屋清如洗。雲崖翠作堆。破扉風自掩。敗壁雨先頽。野色初還柳。林香尙有梅。滄江千萬頃。一鳥鏡中回。雲逐歸心亂。山隨望眼賒。疎林欹晚照。淺溜咽春沙。客路三年過。僧窗一笑譁。此生安稅駕。有地卽爲家。

宿善法寺再賦二首

水繞禪窗淨。香凝古殿深。讀書不求解。酌古聊自斟。塔鈴已無語。匣琴猶有心。獨謠西閣夜。風滿快哉襟。愛竹門可款。命車壑初尋。鳥啼春院靜。人語夜堂深。鼠迹留僧鉢。蝸涎澆佛金。鄰翁笑相命。春酌夜沉沉。

田雲朔從  
政置酒

再過天長寺

山立起平案。松偃臥枕岡。尙憐桃鑿小。已見麥頭昂。檢事關兵氣。逃禪入醉鄉。平生湖海興。一棹付慈航。

分宜道中

老牯挽犁泥沒膝。剡剡青桮鍼水出。大麥登場小麥黃。桑柘葉大蠶滿筐。猿鳥初呼聚儔侶。縑絲百箔聞



好語。此時物色不可孤。勸君沽酒提壺蘆。

礪巖寺

千松夾道直。一水抱村流。清絕小叢林。繞舍竹修修。老僧慣見客。壞衲雪滿頭。野果拆奇苞。畦蔬翦新柔。漂零五管去。邂逅一笑留。詩成寫君壁。記此夢中遊。

靈泉寺

窗戶遙開紫翠間。小橋獨立聽潺潺。意諧獨有清風共。興盡聊隨落照還。但見虛童蒙白帽。且無瀧吏發駢顏。風花雨葉元無定。何必區區戀故山。嶺外虛市。市人大半以白帽蒙首。

七星巖

十載汗修門。簪橐侍帝垣。五雲深莫窺。衆星拱以繁。一坐牘背書。身落海上村。山川發餘想。鐘鼓眩昔聞。星圖煥斗極。兩兩錯地文。今日復何日。乘槎造天閭。日月起可挾。參井立能捫。誰當揭其柄。爲我酌瀛尊。

龍隱巖

跳波觸石喧。古木抱崖擁。老蛟厭泥蟠。一笑作潭洞。孤峯起峭崿。哀壑浩呼洶。腥風噤蛙淫。凍雨落毛鬣。凜凜白晝寒。瘴髮立盡聳。早氣曛日黃。縮爪但陰拱。悠然四大海。斂此一毛孔。安得化爲霖。蕙葉有光寵。時禱雨未應。



西山超然亭

彪區翳榛莽。地瘴藏百怪。西山何軒軒。拔脚風塵外。中縈一線蟠。側立兩壁對。旁連九疑高。遠控三湘大。孤亭坐林杪。俯見飛鳥背。號方泣二女。禦魅竄四罪。誰去窳囚拘。故自脫天械。飄飄思凌雲。萬里風雨會。

飲脩仁茶

煙雲吐長崖。風雨暗古縣。竹輿頽兩肩。弛擔息微倦。茗飲初一嘗。老父有芹獻。幽姿絕媚嫵。著齒得瞑眩。昏昏嗜睡翁。喚起風洒面。亦有不平心。盡從毛孔散。事見盧仝茶詩。

九日次獻花鋪李衛公貶海外道過象江蠻女獻花於此

古路三叉口。青裙兩髻丫。更無陶令菊。空想衛公花。破屋堆黃葉。清紅繚白沙。殷勤邀一醉。涎酒壓梨楂。到象州寓行衙。太守陳容德攜酒見過。

釘坐黃甘喫手香。堆盤丹荔照人光。莫辭涎酒一尊赤。會壓瘴茅千里黃。未省讒言遭薏苡。直將空腹傲檳榔。酒醒夢覺知何處。樹影參差月滿廊。

南山寺

千丈雲根蔭此邦。沉沉寒影臥秋江。潭空映日蒼虬動。煙暖翹沙白鷺雙。夢覺灘聲喧客枕。吟餘竹色滿僧窗。詩成絕叫曾樓上。聽我洪鐘萬石撞。



安心是藥本非禪。遇勝欣隨意所便。嚼蕊拈花身老矣。穿雲涉水思茫然。行逢酒伴操觚去。倦憩僧窗借榻眠。寄語排言問津者。人中今是地行仙。

別象州陳守容德

三年客殊方。榮悴不堪說。迢迢家萬里。奄奄命一髮。使君古丈夫。興哀在縲紲。平生風馬牛。舊職比鷓壓。欣然一笑粲。破此百憂結。皇恩下天扉。淚泣孤臣血。行廚洗玉盤。載酒助歡悅。庖珍問五鯖。餅字炊十裂。徒突今未黔。班草尺一訣。何須更秉燭。端是夢中別。

雉山寺青羅閣

蠻村避謗三年過。野寺尋僧半日閑。小檻吹香花漠漠。斷崖漱碧水潺潺。桃榔葉底秋聲滿。柏子煙中午夢還。便擬買舟隨釣叟。一蓑煙雨繫滄灣。

蒙亭二首

小築三間足。雄包萬象并。遙波通極浦。落日抱孤城。小語千巖應。長歌百蟄驚。坐看衣屨上。漠漠晚雲生。落拓詩酒伴。疎慵粥飯僧。盪胸開遠抱。拄頰見高稜。鳥倦猶聞語。蛟寒正可罾。一區如可卜。吾不愧陳登。

發桂林劉帥立道同諸司出餞於甘棠渡口二首

行盡海北天。笑指湘南路。使君載酒醪。擁節東城駐。前驅千纛直。縱獵萬人呼。塵流翳白日。十里映黃霧。



何人織迎我。一葦橫江渡。渺渺倦鴉翻。相隨歸薄暮。  
洶洶號萬竅。颶風吹海渾。冥冥蔽一天。瘴雲埋日昏。南荒底日所。黃葦三家村。誰云花解笑。但有鳥能言。  
繆恩解南冠。歸路首北轅。酒行可以起。稚子候柴門。

北歸過永永守趙君宰置酒萬石亭

三湘陌上逐臣歸。萬石亭中送客時。拄杖披榛行莽蒼。汲泉磨蘚看魁奇。天傾五色遺媧補。谷變千年出峴碑。何似蹊邊小桃李。向人膏面出風姿。

宜春臺呈太守陳次明

聞說宜春好。曾臺試一登。隴泉悲瑟瑟。松雪見層層。孤絕煙中寺。微茫樹下僧。詩工傳寫妙。不數畫師能。  
再過曹山示如老

不羨鵬南運。聊隨雁北還。捫天上何嶺。犯雪過曹山。偶列萬里去。重來一夢間。觀河見如舊。雙鬢白爛斑。  
曹山在何嶺之下

送智海上人二首

大師興趣在江湖。拄杖扶行穩當車。苦要詩翁淡生活。穿雲涉水到西徐。  
折鼎支磚日半欹。拾薪乞米爲朝飢。昏昏一點炊煙裏。見我邯鄲夢覺時。



馬跡上冢遇大風雨書僧壁二首

松竹騷騷繞舍鳴。沙頭一夜雨連明。衝泥裹飯洗新冢。野哭干霄共一聲。  
白帽排肩上冢歸。飢烏攫肉紙錢飛。東家已改清明火。一點炊烟上翠微。

讀沈德潤詩卷時沈寓金沙寺

繫馬門前柳。投鞭息吾駕。青林合扶疎。木杪抗風榭。沈郎天骨清。衆埽立嵩華。閉閣臥讀書。一榻過僧夏。  
尤工五字律。句法窺鮑謝。無窮真炙輠。有味乃食蔗。我老復何爲。齒髮日夜化。寅緣葦間見。拊髀起一咤。  
懸知擲地響。自欲補天罅。坐令長安紙。頓起千金價。

望道場山塔

碧玉旋螺插暮煙。遙看桂子落僧前。試尋白水田頭路。一葦橫江浪接天。  
蕭寺知名四十年。身投籠檻到無緣。行人指點松間路。正在孤雲落照邊。

橫山堂

波間指點見青紅。雪脊噌稜倚半空。幻出生綃三萬幅。游人渾在畫圖中。  
蒼雲十畝蔭平寬。露葉風枝繞舍寒。莫遣先生賦歸去。且令小吏報平安。

題谷隱



碧瘦峨千疊。清深漲一篙。紅輕花似肉。綠細柳如綵。句好無強對。神超有獨遨。葦間青蒻笠。髣髴見秦逃。  
送徑山僧  
桑棗翳一丘。風雨鳴四壁。晨門響丁丁。一笑喜折屐。臞仙詩作瘦。句有徑山色。哀彈發朱弦。妙寄追白石。  
虛名子過聽。愧臥不能夕。歸袖挽莫留。凌空看飛錫。

華亭朱師實中大燕超堂

海禺納萬艘。市區沸百賈。黃塵翳白日。千騎騰一鼓。蚊巢十字路。四顧盡曠土。蝸角兩大國。一怒有標杵。  
角名眩多慮。聚訟攻衆楚。昏氣自成霧。濯濯汗浹雨。朱公誤涉世。吏隱寄圭組。俗緣墮人境。心大接天宇。  
攀芳採蓮舟。擷秀藝藥圃。山寒石稜紫。樹老松鬣古。風牽碧羅卷。雨壓翠纛舞。寧須鳥催酤。自有花解語。  
觀魚樂洋洋。夢蝶飛栩栩。坐令游俠窟。化作仙佛土。高臥水國秋。靜憩月庭午。不假壺公龍。天上有官府。  
洞庭善慶堂置酒小詩寄之

幽絕小蓬壺。參差見畫圖。亂青山四出。一碧水平鋪。洲蘂紅相照。沙茸細欲無。蓮房駢百子。橘圃聚千奴。  
布穀休催種。提壺且勸酤。楚腰飛燕燕。秦缶和烏烏。便旋驚回雪。連娟引貫珠。西風催畫鷁。落日詠驪駒。  
浩蕩川原隔。驚呼歲月徂。寥寥清夜夢。直提控搏扶。

興化朱公大卿沒於庚申歲既除喪矣其子彥實過余於晉陵留十日而別賦小詩以餞之



柴扉忽枉故人車。躡履歡迎一笑初。夢裏覆蕉疑有鹿。食前彈鋏嘆無魚。忽忽注瓦澆村釀。草草供盤折野蔬。他日死生君一訪。上林鴻雁有書無。

多寶院

穿雲訪幽伴。倚枝蒼崖根。冥冥篁竹中。古寺松爲門。野僧營一飽。乞食山下村。擁鼻且獨謠。未覺釣石溫。世事風雨過。歲陰波浪奔。飄然得遠遊。寄此五石尊。

甘陂莊院

張公臥江海。戢羽如鵬蹲。平生廊廟具。投老三家村。一壑身所寄。萬里心自存。買花紅間坐。種竹青滿門。似聞橘生奴。漸見桐有孫。提壺時見招。一笑空壘尊。

寄題莫謙仲山居

魚鹽市井雷。冠蓋車馬路。生息自相吹。晨門黝如霧。超然塵外躡。崑兀見砥柱。湯湯海橫流。自有安立處。幻泡水上漚。空華草頭露。一峰獨蒼然。歲寒但如故。醉舉庭下花。吟繞池邊樹。便有山中臞。來隨白雲履。

過慧山方丈。皞老酌泉試茶賦兩詩遺之。

蕭蕭呵蘭若。桑苧有故家。佛屋倚高寒。僧蹊抱欹斜。殷勤泉上客。流落瘴海涯。甌酒壓梨楂。蠻烹啗鼉蛇。光潔鏡一奩。照影空自嗟。老僧薦茗粥。芳鮮疑露華。驅除鼻中雷。掃盡眼界花。飄飄思凌雲。攝身上蒼霞。



過楓橋寺示遷老三首

白首重來一夢中。青山不改舊時容。鳥啼月落橋邊寺。欹枕猶聞半夜鐘。  
三年瘴海臥炎霄。夢隔青楓一水遙。萬里歸來悲故物。銅駝埋沒草齊腰。  
翠木蒼藤一兩家。門依古柳抱谿斜。古城流水參差是。不見玄都舊日花。

吳門道中

數間茅屋水邊村。楊柳依依綠映門。渡口喚船人獨立。一蓑煙雨溼黃昏。  
一點炊煙竹裏村。人家深閉雨中門。數聲好鳥不知處。千丈藤蘿古木昏。

罨畫谿行四首

老牯浮鼻水中歸。綵雉應媒桑下飛。蘿蔦冥冥山四起。數家雞犬煙樹裏。  
一支新淥漲晴溝。楊柳中間繫小舟。罨畫谿頭烏鳥樂。呼風喚雨不能休。

蝶趁花飛爭入坐。倚空百尺游絲墮。亂山銜日半船明。斷雲載雨前村過。  
蕨芽戴土小兒拳。漁市人歸柳貫鮮。罨畫谿頭人語好。烹魚煮蕨餉春田。

沙頭綠暗已藏鴉。竹裏猶殘一兩花。蝸廬抱柳開新國。燕語窺簾憶舊家。  
春風有信自年年。罨畫谿邊柳繫船。陶情滿滿酒如泉。醉與長餅藉草眠。



翠木蒼藤繚白沙。槿籬茅店野人家。了無狡兔營三窟。只有黃蜂趁兩衙。樹頭獵獵酒旗風。罨畫谿邊賣酒翁。銀餅快瀉清若空。令君一笑面生紅。

龜潭二首

稚竹綠崖瘦。蒼藤翳樹昏。野花渾少態。谷鳥自忘言。獨曳煙中策。來傾月下尊。樂哉無與共。幽興在桑門。蝸舍三間小。龜泉一勺甘。楞嚴渾不看。彌勒久同龕。潭影千峰倒。雲稍萬木參。巖花自無主。紅雨落毵毵。

題董令升待制明谿

先生谿上宅。華榜有殊稱。已爲山作主。更與谿爲朋。高薨俯流水。坐見南山稜。濯髮雲破碎。漚衣雪崩騰。老蟾駕月來。湫澗一鏡升。舉權擊空明。玉壺響春冰。夜久羣動息。一嘯清風興。手持修月斧。自控赤鯉乘。

李茂嘉寄茶

蠻珍分到謫仙家。斷壁殘璋裹絳紗。擬把金釵候湯眼。不將白玉伴脂麻。

春事

茆棟依林出。松扉傍水斜。浮蒼圍百疊。亂綠翳三叉。屋破蝸書壁。庭蕪鶴印沙。小桃供一笑。已著雨三花。黃鸝遺好音。碧草縈別恨。雨擢翠千尋。風斂紅一寸。持醪散百憂。琢句破孤悶。呼童數擊鮮。無久諸郎溷。

游金沙寺寺有陸希聲侍郎讀書堂在頤山上



一龕明滅佛前燈。破衲猶殘一兩僧。說似鴻盤讀書處。試尋幽伴拄烏藤。  
綠筍遺苞半出籬。清谿一曲翠相迷。古苔稱意壞墻滿。好鳥盡情深樹啼。

歲暮郊行

殘雪溶溶水波凍。山空翠濕衣巾重。東家西家酒初熟。南枝北枝春欲動。  
班坐偶隨鷗鷺集。意行適與牛羊共。直將萬事付狙公。莫浪歡喜踏破籜。

懼菴浮天閣

黃蘆吹雪滿汀洲。萬里煙波接素秋。數點征帆天上落。一輪斜日水中流。  
長橋踏月隨幽伴。小閣浮天賦遠遊。便買一舟爲泛宅。此生何必老菟裘。

向伯恭侍郎致政薌林築一堂名之曰企疎晉陵孫某聞而賦詩

銅臭應作么。夢屍當得官。喁喁魚聚沫。戢戢蚋集酸。高人有遠抱。一笑視鼠肝。  
水將洗耳用。山作拄頰看。種芳茹秋菊。攀秀紉春蘭。披披芰荷衣。采采苜蓿盤。三徑倘真境。  
一瓢非世歡。富貴挽不來。爲我歌考槃。且學方回癡。莫羨董公健。誰合軀七尺。  
浪作青紫椹。更搖乞憐尾。仍出弔喪面。薌林有老僊。蚤具佛眼見。國恩儻粗酬。  
已責遂焚券。驅除竹馬棄。狼藉芻狗踐。寥寥漢二傅。千歲一關鍵。竟日飲無何。  
更補離騷傳。

湖泝上冢繫舟丁山田舍小憩



清谿三百曲。一片春風綠。茆屋有人家。窈窕閔深竹。老去耽田里。寓目快新矚。風漪卷翠綃。雲巘鏤蒼玉。尋盟喚白鷗。解佩贖黃犢。獨嘯無一人。傳聲滿空谷。

妙光菴

孤煙抱水村。落日滿雲樹。亂山如連環。楊柳是門處。青繚竹谿灣。翠點苔石路。鍾魚寂無聲。白日掩僧戶。茗盃酌雲腴。香篆擢烟縷。坐穩不知夕。炯炯山月吐。

吳漢逸家荆谿蓄古書奇器甚富余欲造觀而未果賦小詩先之

高人臥江海。煙雨三家村。白眼憎俗徒。青山自當門。披圖望千載。耿耿尙自存。金鑄騷囊蹄。漆書科斗文。虬螭盤六印。犧象刻四尊。劍包虎皮斑。琴漫蛇腹紋。猶吐星芒寒。尙帶雷斧痕。我亦望古者。昂昂眞戴盆。儻未倚門揮。應許置榻論。從公問奇字。載酒過子雲。

寄題四明吳勰拙軒

分寸躋攀曳九牛。一錐無地拙於鳩。穿鍼結縷非吾事。不上天孫乞巧樓。老罷誰當問喘牛。羈栖且作奇巢鳩。蓋茆一把藏吾拙。便是元龍百尺樓。

雨

山空發清響。樓迥落餘飛。掩冉花頭重。渾酣水面肥。喧豗沉地鏡。飄灑淨垣衣。數點蒼茫裏。飢鳥接翅歸。



小園春事

屋頭喚雨泥滑滑。萬瓦紛披土囊發。西園春事一時休。繁紅漫亂煙脂雪。綠蘿高張翠羽蓋。蒼巘中斷青玉玦。不見枝上一點紅。千頃桑麻光似潑。小園花柳春爭發。風雨顛狂二三月。斷梗梢空轉若蓬。細紅糝逕繁如纈。巨看繞屋溜潺潺。可厭觸塗泥活活。不妨暫柅故人車。大似陳公井中轄。

吳門道中

小橋分路各西東。寂寂松窗半掩蓬。客夢悠揚殘酒裏。一池荷葉雨聲中。

連雪苦寒

霜氣森森背有芒。風稜撼撼面疑鎗。破衾且作龜頭縮。短裾愁牽鶴脰長。

焦山吸江亭

昔年攜客寄僧龕。敗屋疎籬一草菴。白首重來看修竹。連山樓觀亦耽耽。東坡詩云。金山樓觀何耽耽。撞鐘擊鼓。聞淮南。焦山何汲有。修竹三。探薪。萬頃蒼茫一島孤。潭潭雲海現毗盧。問君汲盡西江水。中有曹谿一滴無。

雨中泊蜀山見漁人自山半負樵入舟鼓棹而去

一嶂橫青靄。千漚起碧潯。行穿山半腹。坐占水中心。踢雨松蹊滑。衝煙蓼嶼深。時來有登涉。應不繫升沉。



讀類說二首

亡是談烏有彭郎得小姑。誰言鳩作婦。謾道雁為奴。絡緯那能織。提壺豈解酤。龜茲堪一笑。非馬亦非驢。額痒會出耳。足閑仍有釐。石頑飛作燕。楮老孕生雞。楓瘦那因怒。松枋豈是肥。君看轉丸手。亦復化神奇。

能仁寺悟上人來楓橋訪余索詩賦兩絕句

撚斷吟鬚皺兩眉。鏤冰琢雪等兒嬉。解啼孤月如雞口。堪笑窮郊作許悲。韓吏部詩云。似聞孤月口。

能說落星心。

老去都將筆硯焚。相逢相問只寒溫。更無一語堪酬對。已入維摩不二門。

龜潭

擺落攀緣斷。驅除磊塊平。庭松敵老健。潭水伴孤清。待月出時看。尋雲起處行。相隨木上坐。徙倚到參橫。

舟過湖洑泊丁山

雞犬三家市。蓬蒿一畝宮。蘿牽籬幕翠。籜隕砌堆紅。宿鳥來還去。微泉咽復通。幽尋殊未已。落日滿疎桐。日下殘紅斂。煙升積翠重。鷗輕沒浩蕩。魚樂自從容。野饁迎秋穫。鄰謳相夜舂。田翁有真意。一笑酒中逢。

協趣亭

一丘破天巧。萬壑迴春姿。使君載酒地。不着鼓吹隨。翛然一幅巾。自與幽人期。水淺欲平杯。風細不滿旗。



疎疎殘雨裏。獨理釣魚絲。

江上懷思永

沙老猶生鬣。江寒已伏槽。長煙分聚落。短日下亭皋。木脫曾巢見。潮生小艇高。幽懷誰與悟。不見酒中豪。

梅二首

北風翦水玉花飛。翠袖凌寒不自持。脉脉含情無一語。水邊籬落立多時。纖纖蘿蔓牽茅屋。細細苔花點石矸。夢斷酒醒山月吐。一枝疎影臥東窗。

龜潭道中

沙淨溪行好。煙消野望新。數峰山戴雪。一曲塢藏春。魚逐波間伴。禽藏葉底身。柳邊春信動。眉目已津津。

牛山道中

松雲翠離披。竹日光破碎。青熒麥風過。紅濕花露墜。萍開龜曳尾。樹啄鳥擘喙。物物如貺予。欣然與心會。

罨畫連雨溪漲丈餘雨霽水落喜而賦詩二首

編棧沿村徑。囊沙壅市門。蒼鱗封老幹。黃耳上陳根。屋破容身窄。天低望眼昏。谿邊高樹杪。猶有繫舟痕。月挂樓鐘曉。風生鳥樹秋。林疎山獻狀。池漫水分流。鵲喜時窺牖。鷗馴亦並舟。一聲何處笛。莫遣碧雲留。

沈公序餘閑亭二首



貌古須眉見。情高耳目遺。應諧聊玩世。避謗莫吟詩。事不關心處。身非抱病時。翛然無一事。痛飲是吾師。隱几欲忘吾。趨營老吏疎。判閒聊命酒。引睡謾翻書。祇有貧堪逐。都無憤可摠。樂哉聊卒歲。應信我知魚。虎丘沼老。豫章詩僧也。與余相遇於楓橋。方丈誦所作除獻之侍郎生日詩。有東湖孺子。南極老人之句。余愛其工。賦小詩寄贈。

落景下曾城。遙煙起孤戍。繫舟着斫魚磯。曳杖扣僧戶。忽逢丹霞侶。自誦碧雲句。噲呖應黃鍾。清絕追白紵。不。落。江。西。派。肯。學。邯。鄲。步。冥。搜。自。天。得。妙。中。有。神。助。寅。緣。半。日。留。邂逅一笑遇。詎復管中窺。看沐南山霧。

紹興壬子某南遷。過疎山上一覽亭。見擬東坡煨芋詩。刻龕之壁間。詩律句法良是。殆不能辨。乃宣卿侍郎守臨川時所擬作也。後數日道次安仁縣。一士人吳君出宣卿詩數十解示余。奇麗清婉。咀嚼有味。如噉蔗然。讀之惟恐盡。於是拊卷三嘆。而後知公置力於斯文久矣。又二十年。宣卿築室荆谿山中。別營一堂。以平生所畜東坡詩文雜言。長短句。殘章斷藁。尺牘遊戲之作。盡櫝藏其中。號景坡。自書榜。仍爲記刻之。某欲具小舟造觀。而宣卿召用。今以集撰守吳門。乃賦詩爲之先。

王公製練衣。謝傅捉葵扇。歛若置郵然。一昔徧海縣。東坡百世師。乘雲上騎箕。文爭日月光。氣敵嵩華齊。



諸儒望先覺。坐待成風斲。一斤應手揮。郢鼻無留堊。公生不並時。關鍵同一機。識真屬具眼。造的令中眉。詩亡束皙補。書受伏生所。神交接混茫。參差夢中睹。授我筆如椽。五色光屬聯。醉上金鑾殿。揮泉灑謫倦。連筒自灌黃精圃。結轍休推薏苡車。萬壑飛泉春午枕。一蓑帶雨荷春鉏。逃名尙有身爲累。擇利焉知貨可居。笑指吾公門上莠。一時零落已丘墟。

景思提舉少卿出示藥寮佳篇某繼元韻上呈









# 蘆川歸來集鈔

張元幹字仲宗永福人太學上舍歷官至大監所與遊皆偉人賢士嘗哀其亡友唐愨生詩帖裸軸璫  
粲如諛達人貴公得氣時人嘉其朋友之義又於亂紙中得其祖文靖手澤知祖未第時壻於劉氏劉  
無出葬於福清元幹求之榛莽中割牲醢酒爲文刻石以傳子孫作幽岩尊祖錄宣政間游定夫楊龜  
山陳了翁朱喬年李伯紀洪鉤父徐師川呂居仁名賢三十餘家咸題跋歎美之有蘆川歸來集十餘  
卷得之書肆廢帙逸其大半詩止近體六七二卷清新而有法度蔚然出塵觀其序王承可詩云初從  
徐東湖指授句法知淵源有自也

次韻唐彥猷所題顧野王祠興霍子孟廟對

蘭若黃門像相望博陸居衣冠塵亦暗簫鼓祭全疎草色侵荒逕潮聲過夕墟遺風猶可想弔古一觴餘

過宿趙次張郊居二首

北客多流落東村更寂寥肯同清夜夢不待故人招月掛荒園竹霜飛獨木橋聽雞休起舞且共論天驕  
莫歎交游晚相期歲月深秋來初識面老去要知心燈火須更僕杯盤取自斟平生王霸術袖手有微吟

次韻奉和平叔亭林至日之什



雲物果何好。客愁今更新。坐來江月白。興在雪籬春。我輩且同酌。公詩殊出塵。莫思淮海上。黑幟雜黃巾。

花飛

雨暗連兵氣。花飛點客愁。寓居皆野寺。相過只扁舟。不作新塘去。還爲後柳游。盤餐雖杞菊。得飽勝椎牛。

送江子我歸嚴陵

久客驚秋晚。懷歸更送君。亂來俱避地。老去惜離羣。山閣杯浮菊。江城鴈度雲。行行經釣瀨。時事不須聞。

亂後

亂後今誰在。年來事可傷。雲深懷故里。春老尙它鄉。寧復論秦過。終當作楚狂。維舟短籬下。聊學捕魚郎。

返正

諸將爭傳檄。羣兇尙阻兵。天旋黃屋正。日轉赤墀明。喪亂多妖孽。經綸貴老成。鯨鯢終必戮。誰木已知生。

冬夜有懷柯田山人四首

聞說新居好。山樊卜築深。藥囊能濟物。龜筮少知音。四海憂黔首。中原盡綠林。直須期雪屋。夜棹去相尋。坐閱干戈擾。輸公已定居。生涯今易足。世態莫嗔渠。晷短全疎客。窗晴好對書。故山常入夢。何日到吾廬。客裏了無況。亂來何止貧。淹留頻換歲。老大更思親。泥飲思田父。供糧乏故人。自憐歸未得。不是白頭新。雅欲賦招隱。何堪弔戰場。獨看星錯落。久立夜蒼茫。羽檄來東越。風烟隔下塘。安閑隨處有。冠蓋莫相望。



登垂虹亭二首

一別三吳地。重來二十年。瘡痍兵火後。花石稻梁先。山暗松江雨。波吞震澤天。扁舟莫浪發。蛟鱔正垂涎。熠熠流螢火。垂垂飲倒虹。行雲吞皎月。飛電埽長空。壯觀江邊雨。醒人水上風。須臾風雨過。萬事笑談中。

漫興

老答書題嬾。貧營口腹忙。未能忘壯志。遽肯變剛腸。晷短催寒急。燈明伴漏長。牀頭褚衾在。不怕滿簷霜。奉送富修仲赴南昌尉

吏道雖餘事。人情要飽諳。家風端自守。句法有同參。南浦翻雲浪。西山滴翠嵐。折腰與趨走。政恐未能堪。夜宿宗公丈室求詩甚勤爲賦五字

林表登層閣。秋聲隱暮鐘。鶉歸苦竹寺。雨闌亂雲峰。屢乞留新句。重來訪舊蹤。松門罕車馬。似喜老夫逢。次韻晁伯南飲董彥達官舍心遠堂

今夕知何夕。眞成累十觴。爐薰飄月影。蜜炬剪花香。政嬾還詩債。無從發酒狂。故人憐久客。舞袖要須長。叔易自三吳歸同赴竹菴荔子之集二首

惜別梅花兩。來歸荔子秋。江帆成昨夢。雲嶠忽重游。共喜身長健。寧論久客愁。殷勤老居士。更爲寶峰留。客去雲俱散。山空月正圓。不參藤樹句。自透竹菴禪。骨法凌煙像。家聲鼓瑟篇。直須陪叔季。急佐中興年。



寄錢申伯二首

子去客昭武。今儂懷舊遊。青山渾在眼。白髮暗添頭。旅食今安好。歸程儻滯留。谿邊因野步。試覓水明樓。一點照今古。胸中殊了然。不妨爲漫吏。可但號臞僊。丹荔盟猶在。凝香句未傳。秋風稍涼冷。速辦下灘船。申伯有行色。會宿東禪次。元韻

真成風雨夜。精舍對牀眠。去住非無數。行藏莫問天。十年瀕瘴海。一棹破春煙。君自足歸興。不妨啼杜鵑。次折樞留題雪峰韻

軒冕本無意。煙霞如有期。故人容野老。勝踐見新詩。誰辦兼忘世。公當急濟時。春歸仍送別。好在出山遲。次韻范才元中秋不見月韻

不見中秋月。長吟五字城。浮雲有底急。清影可憐生。殘夜四更句。故人千里情。與君徒悵望。天上自分明。次呂居仁見寄韻

老去猶爲客。誰人念退居。相望千里路。賴有數行書。白曬猶堪寄。烏牛政憶渠。何時聞枉駕。竹裏喚行廚。次韻劉希顏感懷

避諍疎毛穎。推愁賴索郎。坐來春漏促。夢去畏途長。故國書題冷。新詩齒頰香。湖山雖好在。歲月已相忘。郭從範示及張安國諸公酬唱輒次嚴韻



登樓乘暇日。喚客共澆愁。春去花猶發。陰濃雨未休。和詩真冷澹。得句總風流。能遣西隣老。殊無陋巷憂。戊辰春二月晦日同栖鸞子送所親過寶積題壁間

春江因送客。雲嶠更登臨。精舍經行地。征人去住心。猿啼清夢斷。花落曉窗陰。勝踐成三宿。俱來此意深。次韻送友人過山陰郡時夜別於舟中

草草杯盤燦燭光。故人相對水雲鄉。濤江君去訪秦望。丘壑我歸爲楚狂。活國未逢三折臂。憂時空轉九回腸。絕憐明發成南北。夢寐全無夜太長。

喜王性之見過千金村

春來書劄已西東。喜復相逢亂世中。萬事變更唯舌在。三年流落轉途窮。雲收野寺侵廊水。月掛孤帆送客風。剩欲留君明日住。夜闌難得一罇同。

次江子我遷居韻

平生自省宜三黜。老去何心望九遷。避地湖山聊復爾。脫身兵火想當然。浮家泛宅非無計。坎止流行本信緣。猶恐驚濤翻四海。直須化鶴作飛仙。

次趙次張見遺之什韻

海邊遊子日思歸。新句勞君更置規。莫問人間多貝錦。正如天上有參旗。寄書只欲憑黃耳。去路誰能畏



赤眉定與故巢猿鶴老。此生無愧北山移。

過雲間黃用和新圃

繚池剩欲開花徑。傍舍先須作草堂。雨後不妨頻檢校。客來留得共徜徉。故園怪我歸何晚。避地輸君樂未央。待得功名方卜築。豈如強健享風光。

蘭溪舟中寄蘇粹中

氣吞萬里境中事。心老經年江上行。三徑已荒無蟻夢。一錢不直有鷗盟。雲收遠嶂晚風熟。浪打寒灘春水生。鴻雁北飛知我意。爲傳詩句濮陽城。

別綬老

無端流落迫殘年。三十南山訪老禪。未契安心了難覓。不如同世且隨緣。頻移竹几負寒日。旋拾松稍炊晚煙。珍重孤雲出山去。東西南北一青天。

次江子我聞角韻

夫差故國縈寒水。鐵馬南來忽振纓。城上昏鴉爭接翅。舟中逐客謹逃名。胡笳怨處風微起。濁酒醒時夢易驚。飄泊似聞山寺近。真成夜半聽鐘聲。

次友人寒食書懷韻二首



往昔升平客大梁。新煙然燭九衢香。車聲馳道內家出。春色禁溝宮柳黃。陵邑祇今稱虜地。衣冠誰復問唐裝。傷心寒食當時事。夢想流鶯下苑牆。孤生投老急菟裘。萬里雲山已勦游。共喜石交逢異縣。更陪綵筆賦春愁。無心俯仰猶多事。與世浮湛已拙謀。冷雨吹花作寒食。三杯軟飽且眠休。

訪親于連江因過筠溪叩門循行歎其荒翳不治有懷普現居士口占此章

筠莊主人何未歸。溪畔長林穿翠微。此去功名時欲至。箇中車馬跡全稀。茅茨漏久蝸涎篆。籬落欹多蛛網圍。公肯借菴容我老。爲公朝夕埽柴扉。

宮使樞密富丈和篇高妙所謂壓倒元白末句許予尤非所敢承謹用前韻敘謝

修門一出十經春。相業時來自奮身。袖手深謀終活國。揮毫佳句且驚人。話言每許聞前輩。賓客何堪接後塵。待埽攙搶洗兵馬。兩翁玄語記天津。

次韻文老使君宗兄見贈近體佳什兩篇僕與公別四十餘年一旦邂逅情著于詞

舊遊蘭若盡英才。坐上高談亦壯哉。老去語音雖記憶。衆中容貌各驚猜。津亭夜雨故人少。樽酒燈花鄉信來。茂苑相逢話京洛。梅樓猶喜待春回。

冬夜書懷呈富樞



耳聾無用問新聞。矯首何妨目作昏。癡絕已甘投老境。背馳寧受乞憐恩。難陪年少從渠薄。賴得春回爲我溫。京洛交游頻檢校。渡江今有幾人存。

次韻趙元功贈李季言之什

赤縣飄零未易逢。那知今夕一樽同。好招明月共清影。託與白雲行太空。懍悅舊遊如隔世。蹉跎壯志莫論功。兩公秉燭還相對。情話從渠半醉中。

次韻元功才友道中見賦因以解嘲

當時勇決徑歸休。更有人愚似我不。何許置錐寧免累。直須畢娶始無憂。頻遭白眼傷流俗。誰向青門念故侯。客裏題詩相慰藉。羨君椽筆盍螭頭。

奉送晁伯南歸金谿

君家諸父多人傑。半是平生親舊間。莫話故園空矯首。相從逆旅足開顏。文元勳業金甌字。昭德風流玉筍班。此去騰驤吐虹氣。何由來伴老夫閑。

遊東山二詠次李丞相韻

寒木高蘿幾曲溪。斷碑零落臥荒祠。澄潭想像雲頭湧。懸瀑依稀雨腳垂。地軸漫煩龍虎戰。天符那得鬼神私。茫茫造物愁難曉。要是爲霖自有時。



留寄黃檗山妙湛禪師

晨發薊城越數峰。我來師出失從容。白雲遮日蔽秋寺。青嶂聞猿驚暮鐘。世亂可無閑地隱。山深偏覺老僧慵。他年芋火談空夜。雪屋松窗約過冬。

用折樞韻呈李丞相二首

參陪仍許瘦筇支。長者登臨敢後期。鍾斷白雲飛雨過。月生青嶂夜涼時。心知勝地都忘睡。喜聽連牀共和詩。蓮社風流增荔子。餘生長健更何爲。莫問蒲萄出月支。不緣瓜棗訪安期。輕紅滿地人慵埽。空翠沾衣雨足時。松蔭晴泉聽落澗。蟬嘶晚吹助裁詩。公乎此去歸廊廟。無用山中怨鶴爲。

次錢申伯游東山韻

埽榻開軒走寺宮。吾曹終日得從容。夕陽初落罽谿路。雲氣半遮獅子峰。試問丹砂回白髮。何如瀑布煮枯松。暮年縱有壯心在。歸意已勝山色濃。







# 建康集鈔

葉夢得字少蘊。吳縣人。紹聖四年進士。自婺州教授召爲編修官。歷祠部郎。起居郎。翰林學士。出知汝州。提舉洞霄宮。政和五年起知蔡州。移帥潁昌府。尋提舉南京鴻慶宮。紹興初起爲江東安撫大使。兼知建康府。移知福州。上章請老。仍提舉洞霄。致仕而卒。贈檢校少保。夢得有總集百卷。此集乃知建康時所作。總集中之一集也。建康是時值用兵。契闊鋒鏑之中。而吟詠蕭散。固是詩人之致。

## 赴建康過京口呈劉季高

客路重經黃鵠前。故人仍得暫留連。長鎗大劍笑安用。白髮蒼顏空自憐。照野已驚橫雉堞。蔽江行見下樓船。灞陵醉尉無人識。謾對雲峰說去年。時季高再新城上月觀。

## 送模歸卞山并示僧宗義爲余守西巖者三首

自我離山間。忽已兩改月。飢人不忘食。未坐先已說。家僮挾書至。驚起慰愁絕。推尋到雞犬。問訊曲窮折。此生豈多爲。一壑萬慮滅。可能復大錯。更鑄八州鐵。江東領八州。汝歸馬蹄輕。初不恨觸熱。慙慙報松竹。吾豈成久別。

端居探幽奇。自謂略已徧。昨登西山嶺。雄絕昔未見。溪湖莽吞吐。雲物紛百變。乃知十年閑。尙或遺勝踐。



巢成輒棄去。我豈秋社燕。築南山絕頂。基垂成而來。亭爲我課僮僕。開闢盡二面。莫言羊腸險。徑小煩屢轉。杖藜不用扶。吾腳猶爾健。

生長在山間。從公守蓬戶。人言膏梁子。粗免污桓袴。官居無多戀。暫止復遽去。家法恐未傳。此心良已素。義禪晚從我。似識此間趣。西巖鬱嶽岑。久斷俗子路。聊持山中節。爲我主留務。封陞際湖海。雲月皆所部。建康舊俗貴。重九上巳。諸曹皆休務。祀神登北山。參議馬君獨不出。攜詩相過。因言石林之勝。

次其韻

倦飛歸鳥正思還。扣戶聊分半日閑。勝事漫同談栗里。佳時休笑負龍山。簿書已老無餘力。香火朝真有舊班。他日尙期能過我。試窮千嶂共追攀。

西齋初成。廡中舊有太湖石數十株。因植之庭下。

萬壑千巖不易求。壺中聊寄小瀛州。稍看磈兀雲峯出。便有檀欒桂樹幽。絕境自知難遽忘。奇蹤爭怪獨能留。山翁已老猶兒戲。漫擬伸眉一散愁。

與晁激仲夜話

外家文采到諸郎。凜凜辭鋒未可當。伴我何辭共戎馬。憐君聊欲濯糟漿。激仲以池州酒。正從余辟。殘年落寞風塵際。永夜從容燈燭光。祇恐扁舟吾欲去。病慵無意簿淮陽。



次韻再答激仲

生涯久許捕魚郎。鳧雁相追不亂行。但近陶廬存菊徑。不辭楚酒醉椒漿。交情老柏寒方見。妙語靈珠夜有光。回首漸知歸路好。已看梅柳動初陽。

雨夜與模論中原。旦起模與徐敦宗遊清涼。覽觀形勢。嘉其有志。因以勉之。

千年石頭城。突兀真虎踞。蒼茫劫火餘。尙復留故處。大江轉洪濤。騰踏不可御。空城寂寞潮。日暮獨東去。登臨欲弔古。俯視極千慮。吾兒勇過我。蓐食穿沮洳。謂言撫中原。未暇論割據。功名亦何人。我老聊自恕。它年報國心。或可借前箸。無爲笑頽然。已飽安用飶。

懷西山

西山十畝強。高下略不齊。嵌空抱奇秀。上有凌雲梯。架屋八九間。茅簷敢辭低。所欲面勢好。老稚通扶攜。密竹轉修徑。老松故成蹊。仲冬景氣肅。碧草猶萋萋。仰視天宇大。四觀渺回溪。徐行信足力。未畏成顛躋。周意各有適。孰云無叮咛。平生幾濡首。末路乃噬臍。不作巢幕燕。肯從觸藩羝。胡爲濫塵鉞。坐聽鳴鼓鼙。外物委蟲臂。全生思馬啼。可能三徑草。歸路老更迷。

山間每歲正月望夜。梅花正開。多與客飲花下。今年郡廨獨坐。十四夜張陽叔晁激仲相過。共話宣和間事。慨然歸不能寐。因以寫懷。



山頭野梅白玉花。月明弄影紛橫斜。青天無雲萬峯立。下有三畝幽人家。年年春歸不暇省。但掃雪徑尋寒葩。老夫已忘少年事。燈火豈念更繁華。一杯起步徧空谷。破屋歸臥噉朝霞。陪都復來亦何有。凜凜殺氣浮高牙。重關深鎖夜漏永。忽記昨夢翻長嗟。景龍門前一月會。金盃賜酒余雄誇。神州陸沉近歸我。漢節方議通胡沙。天翻地覆那得料。忍復更聽漁陽搥。

蔡子因相過留踰月

解作江山一月留。仲文儒雅更風流。欲知爵躍心能喜。正愛蟬連語不休。築室君方論並舍。子因約同歸居雪上。山我已辦扁舟。交親四海今餘幾。萬事傷心付白頭。

徐敦濟書報嘗過余石林

繞澗新添數百竿。故人書爲報平安。似聞謾謾山風響。正想陰陰夏簟寒。老去不能窮蠹簡。歸來便擬挂塵冠。一杯且覓林間約。莫枉山王廢舊歡。

送沈傳曜

卜峯摩青空。東望烏氏敦。豈忘宿春糧。終媿一款門。邂逅此相遇。傾懷得徐論。人言解牛刀。要使當劇煩。未悟清廟器。朱絃列壘尊。我衰百慮息。但念三畝園。王師肅西征。萬馬先雲屯。何力償賜履。緬慙羨歸軒。寄聲舴艋舟。想見浮雁村。清冷尙可釣。無使雪水渾。



偶書爲山亭二首

爲山亭下小巘。只欠蕭蕭竹數竿。但遣飛流時漱玉。且將歸思爲翁寬。微風似與洗庭除。石枕蠻藤不負予。八尺方牀聊已足。可須仍要讀殘書。

次韻程伯禹贈宗室趙朝請

人物相望不並時。使君水鑑有真知。未論理窟傾三語。只鬪詩壇自一奇。擾擾干戈猶戰伐。紛紛簿領更喧卑。應須便作高軒過。好德何人佐我儀。

題晁公耄惠崇溪山

荒林翳宿莽。脫木寒無煙。不知三間茆。中有幾醉眠。山遠尙見雪。江空欲吞天。歸舟定何許。滄波方渺然。觀化堂編校舊書

赫日真能永。微風亦自涼。故應便北戶。何敢厭東墻。汲水聊爲戲。繙書卻未忙。平生閑與嬾。併覺味兼長。翰墨他生業。山林晚歲心。那知身已老。但覺意增深。捉麈誰能話。扶筇可細尋。晚來庭鵲喜。似恐有歸音。

憶朱氏西澗

澗下流泉澗上松。清陰盡處有層峯。應知六月冰壺外。未許人間得暫逢。憶向中流置竹牀。萬錢無處買清涼。只今路斷無來客。自撥新醅醉幾場。



再任後遣模歸按視石林四首

巖石三年別。君恩未許歸。從誰尋草徑。爲我款荆扉。  
 舊繞山千疊。新添竹一圍。故人如見問。端欲挂朝衣。  
 白髮萱堂上。孩兒更共懷。弄孫那得見。將母竟難諧。  
 已絕功名望。猶疑出處垂。此心終未穩。何處復安排。  
 插架環千軸。傳家有舊書。展舒慙几案。涼曝闕庭除。  
 破屋方懸溜。殘編足蠹魚。好須重檢校。扃鎖莫令疎。  
 細路穿南嶺。新松幾許長。毋庸馳馬足。祇擬轉羊腸。  
 更作高亭好。初非亂石妨。兩溪渾在眼。似欲見帆檣。

東園作草堂新成二首

官舍如何有草堂。野人熟處自難忘。池開月映千山迥。  
 檻靜風生六月涼。幽徑也從穿別浦。小舟還似過橫塘。  
 深知幕府文書省。盡付甘眠亦未妨。

密覆荒茆已數重。中開別戶更相容。苦無公事妨人樂。  
 多有清閑借客慵。南浦潮平分賸水。堂前池與北

山路近得青松。近栽北山松百本怪翁歸意何能緩。  
 新築高臺見臥龍。園中不見山因積土作臺遂見蔣山

徐敦立相過

茆齋一曲傍寒灣。邂逅終年伴我閑。契闊易驚成歲月。  
 追尋空復對江山。暫留客枕聽疎雨。時久旱遙想  
 吾廬掩舊關。落莫歸心誰與話。坐談聊爲起衰顏。

同敦立游蔣山謁寶公塔王荆公墓晚過草堂寺周頤故宅也



我居在城府。再至俄二年。豈無山水心。可奈簿領纏。今晨偶乘興。適此賓從賢。零雨洗驕陽。谷中聽流泉。憑高快遠覽。正見江浮天。至人本無心。與我常周旋。誰云喚不應。汝意自不虔。余自到鎮每雨曷祈寶公塔未嘗不應 麥隴稍已滋。橫水漲微連。佳城倚華表。拱木埋貂蟬。暮過草堂寺。借榻聊暫眠。不復聞怨鶴。荒茆但連延。歸路踐落日。羣峯鬱相先。回風送遠響。虛里生晚煙。吾廬悵何許。東望良慨然。

用前韻送敦立

畏作親友別。況復非中年。身如三眠蠶。已老翻自纏。竭來守江關。從事寧獨賢。經年兩大入。燿火通甘泉。石林豈壺中。亦自有一天。采薇敢言勤。誰與歌勞旋。上書苦祈哀。傾寫志已虔。坐懷北山巖。未見西溪連。人言搏風鵬。不及翳葉蟬。共攬攜手客。可忘曲肱眠。首鼠信禿翁。胡爲尙遷延。子來幸暖熱。愧我一飯先。清詩似鳴玉。想見藍田煙。索去何乃遽。臨分重依然。

爲山亭晚臥

瘦石聊吾伴。遙山更爾瞻。泉聲分寂歷。草色借廉纖。玉粒時能飽。霜毛日更添。平生疎懶意。況與病相兼。

戲方仁聲四絕句

戲弄扁舟泊宅村。卻尋三徑築茆敦。雲邊此意真誰解。賸作新詩與細論。水檻新開似浣花。傍溪須更作浮槎。祗應屢費王宏酒。時要清樽對落霞。



不惜囊錢信手空。荒田卻擬望年豐。天公可是憐風月。判遣詩人一例窮。  
盧橘楊梅已及時。我歸先自有前期。平生不作宣明面。浪愧將軍建鼓旗。

仁聲舊居城東泊宅村。張志和嘗所游也。今徙西溪。作雲茆菴。因東岡爲小亭。號茆敦。欲傍溪開水檻。久無資。會郡守有饋之酒五十壺。不敢飲。亟易之。乃克成。有田數十畝。常苦下潦。余居石林。與雲茆南北正相望。故及之云。



# 橫浦詩鈔

張九成字子韶。開封人。徙居錢塘。從學于龜山。紹興二年。策進士。直言者置高等。九成遂擢首選。授鎮東軍僉判。歷至刑部侍郎。秦檜和議不合。謫邵州。復以傾附趙鼎落職。高宗特予宮觀。先是徑山僧宗杲與善。檜諷論其與宗杲謗訕。謫南安軍。十四年。從學者稱橫浦先生。每執書就明。倚立庭磚。歲久雙趺隱然。寶慶初。贈太師崇國公。諡文忠。九成于經學頗多訓解。然習于異學。故議論多偏。詩亦多禪悅空悟習氣。

## 癸亥初到嶺下寄汪聖錫

人物苦難得。閉眼不敢看。孤芳擢荒穢。秀色出榛菅。懷我同心友。正在天一端。文字妙入聖。操履到所難。美玉經三煨。貞松過凝寒。憐我竄庾嶺。色慘顏不歡。書來每慰薦。苦語餘辛酸。不上泰山頂。安知天地寬。相思暮煙起。片月過前灘。

## 食苦筍

吾鄉苦筍佳。出處惟石屋。玉肌膩新酥。黃衣綠深綠。林深恐人知。頭角互出縮。煙雨養春姿。此物未成熟。三月臘酒香。開罇媚幽獨。烹庖入盤俎。點醬真味足。未須五鼎牛。聊稱一囊粟。竭來庾嶺下。歲月去何速。



經冬又七春。未分窮途哭。今朝好事者。惠我生一束。頭髮甲爛斑。味惡韻麗俗。兒童不慣嘗。噦噦驚媪僕。老妻念鄉味。放箸淚盈目。丈夫志有在。何事校口腹。呼奴更傾酒。一笑風生谷。

有客

春雨止復作。閉門無與居。童奴告予言。有客叩吾廬。束帶出見之。頎然一丈夫。手攜一尊酒。辭氣何晏如。謂言久聞名。曾未瞻簪裙。天寒宜飲酒。一盃聊以娛。盤殮亦草草。蔬果間溪魚。顏色溫勝玉。言談貫如珠。豈期有道者。而來警我愚。酒酣意兩適。心閒樂有餘。四海元有人。君勿輕荒區。

三月晦到大庾

我登超然臺。積雨久不止。臺下柳成行。柳下滿塘水。環塘率喬木。照影弄清泚。恍如在故鄉。西湖古寺裏。氣象極幽深。景物盡蒼翠。十年勞夢想。一夕居眼底。獨坐不能去。頽然起深思。鐘鳴主人歸。燭光何燁燁。笑語復移時。夜久余當起。歸路夫何如。江聲寒玉碎。

庚午正月七夜自詠

余性寡所諧。平生惟自得。談名頸深縮。論利面作赤。文不貴雕蟲。詩尤惡鈎擗。麗豪真所畏。機巧非予匹。所以常閉門。千載求知識。黃卷有可人。爲之忘寢食。亦復愛山水。策杖無與適。看雲獨忘歸。聽泉常永日。內樂萬事休。中虛衆妙入。欲以語斯人。此事吾無力。道喪亦久矣。無言三歎息。



課書

汲汲我何事。愛此牕日光。北門終日開。風透軒檻涼。貧病何以療。六經真古方。榮辱頓爾失。太山亦毫芒。呼兒來讀書。絃誦驚滿堂。仕途有捷徑。掩口笑我狂。

辛未閏四月卽事

閒居喜無事。冠櫛每晨興。今朝鳩喚夢。疑是大雨徵。萬事雖顛沛。此兆常可憑。須臾到江湖。一掃蠻瘴腥。雨罷有何好。環江數峯青。蛟龍得時橫。長堤豁然崩。衰老甘寢寐。半夜聞雷聲。連岡萬株松。漂零一毛輕。雨意疑未已。浮浮晚雲蒸。咄哉造化兒。徒勞竟何成。

窮居不擇交。賢否那復辨。似人輒已喜。況復曾半面。相見且寒溫。不問風雨變。晚來無與遊。澄江喜如練。攜筇信步行。屈曲隨山轉。數日雨不止。衝波頽激箭。舊雨已不來。今雨誰復見。甕頭香滿屋。吾計今已辦。豈復思故鄉。無事且彊飯。

相馬須相骨。探水須探源。君如識此理。知人若神仙。可以千歲下。坐照萬古前。有時陰求人。得意初無言。如聞失一士。每食不下咽。人才何其尠。求一於百千。豈獨今世歟。自古皆已然。我欲授此法。其誰可與傳。

十九日雜興

不是南方熱。愛此有永日。人事斷經過。蕭然空一室。風驚牕外竹。聲如清廟瑟。西塘荷已花。北戶棗亦實。



仕途非所長。進寸輒退尺。所以入市朝。愁苦甘首疾。謫來已九年。底事無憂色。山林興甚長。湖海情何極。物理情不齊。人生各有好。所好儻不獲。亦各騁奇巧。淺者不及門。深者入堂奧。名利工欺人。市朝徒膠膠。所得無幾何。舌焦唇亦燥。其間狹劣者。不售輒復躁。亦有操金珠。侯門致私禱。葡萄得涼州。所求輒復効。舐痔或嘗糞。車服夸新好。吾唯戒妻奴。酒熟宜予告。

和施彥執懷姚進道葉先覺韻

西湖十里山。春風一盃酒。茲興良不淺。何日落吾手。我讀君和詩。襟期一何厚。同生上下字。共閱古今宙。死生何足云。餘生付美酎。佩印還故鄉。衣錦眩春晝。一時正兒嬉。千歲墮塵垢。所以賢達人。中懷元有守。試看牕日中。野馬互奔驟。區區竟何成。尙誇舌在口。宿習猶未除。新詩漫懷舊。環顧天地間。四海惟三友。兩老雖未死。二妙已先踣。生者豈其巧。死者亦非謬。君如悟斯契。萬事可懷袖。銅錢自如山。金印自如斗。只今定何間。腐骨久已朽。籬菊師淵明。庭草悲王胄。彼已升層霄。此猶鑿戶牖。浩歌君其聆。相看都皓首。

子集弟奇江蟹

吾鄉十月間。海錯賤如土。尤思鹽白蟹。滿殼紅初吐。薦酒歛空尊。侑飯饑如虎。別來九年矣。食物那可睹。蠻烟瘴雨中。滋味更荼苦。池魚腥徹骨。江魚骨無數。每食輒嘔噦。無辭知罪罟。新年庚運通。此物登盤俎。先以供祖先。次以宴賓侶。其餘及妻子。咀嚼話江浦。骨滓不敢擲。念帶煙江雨。手足義可量。封寄無辭屢。



讀東坡謫居三適輒次其韻

旦起理髮

憶昔叨從班。入朝大明宮。五更催上馬。夢裏過萬松。想見天竺山。九重吟清風。頭垢不暇梳。爬搔常靡通。今來幸閒放。櫛比骨忽忽。清晨解條辮。千梳復重重。不羨列禦寇。散髮搖風鬢。氣舒兩目明。頓與離朱同。此樂豈易得。快意適相逢。再拜復再拜。深恩荷天公。

午窗坐睡

年老目飛花。心化柳生肘。萬事元一夢。古今復何有。六月苦夜短。午晝何其久。頽然北窗下。竹几休兩手。昏昏不復知。酣適如中酒。睡鄉日月長。椿靈未爲壽。形存若蟬蛻。質槁如木朽。榮辱漫紛紛。正夢那復受。有夢尙有思。無夢真無垢。欲呼李太白。醉眠成二叟。

夜臥濯足

夏日乏絺葛。冬來無衾裯。況復竄炎荒。令人生百憂。空城舞狐狸。深林鳴鴝鷓。此邦無足戀。聊爲薪水留。枯枝煮寒泉。大竈聲颼颼。老盆深注湯。徐以雙骹投。沃久意痛快。紮維今脫鞵。須臾膏液上。兩踝暖氣浮。生平苦寒痺。一洗皆已瘳。登山不須扶。跳梁逐狙猴。

秋興



秋意入茅屋。杖策登平原。落日含西山。一川頓明鮮。蕭蕭江上竹。溜溜巖下泉。我生本閒放。胡爲此拘拳。身世兩相違。於今六十年。勇退未爲怯。銳進豈其賢。

半夜驚夢回。桐葉紛索索。杖藜視天宇。雨罷雲收腳。清風拂襟裙。片月墮籬落。嗟我遊已倦。悵此久淹泊。豆畦今已花。稻壠行可穫。翻思黃卷中。古人誰可作。田園愛潛歸。簞瓢識顏樂。譬彼鷓鴣心。平生在叢薄。過報恩

籃輿訪蕭寺。烟暝漲春空。遠樹樓頭綠。殘霞山外紅。昏鐘發林杪。人語殷橋東。回首都無迹。人生真夢中。三月晦城門晚景

雨漲春江浪。汙汙日夜奔。羣山落雲裏。萬壑吼巖根。沙際人呼渡。煙中牧入村。蕭然何處士。終日揜柴門。題竹軒

聽說竹軒趣。清幽盡此房。春禽一聲杳。夏簟五更涼。落雪鳴寒玉。啼螿泣古簧。因君詩意到。欲罷不能忘。二月二十四日卽事

春來尋勝事。此興亦何窮。夜雨亂江淥。朝花退日紅。雷聲驚嶺北。雲氣漲溪東。蓑笠衝泥去。誰知與我同。卽事

幽事晚山色。幽齋春雨餘。亂紅欹澗水。浮綠漲郊墟。北牖迸新筍。西園生野蔬。槿籬遶茅屋。已分老樵漁。



三月二十四日出城

數日雨不止。今晨晴已還。江頭看濁浪。牕外見青山。白鷺投前浦。輕舟漾遠灘。罇中有餘酒。一酌注頰顏。

次施彥執韻

新詩宛見故人面。思入江山氣象雄。幾歲不堪青草瘴。今朝還喜鯉魚風。高秋木落雁爲伴。久雨江深吾欲東。他日罇前如把臂。莫驚我已白頭翁。

客有談嘉祐間事者。一客瞪目不應。及聞介甫新事。則心目開明。殊可怪也。聊作詩以紀之。吾道何衰只愴神。六經文字變儀秦。魏侯酷喜聽新樂。中尉生來好殺人。海鳥錯將金奏眩。葉公元愛畫龍真。不逢伯樂休驥首。忽遇長沮莫問津。

次單推韻

七載離家夢亦驚。春來又是聽倉庚。熟諳世味心如水。忽見吾人眼尙明。青鏡不堪看白髮。長鑱何處覓黃精。只思歸去西湖上。飽喫東坡玉糝羹。

十二月初七日述懷

謫居寂寞歲將闌。几案凝塵酒盞乾。落落雨聲簷外過。愔愔雪意座中寒。孤飛隻影人誰念。萬里長途心自安。世事悠悠君莫問。雪芽初碾試嘗看。







# 浮溪集鈔

汪藻字彥章。德興人。入太學。登進士。歷江西提舉。徽宗製君臣慶會閣詩。藻所和。羣臣莫及。傳稱於時。時胡仲亦以文名人。爲語曰。江左二寶。胡仲汪藻。遷著作郎。忤王黼。與祠寓晉陵八年。欽宗遷起居室。人高宗歷擢中書給事侍講。直學士院。一時詔令多出其手。拜翰林學士。以所御白團扇。親書紫誥。仍兼綰黃麻似六經十字以賜。除龍圖閣。奏纂三朝日曆。進顯謨閣學士。知徽州。論落職。居永州。卒。在晉陵時。徐俯洪炎洪芻自負無所屈。見藻詩於僧壁。喟曰。我輩人也。詣舍上謁而去。藻歎曰。撚鬚琢句。騷人墨客。不平之鳴耳。烏足尙哉。詩高華有骨。興寄深遠。有浮溪集六十卷。失傳。此選本文粹所存也。

## 桃源行

祖龍門外神傳壁。方士猶言仙可得。東行欲與羨門親。咫尺蓬萊滄海隔。那知平地有青春。只屬尋常避世人。關中日月空萬古。花下山川長一身。中原別後無消息。聞說胡塵因感昔。誰教晉鼎判東西。卻愧秦城限南北。人間萬事愈可憐。此地當時亦偶然。何事區區漢天子。種桃辛苦望長年。

## 過吳明叟新居

誰開大屋沉沉者。門外垂楊拂車馬。主人四十持節歸。高臥綠陰啼鳥下。冥冥一徑傍花入。忽有青池照



深夏魚吹落日知鏡淨。荷受微風看珠瀉。夫君少有湖海氣。欲駟馬鯨無地跨。故將能事驚世人。坐向雲端差萬瓦。稍培幽桂出窗底。時放青山來竹罅。人言此興極不淺。天遣公忙那肯赦。要須更作輞川圖。他日思歸聊對畫。

同張昌時宿高明寺

幽臥不知覺。窗懸寒日初。矧伊夜來雨。豁聲到吾廬。故人挽我出。忽枉天際書。躋險敢自休。青山轉籃輿。相逢竹間寺。共擷園中蔬。殘僧誰在亡。奄忽十載餘。茗果話疇昔。新晴報鐘魚。東雷亦已鳴。百草茗穎舒。奈何與之子。齒髮日夜疎。眷此不能發。牽衣更踟蹰。明朝各回首。世事將焉如。

次高郵軍

小雨靜林麓。鶉鴉相應鳴。移舟漾清深。薄晚荷氣生。歸鳥盡雙去。潛魚時一驚。菰蒲若無人。渺渺炊煙橫。艇子檝迎我。攜魚薦南烹。月出殊未高。疎林隱微明。依沒會有處。斗掛天邊城。

阻風雨辟邪渡寄王仲成

渡頭急雨鳴森木。木杪顛風飛大屋。沒腰寒水稻生芽。滿眼青泥車折軸。山行值雨舟值風。窮愁日日煩天公。不如歸臥澗壑底。世事不埽春煙空。別君兩年重此別。喜君曾次渾冰雪。擬將身作賈胡留。無奈事如空鳥滅。挽我不回君怒嗔。交情把玩轉清新。相隨百里還相見。只有西山似故人。



避地函亭野步

今日幸無雨。天空出遙岑。行行不知疲。遂至春江潯。汲路轉籬落。人家在桑陰。平疇漲清波。隴麥如人深。溝畎戲鳧鷖。新蒲映浮沉。我生本樵漁。對此諧初心。風物豈不好。悲來自難任。胡塵暗中原。四海如驚禽。黃屋狩萬里。兩宮隔辰參。龍移螻蛄窺。月晦蟾蜍侵。宇宙有傾覆。茲游豈嘔歎。銷憂賴濁醪。太息誰能斟。

庚午歲屏居零陵七月二十日以門揜候蟲秋爲韻賦五首

幽人獨夜時。潮落西川根。渡口櫓聲急。一江煙雨昏。城頭短長更。不寐聽譙門。趺坐數千息。焚香待朝暾。暑退潦亦收。瀟湘淨如染。時觀自跳魚。衝破青琬琰。纖纖初弦月。不受薄雲揜。近村應漸寒。已有鴉數點。人生幾聰明。日夜隙駒驟。纔經花信風。又過麥秋候。吾非金石堅。與世相邂逅。胡爲聞鐘鳴。更歷路傍堠。家山在何許。渺渺彭蠡東。人來數月程。衣敝補道中。昨宵青燈花。似墜釵頭蟲。兒飢女沉綿。歲晚書未通。人言間閭者。一日如三秋。孤臣昔放逐。七見天星周。早洿高門地。姓名記前旒。如何天雞星。不照湘南州。

天星周一作  
寒暑周

次韻向君受感秋

且欲相隨苜蓿盤。不須多問沐猴冠。菊花有意浮杯酒。桐葉無聲下井欄。千里江山漁笛晚。十年燈火客氈寒。男兒幾許功名事。華髮催人不少寬。



向侯拄笏意千里。肯爲俗彈頭上冠。何時盛之青瑣闥。妙語付以烏絲欄。日邊人去鴈行斷。江上秋高楓葉寒。向來叔度儻公是。一見使我窮愁寬。

晚發吳城山

風掃陽侯雪陣平。雨催摩詰畫圖成。氣吞浦溆重林盡。秋著江湖去鳥明。厚祿故人無一字。長年三老伴餘生。會須滿意開懷抱。到眼廬山不世情。

過臨平

一別九霄路。風煙長滿衣。已成身老大。無復世輕肥。天闊鳥雙下。山寒人獨歸。曉來何似雨。春水半巖扉。睡起涼生岸。鈎簾坐小窗。麥風能起柁。梅雨不鳴江。往事心長折。歸途影自雙。依然蒲柳地。人老故先降。

書寧川驛壁

過眼空花一餉休。坐狂猶得佐名州。雖遭瀧吏嗤韓子。卻喜溪神識柳侯。盡日野田行穉耜。有時雲嶠聽鈎輅。會將新濯滄浪足。踏遍千巖萬壑秋。

宿鄴侯鎮

當時踏月此長亭。髻似河堤柳色青。今日重來堤樹老。一簪華髮戴寒星。微涼初破候蟲秋。露草螢光已不流。搔首與誰論往事。星河無語下城頭。



龜山上方

度險逢幽處。憑誰寫壯懷。連薨棲絕壁。孤塔表長淮。地本吳楓接。山今禹績皆。潮聲從殷寺。竹影自翻塔。木杪朱欄出。城垣雪浪埋。乾坤迷枉渚。霧雨泄陰崖。丹葉經寒在。蒼洲向晚佳。魚龍宵聽喚。猿鳥晝窺齋。月滿蟻珠寶。霜清磬石諧。僧盂收柏子。樵徑埽松欒。左宦書無鴈。南烹菜有鮭。風煙欺短髮。雲水信殘骸。竟作何鄉老。虛慚素尚乖。江湖今在眼。歸合辦青鞋。

醉別季高侍郎

疇昔追隨翰墨場。功名今日愧劉郎。英姿合上凌煙閣。巧譖曾遭偃月堂。雙槳又乘清夜去。一樽聊發少年狂。歸來卻共燈花語。騎省看成滿鏡霜。

漫興

晨起翛然曳杖行。一簾疎雨作秋清。老來歲月能多少。看得栽花結子成。燕子年年入戶飛。向人無是亦無非。來春強健還相見。送汝將雛又一歸。

北窗

睡起無一事。怡然盼庭柯。綠陰微缺處。最得南颺多。

己酉亂後寄常州使君姪



汾水遊仍遠。瑤池宴未歸。航遷新廟主。矢及近臣衣。胡馬窺天塹。邊烽斷日畿。百年還海地。回首忽成非。

古鏡行

我有辟邪鏡。得之咸陽宮。其陰爲天地。一母將九龍。旁書負圖字。土蝕如旋蟲。緘以駁雞珍。妙極倕之工。請言照遠近。十里秋毫空。豈不鑒脂澤。所貴肝膽通。問誰爲此器。太古非人功。客聞重歎息。意欲窺靈蹤。高臺不辭倚。恐客難稱容。繩窮匣半啓。四室來悲風。日車當晝留。羞澁如頑銅。森然髮上指。凜若臨霜鋒。我還撫客手。此豈世寶同。揮淚兩無言。掩鏡鞶囊中。

蔡天任韻

脩廊過午夕。陰合蝴蝶滿。庭春草長。呼兒更捲簾數尺。要放晚晴升屋梁。



# 香溪集鈔

范浚字茂明。婺之蘭江人。紹興中舉賢良方正。昆弟多居膺仕。竟以秦檜當國。抗節不起。隱於香溪。因稱香溪先生。著書明道。多本於經學。朱子取其心箴於孟子集註中。繇是重於儒林。金仁山謂其集近亡。此本爲其從子元卿所輯。而陳巖肖弁序者。爲香溪集。

## 雜興五首

雉驕有擅澤。雞雄亦專栖。乘人肆桀傲。未異雉與雞。虛張盡客氣。不知墮危機。雉驕或登俎。雞雄亦爲犧。嗟爾桀傲子。不戒將安之。

荆梟昔見惡。去楚將巢吳。妖音不知革。吳豈荆人殊。梟能戒頰舌。勿復輕嗚呼。雖荆亦容爾。何必他邦居。高蟬蔭嘉木。未省螗斧危。勇蟲亦何愚。不顧黃雀飢。癡癡挾彈子。已復露霑衣。世事無不然。古今同一悲。鵲噪得歡喜。烏鳴得憎嗔。烏鵲自有口。噪鳴何預人。烏飛聲啞啞。鵲飛聲嘖嘖。凡鳥從紛紛。未用置肝鬲。彭亨著冠猪。踉蹌上車鶴。皇家一清明。此輩束高閣。龍夔雜鷓鷯。庶位已參錯。少安真可待。四海得耕鑿。我亦幸豐年。從容一丘壑。

## 題八馬圖



何年畫工搨毛錐。貌此八馬姿權奇。青絲絡頭十二蹄。調柔意態行愉怡。五馬放浪無維羈。或齧或望仍迴嘶。一牧牽鞵一牧騎。製度髣髴唐巾衣。不知此馬生何時。昔周穆王遠遊嬉。駕跨八駿驅東西。高升崑崙躡瑤池。騶駼驥義勞飛馳。日走萬里無停駢。興元唐家危累基。百卷僅脫朱泚圍。黃屋進狩懷光追。八馬入谷七馬疲。筋攣肉綻行人悲。兩者資世皆顛羸。虛名何有千載垂。空得傳記流歌詩。未知此馬閒猶夷。牧堦不受鞭箠威。不踣險遠安無危。泉甘草薦足自肥。安用號駿稱雲騅。嗟哉畫意誰能知。

送春曲

春光春光勸汝一杯酒。我能爲春作高歌。未解春能聽歌否。春歸有底急。落盡桃花紅。園溪漠漠野陰靜。兔葵燕麥空搖風。風光幾何時。背我忽如客。殘絲欲斷感春心。語燕勞勞上簾額。我有惜芳意。一春憐物華。春來雪裏索梅笑。春去悵望飛楊花。春歸知復來。奈此斷年別。搖楊三月暮。天愁鶻鴂一聲芳草歇。歌竟我亦醉。一棹觥船空。明年待春花樹下。放歌擎酒相迎逢。

同伯通端杲姪效盧全體

一春癡癖門長扃。兩耳不聞鶻鴂聲。不知東南風。掃盡紅紫英。行行點檢桃李徑。但見樹子青冥冥。門前水流渠。照灼須眉清。科斗遊其間。腳股各已生。渠旁草鬱鬱。草底蚯蚓鳴。韻如抽繭絲。幽咽得我聽。念此瑣細物。隨時變音形。黃河赤鯉或點額。老驥寒默長羈纓。嗟嗟世路真難行。



六笑

我笑支道林。遠移買山書。巢由古達士。不聞買山居。我笑賀知章。欲乞鑑湖水。嚴陵釣清江。何曾問天子。我笑陶靖節。自祭真忘情。胡爲托青鳥。乃欲長年齡。我笑王無功。琴外無所欲。當其戀五斗。乃獨不知足。我笑杜子美。夙昔具扁舟。老大意轉拙。欲伴習池遊。我笑韓退之。不取萬乘相。三黜竟不去。觸事得讒謗。客言莫謾笑。古人笑人未必不受噴。螳螂襲蟬雀在後。只恐有人還笑君。迴頭生愧不能語。嘲評去從今吞不吐。譽堯非桀亦何爲。訕周譏禹終無取。

讀楊子雲傳

老不曉事楊子雲。綴文譏訶堅逐貧。班生曲筆甚假借。謂不成戚元非真。草玄欲作後人計。投閣自迷身不利。王涯筮中好其書。寧復逆知甘露事。蠅聲紫色欺昏童。義士遠引如冥鴻。胡爲顛眩尙執戟。美新屈首稱臣雄。嶧山沃野蹲鴟大。拓落不歸良已過。近危竟似井眉瓶。虛作反騷嗤楚些。詭情懷祿遭嘲評。但用筆墨垂聲名。文章要亦千古事。久矣法言今正行。

讀王建射虎行

我讀射虎行。感慨興長歎。官差射虎得虎難。山下遠立常空還。惜留猛虎著山裏。射殺願恐終身閒。有如邊將圖偷安。遵養時晦容其姦。翻愁努力盡高鳥。良弓挂壁無由彎。君不見劉臣容高千里。留賊自資媒。



富貴恐賊盡誅身不利。坐令屈律裹頭人。橫暴九州狂螫噬。嗟嗟忠臣心不移。受刀摩頸甘如飴。紛紛血刃勇不顧。一死未謝君王知。官軍壯志吞蠻夷。匈奴不滅寧家爲。相公誓欲平淮西。慨言賊在歸無期。霍公裴公今已矣。我吟射虎徒歎歎。

理喻

郵亭羈客寒無氈。夜懷家山情惘然。燈前坐感雨蕭瑟。浩歎達曉愁無眠。鄰翁不出蓬茨裏。聽雨聽風心似水。黃昏鼻息已雷鳴。往往簷喧不經耳。愁霖一種聲紛紛。鄰翁不聞羈客聞。是中轉物有妙理。起予暗契漆園旨。

凌霄花

栽松待成陰。種漆擬作器。人皆笑艱拙。往往後得利。君看植凌霄。百尺蔓柔翠。新花鬱煌煌。照日吐妍媚。風霜忽搖落。大木亦彫瘁。視爾託根生。枯莖無殘蒂。先榮疾蕭瑟。物理固難恃。凌霄亟芳華。衰歇亦容易。寄題鄭亨仲可友亭

鄭君坐交窮。結柳窮不去。無朋長獨立。老大荒村住。荒村掃人迹。取友惟西山。當應愛山標。可望不可攀。牽蘿架風亭。截嶭揖高調。修簷入危碧。阮眼坐相照。嗟今輕薄子。對面生九疑。寧如友真山。貞質終無移。憐君意超超。愧我勞匆匆。未共結交心。漫負心脾骨。



暮春病起絕句

老去長閒百不營。推書習靜更眞清。西窗日腳籬篩動。時有飛蟲撲紙聲。

浦江華藏寺如勝上人欲募施者開田佐僧供以長老皎公書來求予詩作二十韻奉勉

浮圖謝朋親。屏跡藏岩幽。多規脫徭賦。豈必皆禪流。自言佛遺經。墾土爲愆尤。不耕徒穀腹。何異鼠雀偷。告之勿浮食。當須力鉏耰。前修舉鋤事。千載垂風猷。奈何啞羊僧。百語不領頭。皎公老禪伯。雅慕吾孔周。其徒有如勝。用意非常儔。欲開千畦田。更辦兩具牛。率彼枯木衆。躬耕食其秋。釋門有添丁。乃翁坐無憂。與國助耘耔。疲忙庶其瘳。此志良足嘉。感之歎綢繆。昔聞白黑衆。十萬俱清修。鳩金置千畝。給供無時休。于今豈無人。勝也當尋求。長途觸隆冬。一衲寒颼颼。朱門立雪久。歎喜無生愁。作詩勸勇往。以俟歲晚收。

三月二十六日夜同端臣端杲姪觀異書効李長吉體

楊花亂落青春暮。燕拂簾旌傍人語。縹壺買酒洗春愁。迴風落日簷花舞。赫蹏斷爛千載書。青燈照字驚蟬魚。冬烘老生時自哂。安用盤盂學田蚡。

狂泉

昔有大荒國。水以狂泉名。國人皆飲泉。狂顛率無寧。一者自穿汲。乃獨能常醒。國人旣皆狂。反見不狂驚。顧謂不狂人。無乃鬼物憑。不然是狂疾。救療當痊輕。施針灼炷艾。膚肉無全平。而彼不狂者。被虐楚不勝。



賁然走泉所。酌飲不敢停。既飲卽亦狂。萬慮皆迷冥。其狂與衆一。衆始歡相傾。世事今亦然。嗟哉感詩鳴。安得跨鵬背。獨往遊天溟。寄謝彼狂子。酌泉吾不能。

次韻茂永兄首夏新晴

燕落雨知節。鳩鳴天欲晴。行雲飛斷碧。斜日漏微明。筍上竹三徑。苗肥田一成。野人知得飽。索酒坐班荆。

頌茂安兄秀野亭

山作屏風雲作籬。峇嶢亭子俯漣漪。絕知此地風光好。直爲主人心跡奇。側塞亂花紅被徑。檀欒高竹翠緣陂。惠連自喜陪幽賞。判卻歸時倒接巵。

歲暮喜晴

晴山喜見曉幘旣。笑出蓬門不暇冠。風掃斷雲齊萬弩。日融殘雪上三竿。早黃楊柳漏春信。晚翠枇杷凌歲寒。從此林芳入幽賞。凍醪新壓味甘酸。

課畦丁灌園

連筒隔竹度流泉。約束畦丁灌小園。拔薤自須還種白。刈葵輒莫苦傷根。瓜疇准擬狸頭大。草徑隄防馬齒繁。努力荷鋤當給酒。無令菜把乏朝昏。

春雪晚晴出西村



步履尋春犯雪泥。村南村北鶉鳩啼。墮梅殘白猶明樹。着柳暗黃初映堤。風景快晴雪擘絮。江天未暮日懸規。最憐碧漲侵沙尾。更傍橫橋一杖藜。

送周西美主簿之任祁門

君向祁山去。修程幾日期。江天梅子雨。驛路橘花時。知迫循陔養。寧辭糾邑卑。美才無不適。鸞翮豈棲遲。

次韻端臣姪七夕

萬古東西隔女牛。停梭期會豈悠悠。蝦蟆輪破青天暮。烏鵲橋橫碧漢秋。莫放癡兒懽徹曙。且容老子強登樓。舉瓢更取天漿酌。一洗胸中萬斛愁。

張生夜載酒相過

夜卷一鈎簾。衣寒覺露霑。未驚風割面。且看月磨鎌。玉碗鵝兒酒。花甌虎子鹽。張公雞黍舊。歡笑了無嫌。



國家圖書館



000797769